

XL

5.9.105

~~151~~ 5.D.9.

P. M. Savella
No. 6273.

EXPLICATIO
GENTILIUM
FABULARUM
ET
SUPERSTITIONUM,
QUARUM
IN SACRIS SCRIPTURIS
FIT MENTIO;

Vario hinc inde sensu, præter
literalem, ut

ALLEGORICO, MORALI, ANAGOGICO &c.
EXORNATA

Per

R. P. CASPARUM HARTZHEIM

Societatis JESU Sacerdotem.



PATAVII Typis Seminarii MDCCXXXI.

Apud Joannem Manfrè.

SUPERIORUM PERMISSU, & PRIVILEGIO. 5





P R Æ F A T I O

AD LECTOREM BENEVOLUM.



Quanta sit sacrarum profunditas
Literarum, quæ in illis lateat
altitudo sapientiæ, ostendit S.
Augustinus Epist. 3. ad Volusia-
num; & quamvis ipse in earum scientia
fuerit versatissimus, ingenue tamen de
se fatetur: *Ego in S. Scripturis multo
plura nescio, quam scio.* Est enim S.
Scriptura encyclopædia quædam, cu-
jus perfecta intelligentia sine omnium
pene aliarum scientiarum notitia vix
potest comparari; quare easdem scien-
tias volunt SS. Bibliorum interpretes
denotari per Ancillas istas, quas ait
Salomon a Sapientia missas esse, ut *Proverb.
c. 9. v. 3.*
invitarent homines ad mensam propo-
sitam, id est Scripturam intelligendam,
ut explicat Venerabilis Beda. Ne ta-
men ab ejusdem lectione terrentur
fidelium animi, & de illius intelligen-
tia desperarent, caverunt summo-
pere SS. Patres, aliique innumeri, non
tantum de suo in sacris Literis pro-
fectu, sed etiam proximorum solici-

P R Æ F A T I O .

ti . Collegerunt eum in finem speciales quasdam ex sacris Bibliis materias , quas explanarunt clarius , & longius deduxerunt ; ut si quid legenti aut non perspicuum fatis , aut intellectu difficile occurreret , rescire ex iis facile posset , & sibi satisfacere .

Sic fuerunt , qui ex quatuor Evangeliiis collegerunt parabolas , ut Salmeron ; similitudines selectas ex tota Scriptura , Alardus Aemstelredamus ; fasciculum similitudinum , Carolus Tongelli ; metaphoras , Petra sancta ; sylvam allegoriarum , Hieronymus Laureto ; Adagia sacra , Delrio . Conscripserunt nonnulli eorum nomina , qui sacras Literas scriptis suis illustrarunt ; ut Trithemius ; Bellarminus , Possevinus , Antesignanus S. Hieronymo in Prologo suo galeato , vel potius Eusebio . Reptilia ex Scripturis congregavit Bustamantius ; quæ ad naturalem spectant Philosophiam , Valesius ; Herbas , & arbores Levinus Lemnius ; gemmas & lapides pretiosos Franciscus Eveus , Alii in unam quasi mensam contulerunt pondera , mensuras , & nummos , quorum fit in Scripturis mentio ; ut

Ludo.

P R Æ F A T I O.

Ludovicus Alcasar, Tirinus, præeunte S. Epiphanio. Fuerunt, qui antilogias, seu textus in speciem contrarios conquiesierunt, ut Richardus Monachus Cluniacensis, Zephirinus Cumiramius, Tirinus noster tom. 2. Duce S. Augustino. Comportarunt nonnulli in unam quasi panopliam arma veritatis & iustitiæ, sive versus ex veteri, & novo Testamento ad expugnandam hæresin cum vitiis, & defendendam veræ fidei, & virtutum gloriam; ut Ignatius Godvvinus, & Antonius de Balinghem. Alii denique (ut plures omittam) in unam quasi aream nobis ob oculos collocarunt urbes, earum nomina, & loca, quæ in sacris Literis reperiuntur, cum explicatione aliqua; ut Adrichomius, Jacobus Bonfrerius, Duce S. Hieronymo, & eodem adhuc priore Eusebio.

Laudabili horum Patrum, & Interpretum Scripturæ exemplo, operæ pretium esset, si certæ ejusmodi materiæ ex Scripturis cum quadam Paraphrasi in unum quasi fasciculum redigerentur; præsertim si restaret materia, tali saltem forma ac methodo in unum Libellum hucusque forsan non

P R Æ F A T I O .

congesta ; qualis est complectens Gentilium superstitiones & fabulas , non qualescunque , sed quarum in Scripturis tantum fit mentio . Horum vero notitia non modo utilis & jucunda , sed etiam pene necessaria videtur , ut quis Scripturas perfecte comprehendat . *Quod si aliquis contradicat , exponat quomodo de communi opinione sit sumptum .* Vallis Titanorum in Libris Regum , Sirena , & Onocentauri in Isaia , Arcturus , & Orion , & Pleiades in Job , & cetera his similia : qua utique vocabula gentilium fabularum & causas , & originem habent . S. Hieronymus in Epist. ad Galat. cap. 3. sub initium . Quam frequens in sacris Literis mentio Luco- rum , Excelsorum , Altarium , Templorum , rituum , ceremoniarum , Sacrificiorum , & Deorum Gentilium ! horum omnium notitiam certo juvat habere in Compendio . Et hanc præsens dabit Opusculum , quod (ut insinuatum est antea) literalis sensui alios subinde sensus adjunctos habet : ut ex tenebrarum collatione almæ ac veræ Lucis utilitas , suavitas , ac necessitas magis elucescat .

Quare , mi Lector benevole , si quidem

P R Æ F A T I O.

dem lectione Sacrarum Scripturarum ,
& intelligentia afficiaris , spero , gra-
tum tibi fore hoc Opusculum . Mihi
suffecerit obsequium tibi præstitisse , &
in tanta Authorum S. Scripturam il-
lustrare conantium copia , ad eundem
finem ex umbra saltem lucis aliquid
contulisse .

NOI REFORMATORI

Dello Studio di Padova.

HAvendo veduto per la fede di revisione, ed approvazione del P. F. Gio: Pellegrino Galassi Inquisitore di Padova, nel Libro intitolato *Explicatio Gemilium Fabularum, & Superstitionum, quarum in Sacris Scripturis fit mentio &c. per R. P. Casparum Hartzheim ex Societate JESU*, non v'esser cos' alcuna contro la Santa Fede Cattolica, e parimente per attestato del Segretario nostro, niente contro Principi, e buoni costumi, concedemo licenza a Gio: Manfredi Stampatore, che possi essere stampato, osservando gli ordini in materia di Stampe, e presentando le solite copie alle Pubbliche Librarie di Venezia, e di Padova.

Dat. 25. Giugno 1731.

(Carlo Ruzini Kav. Proc. Refor.

(Z. P.^o Pasqualigo Refor.

Agostino Gadaldini Segretario.

Die 28. Giugno 1731.

Registrato nel Magistrato Eccellentissimo degli Esecutori contro la Bestemmia.

Gio: Ricani Notajo.



LIB. GENESIS

CAP. XV.

*Ego Dominus, Qui eduxi te de Ur
Chaldaorum. Vers. 7.*



PYrolatriam, seu cultum
Ignis divinum fuisse an-
tiquissimum, & omni-
bus pene Gentibus fa-
miliarem, tam sacræ
quam profanæ tradunt
historiæ. Originem
suam a Chamo, vel
perversa ejusdem progenie videtur traxisse:
ita enim de eodem Lactantius: Hæc fuit
prima Gens, quæ Deum ignoravit, quo-
niam Princeps ejus & conditor cultum
Dei non accepit, maledictus a patre. Pri-
mogenitus Cham fuit Chus: (verba sunt
Gregorii Turonensis) hic totius artis ma-
gicæ, imbuentē Diabolo, & primus idolo-
latriæ

*L. 2. de
orig. erro-
rum c. 14.*

12 *Explicatio Fabularum,*

latriæ repertor -- stellæ & ignem de cælo
Gen. c. 10. labi magicis artibus mentiebatur. Porro
Chus genuit Nemrod; de quo ita canit Clau-
 dius Marius Victor Poeta Christianus:

*Moxque parum sano genitus de stemmate
 Nemrod;*

*Mole & mente gigas, Babylonis praditus
 aula,*

*Persarum capiens animos, venerator
 iniquus,*

Apuris sacris Domini traduxit ad ignem.

Fuit autem principium regni ejus Baby-
 lon Chaldaicarum Gentium caput; ut e-
 nim notat Adrichomius, Babylonæ paret,
 eique adhæret Chaldæa Arabiæ desertæ fi-
 nitima, cujus incolæ ab Arphaxad filio
 Sem orti fuere, & inde progenitores A-
 brahæ, qui, cum viverent commixti Ba-
 byloniis, superstitionem eorum pariter, &

Judith. c. 1. v. 6. *ceremonias patrum suorum, quæ in multi-
 tudine Deorum erant, didicere, incolentes
 urbem, vel regionem Ur dictam, a cultu*

Becman de ignis sic nominatam: Or enim vel Ur
orig. latin. Hebraice ignem, lucem aut splendorem
linguæ in significat; & inde videtur derivatum lati-
verbo uro. num verbum uro, & Græcum nomen $\pi\upsilon\rho$
 ablata enim litera π habes *vp*, quidni &
 Germanicum *Feur*?

Esdras sacerdos l. 2. testatur claris ver-
 bis, Abrahamum *de igne Chaldaorum* edu-
 ctum esse. An vero ex ipso igne ereptus
 sit,

fit, vel e patria aut urbe sic dicta oblatrariam ignis, eductus, incertum est. S. Augustinus, & Josephus Historicus, aliique ajunt, Abrahamum ideo persecutionem sustinuisse; quod nefariæ religioni avorum suorum, & divino ignis cultui consentire recusaverit; sed Dei adjutorio a persecutione illa liberatum, atque ita de Ur Chaldæorum eductum. Imo Judæorum est traditio secundum S. Hieronymum non improbabilis, illum a Chaldæis in ignem conjectum fuisse, sed divinæ manus beneficio ereptum. Nec mirum est tali zelo Chaldæos pro ignis cultu exarsisse. Gloriabantur enim, teste Suida, & Ruffino, ignem Deum suum invictum esse, qui ligneos, fictiles, æneosque gentium aliarum Deos consumeret; quæ tamen eorum gloria brevi in fumum & in auras evanuit; referunt enim paulo ante memorati scriptores, quod Canopi sacerdos hydriam aqua plenam simulacri aut idoli ad instar efformavit, & foraminibus hinc inde factis, sed cera obturatis, ita tamen ut dolus adverti non posset, Igni Chaldæorum Deo imposuerit, simulque, dum cera calore liquefacta ubertim aqua efflueret, omnem eorum gloriam cum igne extinxerit. Atque utinam omnis pariter superstitiosus ille cultus fuisset extinctus: non solum in Chaldæa mansit, & in Ægypto, quæ sub nomi-

ne

ne Seraphin ignem venerata est, & eundem ut immortalem in delubris servavit, teste Porphyrio, sed inde in orbem pene universum est propagatus. Medi, & Persæ maxima ignem religione coluerunt, & suo nomine Urismada appellarunt; cum solenni pompa eum circumferrent, trecenti & sexaginta quinque sacerdotes solebant præcedere, ut numerus diebus anni congrueret. Mexicanos ignem coluisse notat Herrera dec. 3. l. 2. c. 15. Sinas quoque, apud quos natum Zoroastrem volunt Persæ recentiores, ignem adorare, & injecti succini crematione colere peregrinatores narrant. Apud Dugbumos etiam, Benjamins Tudelensi memoratos, & in Asiæ Insulis Chenierag fuerunt adorantes ignem, in eumque se sponte sæpe (itidem ut apud Indos fieri solitum legimus) cultus & obsequii causa immittentes, seque vivos concremantes. Ut Phrygas, & Cappadocas præteream, in templo Gaditano Herculis ignem arsisse perpetuum tradit Silius l. 3. Idem factum in Templo Jovis Ammonis apud Arabas, qui statis singulorum dierum horis igni sacrificabant, seque ei devovebant, ut accurate refert R. Menachen Lanzano. Idem factum in Delphico templo Athenis, in templo Minervæ Poliadis, & in omnibus Græciæ urbibus, ut probatum a Causobono in Athenæum. Item in

Ætnæo

Ætnæo Vulcani Templo, & in Erycino Veneris, Auctore Æliano. Videtur igitur cultus ille serpsisse e Chaldæa in Persiam, e Persia in Græciam, e Græcia in Italiam. Virgilius Æneid. 2. ita canit de Ænea, qui Troja Romam venerat.

Sic ait: Et manibus Vittas, Vestamque potentem,

Æternumque adytis effert penetralibus ignem.

Certe Romani omni omnium Gentium & nationum potiti imperio, omnium pariter totius pene Orbis superstitionum facti participes, sub Vestæ nomine Ignem ut Numen suum sunt prosecuti. Sacerdotes ejus statuerunt Virgines aptas naturæ Dei, & convenientes ministras, quod non pariant, uti & ignis: hic enim hebraice Esch vocatur, quod romen ab Anachs suam ducit originem, eo quod res consumat; & hinc a quibusdam ignis ex particula in, & gigni componitur, quod nihil pariat. Quamvis contrarium videatur Platoni, qui a gignendo putat derivari: quod per illum vis detur potentiæ generativæ, & omnia fero tam ad naturam, quam ad artem spectantia ignis & caloris beneficio producantur. Cicero l. 2. de legibus ait: *Colende Vestæ virgines præfuisse, ut advigiletur facilius ad custodiam ignis, & sentiant mulieres in natura faminarum omnium Deum Castitatem pati.*

Non

Non ita pridem (ut refert Huetius) ignis perpetui servandi ritus exolevit apud Lithuanos , Samogitas , & Moscovitas , cum quibus olim per Armeniam & Iberiam ut hodieque commercia Persis esse potuerunt, cum præsertim celeberrimum in Caucaſo regionibus illis imminente Pyreum per multa sæcula inextinctum perseverarit . Id manere ad diem hunc affirmavit Teixeira, alii- que plures; sed falsum illud esse deprehendit Olearius oculatus testis , scriptor integerrimæ fidei . Sauromatas ignem venerari tradidit Nymphodorus in libro de barbaricis institutis , ut testatur Clemens Alexand. in Protreptico . Scribunt idem de Tartaris Guilielmus de Rubruquis , & Joannes Plancarpinius . A Gentibus istis borealibus transit eadem consuetudo ad Hibernos , apud quos Moniales Kindanenses ignem a multis annis vel potius sæculis servasse narrat Giraldus Cambrensis. Ignis Brigidæ vocabatur, quasi rei auctor pia virgo fuisset. Cœnobium ipsum dicebatur domus ignis . Verum ab Ethnicis traductum fuisse institutum, indicat Henrici Archi-Episcopi Dubliniensis factum, qui superstitionem hanc, ut pote profanam & Christiana pietate indignam abolevit . Quanquam & renovatam subinde ad Henricum VIII. perseverasse , sunt qui constanter affirmant , *Origo Pyrolatriæ prima communis est*

est omni superstitioni, vanitas, cæcitas & malitia humani generis, quæ omnis idololatriæ causa dispositiva est; completiva diabolus. Hinc ignoratio veri Dei, rerum naturalium sub sensu cadentium partim ob excellentiam admiratio, partim ob utilitatem maximam æstimatio; adeo ut vel ipsius Ciceronis testimonio a Physicis rebus bene atque utiliter inventis tracta fuerit ratio ad commentitios & fictos Deos. Jam vero quid ignis elemento utilius toti universo? quid jucundius? quid magis necessarium? quid prope divinius? Apud Maximum Tyrium Orat. 38. priscos Persas legimus censuisse ignem esse divinitatis simulacrum, quæ videtur Brachmanum quoque fuisse opinio. Porphyrius l. 2. Diis ignem immortalem servamus in templis, utpote qui sit ipsis quam simillimus. Democritus Deum vocabat mentem in igne orbiculari. Parmenides coronam continentem ardore lucis orbem, ad quem accedentes illuminentur, & accendantur. Zeno definivit naturam, ignem esse artificiosum ad gignendum progredientem, ut ait Cicero l. 2. de natura Deorum. Et quid mundus esset sine igne? nonne corpus exanime? Hinc Plotinus, & cum eo plures alii Vestam animam terræ esse voluerunt; Platonici vero *εἰς αὐτὴν* sive substantiam formarum separatarum, & rerum divinarum solidum fun-

damentum. Div. Dionysius lib. de cælesti Hierarch. cap. 15. ait: *Sanctissimi, qui de Deo locuti sunt viri summam illam, & nullis obnoxiam signis substantiam varie in igne describunt.* Lyranus censet ideo Deum in igne olim toties apparuisse, quod ignis non esset figurabilis. Sic Ovidius l. 6. fast. canit:

*Ignis inextinctus templo servatur in illo,
Effigiem nullam Vesta, nec ignis habet.*

Mirum proinde nemini videatur, creaturam tam excellentem ab Ethnicis, qui res multo viliores pro Diis habuere, quasi nomen fuisse habitam & adoratam.

Sunt, qui inventorem pyrolatriæ fuisse putent Prometheum; hic enim humanum figmentum igne de cælo rapto primus dicitur animasse. Verisimile est huic fabulæ ansam aliquam dedisse Abelis victimam, igne de cælo lapso inflammata: docet enim S. Hier. lib. tradit. sacrificium Abelis cælesti igne fuisse consumptum. Theodotion vertit: inflammavit Dominus super Abel. Dubium esse vix potest, si iustorum sacrificia subinde fuerint signo tam manifesto a Deo approbata; quin occasio aliqua data fuerit idololatriæ, ignem modo prorsus extraordinario ac stupendo operantem pro Deo agnoscendi & colendi. Quid? quod Dæmon nequissimus Divinitatis æmulator, & simulator callidissimus simile fere prodigium alicubi in sacrificiis.

eiis sibi oblatis ostentare sit solitus? ita tradit Solinus c. 11. de Sicilia. Nec longe inde (a lacu scilicet Agrigentino) collis est Vulcanius, in quo, qui rei divinæ operantur, ligna vitea super aras struunt; nec ignis apponitur in hanc congeriem, cum porricias intulerint, si adest Deus, sic sacrum probatur. Sarmenta licet viridia ignem sponte concipiunt, & nullo inflammante a litato Numine sit incendium, ubi epulantibus alludit flamma, quæ flexuosis excessibus vagabunda, quem contigerit, non adurit, nec aliud est, quam imago nuntia perfecti rite voti. Hæc Solinus.

Verisimile præterea est libros S. Scripturæ, Moyſis præsertim, in manus Ethnicorum venisse, & perperam intellectos occasionem erroris tribuisse. Justinus Martyr in sermone exhortatorio ad Gentes pluribus locis probat Platonem multa sumpsisse ex sacris literis, versatum in Ægypto fuisse, adjutumque scriptis Mosaicis, subinde caute locutum fuisse, & verba mutasse, ne accusaretur apud Atheniensem populum pro Moyſis discipulo. Hic Plato cum (ut credibile est) legerit in sacris literis, Deum toties in igne apparuisse, incideritque forsitan & in illum Scripturæ locum quo dicitur: *Dominus Deus tuus Deus, cui* *us ignis consumens est*, putavit Deum non

differre ab ignea substantia . Verba Justini refero : *Plato tanquam a superis decidisset , perlustrassetque diligenter omnia caelestia , summum Deum dicit esse in ignea substantia .* Idem fuit de Deo sensus Pla-

Cornel. a tonicatorum, qui Deum ita describunt : *Deus*
Lapid.in c. *est ignis primus vitifer, sive vitam cunctis*
12.ad Heb. *afferens, ex quo ignes syderei, id est stella*
& astra omniaque alia sunt genita.

In sensu literali certum est Deum non esse ignem aliquem materiale : hic enim longe turpior esset error, quam Jacobitarum, qui, dum legerent in Scriptura Baptismum Spiritu Sancto & igne conferendum, candente ferro baptizandorum frontibus putabant Crucis figuram esse inurendam . In sensu allegorico Deus Ignis est : *Sicut ab igne manat lux & calor, ita a Patre Filius & Spiritus Sanctus .* S. Damascenus lib. 1. fid. cap. 9. Et S. Augustinus : *Cum lux, splendor, calor una sit natura & individua substantia; vocabula vero diversa; constat profecto Patris & Filii & Spiritus Sancti unam naturam individuanque essentiam esse.* Tom. 9. Tractatu quinto. Deinde cum ignis Elementum sit primum & nobilissimum, purissimum, subtilissimum, efficacissimum, sublimissimum, celerrimum, lucidissimum, calidissimum, simplicissimum, omnino impassibile, omnia penetrans, & consumens,
in-

interminum , omnia igniens & sibi assimilians , proprietates Dei pulcherrime exprimit & proponit . &c.

LIB. GENESIS

C A P. XIV.

*Percusseruntque Raphaim in Astaroth
Carnaim.*

PER nomen Astaroth probabilius hic intelliguntur plura Syrorum & Palæstinorum Numina fæminei sexus : Hebræis enim Astaroth idem est , quod Deæ , Astarah , quod Dea 70. interpretes per Astarthen Deum , per Astarthas vero Deas volunt significari . Quæ sit vera nominis Astaroth Etymologia , non satis exploratum est . Derivant aliqui ab Athar , quod multiplicari significat ; Alii ab Ascher , quod idem est ac beare vel beari . Sed melius nonnullorum judicio videtur originem suam nomen Astaroth ab astris habere , ut Suidas ait : *Astarte a Grecis Aphrodite , a Latinis Venus dicitur , nomen ab astro factum est* . Testantur præterea veteres historici Herodotus lib. 3. Strabo lib. 15. Heliod. lib. 10. &c. Orientales Ethnices stellas imprimis fuisse veneratos

vel in se vel in simulacris quibusdam effi-
 ctas. Hinc Herodotus lib. 1. Astarthen
 five Astarah vocat ἀσπάρχην. Ælianus lib.
 10. de animal. cap. 17. ἀσπάρχην. Hierony-
 mus, Eusebius, Philastrius aliique Regi-
 nam Cæli; & cum Syrorum ac Palæsti-
 norum Deam tam Græci, quam Latini
 Dianam vocare soleant; videtur hic loci
 Luna potius indicari; confirmari id ipsum
 potest ex eo, quod additur: Carnaim e-
 nim bicornem significat, quod nomen A-
 stris applicatum nulli magis fideri, quam
 Lunæ est proprium. Adstipulatur huic sen-
 tentiæ Philo Bybliensis dicens; Ipsa vero
 Astarthe imposuit proprio capiti regni in-
 signe, Tauri caput, ut corniculatam vide-
 licet Lunam significaret; hinc & antiqui
 pictores Dianam cum lunula in capite so-
 lebant depingere. Putat quidem Rabbinus
 Elias Deabus Palæstinis obtigisse nomen
 suum ab urbibus, quod in his earum fie-
 rent Statuæ; sed verosimilius est, ait Ma-
 sius, urbem Astaroth ab hujus Numinis
 cultu fuisse nuncupatam, eo quod incolæ
 illius urbis speciali veneratione Lunam i-
 psam aut idolum Dianæ sint prosecuti. Est
 qui censet urbem Astaroth ideo vocari
 Carnaim, quod Dea illa coleretur in bi-
 corni vel bicolli loco. Denique Kircherus
 noster Syntag. q. in Pantheo Hebræor. pro-
 bat Astarthen fuisse magnam illam Deo-
 rum

rum matrem, quam Ægyptii Isidem, Archivi Io, Græci Cybelen nuncuparunt, idque ex iisdem sacris & effigie utriusque colligi posse asseverat. Verum, cum hæc omnia ejusdem testimonio solis conjecturis innitantur, nihil de iis certi potest affirmari.

G E N E S I S

C A P. XXXI. V. 19.

Rachel furata est Idola patris sui.

PRO Idolis Hebraice legitur Theraphim, quæ vox varie in Scripturis sumitur. Apud Oseam legitur; sine Ephod & sine Theraphim, id est, ut vertunt Septuaginta, sine sacerdotio & manifestationibus. Apud Ezechielem & Zachariam pro imaginibus cultus divini accipitur; hic vero proprie videtur Idola significare divinis affecta honoribus, vel potius ipsos Deos, quos Laban colebat, ut ex versiculo trigésimo præsentis Capitis pronum est colligere; in quo Laban de sublati Theraphim Jacobum increpans: *quare*, inquit, *furatus es Deos meos?* Non convenit inter Hebræorum Doctores (verba sunt Oleastri) quid significet dictio The-

raphim, quam Idola vertimus: hoc tamen certi de ista habemus, quod significet imagines hominum, quæ loquebantur, & consulentibus responsa dabant. Erant autem Idola illa (ut Hebræorum Rabbini tradunt, & ex eorum præcipuis Aben-Esra) literis quibusdam magicis insignita, & ad certas Astrorum positiones fabricata. Non improbabiliter docet Kircherus noster fuisse simulacra portatilia, siue parvas fictiles Statuas puerorum ad instar fasciis involutorum concinnatas, quas Larium ac Penatium loco quali Deos averruncos, non domi tantum colebant, sed etiam ex collo vel alia corporis parte suspensa gestabant non sine spe consilii & auxilii in rebus dubiis ac afflictis obtinendi. Serarius in lib. Jud. cap. 17. quæst. 5. ex Rabbino Eliezer modum describit, quo Theraphim præpararentur; adducebant hominem primogenitum, quem mactabant, eique caput abscindebant; cui sale & aromate condito inscribebant super auream laminam nomen immundi cujusdam spiritus, quod sub lingua ipsius supponebant, atque ita in pariete collocabant. Porro spiritus ille homines, accensis prius lucernis, se adorantes alloquebatur, non quid certo & clare respondendo, sed musitando aliquid Pythonum more. Videtur autem ideo Rachel patri suo Idola abstulisse.

lisse; ut Jacobo cum suis fugiente non haberet Laban, quos consuleret Deos de via, per quam fugissent; & simul etiam, ut peccandi materiam patri subtraheret. Quamquam S. Chrysostomus dicat, ideo Rachel abstulisse Theraphim, quod a puellari ætate per institutionem paternam cultui Idolorum assuevisset. Quartam causam Josephus addit lib. 1. antiquitatum: ut Rachel haberet, quo confugeret, veniam impetratura, si forte pater fugientes assequeretur.

Sensum Allegoricum hujus historię explicat S. Gregorius Magnus lib. 30. moral. super illa verba Jobi: *Clamorem extoris non audis*; ubi Jacobo Christum, & Racheli comparat Ecclesiam; Theraphim vero avaritiam, quæ Apostolo est *Idolorum servitus*: & ut Rachel Idola Laban subter Cameli stramenta jacere voluit, Jacob insuper in terram defodi, ut liberam omni superstitione haberet familiam; ita Christus omnem vitiorum latrunculam ex Ecclesia sua profligari voluit, ut illam sibi exhiberet gloriosam, non habentem maculam neque rugam.

*Ad Eph.
c. 5. v. 27.*

Porro non contentus Jacob omnes Deos alienos a domesticis suis postulasse, etiam si quæ Deorum ornamenta haberent, ut armillas, dextralia, corollas, in aures &c. extradi sibi jussit, ut omnem prorsus repe-

ten.

tendæ superstitionis occasionem e domo sua tolleret. *Dederunt ergo ei omnes Deos alienos, & inanes, quæ erant in auribus eorum.* Genes. cap. 35. vers. 4.

Apud multos olim Gentiles, Orientales præsertim, inter præcipua capitis ornamenta inanes erant. De iis scribit Plinius lib. 11. cap. 37. *Viris aurum gestare in auribus decus existimabatur.* Item in Procemio lib. 12. *Quæ autem ad ornamenta aurium gestabantur, inanes appellata sunt.* Solebunt etiam illis erat Principum, amicorum, imo & Deorum effigies annulis insculptas gestare in signum memoriæ, amoris & reverentiæ; ut refert Ulysses Aldrovandus lib. 1. de insectis ex Plutarcho lib. de superstitione. Videntur autem instar annulorum inanes quædam saltem fuisse. Taliū meminit in Pænulo Plautus ita ludens in Afros: *incedunt cum annulatis auribus.* Jam vero quid pronius pietati hominum, quam, quæ pulcra & pretiosa sunt, etiam superis offerre, & saltem in imagine applicare? quemadmodum ex adducto textu colligitur, inanes quæ ornamenta erant hominum; Diis etiam fuisse consecrata & appensa.

S. Augustinus quæst. cap. 12. super Genesin scribit: *Quæritur quare & inanes dederint, quæ si ornamenta erant, ad idololatriam non pertinebant; nisi quia intelli-*
gen-

gendum est, Phylacteria fuisse Deorum alienorum: nam Rebeccam a servo Abraha in-
 aures accepisse Scriptura testatur; quod non
 fieret, si eis in aures habere ornamenti gratia
 non liceret. Ergo illa in aures, qua cum
 idolis data sunt, idolorum Phylacteria fue-
 runt. Idem fere ait S. Chrysostomus ho-
 mil. in Genes. 35. Et dederunt Jacob Deos
 alienos: non enim erant sui; & in aures,
 qua erant in auribus eorum; forte enim hac
 signa erant istorum idolorum; ideo hac cum
 Diis offeruntur Jacobo. Sanchez in Caput
 44. Isaia putat in auribus iis insculptas fuisse
 Deorum imagines: tales enim in annulis
 aut etiam laminis e collo pendulis Gen-
 tiles ferebant. Sic videtur clarius explicari
 posse textus Osee, quo dicitur, ut Israel
 auferat adulteria sua de medio uberum
 suorum, laminam scilicet vel quid simile
 inter ubera, & supra cor positum, in quo
 cælata erant idola vel Deorum adulteria.

Cultus Deorum alienorum in sensu Tro-
 pologico sunt hæreses, uti censet S. Augu-
 stinus lib. de vera religione cap. 38. Ei-
 dem S. consentit Hieronymus in cap. 44.
 Isaia ita dicens: Est alius deterior cultus
 simulacrorum, quod phantasmata sua homi-
 nes colunt, & quidquid animo errante cum
 superbia vel timore cogitando imaginati
 sunt, religionis nomine observant. In aures
 ejusmodi Idolorum sunt elaborata ab hæ-
 resi-

28 *Explicatio Fabularum*,
refiarchis ad speciem veri, & desumpta ex
solo & puro, ut prætendunt, Dei verbo
argumenta, quorum specioso colore heu
nimium! eorum affectu dementantur.

G E N E S I S

CAP. XLI. V. 45.

*Dedit illi uxorem Aseneth filiam Putiphara
Sacerdotis Heliopoleos.*

Heliopolis idem est, quod Civitas So-
lis, inter quinque primarias civita-
tes Ægypti, de quibus Isaïæ cap. 19. di-
citur: *In die illa erunt quinque civitates in
terra Ægypti loquentes lingua Chanaan. Ci-
vitas Solis vocabitur una.* Specialiter no-
minatur: quia præ cæteris in omnem, su-
perstitionem videtur effusa, & Solis cultui
addicta. De eadem urbe Strabo ait lib.
17. *Heliopoli domos amplas vidimus, in
quibus Sacerdotes habitant; hanc perhibent
olim Sacerdotum habitationem fuisse; homi-
num Philosophia & Astronomia deditorum.*
De quorum primoribus verosimiliter lo-
cutus est Lactantius lib. 2. de orig. err.
cap. 14. *Omnium primi, qui Ægyptum oc-
cupaverunt, caelestia suspicere atque adorare
cœperunt, & quia neque domiciliis tegebantur*

tur propter aeris qualitatem, (nec enim ullis in ea regione nubibus subrexitur calum) cursus siderum & defectus notaverunt; dum ea sapius venerantes curiosius atque liberius intuerentur. Hinc ortum videtur quod Solem astrorum Principem Heliopoli præsertim summo cultu fuerint profecuti.

Pergit Strabo loco ante citato : Urbs aggeri magno imposita Solis templum habet & Mnevim bovem, qui in septo quodam nutritur, & ab Heliopolitanis pro Deo habetur. In ingressu fani est pavimentum, quod jugeri spatium adæquat quoad latitudinem, ter aut quater illud excedens quoad longitudinem; in qua Sphynxes lapideæ ad latera sunt positæ, vicens cubitis vel pluribus inter se distantes. Addit demum post plura Vestibula duos fuisse muros ad Templi altitudinem erectos, ab initio distantes paululum, sed inclinantes ad se paulatim, in eisque sculpturas fuisse ingentium simulacrorum certas bestias representantium; Crocodilum forsan, Ibin, felem aut accipitrem &c. quos in tanta veneratione habebant Ægyptii, ut Cicero dicat lib. 1. de nat. Deorum : *Ne fando quidem auditum est, Crocodilum, aut Ibin aut felem violatum ab Ægypto.*

Porro qualem vitam duxerint antiqui Sacerdotes Ægyptii, narrat apud S. Hieronymum Chæremon Stoicus, quod scilicet

Lib. 2. ad-
vers. Jov.
cap. 9.

cet

cet omnibus mundi negotiis, curisque postpositis semper in templo fuerint, & rerum naturas, causasque ac rationes siderum contemplati sint, ab usu mulierum semper abstinerint, nunquam cognatos ac propinquos, ne liberos quidem viderint ex eo tempore, quo cœpissent divino cultui deservire, a carnibus & vino semper sibi temperarint. Ovum quoque pro carnibus vitaverint, & lac; quorum alterum carnes liquidas, alterum sanguinem esse dicebant colore mutato. Cubile eis de foliis palmarum contextum erat, scabellum acclive, & ex una parte obliquum in terra pro pulvillo capiti supponebant, bidui, triduique inediam sustinentes. Rhodiginus antiquarum Lectionum lib. 5. cap. 12. ait: *Quod, dum Heliopoli rei divina incumberetur, nequaquam Templo vinum quis inferret; cen dedeceret interdum bibere, Domino ac Rege (Sole scilicet) inspectante.*

Quanta autem in veneratione Ægyptii Sacerdotes non imperitæ solum multitudi-
ni, sed ipsis etiam Regibus fuerint, ex eo satis licet colligere, quod quasi in legem factum sit, ut in tota Ægypto quinta pars tanquam tributum Regibus solveretur *præter terram sacerdotalem*. Genes. cap. 47. vers. 22. Censebant enim esse inconveniens ut proximi supremi Regis Ministri, alteri longe inferiori tributum solverent, & in-
fer-

servitutibus ejusmodi sæcularibus obedirent. Juvat hic ex Epistola tertia D. Clementis ad omnes fideles, quæ extat tom. 1. Conciliorum, gravem quandam S. Petri Vicarii Christi exhortationem referre: nimirum Imperatores & Reges sæculi Sacerdotibus parere debere, & existimare, se eorum precibus in gratiam recipi, cum eorum manus osculantur; atque id ex Domini sententia Matth. cap. 17. confirmatur. *Si a filiis Reges tributum non exigant, quos subditos habent; multo minus ab eis, quos sibi Superiores cognoscunt absque nota criminis invasa tyrannidis; sub quorum cura Principes omnes intelligant se sub Pastoribus esse oves, longeque impar esse, a Pastoribus oves lac & lanam exigere, cum potius ista illa teneantur Pastoribus exhibere.* Hucusque ex illa Epistola. Talem immunitatem suo tempore Sacerdotibus concessam fuisse S. Hieronymus testatur in cap. 17. Matthæi: *Nos pro illius honore tributum non solvimus, & quasi filii Regis a viceribilibus immunes sumus.*

Vide Humbertum D^r assonleville de honorando sacerdotio

G E N E S I S

CAP. XLIII. V. 32.

Illicitum est Ægyptiis comedere cum Hebrais. Detestantur Ægyptii omnes pastores ovium. Cap. 46. vers. ult.

Probabilius docent non pauci, ante diluvium homines ab esu carniū abstinuisse; postmodum vero, ubi vigor terræ non parum universali aquarum inundatione corruptus fuit, & primæva fructuum excellentia defecit, carniū comestio magis ac magis videtur invaluisse; non ubique tamen, nec apud omnes; sed remansit apud aliquos horror quidam esus tam inusitati, ita ut sacrilegium putaretur manducare, quod ex innocentia non fuerat antea comestum; non sine fraude & nequitia maligni spiritus; qui, ut abstinentiam in primis nostris violavit parentibus, ita eandem suavitati, urfit, & evicit in eorum posteris, sed ex pessimis principiis. Quidam enim ideo ab animatis abstinuerunt; quod caro ex corporum commixtione gigneretur; proinde polluta esset ac immunda, & consequenter omnes Creophagos pollueret. Hæc causa Ebionem hære,

hæreticum & discipulos ejus permovit ad abstinentiam a carnibus. Alii, ut Manichæi, carnes & vinum a malo Deo sive Diabolo sustinebant procreari, & ideo illarum comestionem horrebant: *Quia*, ut S. Augustinus ait, *ipsas carnes immundas putant, & earum creatorem Deum esse negant*. S. Epiphanius Hæresi 66. de iis ait: *Edentem carnes Manichæus animam edere dicit, & esse ipsum reum, ut & ipse tale quid fiat, si taurum edat, ut taurus fiat, si porcum edat, ut porcus fiat.*

Alii ideo damnabant esum animalium, quod etiam in brutis crederent esse animam rationalem, eamque in diversa eorum corpora pro vitæ antea actæ merito transmigrare. Hanc sententiam videntur tenuisse antiquissimi Ægyptiorum Gymnosophistæ sapientiæ fama toto Orbe celeberrimi, & ab his eandem didicisse veteres Philosophi, ut Pythagoras, & Apollonius Thyanæus &c. qui per varias orbis partes sapientiæ acquirendæ causa peregrinati sunt. Ad hæc constat ex Historiis, animalia non pauca tam a ceteris Gentibus quam Ægyptiis fuisse Diis consecrata. Sic Veneri & Apollini sacer erat Cygnus; & illi quidem etiam ardea, huic vero columba. Aquila Jovi; turtur ob silentium Harpocrati; noctua Minervæ; Phoenix Soli; pavo Junoni; picus, equus,

C & ly.

& lupus Marti; grus Cereri; lynx & tygris Baccho; cerva Dianæ; Leo Cybeli; bos Lunæ, Soli & Apollini; capra Diti; gallus & canis Æsculapio; Ibis & Cynocephalus Mercurio; asinus Priapo.

Colebantur etiam ab Ægyptiis Dii sub animalium figuris: v. g. Hammonius Jupiter in ariete, Apis in vitulo & bove, Osiris in ibe & accipitre;

*Aurelius
Prudentius
in
Symmach.*

*Isis enim & Serapis & grandi Simia
cauda*

Et Crocodilus, idem quod Juno, Laverna, Priapus.

Imo ipsa animalia pro Diis habebantur. Sic Josephus lib. i. contra Appionem inter Deos Ægyptiorum recenset bovem & hircum; quibus adde feles & mures. Memphitæ Taurum colebant, Thebani mustelam, Tanitæ accipitrem, Lycopolitæ lupum, Cynopolitani aliique canem tanta cum veneratione, ut authore Herodoto tota domus, in qua canis extinctus esset, acta lamentatione, toto corpore raderetur, quod indicium erat maximi apud illos luctus: Arsinoë urbis incolæ Crocodilum, quod miseris, animal andropophagum: causa videtur hæc fuisse, quod toti patriæ non solum Nilus securitatem afferret, sed etiam qui in eo sunt Crocodili, quos Arabiæ, Libyæque latrones veriti non audent flumen transire populatum. Colebant Ægy-

Ægyptii præterea Scarabæum tanquam vivam solis imaginem, ut Porphyrius docet lib. de abstinencia ab animatis, Latum piscem, Xyrinchum sive lucium Niloticum, Cynocephalum, quod animal in sacrisalebatur, tum quod a piscibus abstineret, tum quod gigneretur circumcisum, quam circumcisionem curare Sacerdotes solebant & peragere.

Ex dictis patet, quare Ægyptii fuerint detestati pastores Judæorum, & illicitum illis fuerit manducare cum Hebræis. Immane enim videbatur illis esse sacrilegium, animal Deo sacrum vel pro Deo habitum vilipendere & lædere, nedum mactare & comedere. Hinc Cicero dicebat, ut supra memoratum est: Ne fando quidem auditum est, Crocodilum, aut Ibin aut felem violatum ab Ægypto. Et Juvenalis Satyra quinta de Ægyptiis canit:

--- *Lanatis animalibus abstinet omnis Mensa, nefas illic fœtum jugulare Capella.*

Mirum proinde non est dixisse Moysen Exod. cap. 8. vers. 26. *Non potest ita fieri: abominationes enim Ægyptiorum immolabimus Domino Deo nostro.* Quæ abominationes nihil aliud erant, quam mactationes eorum animalium, quæ in Deorum numero Ægyptii recensabant. Paschalis lib. 1. ita canit de iisdem;

C 2 Non.

36 *Explicatio Fabularum,*

*Nonnulli venerantur olus, mollesque per
hortos*

*Numina sicca rigant, verique hac arte
videntur*

Transplantatorum cultores esse Deorum.
Concinit Paschali Aurelius Prudentius in
Symmachum.

*Sunt qui quadriviis brevioribus ire pa-
rati,*

*Vilia Niliacis venerantur oluscula in
hortis;*

*Porrum & Cepe Deos imponere nubibus
ausi,*

Alliaque & Serapin cali super astra locare.

Jam vero nihil communius, gratiusque
erat Judæis, quam ejusmodi olera come-
dere; hinc illa orexin adhuc eis in deser-
to movebant, cum dicerent: *In mentem
nobis veniunt cucumeres, & pepones, por-
rique & cepe & allia.* Numer. cap. ii.
vers. 5. Econtra Ægyptiis, ut ait Juve-
nalis:

*Porrum ac cepe nefas violare ac frangere
morsu.*

Ex his iterum patet, cur illicitum fuerit
Ægyptiis comedere cum Hebræis.

In sensu Tropologico abominationes im-
piorum sunt fides, justitia, pietas, pæni-
tentia, aliæque virtutes, quarum oblatio
Deo quidem gratissima, sed impiis odio-
sa. Ita S. Gregorius lib. 10. moral. cap.

Exod. Cap. 23. vers. 13. 37

27. ait: *Quod abominantur Ægyptii, hoc Israelita Deo offerunt: quia simplicitatem conscientia, quam iniusti quique despiciunt, hanc iusti in sacrificium virtutis vertunt, & excolentes recti pietatem ac mansuetudinem Deo immolant, quam abominantes reprobi fatuitatem vocant.*

E X O D I

CAP. XXIII. V. 13.

Per Nomen externorum Deorum non iurabitis, neque audietur ex ore vestro.

Jurare est jurejurando devincire: hinc juramentum idem est, quod jusjurandum, & hoc secundum Philonem est testificatio Dei de re controversa: Secundum Juris consultos est affirmatio vel negatio rei alicujus sacræ attestatione firmata. Hinc Cicero l. 3. offic. affirmationem talem religiosam vocavit. Ideo forsan juramentum hebraice Schebuahh dicitur, quod verbum deducitur a schæbahh numero septenario, qui sacer erat & religiosus. Græcis juramentum ὅρκιον dicitur, quod sit quasi ἔρκιον, id est sepimentum, quod utrumque verbum derivatur ἀπὸ τῆ ἐπεὶ a coercendo: nam ut Cicero ait l. 3. offic.: *Nullum vinculum*

ad stringendam fidem iurejurando firmitus maiores nostri esse voluerunt. Hinc censenda est res non levis momenti iuramentum, quod Germanice Schmur quasi schmer dicitur: debet enim esse testimonium animi, conscientiae, veritatis, & Deus ipse veritatis testis adhiberi; in cuius signum solebant Ethnici ipsas Deorum aras & simulacra tangere, ut Juvenalis de quodam testatur Satyra 14.

--- Cereris tangens aramque pedemque.

Et Justinus l. 24. *Ptolomæus sumptis in manibus Altaribus contingens, ipsa simulacra & pulvinaria Deorum inauditis, ultimisque execrationibus adjurat. Quæ autem nationes diversos habebant Deos, per eos pariter jurabant. Thebani Ægyptii per Osiridem, Persæ per Mithram sive Solem, Lacones per Spartanos & Argivos Deos, Vestales per Vestam, Siculi per Proserpinam, Cappadoces per montem quendam pro Deo habitum, Pythagorici per quaternionem, ut Plutarchus testatur de opini. Philos. l. 10 c. 3.*

Ad hæc jurandi formula Deos aut Deas, unum aut plures in se continebat. Sic Gripus piscator apud Plautum in Rudente ait: Per Venerem hanc iurandum est tibi. Ceterum frequentissime per Jovem jurabant iuramentorum Præsidentem, & fidei servandæ antistitem; ratione cuius Deus Fidius ap-
pel-

pellabatur Jupiter, cujus nomine, ut Cicerō ait pro Fontejo, *Majores nostri testimoniū fidem sanctam esse voluerunt, non sine metu perjurii, si commissum esset, puniendi*. Idem ait l. 2. de legibus: *Perjurii pœna divina exitium, humana dedecus esto*. Hinc in senatu Olympii Jovis erat simulacrum ὀρνις nomine, utraque manu fulmen tenens, quasi fulmine ulturus, qui juramentum falleret & violaret. Modus etiam gentiliū vetustissimus fuit jurandi per Jovem lapidem: juraturi enim lapidem v. g. Silicem, dum fœdus aliquod sancirent, manu tenebant, ut Festus docet, dicentes: *Si sciens fallam, me Diespiter, salva urbe arceque bonis ejiciat, ut ego hunc lapidem*. Vide exemplum apud Titum Livium l. 1. decad. 3. de Hannibale, & l. 22.

Formulam jurandi per plures Deos videre est apud Plautum:

*Ita me Jupiter (inquit Chrysalus) Juno, In Bacchi-
Ceres,*

*Minerva, Latona, Mars, Mercurius,
Hercules,*

*Sumanus, Sol, Saturnus, Diique omnes
ament,*

*Ut ille cum illa neque cubet, neque am-
bulet &c.*

Et in Cistellaria apud eundem Plautum
Alcesimarchus adolescens:

C 4 Enim.

40 *Explicatio Fabularum;*

--- *Enimvero ita me Jupiter,*

Itaque me Juno & Saturnus,

Dei me omnes, magni, minuti & Patel-
larii

Faxint, ne ego dein vivus hodie suavium
Silenio,

Nisi ego te tuamque filiam meque hodie
obtruncavero.

Jurabant quoque Gentiles aliqui per olera, quorum saltem aliqua erant Ægyptiorum Numina. Plinius l. 19. c. 6. *Allia Cepasque inter Deos in jurejurando habet Ægyptus.* Athenæus l. 9. docet multis e veterum Poematis repetitis exemplis per brassicam antiquos jurasse: eo, quod huic divinatoriam quandam vim inesse crederent. Ex his patet, quomodo per Deorum suorum nomina Ethnici jurarint. Juste autem a Deo prohibita fuisse ejusmodi juramenta, nimis quam clarum est. Uti enim nulli sunt Gentium Dii & fictitii tantum; ita nulla censeretur authoritas, quæ pro rei confirmatione allegatur. Unus & solus, verus, æternusque Deus Cardiognostes & rerum omnium conscius, quam severus & justus falsi ultor, tam veritatis constans assertor, jure in verbo suo sacrosancto mandavit, non per Deorum nomina, sed per suum nomen jurari posse & debere; & ut hoc Dei mandatum apud Christianos inviolatum maneret, Concilium Quinisextum
Con-

Constantinopoli in Trullo palatii imperatorii Anno 706. habitum sæpius Christi fideles exhortatur, ut a moribus gentilium abstineant, *Neque execrandi Bacchi nomen, neque in torcularibus exprimentes invocent*, Can. 62. Et Canone 94. *Eos qui Gentilium Sacramenta jurant, Canon pœnis subicit, & nos iis quoque segregationem decernimus.*

E X O D I

CAP. XX.

Quod si Altare Lapidum feceris, non edificabis illud de sectis lapidibus; si enim levaveris cultrum super eo, polluetur.

UT Deus magis Hebræos a cultu & ritu Gentilium avocaret, quibuscum per sæcula aliquot in Ægypto vixerant, & ut nulla iis daretur occasio sculpturas & picturas idolorum imitandi; omnino vetuit Altare sibi erigi e secto lapide; sed e rudi & impolito, aut e terra seu egesta humo simpliciter sine parergis & ornamentis: E contra Gentiles splendida, magnifica & polita Diis suis fabricabant Altaria. Hinc Arrianus in Periplo Ponti Euxini,

ni, juxta Trapezuntem civitatem in mari sitam scribit se vidisse aras erectas ex aspero lapide. Addit vero statuisse se aras ibidem albo lapide dedicare: Et Epigrammata perspicuis & illustribus notis, iis insculpere. Angelus Politianus Apollini in Delo aram corneam fuisse instructam testatur. Meminit Athenæus aræ aureæ Babyloniorum. Ex marmore item candido aras olim fieri solitas non pauci testantur Scriptores: hinc illud Poetæ:

*Marmoreas stant fulva canum simulacra
per aras.*

Idem videtur Martialis insinuare lib. 9. dum ait: *Libetur tibi candidas ad aras.* In iis quoque symbola & imagines Deorum cum certis quibusdam characteribus insculpebantur. Frondium præterea ambiunt aras illas coronabant, v. g. Jovis aram æsculo, Apollinis Lauro, Minervæ olea &c. ornabant; unde canit Valerius Flacc. lib. 3. *Frondentibus intulit aris.*

Alias præterea rationes adferunt Rabbinii; quare Deus noluerit cultrō, scalpello, aliove instrumento ferreo altare suum præparari: 1. Quia nefas erat partes ferro abrasas in terram excidere. Tanta aris sacris inerat reverentia. 2. Ne ex frustis sacratorum lapidum simulacra sibi fingerent Idololatræ, iisque ad artes magicas abuterentur. 3. Quod altare conservandæ

&

& propagandæ hominum vitæ erigatur. ferrum vero maligno mortalium ingenio inventum, ut hominum interuiciniæ deferu-
viret. Et ideo forsan sapientissimi Regis *L. Reg. 3. c. 6. v. 7.* consilio factum est, ut omne ferramentum non audiretur in domo Dei, cum ædificaretur. Quod ipsum advertisse videntur Gentiles, quorum ea lex erat, teste Tullio: *Æs & ferrum arceto a delubris, ut duelli instrumenta, non fani.* *L. 2. de legibus.*

Cessat modo lex illa veteris Testamenti: *Altare de terra facietis*, Exod. c. 20. Debet enim ex instituto Sylvestri Pontificis Maximi Altare esse lapideum. Tum quia Christum refert & excipit, qui Apostoli testimonio *Petra est*. Tum ut ævum sustineat, tempusque longissimum; Tum denique ut doceat Sacerdotes, qui in eodem litant supremo Numini, debere esse solidos in Dei servitio, & in adversis quibuscunque constantes.

Symbolice per altare non elaboratum designatur, Deum non egere ullo medio ad suam perfectionem; sed ex natura sua esse perfectissimum, maximum, optimum; qui virtutum nostrarum simplicitate & puro affectu magis, quam artificiosa earum compositione ad ostentationem non raro confecta delectatur. Allegorice per aram impositam altare Crucis intelligitur, in conspectu mundi vilissimum & despicatissimum,

in

44 *Explicatio Fabularum;*

in qua Christus se ipsum Deo Patri obtulit immaculatam hostiam, sacrosanctum Sacrificium.

Ad Eph. cap. 3. Tropologice explicat S. Isidorus: *Lapides infecti sunt fideles, in fide & morum integra & sancta unitate solidati; nec scissi ullo schismate, qui coadificantur in habitaculum Dei in Spiritu sancto.*

E X O D I

CAP. XX. V. 26.

*Non ascendes per gradus ad Altare meum,
ne reveletur turpitudine tua.*

Altare verosimiliter ab altitudine suam trahit originem, ita ut idem sit Altare, ac alta ara, quæ vox altus ab hebræo verbo alach (quod ascendit significat) videtur derivari, quia ad alta ascensu opus est: hinc expresse forsitan Deus vetuit, ne alta sibi fierent altaria, ad quæ opus foret per altos gradus ascendere, qualia Ethnici habebant. Sic testatur Herodotus ab Argonautis altare altius Apollini extructum in Clio ita canens:

*Iustaque soluentes in primo ereximus aram
Littore sublimem.*

Deserviebant altiores hi gradus altarium
ad

ad obscœna & nefanda Gentilium sacrificia , præsertim ea , quæ Priapo fiebant : Et ideo censet hic S. Thomas a Deo vetitos sublimes gradus , ne occasio Judæis daretur execranda ejusmodi scelera imitandi : præsertim , cum transeundum illis esset per Moabitidem , ubi impense Beelphegor , id est Priapus colebatur . Aliam causam affert Plutarchus in Numa Pompil. *Cur alta & sublimia erecta sint altaria ? ut orientem Solem statim exciperent .*

Alii putant ideo altiores gradus a Deo fuisse prohibitos , ut admonerentur Sacerdotes pudoris , reverentiæ , & castitatis in sacris adhibendæ : cum enim sub tunica exteriori linea , subligaculis tantum induti essent , eaque ad genua tantum protensa , facile potuisset fieri , in ascensu altiorum graduum errore aut lapsu pedum pandi subligacula , & verenda conspici . Bene igitur vetitum est altare cum gradibus , *ne reveletur turpitudine tua* . Nec mirum est laudabilem ejusmodi cautelam in divinis præscriptam esse sacrificiis ; cum talem ab Ethnicis etiam in Theatro legamus apud Ciceronem fuisse observatam , sic enim ait lib. 1. Officiorum : *Scenicorum mos habet tantam a vetere disciplina verecundiam , ut in scenam sine obligaculo prodeat nemo , ne si forte corporis partes quadam aperiantur , aspiciantur non decore* . De iisdem ve-

re dixit S. Ambrosius: *Si casu aperiantur, confunditur verecundia, si studio, impudentia aestimatur.*

LEVITICI

CAP. II. V. II.

Omnis oblatio, qua offertur Domino, absque fermento fiet, nec quidquam fermenti ac mellis adolebitur.

QUOD Deus mel in sacrificiis prohibuerit, aliqua videtur fuisse ratio D. Thomæ Aquinati, quod Gentiles eodem uti fuerint soliti in Deorum sacrificiis. Constat enim Athenienses Mnemosynæ, Auroræ, Soli, Lunæ, Uraniæ, & Nymphis aqua melle diluta sacrificasse. Sic in Asopo in Eumenidum æde non nisi mulso libare permissum erat, ut testatur Alexander ab Alex. lib. 3. cap. 12. Ovidius lib. 3. Fastor. canit:

*Liba Deo sunt, succis quia dulcibus ille
Gaudet, & a Baccho mella reperta ferunt.*

Etiam Plutoni, id est Ditis patri melle & lacte sacra fieri solebant. Imo Deam fixerant Mellonam sive Melloniam, Deum autem Aristhæum Atheniensem.

Allegorice per hanc prohibitionem signi-

gnificatur sacrificium Christi plenum fore doloribus & tormentis: quomodo enim suavis & melliflua oblatio typus esse potuisset Crucifixi felle & aceto potati?

Tropologice indicatur omnem amoris proprii, sensualitatis, aut alterius cujuscunque terrenæ voluptatis dulcedinem ab omni Religionis perfectæ exercitio abesse oportere.

LEVITICI

CAP. XVII. V. 7.

*Nequaquam ultra immolabunt hostias suas
Dæmoniis, cum quibus fornicati sunt.*

PRO Dæmoniis in hebraico legitur nomen, quod a pilo suam trahit originem; ita ut verisimilius intelligantur pilosi; qui subinde in Scriptura pro Dæmoniis ponuntur, & spectris horrificis. Vario nomine appellati sunt ab Ethnicis: Fauni a fando, dicti, quod voce, non signo consulentibus responderent; Satyri a rictu oris; Tityri a teretismate certo quodam saltationis genere; Sylvani a præfectura & incolatu sylvarum; Sileni ab inverecunda, & dicaci loquela. Idem esse a plerisque putantur, a quibuldam tamen distinguuntur.

tur . Pro semi-Deis sunt habiti , quorum
 Caput Pan . Sunt autem revera nonnisi
 sordidi & immundi spiritus , quos in ho-
 minibus immunditiam tentare & efficere
*S. Aug. l. 15. de civi-
 tas. Dei.* plures , talesque asseverant , ut hoc negare
impudentia videatur .

Dæmonia sive dæmones dicuntur a græ-
 co verbo *δαμασκειν* , id est terrere , pavefa-
 cere , ut vult Eusebius , & hinc se ut Deos
 coli intenterunt : (nam fecit in orbe Deos
 primum timor) sub specie terrificæ appa-
 rentes , & illudentes hominibus , qui ex spe
 boni alicujus obtinendi , aut potius metu
 mali inferendi sua iisdem offerebant sacri-
 ficia , ut Servius ait in Georg. & in Æ-
 neid. super hos versus :

*Sylvano fama est veteres sacrasse Pelasgos,
 Arvorum pecorumque Deo , lucumque
 diemque .*

Et Ovid. L. pastorum :

Idibus agrestis fumant altaria Fanni .

Apparebant autem humano quidem capite
 sed cornibus instructo , pedes habebant ca-
 prinos , rubentem faciem , nasum sinum ,
 aures asininas , caudas equinis non multo
 minores , toto corpore hircorum more vil-
 losi , & in cursu perniciosissimi , teste Plinio
 lib. 7. cap. 2. De petulantia eorum & sala-
 citate mira referuntur , præsertim a Pau-
 sania in Atticis , uti & de eorum saltibus
 & tripudiis a Pomponio Mela : Insulas
 quas-

quasdam ultra Athlantem , Mauritanie montem fuisse, quos Satyri inhabitare sint crediti, in quibus per noctem obversarentur lumina cum cymbalorum , fistularum & tympanorum strepitu , per diem vero nemo cerneretur . Cui incredibilis videtur congressus Judæorum cum ipsis Dæmoniis, potest per fornicationem intelligere turpes illas & infandas libidines, quas in execrandis Dæmoniorum sacrificiis inter se Gentiles ipsi & Judæi peragebant . Ipsam etiam Idololatriam non raro fornicationem nominat Scriptura, ut ait Hesychius: *Servire idolis, fornicationem appellavit, aperte nos docens, quia nostras animas Deus sibi ad salutem despondit, & ideo fornicatio dicitur ab illo discessio.*

LEVITICI

CAP. XVIII. V. 21.

De semine tuo non dabis, ut consecratur Idololo Moloch, ne polluas nomen Domini.

Moloch vel Melchom Idolum fuisse Ammonitarum ex Scripturis constat ; quamvis non ii solum , sed etiam Chananæi aliæque nationes ejusdem cultores fuerint, Idem significat, quod Regem
D Deo.

Deorum, scilicet ceterorum. Septuaginta vertunt, ἀρχὴν de semine tuo non dabis servire principi. Traditio est Hebræorum, quam passim admittunt Scripturarum interpretes: Idolum hoc fuisse Statuam æneam & concavam, quæ igne supposito accendebatur, capite vitulino, reliquo corpore forma hominis, regiis ornatam insignibus, & in throno quodam confidentem manibus porrectis, quibus imponi solebat puer immolandus; tumque se ipsas per artificialem quandam machinam, more αὐτομάτων, contrahebant, miserumque puerum complexu stringebant, ita ut puer lento ignis vapore tostus ridentis speciem exhiberet. Interim ne ejulatus pueri audiretur, & commiserationem in parentibus exhiberet, quatiebant sacerdotes tympana, & tubis clangebant; insuper imponendo parentibus, puerum igne quidem absumptum, sed a Diis raptum ad athera.

Oecumenius in cap. 7. Actorum, & Arias Montanus in cap. 1. Amos putant Moloch fuisse Mercurium, eo quod hic dictus esset Moloch a Malach, id est nuntius. Cajetanus censet fuisse Priapum, alii Jovem. Sed verosimilius Saturnus fuit secundum veteres profanos Scriptores, & SS. Patres: cum illi maxime conveniant ea, quæ de Saturno Poetæ sunt fabulati: imprimis, quod filios suos devoravit. Præter-

ea

ea hic unus pene fuit, cui a Gentilibus humana victima multis in locis sacrificaretur. Vuelhel Stuckius in sua sacrorum & Sacrificiorum descriptione talem victimam nominat *ἀνθρωποθύσιαν*, additque barbaram illam consuetudinem non tantum apud Gallos viguisse, de quibus Cicero in Oratione pro Fontejo, sed etiam Africanos, Siculos, Italos, Græcos, Scythas, Thraeces, Britannos.

Poscere cade Deos veniam, & flagrantibus *Silius Italicus.*
aris,

Infandum dictu! parvos imponere natos. *L.I. de Relig. falsa*
Nec Latini quidem hujus immanitatis ex- *ci. 21.*
pertes fuerunt, ait Lactantius: Siquidem

Latialis Juppiter etiam nunc sanguine colitur humano. Quid ab his boni precantur, quibus sic sacrificant? Aut quid tales Dii prestare hominibus possunt, quorum pœnis propitiantur? Merito Imilie Annibalis uxor, cum Aspar filius ejus mactandus esset, dolens conqueritur apud Silium:

Qua porro hac pietas! delubra aspergere
tabo?

Hen! prima scelerum causa mortalibus
agris,

Naturam nescire Deum. Jasta ite precari
Thure pio, cadisque feros avertite ritus.

Mite, & cognatum est homini Deus!
hactenus oro,

Sit satis ante aras casos vidisse juvencos.

Sed fuerunt hæc vana Imilii & aliorum idem de Diis sentientium vota. *De infantibus, qui eidem Saturno immolabantur propter odium Jovis, quid dicam, non invenio, ait citato loco Lactantius: Tam barbaros, tam immanes fuisse homines, ut paritridium suum sacrificium vocarent. Cum teneras & innocentes animas, quæ maxime est ætas parentibus dulcior, sine ullo respectu pietatis extinguere, immanitatemque omnium bestiarum, quæ tamen fœtus suos amant, feritate superarent. O dementiam insanabilem!* A Pescenio Festo in libris historiarum refertur, quod Carthaginenses, ab Agathœcle Rege Siculorum victi, cum iratum sibi Saturnum putarent, ut diligentius piaculum solverent, ducentos nobilium filios immolarint. Historiam illam hoc Epiphonemate claudit Lactantius:

*Tantum Religio potuit suadere malorum;
Quæ peperit sæpe scelerosa atque impia
facta.*

Hoc ultimum carmen ita reddit Kircherus noster:

*Quæ toties peperit scelerum genus omne
nefandum.*

Sicut vero aliarum fabularum fundamentum plerumque fuit historia quædam, sed temporum vetustate figmentis corrupta; ita in iis, quæ de Saturno dicuntur, probabile est contigisse. Sunt, qui *Sacra Moloch*

Ioch à Sacrificio Abraham & Isaac deducta esse arbitrantur. Alii verosimilius censent institutum illud sacrificandi filios a Phœnicibus manasse, ut Eusebius indicat lib. 4. præparat. Evangel. cap. 7. ubi ait : Saturnum Regem fuisse Phœniciæ, & eundem mortuum in Deorum numerum fuisse relatum, creditumque esse in Saturni stellam migrasse, cui Anobreth Nympha ejus uxor unicum, quem ex eodem susceperat, filium immolarit.

Juvat ex Kircherō nostro cognoscere, quæ naturalis veritas sub hac fabula latuerit. Censet hic in Oedipo suo Ægyptiaco Idolum Moloch Typhonem fuisse, quem Ægyptii variis modis velut numen sibi adversum quærebant conciliare, sub figmenti involucro plerumque causas rerum naturalium vel benéficas sacrificiis sibi demerendo, vel nocentes placando. Et sic teste Plutarcho Typhon ille nihil aliud erat, quam totum id, quod in Sole vitiosum est, quale est adustiva vis Solis nimia, qua Nilus seu Osiris siccus redditur, & in angustam alvei sui cistam quasi mortuus conditur, quo condito sterilescat tellus Ægyptia. Cum vero ejusmodi sterilitas quodam tempore universam Ægyptum premeret, ad Oraculum confugere Ægyptii, exploratum, qua ratione a publica hac calamitate possent liberari. Responsum vero est,

deliturum malum, si quotannis circa Niliacæ inundationis tempus se hominem sacrificaturos promitterent. Dictum, factum, & fertilitas subsecuta est. Inde quotannis hæc andropothysia est observata.

In sensu morali de semine suo offerunt Idolo Moloch parentes illi, qui filios suos ad vanitates sæculi educant, & in vitiis enutriunt, futuras olim victimas divinæ Nemesis æternum cremandas.

LEVITICI

CAP. XIX. V. 26.

*Non augurabimini, neque observabitis
somnia.*

QUam communis olim apud omnes fere nationes fuerit supersticiosa divination, Cicero testatur l. i. de divinat. *Quæ est gens, aut quæ civitas, quæ non aut ex his pecudum, aut monstra, aut fulgura interpretantium, aut Augurum, aut Astrologorum, aut sortium, aut somniorum, aut vaticinationum prædictione moveatur.* Videtur autem in præsentī textu a Deo prohiberi omnis supersticiosa futuræ rei prædictio ex quacunque re desumpta. Erant cum in
fi-

finem apud Ethnicos in usu maxime auspicia ex garritu avium vel volatu, tripudia, solistina, hydromantia per aquam, cribrum, pelvim, annulos, specula, claves, &c. item extispicia, id est inspectiones viscerum, sive extorum sacrificiorum, quorum beneficio res, & eventus futuros, sive bonos, sive malos prænoscere solebant & prædicere. De quibus ita Peucerus: In disiectis jam victimis ex signis salubribus, noxiisque ex habitu, coloreque extorum & fibrarum, defectu aliquarum particularum in præcipuis organis, aut præter naturam adnatis, collectisve ex humorum affluxu abscessibus sumebant conjecturas de eventuum condicione, & in quam partem Numen, cui fiebat sacrificium, inclinaret. Si quid de extis, aut aliunde manibus exciderat, triste omen censebatur. Ab hepate viscerum præcipuo initium sumebat extorum contemplatio, deinceps jecinoris, cordis, lienis, fellis &c. Non ex brutorum tantum, sed hominum etiam matatorum visceribus atque extis quidam Gentilium divinarunt. Uti de Heliogabalo testatur Ælius Lampridius, & de Juliano Apostata Eusebius l. 7. c. 9. histor. Ecclesiasticæ.

Duo autem erant Auguriorum genera, alia putabantur naturalia, alia ex arte fiebant, & horum meminit Claudius Marius Victor:

*Hinc ars est, quod fibra tremit, quod
pinna coruscat,
Nubibus elisis, quod fulmina nuntia si-
gnant &c.*

Idem Author Auguriorum originem con-
jicit in nimiam hominum curiositatem &
malignam deceptionem Diaboli: Hic enim

*Illusit captis noscendi ardore futuri, "
Vincendique dehinc fati stimulante timore
Solicitis studio magica scelus intulit artis,
Quo semet potius colerent, arisque dica-
tis*

Impia thara darent.

Detestabilem hunc cultum fovebant au-
guria per ipsum eventum subinde compro-
bata: facile enim erat Dæmoni effectus a-
liquos futuros ex naturali causarum serie
dependentes, sed hominibus incognitos re-
velare; ita ut religioni ducerent sibi im-
periti, prognosticis aruspicum effatis non
credere: præsertim cum in eos subinde a-
nimadversum esset, qui eadem non cura-
rent, & contemnerent. Sic Appius Clau-
dus Censor, cum adversus responsum sa-
cra Herculis transtulisset ad servos publi-
cos, luminibus orbatus est; & Politiorum
Gens, quæ prodidit, intra anni unius tem-
pus extincta est. Inde & factum, ut quæ
mero casu fierent, certa tamen boni aut
mali auguria censerentur: v. g. si flamma
esset lucida vel obscura, recta vel obliqua,

pla-

*Lactan-
tius l. 2.
de orig.
error. c. 8.*

placida aut agitata &c. quis non rideat & contemnat superstitiosa ejusmodi omina? uti & illa, quæ ex fortuito bestię aut hominis occurſu, vel ex offensione pedum in limine, ostii strepitu &c. capere solebant. Sic Tibullus de seipſo canit:

*O quoties ingressus iter mihi tristia dixi
Offensum in porta signa dedisse pedem!*

Quis non explodat stultos & inanes ejusmodi metus? & quod apud Claudianum legitur: *Ter cardine verso præſaga cecinerunt fores.* Aristoteles tantus in doctrina vir asserit in libris de historia naturali: *Sternutamentum augurale signum esse sanctum ac sacrum.* Idem Homerus tradit Odyss. 6. & Theocritus in Helenæ Epithalamio. *Hispanicum etiamnum vulgus* (verba sunt Lælii Bisciolæ) *tametsi Christianum, pro o-* Tom. 1.
mine sternutamentum habet. Opinor, ut l. 1. c. 4.
Germanicum, quod jocatur potius, dum sternutantem dicit, bonam auram præſagire. Videas subinde turbari hominem, si a socio pueri vel canis transitu dividatur, si terreatur subito &c. S. Chrysost. homil. 21. ad popul. ait: *Sape domo quis egressus vidit hominem monoculum vel claudicantem, & ominatus est. Si Virgini occurreris, sterilis dies erit &c.* Malum censebatur omen, si lepus ex transverso itineris saliret, si fœta vulpes, aut prægnans canis, vel mulier fufum tenens occurreret &c. Et si ejusmo-

di

di casus evenissent, decretis per pontifices supplicationibus, lustrationibus & lectisterniis ad avertendam Numinum iram, & expiandas offensas festum indicebatur.

Jure merito tam vana auguria, frivolaque omina apud sapientiores quosdam Gentilium, aliosque eruditos in nulla aestinatione fuerunt. Phavorinus, Gellius, Boethius, & alii plurimi tum Peripatetici, tum Platonici non solum has vanitates contempserunt, sed argumentis etiam acerrimis oppugnarunt. *Primo* quidem, quod auguria talia parum ad Deorum honorem facerent. Varro dicebat, Deos otiosos ac feriatis fore, si sua consilia corniculæ crederent, aut corvo, hominibus indicanda. Et alibi: non solum otiosos Deos, sed sordidissimos fuisse, si in jecorum & viscerum sterquilinio sua occultassent consilia, hominibus ab insanis Sacerdotibus manifestanda: ut optabilius fuerit, valuisse apud Maiores Ciceronis pro A. Cluentio sententiam, pietate & religione & justis precibus Deorum mentes, non contaminata superstitione, neque ad scelus perficiendum casis hostiis posse placari; ubi enim fuisse Deos alibi quam in stercore existimabimus? Hujus vanitatis exemplum nobis præbet Tullus Rex, qui cum Jovem iis superstitionibus sollicitasset, fulmine cum tota domo deflagavit. *Secundo*, quod vano me-

tu plus boni Augures impedirent. Hinc apud Homerum Iliad. 12. Hector irascitur Polydamanti Panthoi filio refugienti praelium ob sinistram Augurium:

*Tu vero me prapetibus parere jubesque
Auguriis, quæ sperno equidem, quia vana
videntur;*

*Sen dextra spectentur aves Phaetoniis ad
ortum,*

*Sive sinistra petant obituri lumina Solis.
Consilio magni Jovis an non fidere oportet?*

*Quem penes est hominum Diquaque æterna
potestas.*

Optimum id auspiciū est, patriam pugnando tueri.

Generosum ejusmodi auguriorum contemptum prætulit Julius Cæsar contra Jubam pugnaturus. P. Claudius Consul cum audiret pullos quid mali prælagire, eo quod nollent edere, ajebat: si esse nolint, bibant largius, & in Tybrim jussit projici. *Tertio*, quod per ambages & tam obscure explicarentur Auguria, ut quamvis secus contingeret, nunquam fucus aliquis veritati confirmandæ deesset. Quid aptius ad fallendum illum belli ducem? dum nescio quo felici ut putabat Augurio nomen certæ urbis Thessalonicam scilicet perciperet; sive enim vicisset, & urbem reportasset, prædictam fuisse victoriam credi Augures

voluissent; siue non vicisset, uti revera non vicit, & hoc prædictum esse per ipsum nomen urbis iactassent. Idem enim est Thessalonicam, si syllabas græce divides, quod *Θεὸς ἀλλὰ νικῶν*, id est, pone alteri victoriam. Cicero l. de divinatione ait: *Possum innumerabilia recensere, quæ aut nullos habuerunt exitus, aut contrarios.* D. Cyprianus l. de Idol. vanitate: *Pullos edaces Paulus habuit* (quod bonum omen fuerat) & *apud Cannas tamen casus est.* Possem infinita exempla (verba sunt Augustini Niphi) *inducere eorum Romanorum, qui his vanitatibus inhaerunt, quorum actiones, finesque non evenerunt, ut per Auguria a Varibus fuit interpretatum.* Hinc explosi sunt merito, qui tam vana omina exquirerent. Cato a quodam interrogatus, quid monstri aut mali portenderent caligæ suæ a foricibus arrosæ; apte eidem reposuit, nihil monstri esse, quod forices caligas arroserint, sed si forices a caligis fuissent arrosi. Simile quid refert Cicero lib. 2. de divinat. de angue, qui domi vectem fuerat circumvectus. Mosolamus Judæus, insignis sagittarius, quem Eusebius Misonium nominat, in expeditione quadam cum avem augures ostenderent, ex qua sumendum esset augurium, volentem ictu sagittæ transfodit subridens dicendo: *Quomodo avis suam nesciens salu-*

L. 2. de
Auguriis
c. 1.

Josephus
in Hecatao
contra Ap-
pionem.

litem nobis de nostra certum aliquid potuit significare?

Cum ab ipsis igitur Gentilibus contemnuntur Augurum vaticinia; mirum non est, a Deo, ab Ecclesia, a SS. Patribus condemnari eadem & prohiberi. S. Cyprianus l. de Idol. vanit. ut horrorem auguriorum Christianis ingereret, quis illorum Author sit, declarat: Nequissimi spiritus afflatu suo Vatum pectora inspirant, extorum fibras animant, avium volatus gubernant, sortes regunt, oracula efficiunt, falsa veris semper involvunt, ut ad cultum sui cogant, & nidore altarium, pecorumque rogis faginati, quæ construxerant, curasse videantur. Hæc est de illis medella, cum illorum cessat injuria; nec aliud illis studium, quam a Deo homines alienare, cum sint ipsi pœnales, quærunt sibi ad pœnam comites, quos ad crimen suum fecerint errore participes. Hinc bene monet S. August. l. 2. de Doctrin. Christiana: *Omnes artifices hujus vel nugatoria vel noxia superstitionis ex quadam pestifera societate hominum & Dæmonum, quasi pacta infidelis & dolosa amicitia constituta penitus sunt repudianda & fugienda Christiano.* Dæmones enim talibus rebus efficaciam aliquando præstant, ut vanitatibus animos hominum implicent: & propterea in Psalmis dicitur: *Beatus vir, cujus est nomen Do-*

Domini spes ejus, & non respexit in vanitates & insanias falsas.

Quod si quis objiciat, veras & divinas haberi prophetias, si suis non frustrentur eventibus, idemque in auguriis contingere. Sed quam hoc falsum sit, modo dictum est; nec hoc quis miretur: cum ipse dicat Porphyrius: *Sciendum, Deos quoque saepe mentiri: nam explorata certaque futurorum perspicientia non hominibus tortuosa modo, sed & Diis ipsis incertissima, plurimisque referta ambagibus est.* Vide Rhodiginum l. 2. cap. 12. Aristoteles præterea cum Cicerone negavit a Deo determinatam futurorum veritatem cognosci. Nihil proinde stultius, quam casus rerum omnino fortuitos in vicem certi ominis suscipere, & si quid minus favens videatur, tam inani metu concuti; si prosperum, tam præfidenti gaudio exultare.

LEVITICI

CAP. XIX. V. 26.

Neque observabitis somnia.

CUM Auguriis prohibetur a Deo somniorum observatio; cum ex uno oriantur principio, & ad eundem a Dæmone fi-

finem dirigantur. Quidam mystica senſa ex ſomniis conati ſunt elicere, & multas divinationum ſpecies efformare. Hoſ Cicero L. de Divinat. jure irridet, maxime Pythagoreoſ & Platonicoſ; qui, ut certius aliquid ſomniarent, cultu exquisito ſe ad ſomnum præparabant. Pythagoram cantu & ſono lyræ ajunt ſomnum captiſſe, ut ad læta ſe ſomnia præpararet. Bene ait Cicero libro prædiſto, idem de ſomniis exiſtimandum eſſe, quod de imaginatione inſanorum & ebriorum, quibus multa apparent & videntur, quæ vera non ſunt.

Interim magna ſemper fuit apud omneſ Genteſ ſomniorum authoritaſ, Romanæ, Græcæ, & Barbaræ, & fuerunt apud omneſ, qui judicandi per ſomnia artem magna ſuperſtitione exercerent. Artemidori commentariuſ artiſ hujus circumfertur magiſter, mille nugis & præſtiigiis refertuſ. Imo quædam in hunc finem oracula fuiſſe, quæ de inſomniis reſponſa darent, eaque explanarent, author eſt Plutarchuſ l. de defectu oraculorum.

Ariſtoteleſ extremo de divinat. libro c. i. negat ulla a Deo ſomnia mortalibuſ dari, eo quod quibuſlibet dentur non optimiſ & prudentiſſimiſ. Quæ & fuit Epicuri ſententia, ut Tertullianuſ de eodem ait: Vana in totum ſomnia Epicuruſ judicavit, liberanſ a negotiis divinitatem, & diſſol-

vend

vens ordinem rerum &c. Fuerunt e contra alii, qui omnia somnia censuerunt divina esse, quos Chalcidius refellit in Timæum Plat. scribens; vel ideo, quod multa somnient homines irreligiosa & impia. Melius profecto Joannes Franciscus Picus tres definivit in universum causas somniorum esse, divinam unam, Dæmoniorum alteram, tertiam naturalem; & hanc quidem oriri ex plenitudine stomachi, vel inanitate, vel etiam antecedentibus cogitationibus & curis diurnis (ut experimur ipsi) docet S. Gregorius l. 4. Dialog. cap. 48. *A Deo autem immitti subinde somnia, non probis solum, sed etiam infidelibus, ut Pharaoni & Nabuchodonosori, Scriptura nobis multis in locis testantur.* Ut vero quæ a Deo immissa sunt somnia, vel a Dæmone, discernantur, non levi opus est diligentia & cautela. Sancti viri, ait S. Gregorius Magnus, inter illusiones & revelationes ipsas, visionum voces & imaginem quodam intimo sapore discernunt, ut sciant, quid in bono spiritu percipiant, & quid ab illusore patiantur; nam si erga hæc mens hominis cauta non esset, per deceptorem spiritum multis se vanitatibus immergeret; qui nonnunquam solet multa vera prædicere, ut ad extremum valeat animam ex una aliqua falsitate illaqueare. *Multos errare faciunt somnia,* ait Ecclesiastes: & ex-
cide-

*ciderunt sperantes in illa, cap. 5. Quare
nisi a Domino missa fuerit visitatio, ne des
insomniis cor tuum. Ecclesiastici cap. 34.*

LEVITICI

CAP. XIX. V. 27.

*Neque in rotundum attondebitis comam,
nec radetis barbam.*

Vario comarum cultu quondam usi
sunt Gentilium Sacerdotes: aliqui
raso erant capite, alii barbati, imberbes
aliqui, alii comati. Quibusdam barba e-
rat brevior, aliis promissior. Stephano-
phori Herculis Sacerdotes apud Græcos
promissam comam & coronam solebant
ferre, ut ait Alexander ab Alexand. l. 6.
c. 12. Econtra Isiaci, id est Isidis Sacerdo-
tes apud Ægyptios raso erant capite. Hinc
Lactantius l. 1. c. 21. ait: *Eos deglabrato
corpore pectora sua tondere; & Aurelius
Prudentius de festis eorum: Mimica riden-
daque suis solennia calvis. De iisdem scri-
bit Polydorus Virgilius: Commune initiatis
omnibus insigne est vertex rasus, præcipuum
sacri profanique capitis discrimen.* Et hæc
videtur causa, cur Deus prohibuerit Ju-
dæis barbam non radere, neque in rotun-
E dum

dum comam tondere, ne in hoc cum Gentilibus convenirent, cum solerent illi in capillis rotundam tonsuræ formam facere; rati hanc figuram præ cunctis aliis, Diis suis placere: est enim om̃pium perfectissima: sic constituta, ut nihil demi, nihil addi possit; hæc una ubique incipit, ubique desinit; si mavis, nunquam incipit, numquam desinit. Et cum motus perpetui causa sit, æternitatis est symbolum. Hinc

X. 10. c. 3. apud Nicephorum legitur, visa circulari forma contremuisse illos, qui Juliano sacrificanti adstabant, cum in exis apparuisset signum Crucis corona circumdatum: hinc enim conjectores isti cœperunt suspicari, nullos nec temporis nec locorum fines doctrinæ Christianæ statutos esse. Bene proin de circulari figura canit Manilius l. 1.

*Hæc aterna manet, Divisque simillima
forma,*

Cui neque principium est usquam, nec finis in ipsa.

Symbolum quoque absolutæ perfectionis figura est sphærica, cum sit capacissima ex omni parte vergens in se, in suam rotunditatem compactilis: Nullus in ea angulus eminet, nullique potest injuria esse obnoxius. Ita vir bonus & perfectus: Mundi instar habens teres atque rotundus, non ex fortuna pendet, nec foras vergit, sed

in

Cicero.

Virgil.

intra se collectus, ita vitam suam disponit; ut prius justo trutinæ examine penset singula, ne quid hiet, ne quid protuberet.

Angulus aquis partibus ut coeat, nihil ut deliret amissis. *Virgil:*

Est igitur figura sphaerica imago summæ perfectionis & æternitatis, adde, veritatis. Idem enim est Latinis, rotunde fateri, quod, veritatem dicere, & hoc sensu Hebræorum sapientes ineffabile Dei nomen videntur circulo inscripisse; ut docerent bonitatem Dei in centro, veritatem in circumferentia inveniri. Empedocles interrogatus, quid esset Deus? Respondit esse circulum, cujus centrum est ubique, circumferentia nusquam. Vel in ipsa mundi hujus tam cæli quam terræ fabrica hujus figuræ patet excellentia.

Verisimile est harum rationum intuitu Gentiles fana ac templa sua in formam rotundam extruxisse: quemadmodum Romæ Pantheon extructum fuit. Sic refertur Numam Pompilium Vestæ, id est Terræ in se rotundæ, matri & altrici omnium, ædem rotundam consecrassse. Cum igitur eundem in sinem Ethnici capita sua Dæmoniis consecraturi, ut iisdem magis placerent, cæsariem suam rotundam in figuram attonderent, jure hic a Deo vetatur Judæis, ne hanc tonsuræ figuram sequerentur; sed naturam potius, & dispositionem vultus, eamque in vestibus & capillitio ser-

varent munditiem & decorem , quo cum idololatræ minime convenirent . Et ideo forsan tempore Optati Milevitani , & Ambrosii Sacerdotes Christiani non radebantur , ut ipsimet testatum reliquerunt : verisimile enim est adhuc ea tempestate Sacerdotes Isidis extitisse , qui caput radebant ; ut videre est apud S. Ambrosium lib. 4. Epist. 30. , ubi conqueritur carpi immerito ab Ethnicis mutationem habitus in Christiano , non enim dedecens esse censent : *Cum ipsi capita & supercilia sua radant , si quando Isidis suscipiunt sacra , si forte Christianus vir attentior sacrosancta Religioni , vestem mutaverit , indignum facinus appellant.* Æquum proinde erat , ut tunc temporis non essent Presbyteri Religionis nostræ rasis capitibus , sicut Sacerdotes cubitoresque Isidis atque Serapidis . Nunc vero , cum omnis ejusmodi idololatria prorsus sit abolita , & quamvis non foret , nullum omnino sit periculum per ritum quorundam de se indifferentium imitationem , in ipsam incidendi superstitionis substantiam ; judicare quivis non difficulter potest , modo non fuerit affectu pravo præoccupatus , quam sit insulsa , futilis & maligna hæreticorum calumnia , Magdeburgensium v. g. Hortensii Landi aliorumque ; dum effutunt , Catholicos inter abusus cæteros , ritus etiam Gentilium , Tonsuram ac rasuram Cle-

S. Hieronymus in cap. 44. Ezechiel.

Clericorum, & Religiosorum in veram Christi Ecclesiam introduxisse, nec eosdem a Gentium sacrificulis discrepare. Nemo enim non novit, in orbe terrarum nullam fuisse & esse religionem adeo ab altera diversam, quin in realiqua, aut quibusdam conveniant. Sic Judæis multa fuerunt cum Ethnicis communia; fuerunt nihilominus Sacerdotia illorum cum Religione toto caelo diversa. Hinc bene ait S. Augustinus: *Et si usus quarundam rerum similis esse videatur nobiscum cum Gentibus, longe tamen aliter his utitur, qui ad alium finem earum usum refert, & aliter, qui ex his Deo gratias agit, de quo falsa non credit.*

Lib. 20.
contra
Faustum
cap. 2.

Ratio horum omnium est, quod res adiaphoræ, cum externis actionibus, a fine & intentione boni vel mali titulum fortiantur. Ethnicorum ritus & cæremoniæ ad Idolorum & Dæmonum cultum referebantur; Catholicorum ad colendum unum verum Deum: hinc talis est differentia inter Gentiles ritus & Christianos, qualis est sacrum inter & sacrilegium, Deum inter & Diabolum. Accedit ad maiorem Novatorum nostrorum confusionem, quod eandem calumniam (quod Catholici scilicet Gentiles imitentur) olim objecerint Christianis Manichæi; uti & Vigilantius; quemadmodum legere est apud S. Augu-

stin. Lib. 20. contra Faust. cap. 4. & S. Hieron. Lib. contra Vigilantium: & hinc patet, quorum parentum filii sint heterodoxi, mali corvi, malum ovum.

Quod si quis causas scire desideret, quare ordinarit Ecclesia tonsuram Clericorum & rasuram; sunt hæc admodum piæ & perquam religiosæ.

1. Est, quod cum comæ laxiores levitatis cujusdam indicium sint & vanitatis, a qua longe Clerici abesse debent, tonsura illud removeat; & si viro ignominia est, teste Apostolo, si comam nutriat, magis Religioso & Clerico,

2. S. Augustinus l. de opere Monach. prope finem ait: *Patres Legis veteris merito gestasse longos capillos; quia mysteria redemptionis nondum erant revelata.* At nunc postquam Christus apparuit, convenit, ut qui Christo sunt consecrati, contrarium ablatione comarum significant.

3. Ut sciant personæ Deo sacræ ressecanda esse superflua: cum non deceat eos negotiis sæcularibus implicari. S. Augustinus in libro de contemptu sæculi ait: *Sacerdotes minimam partem capillorum in capite detinent; ut per eorum abrasionem se minimam terrenorum sollicitudinem agere designent: ut aptiores fiant ad contemplandum*
L. A. c. 8. celestia. Ratura enim capitis, ut Polydorus Virgilius ait de Isiacis, admonet Sa-
 cer-

sacerdotes, spretis omnibus humanis voluptatibus, oportere cælestia tantum meditari.

4. Abscissio capillorum, & abscissorum traditio erat olim in arrham & pignus fidei datæ: ita qui ad sortem divini ministerii admissus est, meminerit inter dispensatores Dei fidelis inveniri, & fidem Deo datam non facere irritam.

5. Nihil notius ex profanis Scriptoribus & sacris Literis, quam in signum luctus tonsuram solere fieri: hinc illa merito confertur Sacerdotibus, ut moneantur officii sui, quod est nunc, cum sponsus absit, lugere; inter Templum & Altare plorare coram Domino pro peccatis populi; portare manipulum fletus & doloris, ut cum exultatione percipiant mercedem laboris.

6. Signum humilitatis & contemptus sæculi tonsura est, ut qui illam præseferunt, pro Nomine JESU contumeliam pati non erubescant: nam circumtonderi comam, Græcis in proverbio idem est, quod ludibrio haberi.

7. Qui olim e naufragio enatabant, caput radebant. Etiam Clerici, & magis Religiosi magno Dei beneficio erepti sunt ex hoc sæculo nequam, furenti vitiorum Oceano; hinc non male eis tonsura convenit, securitatis symbolum.

8. Magnus denique Dionysius ait: Per tonsuram significari puram & candidam,

nullo vitio & artificio fucatam vitam, qualem fatentur omnes a Dei ministris transigi oportere.

Sed quæ causæ ordinationis in Concilio Toletano IV. factæ, ut Levitæ, Lectores, & Sacerdotes detonso superius capite, inferius solam circuli coronam relinquerent?

1. Ut meminerint Sacerdotes, cujus Domini sint ministri, & cujus membra sint capitis, scilicet JESU Christi spinea corona circumdati & crucifixi. Albinus Flaccus. V. Beda, aliique. Nec decere, delicatum membrum vivere sub coronato capite, ut notavit S. Bernard.

2. Fertur Simon Magus formam quadratam Clericorum suorum verticibus impressisse; nec inepte homo sordidus talem elegit, utpote angulos habentem: quia, ut scite D. Bernardus, *ubi angulus, ibi sordet*. At Ecclesia rasuram capitis rotundam suis præscripsit, quæ nec angulos nec sordet pateretur.

3. Ut memores dignitatis suæ, quæ Regalem etiam antecedit, omnia verba, cogitata & opera statu & officio suo metiantur. Regiis enim, id est excellentissimis operibus decorandum est Regale Sacerdotium. 1. Petri cap. 2.

4. Corona, ut dictum, symbolum est absolutæ perfectionis, quam si non habeant Sacerdotes, saltem sibi studeant comparare:

re : cum præcipue iisdem dicatur : *Estote perfecti , sicut & Pater vester celestis perfectus est.* Matth. cap. 5.

5. Signum gloriæ & Beatitudinis corona est. Hinc bene ait S. Hieronymus : *Coronam habent ab institutione scilicet Romana Ecclesia , in signum regni , quod in Christo expectatur ,*

LEVITICI

CAP. XIX. V. 28.

*Super mortuo non incidatis carnem vestram ;
neque figuras aliquas , aut stigmata faciatis .*

IN more habebant Gentiles aliqui , carnem suam in charorum funere incidere , quos inter Syri numerabantur , quorum vicini in terra Chanaan futuri erant Iudæi . De Scythis refert Herodotus , quod in Regum funere aurem sibi deciderint , circumciderint brachia , & sagittis sinistram manum trajecerint . *Barbarorum nonnulli , In consolat. ait Plutarchus , corporis partes abscindunt , lat. ad Ananæs scilicet & aures , reliquum quoque Pollonium . corpus placentes .* Et imprimis Gentes multam genibus infligere solitos , tradit Lucianus ; eo quod eam corporis partem *In lib. de* **vete**

veteres religiose observarent, & in ea miserationis & condolentiae sedem locarent, ut docet in Plautum Lambinus. Guilielmus Parisiensis lib. de legibus cap. 14. putat incisiones super mortuos factas esse propter placandum Deum inferorum; id quod confirmari potest ex eo, quod Servius ait in illud *Æneid.* 3. *Unguibus ora soror fœdans & pectora pugnis*: Varronis testimonio, mulieres in exequiis & tuctu ideo solitas ora lacerare, ut sanguine ostenso inferis satisfacerent.

Non tamen leguntur semper se ipsos Gentiles cruentasse, sed alios subinde, captivos præsertim & maleficos immolasse, & quasi inferias placandis inferis obtulisse, ut Tertullianus docet lib. de spectaculis. Sic apud Homerum *Iliad.* ↓ legitur in Patrocli funere 12 Trojanos juvenes bello captos mactatos esse. Postmodum gladiatores instituti sunt, qui inter se configendo caderent. Hinc ortum est, ut in funeribus potentum maxime frequentia gladiatorum exhiberentur spectacula. Vide Tertul. supra & Lipsium in *Saturnal.* lib. 1. cap. 8.

Videntur quoque incisæ aut inustæ carni notæ, fuisse Gentium quarundam, hominumque discernicula; & de iis Philo loquitur lib. de Monarchia; ubi ait, aliquos fuisse, qui alios non reciperent, nisi literis in corpus ferro ignito inustis, ut deleri non

non possent in confirmationem servitutis : Oleaster narrat, Arabes & Saracenos, & quosdam Insulares apud Insulas fortunatas degentes habuisse pectora, & brachia certis quibusdam notis & literis inscripta. Claudianus lib. 1. in Rufin. de Gelonis canit : *Membraque qui ferro gaudet pinxisse Gelonus*. Lucianus in l. de cultu Dæ Syriæ prope finem de Assyriis ait : *Certis notis compunguntur omnes, alii quidem in vola manus, alii autem in cervice; & inde est quod cuncti Assyrii notas inustas habent*. Sic mos erat viris primariis apud Babylo-nios, quorum sub eo nomine meminit Ezechiel cap. 23. notis carni impressis insigniri. Herodotus lib. 5. de Thracibus : *Punctis notatas esse frontes nobile judicatur, non esse notatas punctis, ignobile*. Cum igitur Judæi quasi in medio earum Gentium essent habitaturi, vetuit omnino Deus, ne superstitionis ejusmodi notis carnem suam inquinarent.

Celeberrimus præterea apud Ethnicos incisionum & punctiionum usus erat in Deorum sacrificiis. S. Augustinus lib. 12. de Civit. Dei cap. 27. ait : *Quod Sacerdotes Magnæ Matris in festo ejus sanguine se perfunderent, & brachiorum carnes inciderent*. Item Cyprianus in carmine ad Senatorem Apostatam de Sacerdotibus Cybeles;

Mente

76 *Explicatio Fabularum;*
Mente fremunt, lacerant corpus, fun-
duntque cruorem.

Refert Abulensis ex Judæorum traditione solitos Idololatrias accipere laminam auream inscriptam nomine Idoli, & inflammata carnī suæ apponere; ut ita nomen illud carnī suæ profunde impressum gererent:

Pruden-
sius in
Martyrio
Romani.

Quamcunque partem corporis fervens nota
Stigmatit, hanc sic consecratam predicant.

Confirmat idem Primasius in verba Apostoli, ut contumeliis afficiant corpora sua, ad Rom. i. sibi characteres & uestiones infligunt in consecrationibus Idolorum. De sacrificiis, quæ Bellonæ fiebant, ait La-

Lib. i. de
falsa re-
lig. c. 21.

Etantius: In quibus ipsi Sacerdotes non alie-
no, sed suo cruore sacrificant; sectis nam-
que humeris, & utraque manu districtos gla-
dios exerentes currunt, efferrantur, insanunt.

Tertul. in Apolog. c. 9. Hodie istinc Bellonæ sacratus sanguis de femore proscisso in palmulam exceptus datur signatis. Nec viri solum, sed & feminae cruenta ejusmodi sacrificia peregere. Sic enim de quadam Tibullus canit:

Ipsa bipenne suos cadit violenta lacertos,
Sanguineque effuso spargit inepta Deam:
Statque latus præfixa vern, stat saucia
pectus,

Et canit Venus, quos Dea magna
monet,

A

A ritu tam nefando signandi carnem, & colendi Deum prorsus suos abstinere Deus voluit. Quale vero signum Christiani habere debeant, Petrus Damiani innuit Serm. de S. Cassiano : *Habeatur Christus in corde, habeatur & in operatione signaculum, ut ejus in nobis viva semper memoria & subrepentium cogitationum prava compefcat, & in his, quæ extrinsecus agimus, Crucifixi characterem evidenter exhibeat.* S. Gregorius Nazianz. oratione in Laudem Cæsarii ait : *Solam Dei, in quo, & in quem creati sumus, notam in nobis inustam feramus, tantum ab eo informati & impressi, ut ab illo solo noscitemur.* Monet denique Petrus Damiani opusc. 25. cap. 2. *Munditiam ut Sacerdos in se valeat præ cæteris possidere, stigma Sanguinis Christi studeat in se signanter exprimere, sicut dicite Apostolus : Ego stigmata JESU semper in corpore meo porto.*

LIB. NUMERORUM

CAP. XXI. V. 29.

Va tibi Moab, peristi popule Chamos.

PLura a Moabitis idola fuisse culta ex Scripturis constat: hinc incertum est;
an

an Chami idolum idem fuerit, quod Priapi. Idem fuisse censet S. Hieron. in Isaia cap. 15. ubi ait: *In Nabo erat Chesmo idolum consecratum, quod alio nomine appellatur Beelphegor.* Alii opinantur non improbabilius Chamum fuisse Bacchum: primo quidem, si radix consideretur nominis Chamos tam ex Græco, quam Hebræo. *Secundo* si ritus & ceremoniæ religionis Bacchicæ spectentur: Chamos enim a Græco *κῶμος* videtur derivari, quod nomen est comessationis convivalis & compotationis crapulosæ, ex qua in profundum somnum, a Græcis *κῶμα* nominatum, homines solent incidere. Ad hæc *κωμίζειν* idem fere est, quod petulantius se gerere & lascivire: tam nefandæ enim libidines, cantus, saltationes & tripudia fiebant in orgiis seu festis Baccho sacris, ut vel ipsa horreret impudentia cum iis in lucem prodire. Hinc, ut Plutarchus & Pausanias testantur, de nocte comessationes illæ solebant institui, Bacchoque sacrificium cum ingenti bacchantium per vicos & compita, præcipue scæminarum, insania & clamoribus. Propterea etiam nonnulli volunt Chamos deduci a Syro & Chaldæo verbo Camas, quod occultare vel latitare significat, atque ita per Chamum intelligi Bacchum *νυκτέλιον*.

Si sensus spectetur historicus, forsan occasionem fabulæ dedit Moabitarum Pa-

triar.

eriarcha Loth, de cujus ebrietate & incestu Liber Genesis meminit cap. 19. Alii quidam Mythologi, cum Saturnum velint Noemum fuisse, inferunt quibusdam ex rationibus Chamum sive Jovem Hammonium fuisse Cham Noemi filium. 1. quidem ob cognationem nominum: parum enim inter se differunt Cham & Chamos. 2. Jupiter Græce Ζεύς nominatur, quod idem est ac calor & fervor: ita & Cham calidum vel calorem significat. 3. Jupiter fingitur fuisse tertius Saturni filius: sic Cham fuit Noemi natur minimus, ordine tertius. 4. Jupiter cœli Dominus censebatur; Cham Dominus fuit Africæ, quæ cum supra verticem habeat Solem cum Planetis, putatur cœlo vicina. Sic de Lybia canit Lucanus lib. 9. *proxima cœlo est, ut probat ipse calor.* 5. Multi loco Ham scribunt Cham, & a priscis Ægyptiis Chamia Ægyptus nominatur. Quidam non sine fundamento asserunt, Gentiles per cultum illum, qui Baccho & verendis ejus publice deferebatur, & apud S. Augustinum lib. 7. de civitate Dei c. 21. descriptus legitur, voluisse indicare virtutem generativam, & naturæ fecunditatem, eamque ut divinam commendare ac venerari; in eo summopere reprehensibiles, quod simplicem rerum naturalium veritatem sub involucris tam obscœnis texerint, & tam nefandis ritibus celebrarint.

In

In sensu Tropologico populus Chamos
sunt omnes dediti comestationibus & e-
brietatibus, *quorum finis interitus, quorum*
Deus venter est, & gloria in confusione i-
psorum.

NUMERORUM

CAP. XXV.

*Fornicatus est Populus cum filiabus Moab;
qua vocaverunt eos ad sacrificia sua,
at illi comederunt, & adoraverunt
Deos earum, initiatusque est
Israel Beelphegor.*

BAlac Moabitarum Rex timens sibi ab
Israelitis per Balaam ariolum cogita-
bat maledictionibus eos subvertere; sed quod
vi maledictionum Balaam non potuit, per
mulieres effecit. Cum enim reverti jam
vellet ad populum suum, ajebat Regi Ba-
lac: *Dabo consilium, quod populus tuus*
populo huic faciat extremo tempore. Sed
quod illud consilium? explicat illud Orig.
homil. 20. in Lib. Numer. ita loquens in
persona Balaam ad Balac Regem: *Populus*
hic non propriis viribus, sed Deum colen-
do vincit, & pudicitiam conservando. Si
vis eum vincere, primo eorum pudicitiam
deji-

dejice, & sponte vincentur. Sed adversum hæc non virtute militum, sed mulierum decore pugnandum est, nec armatorum vigore, sed mollitie scæminarum. Electam congrega speciem puellarum, ludentes pedibus eant, manibusque plaudant. Forma vincit armatos, ferrum pulchritudo captivat, vincentur specie, qui non vincuntur prælio. Dictum, factum. Credibile tamen est, prius Judæos invitatos fuisse a mulieribus ad sacra sua, ad comedendum idolothyta, ad adorandum Beelphegoris Idolum specie tam execrabili & pudenda propositum, ut vel solo aspectu cultores suos ad omnem facile turpitudinem incitaret. *Vocaverunt eos ad sacrificia sua; quæ non ex minima sui parte in epulis & fornicationibus consistebant. Comederunt, & adoraverunt Deos earum, initiatusque est Israel Beelphegor.*

Communior sententia est, fuisse Idolum illud Priapi, satis ex Etymo turpitudinem suam indicantis: idem enim Hebræis est, quod os nuditatis, vel Dominus hiatus aut aperturæ. Nonnulli deductum esse volunt a Græco πρίην, quod ardere aliquando significat, & accendere. Hinc & flammeo habitu ornatus cernebatur, dextera sceptrum tenens &c. Obscœnam ejus effigiem cum abominandis ritibus apud Oleastrum descriptam habes in caput 25, Numerorum,

NB. Ruber ab Horatio & Ovidio vocatur.

ego referre illa supersedeo, ne contingat, castas lectoris aures rerum obscenitate verberari. Ad hæc tricubitales statuas habebant Gentiles Priapo sacras ex variis materiis, quas in ejusdem honorem ex collo suspensas circumferebant, quasi amuleta contra maleficium. Credebant quoque per fornicationes & adulteria, velut opera Beelphegori gratissima, se sublata sterilitatis infamia numerosa prole donandos; id quod non parvum erat Judæis illicium ad superstitionem pronis, Priapi sacra lubentius celebrandi. De ejusdem Sacerdotibus scribit Athenæus lib. 14. quod agerent ebriorum personam (Priapum enim Veneris & Dionysii seu Bacchi filium fuisse ait Diodorus) coronati manicas habebant floridas, & semialbis tunicis utebantur, subtili ad talos usque amiculo tecti, cum silentio per posticum egrediebantur; & ubi in mediam pervenissent saltationem, ad Theatrum conversi dicebant: *Recedite, Deo locum date.* Matronæ Idolum illud circumferebant, quæ præterea tam indecora committebant, ut honestus animus vel cogitare eadem horreat, nedum profari. S. Hieronymus Deum illum maxime a mulieribus cultum fuisse asserit.

*L. 1. advers.
Jovinian.*

Originem suam ejus sacra in Ægypto primum habuere, quæ dein in Græciam propagata; a Romanis postmodum coopta-
ta,

ta, diffusaque adeo & in tantum excrevere, ut etiam post adventum Christi non defuerint, qui sacris ejusmodi abominandis initiati se turpissimo Phegori manciparent; uti ex detestabili Gnosticorum secta apud Epiphanium licet colligere, quos mirum non est rebus obscœnissimis fuisse deditos, cum superstitionis Gentilium principiis eorum Religio inniteretur. Vere dixit Sapiens cap. 14. *Inizium omnis fornicationis est exquisitio Idolorum.*

LIBER DEUTERONOMII

C A P. IV.

Ne forte decepti faciatis vobis sculptam similitudinem aut imaginem masculi vel feminae. v. 16. Similitudinem omnium Jumentorum qua sunt super terram, vel avium sub calo volantium. v. 17. Atque Reptilium, qua moventur in terra, sive piscium, qui morantur sub terra in aquis. vers. 18.

PROhibentur hic primo fieri imagines hominum vel Angelorum, in eo loco, habitu, situ aut statu, qui ad honorem vel cultum aliquo modo referri possit, & occasionem præbere Idololatriæ;

Masculi & fœminæ similitudines vetantur, Deorum præsertim & Dearum, Gentium more sculptæ vel depictæ, ut Jovis & Junonis, Veneris & Dionysii, Asthartes & Priapi, Apollinis & Dianæ &c. ne eosdem adorarent: quanquam ipsa naturalis ratio dictat, naturæ divinæ sexus diversitatem non posse convenire; ut pulchre ostendit Arnobius lib. 3. adv. Gentes: *Adduci, hoc ut credamus, non possumus, immortalē illam, præstantissimamque naturam divisam esse per sexus, & esse partem unam mares, partem esse alteram fœminas.* Quem quidem locum plane jam dudum homines pectoris vivi tam Romanis literis explicare, quam Græcis, & ante omnes Tullius Romani disertissimus generis. Probat deinde, ex diverso sexu inferri necessario, Deos habere corpora, quæ ad generationem servire possint; immunditiis visu, audituque horrendis Deas immisceri. Quæ quam absurda sint, & ab omni divinitate aliena esse debeant, quis non videt?

Quatuor rationibus oppugnat Lactantius sexum Deorum: Lib. 1. de falsa Relig. cap. 8. & cap. 16. 1. *Diis, si sunt immortales, quid opus est altero sexu? cum hic tantum successioni servire debeat. Deo autem, qui sempiternus est, neque alter sexus, neque successio necessaria est.* 2. Si filios

filios Deos habere velit , quis dubitet , quin is , qui omnipotens est , sine usu & opera famina possit filios procreare? cum etiam animalcula quædam sine matre e lignis & foliis nasci observemus . 3. Ex duobus sexibus alter fortior , alter infirmior est : Imbecillitas autem non cadit in Deum , ergo nec famineus sexus . 4. Quis tandem erit genitorum Deorum immortalium numerus? nec enim vincuntur ab hominibus fecunditate . Nisi forte arbitramur non generandi causa , sed tantummodo capiendæ voluptatis duos esse sexus Deorum , & ea exercere , quæ homunculos & facere & pati pudet .

Secundo . Vetantur jumentorum & pecudum imagines , quas divino cultu Gentiles prosequiebantur , facere . Sic Ægyptus passim Vaccam colebat , Memphis taurum ; Delphi lupum , Sais ovem , Bubastus canem , Mendes hircum , mustelam Thebæ , Heracliotæ Ichneumones , Athribis Mygalim seu murem araneum &c. Jure Paschalis vetus Poeta Christianus hominum illorum arguit & deplorat cæcitatem ita canens lib. 1.

Hec miseri ! qui fana colunt , qui corde sinistro

Religiosa sibi sculpunt simulacra , summeque

Factorem fingunt , & qua fecere , verentur :

86 *Explicatio Fabularum,*

*Quis furor est, qua tanta animos de-
mentia ludit?*

*Ut volucrem, turpemque bovem, tortum-
que draconem,*

*Semihominemque canem supplex homo pro-
nus adoret.*

Tertio. Similitudinem avium Deus pro-
hibuit: nam & illas ab Ethnicis in Deo-
rum numerum relatas fuisse constat. Græ-
ci gallos coluerunt, Thessali ciconias,
quas occidere apud eos nefas erat, Latini
picos, Romani anseres, Syri columbas,
Tanitæ accipitres, Alexandrini Ibim, a-
lii Ægyptiorum gryphones, aquilas, &
vultures, quibus ad auspicia maxime usi
sunt.

Quarto. Imagines reptilium, quæ mo-
ventur in terra. Trogloditæ testudines Ve-
neri consecratas, teste Plinio, colebant &
adorabant. Ægyptii araneos, cantharos,
scorpiones, scarabæos. Accaronitæ mures
& vespas. Serpentem Græci, Phœnices,
Ægyptii, Romani, & imprimis celebrem
illum serpentem Epidaurium, qui per lega-
tos Epidauro accersitus Romam dicitur pe-
stilentia liberasse; sed *per inhabitantem sibi*
Demoniarcham, ut bene notavit Lactan-
tius libro secundo capite decimo septimo.

Quinto. Similitudinem piscium. Nam
& pisces divino cultu Ægyptii honora-
bant; imprimis tamen anguillam & del-
phi-

phinas, quos Neptuno voverant: item Crocodilum, quem Æsculapio attribuere. Specialiter illum coluit urbs Ægypti Arsinoe; Oxyrynchus vero lucium Niloticum. Eandem piscibus venerationem præstiteri Insulæ Phari incolæ, & civitatis Syenes sive Thebaidis, uti & Syri, de quibus Xenophon testatur lib. 1. de exped. Cyri, in qua meminit cujusdam fluminis Chalum nomine, in quo magni erant pisces & mansueti: Eos, inquit, Deos arbitrantur Syri, nec injuria illos affici patiebantur. Ab aliis gentibus Neptunus, Thetys, Tritones, Nereides, Najades Dii, Deæque aquei colebantur, quoad superiorem partem in forma hominis, quoad inferiorem vero piscis speciem referebant. Amphibia quoque animalia, ut ranas, mergos, anates Deorum loco habuit & coluit Ægyptus, quæ ut omnis superstitionis principium, ita & compendium meretur nominari.

Originem cultus animalium refert Eusebius Cæsar lib. de præpar. Evang. cap. 1. Dicunt alii ab Ægyptiis ea animalia, quorum imaginem victoriosi duces gestarunt, quasi offensionem belli ad hostes ipsi repulissent, ad Deos relata fuisse. Ridiculam causam affert Natalis Mythologus lib. 6. cap. 21. cum gigantes cælum oppugnarent, Typhœum Diis primo tam terribi-

Lib. I.

lem apparuisse, ut omnes in Ægyptum aufugerint, & in varia ibidem animalia fuerint transmutati. Similem fere refert Diodorus Siculus: Deos, cum ab initio pauci essent, prævalente hominum malorum multitudine, in animalia se transformasse, aut potius sub eorum formis latuisse; postmodum vero, ubi rerum potiti essent, iussisse, ut illas bestias venerarentur homines, quarum beneficio latuissent. Plures alias adducit causas prædictus Author, quarum verisimilior est tertia, utilitas scilicet ab animalibus proveniens: quorum enim beneficio vel a malis liberi erant Gentiles, vel bonis fruebantur, colebant summopere Deos esse censentes, & *gratia retributionem maximum vite præsidium esse judicantes*. Ne igitur in errorem similem laberetur Hebræus populus, omni animalium sculptura aut pictura eidem divina lege interdictum fuit, quam tam sancte legitur observasse, etiam post adventum Christi, ut cum Herodes supra maiorem portam Templi dedicasset donum pretiosum, Aquilam auream magni ponderis, claro meridie ascendens aquilam inde detraxerit, & inspectante congregata in templum multitudine securibus conciderit.

Ioseph lib.
17. Anti-
qu. cap. 8.

Contra eandem legem peccari a nobis Catholicis obganniunt hæretici. Sed reje-
 cta

Etā spretaue eorum calumnia, (cum nulum modo sit Idololatriæ incurrendæ periculum) magis attendimus & sequimur verba secundæ Nicænæ Synodi & Generalis septimæ Anno 789. habitæ: *Ex legali, prophetica, Apostolica, Patrumque traditione instructi sumus, hanc esse veritatem, pietatemque, ut in sacris Ecclesiis veneranda imagines colantur; fuerunt enim factæ, ut S. Gregorius Papa ait, ad edificationem imperiti populi, ut nescientes literas ipsam historiam attendentes discerent, quid actum sit, & suum inde spirituale emolumentum caperent. Solennitates enim (& picturæ) Martyrum exhortationes sunt Martyrorum; ut imitari non pigeat, quod celebrare delectat.*

Lib. 7. Epist. 109.

S. August. serm. 47. de Sanctis.

DEUTERONOMII

CAP. XIII. V. 2. 3.

Si surrexerit in medio tui Prophetes; qui prädixerit signum atque portentum, & euerit, quod locutus est, non audies verba Prophetæ illius.

VEra & Divina prophetia est certissima futurorum præscientia, non talium, quæ in eventu suo a causarum natura-

turalium serie dependent, sed quorum nullum in rerum natura argumentum est, vel a libera tantum voluntate proveniunt ad bonum finem, ut malorum correctionem, vel bonorum solatium semper ordinata. Quodcumque aliud vaticinium his signis destitutum falsum est, aut si fortuito verum sit, malignum est. Cum Hananias Pseudo-Propheta tam audacter ausus esset asserere: *Hac dicit Dominus exercituum Deus Israel*, omnia scilicet vasa a Nabuchodonosore ablata brevi ad domum Domini referenda esse: respondit *Isaias*: *Propheta, qui vaticinatus est pacem, cum venerit verbum ejus, sciatur Propheta, quem misit Dominus in veritate.* Et talem sine dubio audiendum esse, nemo negaverit. Quid igitur causæ, quod in præsentis textu dicatur: *Si surrexerit in medio propheta, qui pradixerit signum atque portentum, & evenerit, quod locutus est, non audies verba propheta illius.* Ex duplici capite ejusmodi prophetia damnatur: tum, quod vere talis non sit, cum ex conjectura, vel ex mera naturalium scientia oriatur. Tum, quod ad finem pessimum dirigatur: additur enim in textu nostro: *Et evenerit quod locutus est, & dixerit tibi; eamus & sequamur Deos alienos, quos ignoras, & serviamus eis, non audies verba Propheta illius.* Eo autem spectabant omnia

omnia Gentilium oracula & vaticinia, ut
 in superstitione & cultu Dæmonum magis
 homines confirmarentur. Et cum vix ul-
 lum sit adeo certum Divinitatis signum,
 quam Prophetia (Isaias enim cap. 41.
 ait: *Annuntiate, qua ventura sunt in futu-
 rum, & sciemus, quia Dii estis vos*) hinc il-
 lam æmulari Dæmones nullo non tempore
 per augures, ariolos & pythones labora-
 runt, ut hominibus noceant, quos nesciuntur
 a cula & notitia vera Majestatis avertere,
 ne immortalitatem possint adipisci, quam
 ipsi sua nequitia perdididerunt, ait Lactan-
 tius, subjungens: *Quoties alicui populo vel*
urbi secundum Dei statutum boni quid im-
pendet, illi se id facturos, vel prodigiis,
vel somniis, vel oraculis pollicentur; si sibi
templa, si honores, si sacrificia tribuantur.
 Quæ tamen illorum promissa subdola ple-
 rumque sunt, recta & ambigua: Nam si-
 ve illud periculum, quod imminet, vitari
 potest, videri volunt id placari avertisse;
 si ve non potest, id agunt, ut propter con-
 temptum accidisse videatur. Et hinc non
 parum crevit vaticinationum Ethnicarum,
 & oraculorum æstimatio: quod qui visi
 sunt illa consulere & venerari, felicitatem
 subinde sint consecuti: qui vero neglexe-
 runt & aspernati sunt, infelicem successum
 in se & negotiis suis non raro sint exper-
 ti. Sic fertur Claudius Appii cæci filius,
 cum

Lib. 2. de
 Orig. error.
 cap. 17.

cum navalem expeditionem contra auguria parasset, magno Reipublicæ damno cladem accepisse. Item Crassus contra Parthos bellum gerens inauspicatum, cum filio suo captus, & a Spurina Regis præfecto occisus toto cum exercitu periisse. Habuit quoque infelicem expeditionis suæ successum P. Claudius Consul, cum pullos malum ominantes submergi jussisset. Quintus Flaminius, quod neglectis Sacris inauspicato ad exercitum profectus esset, cum Hannibale ad Trasimenum lacum Perulium conflicturus 15. Romanorum millia perdidit, 20. millia fugata, & sex millia capta.

*Valerius
Max. lib.
1. de prodig.
& Cicerone
l. 1. de divin.*

Ejusmodi mala cum Gentiles adverterent iis evenire, qui Augurum vaticinia contempsissent, non parum in superstitione sua stabiliti sunt, ut illa quasi divina respicerent & observarent oracula, ne per eorum neglectum & contemptum Deorum iram & vindictam incurrerent. Præsertim cum persuaderent hominibus, tot calamitates, quæ ex alia facile causa oriri poterant, vel ideo solum contigisse, quod auguria sua contemnerentur. Et hæc erat impostura maligni spiritus nequissima, qua subinde etiam usus est contra Christianos, persuadendo pariter Ethnicis, quidquid malorum paterentur, ex Christi fide, quæ contemptum Deorum invehret,

pro-

provenire. Hanc calumniam fuse refutam vide apud Arnobium lib. 1. adv. Gentes.

Negandum interim non videtur, veras apud Gentiles prophetias fuisse Sibyllarum imprimis: tantum enim abest, ut sint in Religionis nostræ præjudicium, ut sint potius in stabilimentum illius maximum. Imprimis enim vita earum fertur fuisse laudabilis, nec iis sceleribus, impudiciis scilicet, quibus idola Gentium coli solebant, contaminata. S. Hieronymus de iis ait: *Quarum insigne virginitas, & virginitatis premium divinatio*. Dein doctrina eorum ad fugam mali & amorem boni, & cultum unius veri Dei dirigebat. Lactantius postquam lib. 1. de falsa relig. cap. 5. omnes Sibyllas enumerasset, de iis ait: *Omnes hæ Sibylla unum Deum prædicant*. Nec obscura aut dubia, sed tam manifesta de rebus post aliquot annorum millia futuris, de resurrectione v. g. de iudicio, & imprimis de Christo in libris suis ediderunt vaticinia, ut vix ullum de Christo clarius in omnibus veteris Testamenti Prophetis possit inveniri. Non igitur vetat Deus omnibus Gentilium prophetiis credi, sed iis, quæ ab idololatriæ ritu superstitioso eliciuntur, & ad cultum Deorum promovendum evulgantur.

DEU.

DEUTERONOMII

CAP. XVIII. V. 10. & 11.

*Nec inveniatur in te qui lustrat filium suum,
aut filiam ducens per ignem &c.*

DE hac lustratione agetur lib. 4. Regum cap. 16. *Aut qui ariolos sciscitetur*. Ariolatio latissime sumpta omnem complectitur divinationem. Stricte sumpta sic ab Isidoro describitur: Arioli vocati propterea, quod circa aras idolorum nefarias preces emittant, & funesta sacrificia offerant, iisque celebritatibus Dæmonum responsa accipiant, ex vivæ adhuc victimæ observatione, ut notat Simon Majolus; dum produceretur, sisteretur ad aram, attrectaretur, & vinum ei affunderetur. Hinc legimus Numerorum cap. 23. Baalam ariolum, ut eum Scriptura nominat, jussisse Balac Regi, septem aras ædificari, & adferri victimas, ut rite suo ariolandi officio fungi posset. Et ad quemcunque alium locum a Rege Balac duceretur, septem aræ prius cum victimis debebant præparari, quasi nulla sine aris & victimis fieri posset ariolatio. Hæc interdum fiebat e conspectu ignis victimarii,
utrum

utrum in unam coiret pyramidem, quod
prosperum; an vero divideretur, quod
adversum portendebat. Quis ignis calor,
color, splendor, ascensus, strepitus &c. an
cito victimam comprehenderet, vel extin-
gueretur. Subinde fumus sacrificii obser-
vabatur, teste Papin. lib. 10. Thebaid.
ubi postquam pyromantiam Tiresiæ descri-
pserat, addit eum ore fumum fatidicum
hausisse.

*Ille coronatos jam dudum amplectitur
ignes,*

*Fatidicum sorbens vultu flagrante vapo-
rem.*

Ejusmodi Capnomantia Judæos usos fuisse;
& considerasse, an fumus, qui ex victi-
marum sacrificio ascendebat, rectus ascen-
deret, an in obliquum vergeret, docet
Theophylactus in Osee cap. 4. *Qui ob-
servet somnia atque auguria.* De his actum
Levitici cap. 19.

Nec sit maleficus: Id est, qui proximo
damnum causet ope Dæmonis, ad hoc
promptissimi, ut homini noceat: nam, ut
Synesius loquitur, calamitates mortalium
convivia sunt malorum Dæmonum: no-
cent autem hominum ministerio variis mo-
dis: pulveribus v. g. herbis, festucis, un-
guentis albis, halitu, afflatu, & verbis,
ut Virgilius ait: *Miscueratque herbas, &
non innoxia verba.* Item Seneca de Me-
dea:

dea: *Addit venenis verba non istis minus.*
Item Philtris, de quibus Ovidius:

*Nec data profuerint pallentia philtra
puellis:*

*Philtra nocent animis, vimque furoris
habent.*

Mirum alicui videri posset, quod Deus permittat tam horrenda subinde fieri, & inferri maleficia, etiam innocentibus & pueris, ut constat experientia, quam Ovidius confirmat ita de maleficis cantans:

*Nocte volant, puerosque petunt nutricis
egentes,*

Et vitiant cunis corpora rapta suis.

Sed certum est hæc omnia iustis de causis a divina permitti providentia; quas qui scire volet, legat Delrio lib. 3. disquisitionum Magic. part. 1. quæst. 7. ubi duodecim causas iustæ permissionis enumerat.

Nec incantator. Septuaginta vertunt, nec incantans incantationem. Talis dicitur, qui susurris quibusdam & mussitationibus mira quædam efficit. Sic Nemefianus Bucolicorum scriptor Eclog. 4. de quodam ait:

*Cantavit, quo Luna tremit, quo rumpitur
anguis,*

*Quo currunt scopuli, migrant sata,
vellitur arbor.*

Miranda prorsus ad speciem fecisse legitur Simon Magus Dosithei discipulus, quæ
ita

ita breviter Glycas part. 2. enumerat :
*Effecit , ut statua ambularent , idemque in
 ignem profiliens ; non tamen urebatur .* In
 aera subvolabat, ex lapidibus panes facie-
 bat, alias atque alias in formas migrabat,
 facies aliquando binas habebat ; januas
 clausas sponte sua faciebat aperiri, vasa
 domestica ad usus hominum ultro moveri,
 umbras multas semetipsum præcedere, quas
 mortuorum animas esse dicebat &c. Non
 minus stupenda narrantur de Apollonio
 Thyanæo, qui ideo pro divino Propheta
 ab omnibus Principibus & populis est ha-
 bitus ; Diabolo hanc in animis hominum
 opinionem inferente & confirmante , ut
 Christi authoritatem diminueret. Quid di-
 cam de magicis operibus Manethonis ? qui
 tantus fuit ejusmodi imposturarum artifex,
 ut semper palam irriferit Apollonium ,
 quasi non perfecta ejus doctrinæ peritia in-
 structum : oportebat enim (ut aiebat) eum,
 sicuti ego soleo, solis verbis perficere quæ
 vellet, non operum effecttionibus ad ea uti.

*Cedrenus
 in historia-
 rum Com-
 pend.*

Tales execrandas incantationes nunquam
 fieri sine damno rerum spiritualium , cer-
 tum est, uti & non raro cum ingenti cor-
 poralium , per simulacra , imagunculas ,
 characteres , corpora ritu solenni efficta ,
 plantas , animalia , herbas , metalla &c.
 magicis carminibus ad maleficium destina-
 ta. Sic Ovidius canit :

G

Car-

*Carminē laesa Ceres sterilem vanescit in
herbam,*

Deficiunt laesi carmine fontis aquae.

Illicibus glandes, cantataque vitibus uva

Decidit, & nullo poma movente fluunt.

Quod dolendum summopere, in nefariis his negotiis, est, quod sacrosancto Dei nomine, aliisque rebus sacris abutantur tales venefici ad praeſtigias Diaboli contegendas, ut ab iis simpliciores omnem vim proficisci ac pendere arbitrentur. Illud vero quam execrandum sit, videre est apud Simonem Majolum colloquio 3. de sagis.

Nec qui Pythones consulat. Septuaginta vertunt, ventiloquos. De his agetur lib. 1. Reg. cap. 28. vers. 7.

Nec divinos. De illis dictum alibi.

Aut qui quærat a mortuis veritatem.

Hæc veritatis inquisitio non videtur a Gentilibus facta sine Necromantia, quam certis locis, quæ putabantur esse inferni ostia, ut in occiduo Galliarum litore apud Tarentum, Avernum, Cimmerios, & Heracleam certis ritibus exercebant, quibus se putabant manes elicere, ut futura aut plane incognita perciperent. Modus ille evocandi accurate a Seneca describitur in Oedipo actu 3. per versus viginti & unum, in quibus ritus & ceremoniarum ad 25. circiter enumerantur, quibus usus est Necroman-

manticus, ut rerum occultarum cognitionem a mortuis posset percipere. Diabolici ejusmodi commercium omnino Judæis omnibus Deus prohibuit; cum veritas ad salutem necessaria per Scripturam & missos a Deo Prophetas sufficienter nobis innotescat. Alia e contra veritatis inquisitio de arcanis & futuris rebus inutilis & prorsus nociva est, præsertim ea, quæ per mortuorum animalium fibras & defunctorum animas expectatur. Quantus error! magis credere mortuorum nutibus, quam sapientiæ plenis vivorum discursibus? & in pecudum mortuarum visceribus quærere, unde utiliter vivi homines mortis casus possint evitare? Stultum hunc errorem miratur S. Chrysologus serm. 5. dicens: *Occidebatur pecus, ut quod vivum nihil scierat, divinaret occisum, & loqueretur ex fibris mortuum, quod nunquam fuerat ore prolatum.* Saul expertus est, quam sit damnosa inquisitio veritatis ex mortuis. Sperabat aliquod vitæ solatium a Samuele ab inferis excitato percipere; sed quid audiit? *Cras tu & filii tui mecum eris.* Lib. Reg. 1. cap. 28. Ista retributio, ut qui neglecto vitæ fonte, mortuos interrogat, responsum mortis accipiat.

DEUTERONOMII

CAP. XXIII. V. 17. 18.

Non erit meretrix de filiabus Israel, non offeres mercedem prostibuli, nec pretium canis in domo Domini Dei tui.

A Pud Septuaginta additum legitur, non erit *τελεσφόρος* de filiabus Israel, quod S. Hieronymus explicat: *Non erit vestigial pendens*, Epist. 146. Quod appositum videtur 70. interpretibus ad textum melius explicandum: *τελεσφόρος* enim idem est, quod meretrix, quæ se Veneri & Priapo consecrans vestigial eis solvit ex impudicitia. *τέλος* enim idem quod tributum. Inde telonium. Ita S. Cyrillus lib. 15. de adorat. Sic refert Suetonius cap. 40. & Dio lib. 59. tributum aliquod a meretricibus exegisse Caligulam.

Τελῆν etiam significat initiare: inde forsitan proverbium: *A tela ordiri*. Hinc Theodoretus *τελεσφόρον* explicat initiantem: nam mulieres Gentilium, quæ idolis consecratæ erant ad quæstum meretricium in honorem Idolorum, dum viros admitterent, censebantur eos quodammodo Veneri vel alteri Idolo initiare. V-

tuit

tuit autem hoc textu Deus, ne initiatio ejusmodi apud populum suum introduceretur vel permitteretur. Invaluerat enim mos ille execrabilis apud Gentes, ut pecunię ex quęstu meretricio collectę idolis offerrentur. Apud Rhodiginum lib. 8. cap. 11. legitur Babylonicis mulieribus morem fuisse ex oraculo quodam, cum hospitibus suum habendi negotium, turba & cultu plurimo apud Aphrodisium commeantibus, Thominge singulis coronatis; qui vero admittebatur, posito super genibus argento quantum videretur, mulierem mox longe a fano abductam conveniebat, idque argentum Veneri sacrum erat. Strabo lib. 12. ait de meretricibus, quę sacrę habebantur, Comanis urbe Pontica: *Magna ibi mulierum multitudo, quę corpore quęstum faciunt, quarum complures sacra sunt.* Et paulo post de meretricibus Corinthiacis: *Corinthe erat mulierum multitudo, quę Veneri erant sacra,* quas lib. 8. sacras ministras nominat, & earum supra mille asserit fuisse.

De Phoenissis mulieribus refert Athanasius in orat. contra Idola: *Quod ante ea prostituerentur, dedicantes Numinibus quęstum suum: persuasa meretricatu eadem propitiari.* Idem factitasse ait virgines Babylonicas, Syras, Medas, Persicas, Lydias, aliasque. Herodotus in specie de

Babyloniis ait lib. 1. *Omnibus mulieribus indigenis commune est semel in vita ad Veneris templum desidentibus cum externis viris consuetudinem habere.* Et paulo post ait: *Cum semel illic confederint, domum non regrediuntur, nisi prius ab hospitum aliquo pecuniam acceperint, & cum eodem rem habuerint. Hospitem autem illum, qui pecuniam obtulit, dicere oportet: tanti ego tibi Deam Mylittam imploro.* (Mylittam enim Assyrii Venerem appellant.) *At vero pecuniam illam, quantulacunque sit, non est fas rejicere: siquidem in sacrum convertitur usum; neque mulieri etiam permittitur hospitem aliquem repudiare, sed quisunque is est, qui pecuniam objecerit primum, hunc illa sequitur extra delectum.* Herodotus, *Quod si quædam fuisset præterita, fannis & opprobriis excipiebatur, ut testatur Propheta Baruch cap. 6. vers.*

43. *Causam tam nefandi cultus Veneris assignat Lactantius lib. 1. de falsa relig. cap. 17. Quid loquor obscenitatem Veneris omnium libidinum prostituta, non Dearum tantum, sed & hominum? qua prima, (ut in Historia sacra continetur) artem meretriciam instituit, Auctorque mulieribus in Cypro fuit, ut vulgo corpore questum facerent; quod idcirco imperavit, ne sola præter alias mulieres impudica & virorum*

appetens videretur. Etiamne habet hac aliquid Numinis? cujus plura enumerantur adulteria, quam partus: Authorem tam execrandi cultus ait Clemens Alexandrinus in adhortatoria ad Gentes fuisse Cynaram. Verba ejus sunt: Nec non & Cypria Veneris abstrusa illa initia pretereamus, quorum conditor indicatur Cynaras Rex fuisse; offerebant autem ii, qui initiabantur, nummum Veneri ut amica amatores.

Quis non abominetur religiones tam sacrilegas? quis non horreat tale pretium Deo offerre? & tamen talibus donis delectabantur Dii, Dæque Gentium, & statuas suas ex iis fieri ornarique gaudebant: Severus Imperator tributum ex questu meretricio collectum vetuit inferri ærario suo; eo quod nimis indecorum illud fore censeret. Quanto magis censendum est Deum horruisse ejusmodi pretium offerri in Ecclesia sua, & vetuisse Judæis omnibus, ne Phœnices vicinos, & Gentes alias non adeo remotas, in sacrilega initiatione & mercedis ejusmodi turpissima oblatione imitarentur? Ex his bene infert Hebræorum *Plato Lib. 2. de* Philo Judæus: Si turpiter acquisitos *Monarch.* nummos, qui per se carent crimine, ita Deus repudiaverit, uti & victimam, quæ defectum aliquem habeat; quanto magis a suo arceri vult sacrario Sacerdotes vi-

tio libidinis infectos & corruptos? oportet sane sacrificaturum dispicere, ut mens ejus integra sit magis etiam, quam victima.

Nec pretium Canis. Augustinus, & alii censent hic loqui Deum de primogenito canis, qui, nisi facta hic fuisset exceptio, redimendus fuisset, & pretium Deo offerri debuisset. Sed videtur melius hic locus explicari de pretio impudentioris cujusdam libidinis, ad quam homines in propatulo expectarentur vel invitarentur; qualis ad fanum Veneris, ut ex Herodoto dictum est, fiebat: solet enim manifesta ejusmodi libido canina vocari; hinc Philosophi qui talem exercebant, dicti sunt Cynici, quorum sectam impudentiæ principem jure dixit Origenes Cynomyia notari. Quid enim potest aut esse impudentius, aut dici, quam publice in foro hominem cum muliere congregari, quemadmodum Diogenem fecisse legimus? Dum igitur vetatur a Deo, ne offeratur merces meretricis, videtur id intelligendum de occultis meretricibus; ne vero offeratur pretium canis, de scortis publicis, quales erant meretrices in sacris Gentilium prostantes.

Quid de eorum sacris boni sentiendum est, ait S. Augustinus, *quæ tenebris operiuntur, cum tam sint detestabilia, quæ proferuntur in lucem?* Vel hinc patet, quam vera Christi Ecclesia sit munda, non habens

bens maculam neque rugam, aut aliud huiusmodi, quam sit sancta & immaculata. Nam ut S. Bernardus ait: *Ex contrariis contraria aut placent amplius, aut displicent. Junge nigra candidis, & mutua collatione in proprio quaque colore distinctius enitescunt.* Hinc sicut Apostolus loquitur ad Rom. 3. *Veritas Dei in meo mendacio abundat in gloriam ipsius; Ita splendor illibatae castitatis Ecclesiae in immunditiis Gentium & hæreticorum abundat in gloriam ipsius.*

DEUTERONOMII

C A P. XVII.

Cum reperti fuerint, qui serviant Diis alienis, & adorent eos, Solem & Lunam, & omnem militiam cæli, educes virum ac mulierem, & lapidibus obruentur. Vers. 3.

EX Astrologiæ sinu profluxisse superstitionum omnium vanitates, locupletissimus author Varro testatur. Hinc vix ullæ fuerunt Gentes, quæ non stellas, quas exercitum aut militiam cæli Scriptura subinde nominat, pro Diis ac Deabus haberint & coluerint. Maxime tamen præ
stel-

stellis reliquis Sol & Luna divinis honoribus fuerunt affecta a cunctis fere Ethnicis; Ægyptiis præsertim, Chaldæis, Phœnicibus, Græcisque, ut testantur Plato, Diodorus Siculus, Plutarchus, aliique. De Lybiæ populis ait Herodotus in Melpomene, quod de Diis reliquis minime solliciti Soli tantum & Lunæ sacrificarent. Sol ideo sic dictus, quia solus siderum maximus, ut vult Cicero: hinc & Græce Apollo, id est non multus: a Persis & Massagetis pro Deorum maximo fuit habitus, quem in antro quodam, teste Lactantio, venerabantur: quia cum exortus est, obscuratis ceteris sideribus, solus apparet, & astrorum principatum obtinet, fons & author lucis, dominus diei, cor cæli, dux, princeps & moderator reliquorum luminum atque temporum. Hinc pulchre sic illum Ovidius quasi in solio sedentem cum satellitio suo describit 2. Metamorphos.

---- *Purpurea velatus veste sedebat
In solio Phœbus claris lucente smaragdis;
A dextra levæque dies, & mensis, &
annus,
Seculaque, & postea spatiis equalibus hora.
Verque novum stabat cinctum florente
corona,
Stabat nuda ætas, & spiceaserta gerebat,*

Sta-

Stabat & autumnus calcatis sordidus u-
vis,

Et glacialis hyems canos hirsuta capillos.
Fuit autem idem Sol cultus sub diversis
nominibus, v. g. Phaetontis, Serapidis,
Mythræ, Phæbi, Apollinis, Panis, Ti-
tanis, aliisque plurimis, ut fuscè demonstrat
Macrobius. Hinc Statius lib. 1. Thebaid.
ita Solem alloquitur:

---- *Sen te roseum Titana vocari*
Gentis Achæmenia ritu, sen præstet O-
srin

Frugiferum, sen Persei sub rupibus antri
Indignata sequi torquentem cornua My-
thram.

Ægyptii Horum vocarunt Solem; quod
derivatum videtur ab Hebræa voce Or,
quæ lumen significat, quod Sol fons sit
omnis luminis. Inde etiam juxta Macro-
bium horæ dictæ sunt, in quas totus dies
est distributus. Osiris Ægyptiorum idem
fuit, qui Horus, & a Græco ὀρίων vide-
tur nasci, quod æstare significat; figura
accipitris exprimi solebat: hæc enim avis
cum citissime volet, & de nocte etiam cla-
re videat, apta erat imago Solis. Ob
eandem rationem Heliopolitani Solem sub
specie felis colebant, Lycopolitani sub for-
ma lupi, eo quod hoc animal instar Solis
omnia raperet, consumeret, & acutissima
acie præditum de nocte etiam videret.

Hinc

Hinc lupus græce λύκος ἀπὸ τῆς λύκῃς, id est a luce, videtur dictus. Etiam Beli nomine cultus fuit Sol, non sine ratione, ut notat Servius: El enim Assyriorum lingua Solem significat, & hinc adjecta aspirationis nota Sol græce ἥλιος dicitur. Alii tamen Phœnicum lingua non Assyriorum Hel Solem dici putant; inde forsan Germanicum illud hell, id est, clarum & serenum.

*Lib. contra
Symmach.*

Quam longe vero & turpiter errarint Gentiles Solem pro Deo agnoscendo & colendo, pulchre ostendit Aurelius Prudentius, simul rationes in ligatum stylum colligens, quibus convincere conatur Solem Deum esse non posse, quod v. g. variis mutationibus esset obnoxius, certo spatio, & certis legibus adstrictus, minor cælo: *Area major enim, quam qui percurrit in illa &c.* Idem probat Lactantius lib. 2. de orig. err. cap. 5. & quanquam dicit Cicero lib. 2. de natura Deorum, quod qui Solem, Lunam, cæterasque stellas observat, *non indocte solum, verum etiam impie faciat, si Deos esse neget.* Nos vero, subjungit Lactantius, *& quidem constanter negamus, ac vos o Philosophi non solum indoctos & impios, verum etiam cæcos, ineptos delirosque probamus.* Quanto prudentius Naso, quam illi, dum sentit illa cæli lumina a Deo in servitium hominis

nis creata & instituta, ut horrorem tenebrarum depellerent?

Tot numero, talique Deus simulacra figura

Imposuit calo, perque atras sparsa tenebras

Clara pruinosæ jussit dare lumina nocti.
 Secundum dignitatis gradum inter stellas Luna obtinet, quasi una, a lucendo sic dicta; cum noctu inter ignes sola minores clarius luceat. In sacris literis noctis Domina appellatur, ut præesset nocti. Illi & Lib. Genes. Soli primus ædes Romæ consecravit T. cap. 1. 16. Tatius Sabinorum R. Sub Nocticulæ nomine culta fuit Luna in colle Palatino. Græci quoque solenni religione fana Soli & Lunæ erexerunt. Qualis victima Soli & Lunæ ab Ethnicis sit oblata, Lactantius meminit lib. 1. de fals. relig. cap. 21. Luna taurus mactabatur; quia similiter habet cornua; &:

Placat equo Persis radiis Hyperiona cin- Ovid.
ctum,

Ne detur celeri victima tarda Deo.

Suam præterea Ægyptii Lunæ leguntur immolasse; quoties vero Eclipsin patiebatur, toties stulti credebant Ethnicæ, beneficiis eam deduci; quare tunc pulsare tympana, & æra, ut Ovid. ait, auxiliaria insonare, ne magas incantatrices perciperet. Hinc Tibullus lib. 1. eleg. 8.

Can-

Lib. 4. Cantus & e curru Lunam deducere tentat;

Et faceret, si non ara repulsa forent.

Pater de Valle in Itinerario suo refert adhuc suo tempore Persas morem illum observasse. Luna Hebræis masculini est generis, Sol fœminini, ut apud Germanos *der Mond / die Sonn*. Etiam Idolum Lunæ formabatur specie viri tunicati & caputis induti erectis cornibus. Sacrificium illi fiebat, ut scripsit Philochorus, a maribus veste muliebri, a mulieribus virili indutis. Varia nomina juxta facultatum & Gentium varietatem consecuta est. Isis fuit Ægyptiorum juxta Tacitum, Græcorum Romanorumque Ceres & Proserpina juxta Diodorum Siculum. Gallorum Dis juxta Cæsarem. Hanc unam Deam sub diversis nominibus aut plures tam re quam nomine, cum inferna haberentur Numina, & maxime nocturnis delectarentur cæremoniis, non Germani solum, sed etiam omnis populus Borealis, noctem præ die, Hyemem præ æstate, Lunam præ Sole, & in Luna velut in Pantheo, & totius cælestis virtutis receptaculo & administratrice omnes Deos cæteros venerati sunt.

Lib. contra Aurelius Prudentius sic Lunam describit
Symmach. variis nominibus insignitam:

--- Cum Luna est, sublestri splendet a-
miectu:

Cum

*Cum succincta jacet calamos, Latoria
Virgo est:*

*Cum subnixa sedet folio, Plutonia conjux,
Imperitat furis, & dictat jura Megara.*

Sed quid sub his tribus nominibus vere cultum sit, bene notavit idem Poeta ita subcinens:

*Si verum quaris, Trivia sub nomine Da-
mon*

Tartareus colitur.

Quoad cæteras stellas, notum est imprimis ex sacris Literis, Deum exprobrasse Judæis aliquoties, quod mensam paraverint, id est sacrificarint numeris stellarum more Ethnicorum: sic enim Isaïæ cap. 65. interpretantur aliqui vocem *Gad*, quamvis alii Martem, alii Jovem, Mercurium alii intelligant. Sic apud Prophetam Amos cap. 5. iisdem exprobratur, quod sidera Deorum ad instar coluerint, ubi Saturnum aliqui interpretantur ab iis cultum fuisse. S. Hieronymus testatur ætate adhuc sua a Saracenis stellam Luciferum fuisse cultum. Cicero in lib. de natur. Deorum refert, quod Zeno Crotoniates, Alemaus, Parmenides &c. ex Platonis disciplina mundum mentem divinam esse putaverint, sideribus etiam & stellis errantibus divinitatem tribuerint. Quod si notionem illam consideres quam τὸ Θεὸς significat, astris convenire comperies. Si-

ve enim derives ἀπὸ τῆ θεῶσδαι, a vi scilicet inspiciendi atque spectandi, a nulla re ita se inspicere & spectari credebant Gentiles quam a stellis, Sole præsertim, de se ita apud Ovid. loquente:

*Lib. 4.
Metam.*

Ille ego sum, qui longum metior annum,

Omnia qui video, per quem videt omnia mundus.

Sive dicas quod originem suam Deus trahat ἀπὸ τῆ θεῖν, quod per omnia currat, ordinet & disponat, solis id stellis, & Soli præ aliis attribui debere censebant. Certe Plato in Cratylo affirmat, veteres astra sola pro Diis habuisse, quæ semper currunt. B. Greg. Nazianz. Orat. 4. de Theol. ad sempiternam refert agitationem τὸ θεῖν, ex quo θεός. Et adjungit tertiam notionem ἀπὸ τῆ αἰθεῖν, ab urendo scilicet & inflammando; id vero quam Soli sit proprium, nemo ignorat.

*Eusebius
Cæsar.*

Causa, quæ Gentiles induxit, ut in Deorum numerum stellas referrent, videtur prima fuisse earum pulchritudo & stabilis ordo. Hinc Cicero lib. 2. de nat. Deorum ait: *Hanc in stellis constantiam, hanc tantam, tam variis cursibus in omni aternitate convenientiam temporum, non possumus intelligere sine mente, ratione, consilio; qua cum syderibus inesse videamus, non possumus ea ipsa non in Deorum numero*

vero reponere. Altera causa videtur fuisse stellarum utilitas ob influxum earum in inferiora, vegetando eadem, vivificando, nutriendo & conservando. Lib. 1. de nat. Deor. refert Cicero, quod Perseus Zenonis auditor eos dixerit habitos esse Deos, a quibus magna utilitas ad vitæ cultum esset inventa, ipsasque res utiles & salutare Deorum esse vocabulo nuncupatas. Cum igitur tanta ex stellis in hunc mundum dimanent beneficia, & quoniam (loco citato pergit Cicero) non audes negare esse Deos, quid est quod te impediat aut Solem, aut Lunam, aut Mundum, aut mentem aliquam sempiternam in Deorum natura ponere? Ipsi qui irridentur Ægyptii, nullam belluam, nisi ob aliquam utilitatem, quam ex ea caperent, consecrarunt. Mirum proinde non est, Solem, Lunam & cæteros Planetas divino cultu Gentiles fuisse profecutos; cum ipsum hominem opus Planetarum esse censerent, eumque, dum concipitur & generatur, a Sole spiritum suum accipere, a Luna corpus, a Marte sanguinem, a Mercurio ingenium, a Jove desiderium, a Venere cupiditatem, a Saturno humorem; verbo, omnem ipsius felicitatem a sideribus dependere. Feliciores longe Christiani, ab ipsomet Christo instructi, quis bonorum omnium Author sit, & quomodo colendus: *Dominum Deum*

114 *Explicatio Fabularum;*
taum adorabis, & illi soli servies. Qui fe-
cit luminaria magna, Solem in potestatem
diei, Lunam & stellas in potestatem no-
ctis. Psalmo 135.

J O S U E

CAP. VIII. V. 33.

Percusseruntque cum Baal fœdus, ut esset
eis in Deum.

PER Baal antonomastice intelligitur
Deus Gentium: nunquam enim in
Scriptura de Deo vero dicitur. A Belo,
qui primus Gentium Deus fuit, suam vi-
detur originem trahere, idemque significat
quod Dominus. Tam Diis quam Deabus
nomen Baal convenire ait Theodoret. in
cap. 32. Jerem. & 70. Interpretes, qui ar-
ticulum generis fœminini subinde illi præ-
ponunt; quod ideo aliqui factum putant,
quod εἰκὼν sive imago subintelligatur. A-
pud Diodorum Siculum lib. 12. legitur de
Dea quadam, quæ Baalthis vel Belthis vo-
catur. Cum igitur nomen Baal commune
sit, adjungitur subinde illi nomen, unde
aliqua differentia desumatur, v. g. Beel-
phegor a loco, qui Phegor dicebatur.
Baal Tyrionum, qui teste Herodoto lib.
1. &

1. & Macrobi. lib. 1. Saturn. cap. 20. fuit Hercules. Baalgad secundum S. Hieron. idem, quod Deus fortunæ. Beelsamin, Dominus cæli. Baalberith, de quo in præsentī capite fit mentio, & idem ipse est cum Baal in præsentī textu; Berith enim Hebraice fœdus significat, ideoque sic vocatus, quod cum Baal fœdus Gentes inierint spe fretæ, se adversus Abimelech protegēdos, ideoque ad fanum illud, dum se subjugandos timerent, confugerant, simulque Abimelechum fani reverentia abterritum iri credebant. Sed aliter disposuit verus cæli terræque Dominus, voluitque, ut ibi perirent Idololatræ, ubi se sperabant solatium aliquod & auxilium esse habituros. Et quis opis aliquid sibi promittat a mutis fictisque simulacris? *Similes illis fiant, qui faciunt ea, & omnes, qui confidunt in eis.* ps. 134. Longe felicius legitur Num. cap. 21. Israel fœdus quodammodo cum Deo percussisse, & voto se obligasse dicens: *Si tradideris populum istum* (Chananaum cum Rege Arad) *in manū meā, delebo urbes ejus; exaudivitque Dominus preces Israel, & tradidit Chananaum, quem ille interfecit, subversis urbibus ejus, & vocavit nomen loci illius Horma, id est Anathema.*

LIBER JUDICUM

CAP. XVII. V. 15.

Qui Ædiculam quoque in ea Deo separavit.

HAbuisse Gentiles separatas idolorum ædículas notat Cyrillus in Isai. cap. 22. Erant hæ ædes minuscule, incustoditæ, quas qui tentaverint, amplius quam fures, minus quam sacrilegi mererentur.

Septuaginta Interpretes vocant illas δῶματι μάρτυα, Judæi domos turpitudinis, Ethnici Lararia. Æmilius Probus in vita Timoleonis Corinthii sic ait: *Nihil rerum humanarum sine Deorum Numine agi putabat; itaque sua domi Sacellum ἀνθρωπιῶας constituerat, idque sanctissime colebat.* Plutarchus in Timol. *Domi autem sua Sacellum fortuiti casus condidit, eique sacrificavit.* Porro in Babylonis templo aliud etiam est Sacellum inferius, quod magnam habet Jovis Statuam eamque auream, ait Herodotus lib. 1. cap. 183. Qui & alterius sacelli in turri quadam Babylonis meminit lib. 1. cap. 181. Cicero quoque lib. 1. de divinatio. Lampridius narrat de Alexandro Severo: si nullum de nocte habuisset cum uxore

uxore negotium , matutinis horis in Larario suo (in quo & Divos Principes , & optimos electos , & animas sanctiores , hasque inter Christum , Abraham & Orpheum habebat) rem divinam faciebat . Non male Lararium ejusmodi in veteribus glossis vocatur sacrarium *θυσιαστήριον* , in eoque rem divinam Dñs. domesticis prope quotidie faciebant , quod penetrale beneficium dicebatur . Festus in verbo penetrale . Probabile est ante tempora Numæ Pompilii ædículas tantum in Deorum honorem fuisse extructas . Negat enim tunc temporis Romæ fuisse Deorum templa , Tertullianus in Apolog. cap. 25. Affirmat Plinius lib. 34. cap. 7. & Livius lib. 1. Conciliat Lælius Bisciola lib. 17. v. 19. *Sacella fuisse ac Tem. I. delubra , qua proprie non dicebantur templa : nondum enim erant Populi Romani adhuc infantis vires tanta ac opes , ut superbas ac ingentes templorum fabricas possent excitare .* Id quod primis etiam contigit Christianis , quibus templa extruere tum paupertas Ecclesiæ , tum Gentilium persecutio non permittebat .

Porro Principibus duo erant Lararia , majus & minus . Alexander Imperator , de quo paulo ante , Virgilii & Ciceronis imagines in secundo posuit , Alexandrum Magnum in majore tenebat . Præfectus Lararii Magister Larium vocabatur . Non

Principes solum, sed & privati omnes domesticos & familiares lares habuerunt, ubi Deos suos privatim colerent. De his Celsus Juris-Consultus: *Finge pauperem, qui si reddere id cogatur, laribus sepulchrisque avitis carendum sit.* Lares enim aviti a majoribus tradebantur. M. Tullius act. 9. in Verrem: *Erat apud Hejum Sacrarium magna cum dignitate in ædibus a majoribus traditum, perantiquum, in quo signa pulcherrima.* Tenuioribus loco sacrarii erant foci, in quibus Lares suos colerent. His thure aut vino supplicabant, & coronas dabant, dum annus aut mensis inciperet. Ab his sacrariis ædium privatarum sanctitas manabat; quod illic aræ foci, Dii penates & sacræ religionis ceremoniæ continebantur. Hæc Jacobus Guthenius de veteri jure Pontificio lib. 3. cap. 10:

LIB. REGUM I.

CAP. V.

Tulerunt Philistiim Arcam Dei, & intraverunt eam in templum, & statuerunt juxta Dagon.

Dagon videtur fuisse præcipuus Philistæorum Deus. Volunt aliqui, ut Ma-

Marinus in Arca Noe, & Montanus in Elencho suo, Dagon derivari a radice Dagan, id est frumentum; consequenter fuisse illum aratri & frumenti inventorem, sive Jovem Frumentarium vocatum esse. S. Hieronymus, & cum eo alii, ut Beda, Rabbanus, Hugo &c. censent Dagon provenire a radice Dagah, id est piscis, & conveniunt in eo plures interpretes, Dagonem superius formam hominis (cum versu 4. dicatur habuisse faciem, & palmas) inferius formam piscis exhibuisse. De simili monstro canit Horatius; *turpiter atrum desinit in piscem mulier formosa superne*. Hinc non improbabiliter docent aliqui Dagonem non differre a Dercete, quam Ascalonitæ venerati sunt teste Rhodigino lib. 23. cap. 5. & ut valde credibile, sub eadem forma. Fuit autem Dercete, ut Syri fabulantur; scēmina Ascalonitis, quæ ex stupro clanculario enixa Semiramidem, postea sic erubuit, ut præ nimio pudore in lacum Ascalonitem se dederit præcipitem, & in piscem mutata sit. Diodorus Siculus lib. 3. cap. 21. Manilius lib. 4. de hac re ita canit:

---- *In piscem sese Cytheræa novavit,
Cum Babylonicas submersa profugit in
Undas.*

Et Ovidius lib. 4. Metamorph. de Venere (quæ probabilius fuit ipse Dagon.)

---- *Dubia est, de te, Babylonia, narret
Derceti, quam versa squamis velantibus
artus,*

Stagna Palæstini credunt coluisse figura.

Hinc Palæstini teste Cicerone de nat. Deor. lib. 3. divinitatem tribuebant piscibus, uti & Nabuchodonosor Rex Babylonis, de quo dicitur Habacuc cap. 1. v. 16. *Immolabit sagena sua, & sacrificabit reti suo,* id est, *piscibus*: continens enim pro contento ponitur. Præterea ab esu piscium abstinebant Syri, ut Ovidius testatur 2. Fa- storum:

*Inde nefas ducunt genus hoc imponere
mensis,*

Ne violent timidi piscibus ora Syri.

Ex his non male quis conjecerit, Dægonem, cum suam traxerit originem a Dercetis impuritate, simulacrum fuisse turpitudinis, quod figuram piscis retulerit. Ferunt enim Dii Aquei & Marini apud Veteres symbolum lasciviæ & libidinis, ut Pierius lib. 13. testatur. Sic vulgari fertur carmine: *Est Venus orta mari.* Quanquam Hyginus dicat num. 197. in Euphratem fluvium de cælo ovum cecidisse mira magnitudine, quod pisces ad ripam evolverint, super quod columbæ confederint, & ubi calefactum fuit, Venerem excluderint, quæ postea Dea Syria appellata est. Ab Jove autem optione data pisces in astrorum numerum

rum relatos esse, & ob id Syros in Deorum numero pisces & columbas habere, nec edere. Ex quibus denuo potest colligi, Dagonem fuisse Deam illam Syriam. Sic Serarius in cap. 19. Jud. c. 23. ait Samsonem in Dagonis seu Veneris templo corruisse; & Herodotus lib. 1. circa medium ait: *Templum Veneris apud Ascalonitas in summa fuisse veneratione.*

Nec obstat, quod Dagon masculini generis esse dicatur: in Hebraico enim nulla est terminatio, quæ divinam naturam in fœminino genere significet. Et Latini subinde fœminini sexus personam Deum vocant. Sic lib. 2. Æneid. Virgilius Venerem Deum vocat. Et Macrobius lib. 3. Saturn. cap. 8. observat Venerem etiam Deum vocari. Quid? quod nonnulli Deorum γυναιδες, viri simul ac mulieres apud Ethnicos sint crediti. Arnobius lib. 3. adv. Gentes insinuat Gentiles ipsos nescivisse subinde, Deum an Deam venerarentur; sic enim ait: *Nam consuevis in precibus, sive tu Deus es, sive tu Dea, dicere.* Ex dictis advertes, si sensum spectes historicum, Semiramidem probabilius occasionem dedisse fabulæ; si veritatem rerum naturalium, Lunam fuisse, ut observat Kircherus noster in Oedipo Ægyptiaco, eamque ob dominium in humida, Dagonis aut Dercetus nomine fuisse insignitam.

Obfer-

Observandum porro est, primo nihil fuisse absurdius & monstrosius, quam quod Gentes sub forma tam vili & abjecta piscis v. g. aut alterius bestiae Deos suos coluerint. Si vivi, ait Seneca, illa fuissent forma praediti, quam eorum simulacra praeferebant, non ut Numina colerentur, sed ut monstra ab omnibus fugerentur. Secundo, quam inique Philistaei egerint, Arcam Dei captam juxta Idolum tam abominabile ponendo. *Qua enim participatio iustitiae cum iniquitate? aut consensus templo Dei cum Idolis?* 2. Corinth. cap. 6. Magis vero aggravarunt peccatum suum, quod captam Dei arcam tanquam exuvias & opimum quoddam spoliū suo Idolo donarii loco consecrarunt, ut S. Chrysostom. ait tom. 5. lib. uno contra Gentiles. Quod ipsum Josephus confirmat lib. 6. antiquit. cap. 1. *Arcam juxta Deum suum Dagon tanquam Trophaeum aliquod posuerunt.* Mirum proinde non est idolum istud ante arcam Domini humi prostratum prima vice, & secunda capite & palmis truncatum super limen inventum esse, ut appareret omnibus Dei illius vilitas & infirmitas. Tertio, quanta sit hominum indigne communicantium, & imprimis Sacerdotum in statu mortalis peccati sacrificantium malitia; si enim sacrilegum Adriani imperium fuit erigendis Adonidem in Antro Bethleemitico, ut (quemad-

mo.

modum S. Hieronymus loquitur ad Paulinum) in specu , ubi Christus parvulus vagiit, Venenis Amasius plangeretur; horrendum pariter est facinus , coinquinatum carne & immundum spiritu ad Eucharistiam vel Sacrificium accedere . Nam ut Petrus Blesensis serm. 38. ait: *Quicumque ad Altare Dei accedit inquinatus luxuria, juxta Filium Virginis Idolum ponit Veneris.* Quarto, in sensu Allegorico juxta S. Gregorium Arcam Dei Templo Dagon inferri , idem esse ac mysteria fidei cordibus infidelium intimari ; per ruinam vero Dagonis secundum Bedam & Angelomum Idololatriæ & infidelitatis interitum per Arcæ Dominicæ seu Christi adventum ad Gentes præfigurari.

LIB. REGUM I.

CAP. V. V. 5.

*Propter hanc causam non calcant Sacerdotes
Dagon, & omnes qui ingrediuntur
Templum ejus, super limen
Dagon in Azoto.*

POterant insani illi sacrificuli ex casu Dei sui satis intelligere , monstrum illud potius esse calcandum pedibus, quam reli-

religiose colendum . Sed quam non excœcat mentes hominum inveterata superstitio? Medium , quo Dei sui ignominiam obscurare quærebant & obterere , vel etiam quodam honoris obsequio compensare , magis ad ejusdem dedecus & jugem infamiam serviebat . Quid enim responderent Sacerdotes posteris , quod limen transilirent , nisi rationem se habuisse religiosam & piam Dei sui , cujus membra ignominiose dissipata aditum illum templi constravissent ? hinc ceremonia illa non in Dagonis cultum , sed potius in veri Dei gloriam cedebat . Idem de ceteris Deorum cultibus dici potest , qui magis in Deorum ignominiam vergebant quam honorem & gloriam . Et hoc est quod Arnobius Ethnicis objicit lib. 5. ita dicens : *Quid tantum queso de vobis Jupiter iste (quicumque est) mernit? quod genus est nullum probri , infame adulterium nullum , quod non in ejus caput velut in aliquam congeratis vilem luteamque personam? ubique est Jupiter fabula , neque ullum turpitudinis genus est , in quo ejus non nomen consociatis libidinibus consecratis: ita non advertitis , non videris , quanta istud dicatur & cum ignominia fieri , contumeliaque Divorum? Et lib. 4. Soli sunt apud vos Superi inhonorati , contemptibiles , viles , in quos jus est a vobis datum quæ quisque voluerit , dicere , turpitudinem jace-*

re,

re, quas libido confinxerit, atque excogita-
verit formas; cum sit rectius multo, Deos
esse non credere, quam esse illos tales, ta-
lique existimatione sentire. Ita satius fecif-
sent Philistæi, si Dagonem non agnovissent
Deum suum, quam sic comminutum ac
humiliatum divino adhuc honore & cultu
tam ridiculo persecuti fuissent.

Ut autem post casum Dagonis Azotii
non calcarunt amplius Deorum suorum li-
mina, sed transilierunt, & ut Dio: lib. 41.
testatur, osculati sunt; ita videtur mos ille
ad alias Gentes manasse, quamvis ex alia
intentione ac persuasione, ut fieri assolet
in ritibus inveteratis. Lyranus in lib. 3. E-
xod. affirmat Gentiles prima Deorum li-
mina non nisi nudis pedibus attigisse. Ra-
tionem ex Justino juvat percipere; nam & *Apologia*
calceis exutos introire sacrorum causa ju-^{2. pro Chri-}
bent sacrifici, dum iidem genu amulantur stianis.
quiddam, quod Moysi propheta accidisse sciunt;
legerint enim forsitan ex libro Exodi, vel
audierint Deum Moyse dixisse: solve calcea-
mentum de pedibus tuis: locus enim, in quo
stas, terra sancta est, cap. 3. v. 5. Sic puta-
bant Gentiles Templorum Vestibulis Nu-
men aliquod inesse vel adesse. Imo Dii
quidam inde nomen suum sortiti sunt, ut
essent custodes ædium. Liminibus præfectus
erat Deus Limentinus, Portis Portulus si-
ve Forculus, Cardinibus Cardea vel Car-
dinea

dinea sive Carna Dea, quæ, ut Ovidius ait lib. 6. *Fastorum*, prius Iran nuncupata clausa aperiret, aperta clauderet. Mirum proinde non est Virgilium *Æneid.* 2. appellasse *religiosa Deorum limina*: & Juvenalem saty. 6. *Tarpeum limen adora*. Et Tibull. lib. 1. Eleg. 2.

Non ego si merui, dubitem procumbere templis,

Et dare sacratis oscula liminibus.

Quem in morem Prudentius in Romano ita canit. *Sed credo magni limen amplectar Jovis, qui sic citetur legibus vestris*. Ovidius præterea lib. 1. *Metamor.*

*Ut templi tetigit limen, procumbit uterque
Pronus humi, gelidoque pavens dedit oscula saxo.*

Arnobius lib. 1. adv. Gentes: *Cum Deorum ante ora prostrati limina ipsa converrerent osculis*. Eadem videtur fuisse causa, quod nova apud Gentiles nupta non auderet limen mariti tangere, ne, ut Servius notat, a sacrilegio inchoaret, si depositura virginitatem calcaret rem Vestæ, id est Numini sanctissimo consecratam.

S. Gregorius Magnus in sensu tropologico ait eos Dei ministros, qui post prava sua abeunt desideria, similes esse sacerdotibus Dagon, nec cum iis super limen calcare. Cujus ulteriorem explicationem apud eundem vide in Expositione 1. 1. Reg. c. 5. v. 5.

Cete-

Ceterum meliori jure Christiani non solum templorum suorum adyta, sed etiam limina venerantur. Quam nota sunt & fuerunt a primis Ecclesiæ sæculis limina Beatorum Apostolorum Petri & Pauli? qua cum veneratione non communis tantum populi, sed etiam Regum ac Principum fuere visitata? S. Chrysostom. homil. 26. in poster. Epist. ad Corinth. refert, quali in æstimatione & reverentia fuerint vestibula & limina Apostolorum etiam apud Reges eadem invisentes: sic enim ait: *Quod in regiis janitores sunt Regibus, id in sepulchro Reges sunt Piscatoribus; & illi quidem velut ipsius loci domini, intus habitant, hi vero tanquam accolæ & vicini præclare secum agi putant, si janua ipsis assignetur vestibularis.* Idem homil. 30. in 2. ad Corinth. *Templi vestibula & adytum osculamur.* Prudentius in peristeph. hymno 2. *ipsa & Senatus lumina, quondam Luperi & Flamines, Apostolorum ac Martyrum exosculantur limina.* Plura eorum exempla, qui piis votis, muneribus, osculisque eadem venerati sint, vide apud Baronium ad annum Christi 631. & 689.

LIBER REGUM I.

CAP. XXVIII. V. 7.

*Quarite mihi mulierem habentem Pythonem,
& vadam ad eam, & sciscita-
bor per illam.*

Mirum videri potest, a Saule, qui v.
3. ejusdem Capit. legitur abstulisse
magos & ariolos de terra, hoc versu 7.
quæri mulierem Pythonissam. Justinus Mar-
tyr Quæst. 52. ad Orthodoxos ait, quod
Pythonissas sustulerit, ut ea ratione Deum
sibi reconciliaret, quo sententiam abrogaret,
qua Saulem regno abdicaverat, non ariolo-
rum & magorum odio, sed imperii reti-
nendi desiderio. Hinc pronum est judica-
re, ipsum, cum a Deo nullum de futuro
belli eventu responsum posset accipere,
ambitionis & desperationis spiritu commo-
tum, Pythonissam adiisse quæsitum quid se
futurum esset. Derivatur Pythonissa ἀπό
τῆ πυθιδνῆς a sciscitando. Erant vero duo
Pythonum genera, quorum corpora Py-
thus vel Dæmon obsidebat, & implebat,
& per eos sic affectos sua edebat oracula.
Alii Engastrimythi græce appellantur,
& in canonicis decretis causa 26. q. 3. ven-
tri-

triloqui; quales erant yates Colophonii & Triphonii & Seractini, de quibus Pausanias in Achaja, & Strabo Geograph. l. 5, Philochorus in l. 3. de vaticiniis, etiam mulieres vocat ἐγγαστριμύθους, eo quod ex imo ventre vox prodire videbatur, ut explicat Origenes aliique. Nonnulli ενδομάντεις dicuntur, eo quod aliquando sub pectore infra cutem se Dæmon ostendat, & per pectus loqui videatur. Quomodo vero ejusmodi Ventriloquium fiat, Apollo apud Eusebium de demonstrat. L. 3. describit: esse fluxum quendam ex Phæbi radiis descendentem, aeris puri substridulo flatu occultatum, delinitum cantibus, & infandis verbis cecidisse super caput inculpati receptoris, (magi scilicet, qui juxta ritum se purgabat) terminum velamentorum seu vitarum, quibus caput cinctum; mollem vero impleisse tunicam assultim per ventrem citato motu recurrentem, & tandem in humanam vocem erupisse. Rhodiginus L. 10. c. 8. ait se vidisse & audisse similem pene mulierculam, Jacobam nomine, tota fere notam Italia, ex cujus ventre immundus spiritus vocem prætenuem, etiam ubi vellet dearticulatam, & prorsus intelligibilem emitteret. Concinnatulus Dæmoni nomen erat; hac ille appellatione gestiens inclamanti subinde respondebat. Si de præteritis aut præsentibus interrogaretur, quæ reconditis-

suma forent, responsa dabat sæpe mirifica, si de futuris, semper mendacissimus, sed & inscitiam suam nonnunquam murmure incerto & bombo verius ignorabili retegebat.

Aliud genus Pythonum Necromantiam exercet, quando Dæmones aut Manes seu defunctorum animæ magico carmine & certis ritibus ex inferis evocantur. Sic legitur apud Senecam in Oedipo a Tiresia Lacum evocatum esse. Fiebat vero evocatio illa vel per sacrificium & incantationem solam, vel modo Thessalico adhibitis funestioribus ritibus, ossibus, fibrisque mortuorum, & aliis rebus plane feralibus: fiebat quoque deprecatio, & per eandem advocabantur Eumenides, Styx, Chaos, Pluto, Mors, Persephone, Hecate, Cerberus, Parcæ, & Charon cum obsecratione, commemoratis suis meritis, ac cultu assiduo infantium occisorum.

Qualis Pythonissa fuerit a Saule requisita, ventriloqua, an necromantica, quales ritus adhibuerit, & quæ verba expresserit, Scriptura non meminit. Justinus l.c. ventriloquam fuisse censet. An autem revera Samuelis animam evocarit, an non, Interpretes disputant. Verisimilius est vere eam apparuisse. Observandum interim, esse periculosa plenum opus alex Necromantiæ negotium; imprimis ipsis magis, quos Dæmon

mon subinde aufert, & hominum aspectui subducit; dein ipsis, qui curiose illos consulunt: a mente enim nonnunquam alienantur, & male pereunt. Notus satis est infelix exitus Heliogabali, huic superstitioni valde addicti. In Lege veteri poena mortis statuta erat Pythoni, & Pythonem consulenti.

LIB. REGUM III.

CAP. XXII. V. 44.

*Quorum genua non sunt incurvata ante Baal,
& omne os, quod non adoravit eum,
osculans manus.*

DUO hic adorationis genera recensentur, genuflexionis & osculationis, quæ Gentiles in cultu Deorum suorum solebant usurpare. Et primo quidem genucationis usus in supplicationibus antiquissimus & creberrimus apud Gentes fuit: ex ipso sane instinctu naturæ usus ille videtur promanasse, ut qui alteri supplicat, se eidem genuflexione submittat: illa enim professio est manifesta imbecillitatis atque indigentiae, quemadmodum non flectere dignitatis atque potentiae: hinc Elephanteus Aegyptiis symbolum est Regiæ potentiae,
1 2 quod

quod genua non flectat, id est, alterius ope non indigeat, nec necesse habeat alteri supplicare, quod est egentis ac imbecilli. Id causæ est, quare Ergasilus parasitus in Plauti Captivis, cum sibi fortunatus videretur, dicat, sibi certum esse nulli hominum supplicare. Inde solvitur ænigmatica Homeri dictio Iliad. 1. afferentis, preces esse Jovis filias, sed claudas, eo quod ii, qui preces faciunt, in genua se soleant dejicere, ut Phornutus explicat, ut misericordiam Dei implorent & obtineant. Eundem in finem mos erat, illorum genua, quibus supplicabant, tangere, & per hoc robur ac potentiam eorum agnoscere, qua ferre opem possent, si vellent, & labantes confirmare. Causa autem tactus illius videtur fuisse, quod persuaserit sibi antiquitas genua misericordiæ dicata esse, ut Servius in illud 3. Æneid.

Dixerat, & genua amplexus, genibusque volutans

Hærebat.

Physici, inquit, dicunt esse consecratas Numinibus singulas corporis partes, ut aurem Memorix, frontem Genio, dexteram Fidei, genua Misericordiæ. Hinc Arnobius l. 6. de Diis ait: *ita enim non videtis spirantia hæc signa; quorum plantas & genua contingitis & contrectatis orantes.* Imo qui vota ob rem optatam a Diis concipiebant,

ea illorum genibus affigebant, ut de illorum benignitate atque misericordia, cujus illa sunt sedes, sibi, quæ poscerent, polliceri significarent. Mos quoque erat Ethnicis signandi vota & incerandi Deorum genua: votum enim quisque suum rite nuncupatum atque conceptum, conscriptumque Deorum genibus cera obsignatum, siue ceratis obsignatum tabellis adfigebat. Unde Juvenal. Satyra 10.

Propter qua fas est genua incerare Deorum.

Et hæc occasione incurvationis genuum ante Baal; cujus cultoribus non verentur Hæretici conferre Catholicos, eosque idololatrias appellare; quod eorum genua incurventur ante Sacramentum Eucharistiæ, & in eodem *Deum Maolim* adorent. Quod si propterea idololatriæ sint Catholici, qui Christum vere in Eucharistia præsentem esse & credunt & confitentur, ergo & idololatriæ fuere SS. Patres, qui primis vivere sæculis. 1. S. Epiphanius, qui in Dialog. 2. ait: *Symbola Dominici Corporis & Sanguinis post invocationem sacerdotis facta, & mutata credi & adorari.* 2. S. Chrysostom. Hom. 3. in Epist. ad Ephes. *Adora & manduca.* 3. S. Augustinus in Psal. 98. *Nemo illam carnem manducat, nisi prius adoraverit.* 4. S. Ambrosius de eadem carne ait: *quam hodie quoque in My-*

*Daniel.
cap. 11.
v. 38.*

*I. de spi-
ritu S.
cap. 12.*

steriis adoramus, & quam Apostoli in Domino adorarunt. Et S. Chrysostomus iterum, alio tamen quam prius citato loco, fideles admonet, *ut adorent Corpus Christi in altari positum, quod Magi in praesepe positum adorarunt:* non tantum *in spiritum & veritate*, ut Joannis quarto dicitur, sed etiam genuum incurvatione, cum expresse dicatur, *& procidentes adoraverunt eum.* Quis vero hos SS. Patres, aliosque, nisi insanus sit, idololatriæ insimulet?

Secunda adorationis species erat, manum osculari. Verbum *adoro* putat quidem Lælius derivari melius a verbo *oro*; non male tamen alii censent, provenire a manu osculo: quia Gentiles Deos adoraturi ad ora manus admovebant, teste D. Hierony. in Apolog. adv. Ruffin.: *Solebant adorantes manum deosculari, & sua capita submittere.* Confirmat idem Plinius in genere l. 28. *inter adorandum dexteram ad osculum referimus:* in particulari Minutius in Octavio: *Cacilius simulacro Serapidis viso, ut vulgus superstitiosum solet, manum ori admovens osculum labris impressit.* Et Lucianus in Encomio Demosthenis ad finem: *cum ille ori manum admovet, neque ego suspicabar eum aliud facere, quam orare Deos.* Et hæc oratio melior censebatur, apud Græcos saltem, de quibus ait Rhodiginus l. 5. c. 3. *Græcis pluribus preces tum de-*

demum perfecta videbantur, si inter eas manus exoscularentur.

Modus autem osculandi hic erat: manus ad idolum, vel templum, vel aram apertas extendebant: sic enim canit Lucretius:

*Procumbere humi prostratum, & pandere
re palmas*

Ante delubra Deum.

Dein manus ad ora admovebant, formatæ digitis crucis figura priori digito in erectum pollicem residente, ut latius explicat Jo. a Chockier in face histor. c. 31. Idem Apulejus asserit l. 4. Metam. *Multi admiratione stupidi, & admoventes oribus suis dexteram, priori digito in erectum pollicem, & ipsam prorsus Deam Venerem religiosis adorationibus venerabantur:* illam vero manus partem osculabantur, quæ idolum contigerat: censebant enim venerationem aliquam parti illi exhibendam esse, quæ rem sacram meruisset attrectare; quasi à contactu rei sacræ sanctitatis aliquid libasset & contraxisset. Quod si rem sacram longius a se remotam non possent manu contingere, saltem manum ad illam extendebant, cui dein ut rei sacratæ osculum infigebant. Idem videntur Heliolatæ observasse in Solis adoratione, ut Hulsæus Vates innuit c. 31. v. 26. *Si vidi Solem, cum fulgeret, & Lunam incedentem clare, & latatum est in*

abscondito cor meum, & osculatus sum manum ore meo. Aliquando conformabant labia, quasi absentibus ad osculum oblatura, in amoris & observantiæ argumentum. Sic de Gentilibus ait Tert. in Apol. c. 16. quomodo eorum plerique in affectatione aliquando ut cælestia adorandi, ad Solis ortum labia vibrarent. Tam frequens vero erat adorationis genus per oscula, ut Cicero act. 4. in Verrem dicat: Simulacrum Herculis æreum adeo religiosum fuisse Agrigentinis, ut rictus ejus & mentum paulo fuerit attritius; quod in precibus & gratulationibus non solum id venerari, verum etiam osculari sint soliti. Lucretius L. 1. canit:

- - - *Tum portas propter athena*

*Signa manus dextras ostendunt attenuari,
Sape salutantur tactu, præterque mean-
tum.*

Porro humiliter osculatam fuisse manum illius Numinis, cui sacrificium fieri debebat, suffecerat illis, qui aliud præstare non poterant, ut observat Servius in notis Virgilii: hinc pauperes hostiarum loco manus osculum Diis offerebant. Rhodigin. L. 5. c. 3. Idem Lucianus confirmat de Sacrificiis: *si quis pauper ita Deo litat, ut dexteram duntaxat suam osculetur.*

Sed cur dexteræ usus erat potius in sacrificio quam sinistræ? eum necesse est ignorare, quid sit inter dextram & sinistram,

stram,

stram, ut phrasi Scripturæ loquar, qui nesciret dexteram lævam nobiliorem esse: nam dextrum præfert natura sinistro; cum sit robustior, quam læva; quia visceri alicui principali, unde vis & robur suggeritur, hepatis scilicet propinquior. Dexteræ præterea symbolum est honoris, amicitiae, libertatis, & fidei. Et hanc rationem affert Isidorus L. II. in orat. Lat. Ling. cur dexteræ osculum obtulerint: quia omnium rerum autoritas dextræ viribus constat, & ipsa fidei testis est. Ad hæc adoraturi Gentiles dextram partem tenebant, secundum illud Plauti in Curcul. Act. I. Scen. I. *quo me vortam, nescio, si Deos salutas, dextro vorsum censeo.* Conveniens proinde erat, manum dexteram pariter sacro ministerio deservire. Quid? quod Deorum Statuæ olim efformatæ fuerint dextra hominibus offerentes munera; cujus exemplum nobis refert Atejus Capito apud Macrobi-um Satur. I. Apollinis simulacra manu dextra gratias gestant, arcum cum sagittis sinistra. Quis Gentilium adeo non Deorum dicam, sed vel sui fuisset immemor, ut sinistram ad Deos tam liberales extendisset, & non dextram; cum hæc olim apud Augures boni & fortunati esset ominis? & ideo manum dextram ori admovebant, eo gestu profitentes, velle se Deorum dextras tangere, quasi omnia sibi pro-

spe-

spera & felicia ab iis promittentes.

In sensu tropologico per osculationem manus propriæ intelligi potest vana gloria, ut Olympiod. ait: *sapenumero nonnulli cum sua facta offerunt, manus osculantur suas.* Et S. Bernard. in Cantic. Serm. 3. *propriam gloriam querere, propriam est osculari manum: profecto qui dat gloriam Deo, non incongrue Deo dicitur manum osculari.* Qua ratione illius osculi contactus fiat, in Psal. 20. explicat Hugo Carenfis: *Duo labia sunt, intellectus & affectus, quibus anima fidelis osculatur Deum, quando intellectus coniungitur veritati, & affectus bonitati.* Si alterutrum desit, non est plenum osculum: ait S. Bernardus. Tunc vero plenum & perfectum est, quando & sapientia illustrat rationem, & virtus afficit voluntatem. S. Bernard. in Serm. parvis Serm. 54.

LIB. REGUM III.

CAP. XVIII. V. 26.

Transiliebantque altare, quod fecerant.

Modus ille cum saltu sacrificandi usitatus fuit Gentilibus: vario enim incessu & motu Deorum suorum festos dies obi-

obibant, & inter dissectas victimæ partes discurrebant; ut Corybantes, Salii, Luperci, & similes alii. Causa illius saltus videtur fuisse, quasi ipsi quoque, dum altare conscendunt, vellent esse victimæ, aut victimas se esse ea ratione simularent: aut certe, ut frequenti illo & numeroso transfultu Deum suum magis placarent, & etiam repugnantem impellerent. Aliam rationem adfert Servius in Eclog. 5. *quod nullam majores nostri partem corporis esse voluerunt, qua non sentiret religionem.*

Cælius Rhodiginus L. antiq. lectionum c. 10. refert, quomodo & quare Gentiles ita saltarint, & aras circumcurrebant. In Græcorum monumentis adnotatum nobis est, morem sacrificandi servatum diu, ut circumcurrebant aras, cursum auspicati a laevo dextrorsum, Zodiaci quadam imagine, cujus motio fit mundo diversa ad exortum vergens; mox vero a dextris levorsum procurrebant: quo motu calum rotari manifestum. Idem observavit in precationibus & sacrificiis Indorum Lucianus: Indi ad orientem conversi saltatione Solem consalutant, cum silentio se ipsos conformantes Dei choream imitari atque effingere conantur. Et hac Indorum est precatio, & chori, & sacrificium. Canebant etiam Gentiles in saltu, teste Cælio l. 5. c. 3. ubi ait: *hyporchemata concinebant saltantes in altaris am-*

rom. 2.
1. 12.
c. 6. n. 6.

ambitu, ubi jam igni admota forent sacra.
Addit Lælius Bisciola carmen illud saliare
ob celeritatem pyrrichiis constitisse. Po-
tuit quoque Ethnicis ad saliendum fuisse
stimulus exemplum Deorum, Faunorum
scilicet & Satyrorum, de quibus Isajæ c.
13. dicitur: *Pilosi saltabunt ibi, & respon-*
debunt, ibi ulula in adibus suis, & sirenes
in delubris voluptatis. Ubi saltus lascivus,
ait S. Chrysostomus, *ibi diabolus certe ad-*
est. Quod si corpus deforme fit impuden-
ter saliendo, quanto magis animam fœda-
ri credendum est? Plus curæ sit Christia-
no spiritualis saltus, præsertim in sacrificio,
de quo Richardus ita scribit in Psal. 113.
Corporalis saltus est totum corpus a terra
suspendere, spiritualis saltus spiritum & to-
tum, quod spiritus est, abalienare, a sen-
suum scilicet illecebris. Bonus saltus, dum
mens facili motu fertur de virtute in vir-
tutem, & de terrenis transilit ad cælestia
& æterna. Salta, dum Propheta, dum A-
postoli, dum Christus cantat, & saltus can-
tui respondeat, ne audias aliquando quod
Lucæ c. 7. dicitur: *Cantavimus vobis, &*
non saltastis.

LIB. REGUM IV.

CAP. I. V. 2.

Ite, consulite Beelzebub Deum Accaron, utrum vivere queam ab infirmitate hac mea.

OChozias Achabi filius, suasu impiæ matris suæ Jezabelis, ut credibile est, & aversione quadam contra veri Dei Prophetas concepta, quod non nisi malum ei vaticinarentur, mittit nuntios ad Beelzebub, qui Matth. 12. & Luc. 11. vocatur Princeps Dæmoniorum. Est vero Beelzebub, spectando Etymon nominis, idem, quod Deus muscarum vel Maritus. Zebub enim muscam significat. S. Remigius auctor est ab Abimelech Gedeonis filio templum ipsi Baal exædificatum, sacerdotemque ei designavisse Zebub quempiam, quod nomen muscam significat, quæ muscas abigeret ob cruorem victimarum affluentes.

Josephus legit: *Consulite Myodis oraculum*: *μῦα* enim muscam significat. Hinc Myodes seu Deus muscarum: ideo sic dictus, quod muscis plenus esset ob sanguinem victimarum, quo aspergebatur; &
hinc

hinc forsan Ironice Beelzebub a Judæis iridentibus dictus est maximus Palæstinorum Deus, qui in Accaron colebatur. Author catenæ hanc dat rationem: quod nulla musca (ut dicitur) visa unquam fuerit in sacrificio vero Deo immolato, ubi sanguis animalium fundebatur; quo tamen solent muscæ confluere, & inde generari. Quo miraculo læti Judæi irridebant Chaldaeos aliosque Allophylos, in quorum sacrificiis, præsertim Accaronitarum, muscæ solebant abundare. Terra enim Accaron, cum esset calida & humida, marique vicina, infestis sordidisque ejusmodi bestiolis abundabat. Hinc sicut aliæ nationes Deos suos Avertuncos habebant pro certis malis avertendis; sic Accaronitæ colebant Beelzebub, ut muscarum molestiis liberarentur. Ita Ægyptii ne a serpentibus læderentur, Ibin animal serpentivorum colebant. Apollo fertur fuisse Smintheus, eo quod mures occiderit: nam Smintha Cretensis idem est, quod mus. Sic idem Apollo, Parnopius est appellatus, quod culices & locustas ex Atticis finibus averterit. Verisimile est, eundem Jovem, quem Gentes aliæ colebant sub nomine ἀπομυῖος, quod muscarum esset avertuncator, ab Accaronitis cultum esse sub nomine Beelzebub. Et hinc patet, cur Princeps Dæmoniorum fuerit vocatus. De eodem censent dictum fuisse illud Christi:

Cum

Cum fortis armatus custodit atrium suum. *homil. 41.*
 S. Chrysost. & S. Augustinus. Idem Beelzebub videtur esse, quem Plinius Myagron *in Math.*
 vocat, & ab Eleis coli scribit, ne a muscis *Lib. 1. 9.*
 infestentur. Pausanias narrat de incolis *Evangel.*
 Alipheræ urbis lib. 8. Jam vero & nundinas celebrant, cui Deo, non satis constat, *cap. 4.*
 Minerva arbitror. In iis nundinis uni ante
 omnes Myagro rem divinam faciunt, & Myagri nomine implorato securitatem sibi
 fore inter immolandum ab omni muscarum
 protervitate pro certo habent. Hanc fidu-
 ciam auxit sperata & obtenta muscarum
 fugatio: nam Ælianus lib. 5. de animalib.
 cap. 17. refert, quod muscæ Pisatides eo
 tempore, quo Olympiæ festum celebraretur,
 sponte discesserint inde ultra Alphæum
 flumen, nequid molestiæ crearetur. Vide-
 tur autem Ælianus intelligendus esse de
 festo & sacrificio, quæ fiebant Myodi Deo.
 Plinius lib. 10. cap. 28. de Cyreniacis: A-
 chorem Deum muscarum multitudine pe-
 stilentiam afferente invocabant; quæ pro-
 tinus interierunt, postquam litatum esset
 illi Deo. Quod paulo ante de muscis Pi-
 facis relatum est ab Æliano, ejusdem me-
 minit Pausanias, & clarius explicat in E-
 liacis, proditum esse, Herculem Alcmenæ
 filium Jovi projicientem, cum muscas abi-
 gere non posset, vel quod ei tunc primum
 in mentem venerit, vel quod tralatitium
 sige-

projicere
 vel porri-
 cere ver-

*dum solenne olim sacrificanti-
bus.*

fuerit, Abactori muscarum hostiam ma-
ctasse, cum perlitatum esset, omnes repen-
te muscas trans Alphæum evolasse; hinc
ab Eleis servatum, ut ad abigendas ex O-
lympia muscas idem sacrum usurparetur.
Addit Clemens Alexandrinus in Protrepti-
co suo, Romanos sacrificare Herculi musca-
rum depulso. Ejus templum Romæ, ut
Julius Solinus refert, neque canes, neque
muscæ ingrediebantur: hanc esse causam
arbitratur, quod cum imperatorem sacri-
ficulis daret, muscarum Deum dicitur im-
precatus, clavam vero in aditu reliquisse,
cujus olfactum refugerent canes.

Ex dictis satis liquet, Beelzebub, Myia-
grum, Myoden, & Jovem Apomyium
eundem esse, quod vel ipsa produnt nomi-
na, quæ a musca deducuntur. Reliquias
hujus Dei vidit & notavit Christianus A-
drichomius in portu Ptolemaidis, in cujus
medio (inquit) insignis turris est, quæ,
quod Beelzebub olim fanum celeberrimum
fuerit, turris muscarum vocatur. Porro
in Leucade, ubi in promontorio eminente
Apollinis stat templum, quem A-
ctium nuncupant, bovem muscis immola-
re fuit receptissimi moris; quem clarius in
Protreptico Clemens Alexandrinus enar-
rat: in Leucade fano Actii Apollinis, cum
festum ejus instat, saltant homines, &
muscis bovem mactant, qui videlicet ea-
rum

rum moribus conficitur ; cum exsatiatae sunt cruore, mox abeunt, quasi suo perfunctae officio. Quam vero absurdum sit ejusmodi sacrificium, Theodoretus in L. 4. Reg. declarat : quid enim, inquit, est musca odiosius ? sed tamen & ejus simulacrum de vita sciscitabantur, & quam viventem flabellis expellunt, ejus figuram Deum appellaverunt, & coluerunt in figura muscae, ut est probabile, saltem collo tenus expressum, cum & alias viles bestias pro Diis habuerint, & in earum forma propositas honorarint. Symbolum hieroglyphicum Dei muscarii erat musca cum Thyrsoscylo cyprio, quod praeterquam πολύμορον δαίμονα, muscarum etiam abactionem significabat; hujusmodi hieroglyphico nihil frequentius fuit in obeliscis Aegyptiorum.

Kircherus
in Oedipo
Aegyptiaco.

In sensu allegorico Dæmones ob multitudinem, impudentiam, mordacitatem, sordes, foetorem, muscae dici possunt. Eleganter harum cum Diabolo comparisonem lege apud Bisciolam nostrum tom. 1. lib. 16. cap. 23. lib. 10. Etiam ex ea ratione muscae sunt Dæmones, quod, ut Lucianus de sacrificiis ait, victimarum sanguini muscarum instar inhiare soleant. Quid ? quod in vates Gentilium sub muscarum forma subinde involarint, ut oracula ederent.

K

In

In sensu morali comparat S. Gregorius lib. 18. moral. cap. 25. mundanos & carnales homines Accaronitis seu muscæ cultoribus. Ægyptiis, quæ hujus mundi speciem tenet, muscis percutitur; *musca enim nimis insolens & inquietum est animal, in qua quid aliud quam insolentes cura desideriorum carnalium designantur? unde alias dicitur: musca morientes perdunt suavitatem unguenti. Eccles. cap. 10. quia cogitationes superflua, qua assidue in animo carnalia cogitante & nascuntur & deficiunt, eam suavitatem ac spiritum perdunt. S. Hieronymo musca Luxuriæ symbolum est, quam ocysus expedit spirituali muscario, dum blande subingreditur, fugare: qua de re sic idem S. Pater: quod autem matronis offertis muscaria parvis animalculis ventilandis, elegans signatio est, debere nos luxuriam cito refringere, quin musca moritura oleum suavitatis exterminent.*

LIB. REGUM IV.

CAP. XVI. DE ACHAZ.

Filium suum consecravit transferens per ignem secundum Idola Gentium. v. 3.

CUM inter ceteras qualitates ignis sit, ea, quæ immunda sunt, purgare, per-

persuasi Gentiles erant, ignis beneficio animæ & corporis fordes elui posse & debere; cui enim ignotum est aerem, agros, metalla, & quæ non corpora ignis virtute emaculari? animas etiam contaminatas igne mundari, Virgilius ait *Æneid.* 6.

----- *Alia panduntur inanes*

*Suspensa ad ventos, aliis sub gurgite vasto
Infectum eluitur scelus, aut exuritur igne.*
Hinc invaluit mos ille superstitiosus, ut parentes filios suos per ignem transferrent, non solum ut eos purgarent, sed etiam hoc ritu idolis suis consecrarent, & eorum cultui æternum addicerent. Eum in finem adhibebantur lustrales ignes, quibus vel afflati, vel etiam ustulati, idolis suis initiati censebantur. An Achaz filium suum per ignem tantum traduxerit, vel etiam combusserit, incertum est: utrumque secundum morem Gentium, vel alterutrum fieri solebat. Feriæ illæ, in quibus talis fiebat consecratio, Palilia vocabantur, vel a Pale Dea pastorum, vel Parilia a pariendo, quod pecorum partui creditus hic Deus siue hæc Dea præsidere. Quo die celebrari eadem solerent, Propertius canit lib. 4.

Urbi festus erat, dixere Palilia Patres.

Hic primus cœpit mœnibus esse dies.

Annua pastorum convivium, lusus in urbe

Cum pagana madent fercula divitiis.

Cumq; super raros fœni flammantis acervos

K 2

Tra.

Trajit immundas ebria turba dapes.
 Ecce hic expressum morem non filios solum, sed ipsas etiam epulas per ignem trahendo expiandi urbem conditam.

Varro apud veterem Persii gloss. refert, Palilia tam privata quam publica fuisse apud rusticos, in quibus congestum ex fœno ac stipulis ignem magnum transfiliunt. Hinc bene canit Persius sat. 1. *fumosa Palilia fœno*. Theodoretus censet aliqua superstitionis illius vestigia ad sua usque tempora superfuisse: sic habet. Ego existimo, id quod dicitur tacite significare genus erroris, quod ad nos usque pervenit: vidi enim in aliquibus civitatibus semel in anno accendi rogos, & trans eos saltare aliquos, non solum pueros, sed etiam viros, infantes autem per flammam ferri a matribus. Videbatur autem quædam esse expiatio & purgatio: existimo autem hoc fuisse Achazi peccatum. Hucusque Theodoretus.

Hunc locum Theodoreti indicat lib. 2. Annal. Glycas Siculus, cum docet, ipsum non sensisse, Achaz solido sacrificio unum ex liberis Baali concremasse, ut Josepho placet, sed tantum trajecisse per ignem, ut error fert nostrorum, inquit, temporum, cum semel in anno rogos accendunt, quibus injiciuntur & pueri, & viri, quin & infantes ab ipsis matribus per flammam transportantur ad averruncationem & lu-
 stra-

strationem. Forte de solis paganis locutus est Theodoretus. Quia tamen Palilium lustrationes, & Catharmi exeunte vere aut ineunte æstate agitabantur a Romanis rusticis, non est improbable mansisse etiam apud Christianos morem 23. aut 24. die Junii ignem e fœno excitatum transiliendi. Refert Balsamo ad Conc. Trull. canon. 65., quo interdicti leguntur hi rogi pro domibus & officinis, quos transilire vetus mos erat. E quodam canone ejusdem Concilii habentur Cyri Michaelis Patriarchæ Constantinopolitani hæc verba: Inter cetera die 23. Junii mensis concursus fiebat in vicis, & in quibusdam ædibus virorum ac mulierum, & per totam noctem rogos accendentes super eos exiliendo Dæmoniace ominabantur & divinabant de prosperis & adversis eventibus aliisque rebus. Par causa fuit, cur diem illum S. Joanni Baptistæ sacrum Lampadem vocarent, quod ex S. Joan. Chrysostomo, boni parentis filius degener a fide Josephus Scaliger in 7. Operis magni refert. *Qui mos* (verba sunt Bisciolæ) *in* Tom. 2. l. *mentem revocat mihi morem non dissimilem Perusinorum rusticorum: nocte ante S. Georgii Martyris, aut S. Marci, congerie aridorum sarmentorum incensa, & per clivos, colles, montesque villarum dejecta, dum accensi devolvuntur, alte vociferantur.*

Ex dictis constat translationem per ignem fuisse Gentilibus quasi baptisma, quo purgati sordibus initiabantur Idolis suis, & sacri fiebant.

Divinius longe Baptisma habet Ecclesia Catholica, quo homines a nãvis suis purgantur, & Deo perfectius consecrantur. De eodem meminit S. Joan. Baptista, Matth. 3. *Ipse vos baptizabit in Spiritu S. & igne.* S. Chrysostom. homil. 3. in Imperf. Op. per ignem, quo Christus baptizat, tribulationem intelligit: nam *sicut igne probatur argentum, & aurum camino; ita corda probat Dominus*, Proverb. 17. De iis vero, qui ab hac probatione eximuntur, illud Jeremiã intellige: *Argentum reprobum vocate eos, quia Dominus projecit illos.* Ne ad casum tam infaustum labamur, expedit potius cum Psalmista petere: *Proba me Domine, & tenta me, ure renes meos;* ut inter eos aliquando numeremur, qui apud Vatem Regium non sine gaudio dicunt: *Transivimus per ignem & aquam, & eduxisti nos in refrigerium.* A quo licet quis post obitum ad tempus impeditur; Apostoli tamen testimonio, *Salvus erit, sic tamen, quasi per ignem,* ad Corinth. cap. 3.

LIB. REGUM IV.

CAP. XVII.

*Unaquaque Gens fabricata est deum suum. --
 Viri Babylonii fecerunt Socothbenoth: vi-
 ri autem Cutai fecerunt Nergel, & viri
 de Emath fecerunt Asima. Porro Havaï
 fecerunt Nebehaz & Tharthac; hi au-
 tem, qui erant de Separvaim, combure-
 bant filios suos igni Adramelech, & A-
 namelech diis Separvaim.*

ECce tibi coloniam deorum Babylonio-
 rum, quorum nomina videntur esse
 propria linguis earum Gentium, a quibus
 culti sunt: si enim derivationem suam ha-
 berent a lingua Hebraica, vertisset illa S.
 Hieronymus, quod non fecit. Nec obstat,
 quod Socothbenoth hebraice significet ta-
 bernaculum filiarum; cum subinde nomen,
 quod est appellativum in una lingua, in
 altera sit proprium. Imo in eadem lingua
 id non raro contingit.

Vatablus ait, horum deorum nomina
 esse Syriaca & Chaldaica, & quod Socoth-
 benoth idem significet, quod Gallina cum
 pullis suis, quos alis suis umbraculi instar
 seu tabernaculi solet excipere & fovere.

Cum vero Babylonii essent excellentes Astrologi, videntur sub hac figura coluisse cœlestem constellationem, quæ vocatur gallina cum pullis suis, & sunt stellæ in signo Tauri, solentque Plejades vel Athlantes nominari. Inter omnes constellationes hæc nominatissima habetur in sacris literis, ut Job cap. 9. cap. 38. item Amos cap. 5. Longa enim cœlestium corporum inspectio-
ne & observantia notatum est, eam Zodiaci partem, quam Tauri titulo Veteres insignivere, maxime vitalem esse, utpote in qua Sol constitutus omnia vitali calore humoreque repleat. Gallinæ autem nomine vocarunt, tum quod imaginem ejus cum pullis referat, tum quod humore abundanti & sæcundo calore inferiora reficiat. Et cum sæcunditatem Veneri Gentiles adscriberent, nonnulli cœlestem Venerem appellarunt. Cultus hujus Numinis in adulteriis & fornicationibus consistebat. Oblationes erant furfures, farina, molæ salsa, libamina, & placentæ. Accedit, quod insigniores solemnitates mense Athyr, Vergiliarum seu Plejadum ortui respondente, ab Ægyptiis & Græcis peragerentur: tunc enim plagam illam cœli quasi præ cæteris diviniorem & humano generi faventorem respiciebant.

Nergel idem est, quod gallus gallinæus, quem pro deo olim habitum fuisse

Lu-

Lucianus testatur L. de Dea Syria. Simulacrum ejus in figura galli gallinacei, sub qua Solem, aut ignem Persæ, ex quibus Cuthæi oriundi, olim colebant. Quod Gallus Persis olim imperarit, & Marti sacer fuerit, Aristophanes testatur. Persiam quoque primum gallos produxisse Athenæus meminit: *Sunt illic (in Junonis Samia templo) pavones Junoni sacri, primi quidem in Samo editi ac educati, -- veluti galli e Perside, -- unde gallus passim avis Persica audit.* Multis quidem diis ac deabus gallus olim fuit consecratus, imprimis tamen Marti, quod sit animal pugnacissimum. Deinde Soli ac Lunæ, quod tempus indicet, & sit quasi in signa & tempora. Præterea Latonæ, Majæ, Nocti, Laribus, Mercurio, Herculi, & Æsculapio. Plutarchus refert L. de Isid. & Osirid. quod Ægyptii soliti sint gallum jam album, jam nigrum Osiridi immolare.

Asima simulacrum fuit Emathitarum in similitudinem hirci formatum. Cultus idoli hujus ab Ægyptiis manavit, imprimis Mendesiis, a quibus hircum summo in honore fuisse habitum solennitates testantur, huic quotannis in urbe Mendesia exhibitæ; unde & Tragolatræ dicti sunt. Verba Diodori sunt: *Hircum Ægyptii deificaverunt, sicut Græci Priapum.* Nihil fere frequentius est videre in Ægyptiorum hierogly-

roglyphicis, quam hirci caput baculo vel aræ impositum, & hoc symbolo salacem naturæ fecunditatem exprimebant.

Tharthac Rabini volunt idolum fuisse asini figura propositum. Typhonem vero sub asini figura ab Ægyptiis fuisse representatum, & velut sinistrum Numen ab iis fuisse victimis placatum, Plutarchus meminit L. de Osirid. & Ifid.

Nebehaz idolum significat canis figura expressum. Fuisse autem canem Numinis loco a Gentilibus habitum, Authores tradunt. S. Cyprianus in Epist. contra Demetrianum: *Crocodili & Cynocephali, & lapides & serpentes coluntur. Semicanesque deos canit* Lucanus. Cynopolis a cultu canis nomen suum obtinuit; de eadem scribit Strabo: *Sequitur Nomus Cynopolites & canum urbs, in qua Anubis colitur, & canibus habetur honor, & sacer quidam cibus canibus est constitutus.* Bubastus urbs Ægypti celeberrima (*qua in nostra idem est, quod Diana*, ait Herodotus in Euterpe, & Divino eam cultu prosequitur) fertur canem quoque velut Numen venerata; quod mirum non est; cum enim Diana venatrix sit, uti Græci, sic & Ægyptii canes ei adiungere. Cæterum deus ille Ægyptiorum, forma canis expressus, Anubis erat, qui propterea appellatur a Virgilio *Æneid. 8.* & Ovidio lib. 9. *Metam. Latra-*

trator Anubis. Hic vero fuisse creditur ipse Mercurius, ut Servius notat: *Quia canino capite fingitur, volunt esse Mercurium, ideo, quia nihil est cane sagacius*. Accedit, quod Hermanubis vocetur a Plutarcho L. de Isid. & Osirid. Hermes vero Mercurius est. Confirmatur ex Apulejo, qui Mercurium ita describit: *Ille superum commentor & inferum, nunc aëra, nunc aurea facie sublimis attollens canis cervices arduus Anubis, leva caduceum ferens, dextra palmam virentem quatiens*.

Fundamentum superstitiosi hujus cultus videtur fuisse historia. Osiris toti Ægypto imperasse fertur summa cum prudentia, majestate & gloria, præclara & heroica patrasse facinora, varias artes & scientias adjutore Mercurio homines docuisse. Inde & Osiris & Mercurius post fata Apotheosin meruere. Sed cur sub canis specie cultus sit Mercurius, dictus Anubis & Cynocephalus, varia datur ratio. Prima, quod Osirim ad bellum secutus gestarit canis insigne in clypeo, Diod. Siculus. Secunda, quod Isidis & Osiridis corpora custodierit: rerum autem custodia canibus est propria. Tertia ex Servio adducta est, scilicet, quod canes sagaces sint, & ferarum vestigia insequantur; ita Mercurius dicitur varias artes & literas humano generi perquam utiles & necessarias sagaciter indagasse,

gasse, & ideo etiam dilexisse canum corpora, velut naturæ suæ perquam similia. Quartam, si velis, adde, ne sanctius Numen præ diis cæteris videatur: quia canis lasciviæ symbolum est; Anubis vero mæchus a Tertulliano appellatur.

Anamelech & Adramelech idem videtur fuisse Numen cum Moloch; cum illis pariter Scriptura dicat filios hominum combustos fuisse & immolatos. Erat enim Gentibus proprium unum eundemque deum, v. g. Solem & Lunam, diversis figuris, diversis in regionibus adumbrare. Moloch vero, idem qui Mars Ægyptiorum seu Mythra Persarum. Revera autem Sol ipse, cui equos fuisse sacros Justinus L. 1. testatur. Et hæc causa est, cur idolum, de quo in præsentī, figura equi dicatur fuisse expressum. Nonnulli censent Adramelech muli imaginem retulisse, & sub eadem Lunam fuisse cultam. Proclus certe in Hesiodum tradit, mulam Lunæ sacram fuisse: quod Festus confirmat. Mulus vehiculo Lunæ adhibetur, quod ea tam sterilis sit, quam mulus, vel quod mulus non suo genere, sed equi, sic ea Solis, non suo fulgore luceat. Alii denique per Adramelech censent significari simulacrum Pavonis, aut alterius cujusdam speciosæ avis, tum ob etymon nominis, tum quod magno in honore apud Persas, aliasque Gentes avis illa

la fuerit Junoni sacra , id est Lunæ , ob admirandam colorum varietatem & vicissitudinem , quam intuentes Ethnici ita stupuerunt , ut Pavonem Argos vocatum in noctis & diei hieroglyphicum assumpserint . Pererius .

Ex dictis patet , quam abjecta fuerit & propudiosa gentilium religio , deos suos sub canis , hirci , asini , mulique specie proponens adorandos . Itane istud non turpe est , (verba sunt Arnobii) non impietatis & contumelia plenum est , moribundi & caduci animantis lineamenta diis dare ? Quis non rideat & excretur Ægyptiorum anigmata , quod mulorum animantium formas divinis inseruerint causis ? - Si aselli , canes , porci humanum aliquid saperent , fingendique haberent artes , iidemque nos vellent culum aliquo prosequi , & statuarum consecrationibus honorare , quantas nobis irarum flammæ concitarent , si suorum corporum formas nostra vellent portare atque obtinere simulacra ? Quam res indigna , & indignatione dignissima , si Urbis conditor . Romulus asinina staret in facie , si sanctus Pompilius in canina , si porcina sub specie nomen esset Catonis , aut Marci Ciceronis inscriptum ? Ita ergo stoliditatem vestram non rideri (si rident) vestris a Numinibus remini ? &c.

Arnobius
adv. gentes
lib. 3. num.
6.

LIB. REGUM IV.

CAP. XXVIII. De JOSIA.

*Abstulit quoque equos, quos dederant Reges
Juda Soli, currus autem Solis
combussit igni. V. 11.*

AN equi illi, quos dicitur abstulisse Josias, vivi ac veri fuerint, vel tantum ficti & picti, non adeo certum est. Lyranus & Historia Scholastica censent fuisse pictos tantum; Abulensis veros, cum Rabbino Salomon; qui ait, quod soliti fuerint Gentiles mane Soli orienti cum equis obviam procedere, quasi eundem salutaturi. Satis constat ex historiis mos Ethnicorum Solem mane salutandi: de eadem consuetudine meminit Plutarchus, item Herodianus, dum de Artabani scribit exercitu; & Sozomenus lib. 2. Historiar. cap. 8. & 9. refert, quomodo S. Simeon recusaverit Solem adorare.

Vivos equos fuisse Soli sacros, ex eo probari potest, quod iidem fuerint Soli in victimam oblati. Sic Justinus lib. 1. refert, equos Soli sacrificatos, quod etiam Philastrius lib. 1. & in Lacon. Pausanias testantur. Philostratus in Heroicis ait: Pa-
lame-

Iamedem Græcis præcepisse, ut orienti Soli equum candidum mactarent. Massagetæ Persarum inimici equam Soli offerebant in sacrificium, Strab. lib. 11. idem Mysii faciebant; sic enim de iis Florus lib. 4. cap. 12. Illi statim ante aciem immolato equo concepere votum, ut cæsorū extis Durum & litarent & vescerentur.

Causam aliquam, cur equus potius, quam aliud animal Soli fuerit in sacrificium oblatum, Ovidius adfert l. 1. Fastor.

Ne detur celeri victima tarda deo.

Sic Lactantius lib. 1. de falsa relig. ait: Lunæ mactatum fuisse taurum; quia similiter habet cornua. Causam quoque ibidem refert, quare asinus olim Priapo fuerit sacrificatus. Unde patet suam cuique Deo congruam victimam, quantum fieri potuit, fuisse destinatam.

De curru Solis meminit Xenophon lib. 8. Pædiæ Cyri e Babylone, ubi ait: *Post boves, equos secutos esse, ut Soli sacrificium existerent. Post hos currus educebatur -- candidus iugum habens aureum, coronatus, Jovi sacer; post hunc ducebatur Solis currus candidus, & coronatus similiter ut superior.* Qua vero ratione & modo Solem Gentiles venerati sint, refert Aurelius Prudentius:

Post trabeas & eburnam aquilam sellamque curulem,

Cor:

- Cornuaque ora senex barbatns, & oscula
figit
Crucribus aripedum, si fas est credere,
equorum,
Immotasque rotas; & flecti nescia lo-
ra,
Aut ornat redimita rosis, aut thure va-
porat.*

Macrobius Lib. 1. Saturnal. cap. 30. ita cultum Solis describit: *Vehitur simulacrum Dei Heliopolitani ferculo, veluti vehuntur in pompa ludorum Circensium deorum simulacra, & subeunt plerumque Provincia Proceres raso capite, longi temporis castimonia puri, ferunturque divino spiritu, non suo arbitrio, sed quo deus propellit vehentes. De forma ac figura statux ait: Quod fuerit simulacrum aureum specie imberbi, dextra elevata cum flagro in auriga modum, leva tenens fulmen & spicas.*

Quatuor Solis equos Poetæ finxerunt, quorum beneficio currus Solis toto cœlo circumvehitur. Ovidius lib. 2. Metam.

---- *Pyrois, Eous, & Æthon*

Solis equi, quartusque Phlegon,
Quæ nomina nihil aliud, quam lucem & ardorem Solis significant. De iisdem & curru Solis ita canit Aurelius Prudentius, vetus Poeta Christianus:

*Hoc sidus, currum; rapidasque agitare
quadrigas*

Com-

*Commenti, & radios capitis, & verbera
dextra,*

*& franos, phalerasque, & equorum pe-
tora anhela,*

*Aëris inaurati vel marmoris, aut ori-
chalci*

ſuſſerunt nitido fulgere polita metallo.

Fundamentum hujus fabulæ, verosimile est, fuisse historiam Eliæ curru igneo & equis igneis in cœlum rapti: prisca enim Philosophi gentilitatis tenebris involuti, ea quæ ex Scripturis legerant vel audierant, deliramenta reputantes ad fabulas conversi sunt. Ita censet Joannes Episcopus Hierosolymitanus; cum & maxima inter nomen Solis & Eliæ sit cognatio; Græce enim Sol ἥλιος dicitur, ut notavit Sedulius ita canens:

*Quam bene fluminei pralucens semita cœli
Convenit Elia, meritoque & nomine fulgens!*

*Hac ope dignus erat, quoniam sermonis
Achivi*

Una per accentum mutetur litera, Sol est. Idem sentit Angelomus, V. Beda quæst. 37. & S. Chrysostomus Homil. 1. de Elia, dicens: *Hinc poetas atque pictores in figuranda Solis imagine exempla credo sumpsisse, qui curru atque equis fulgentibus ipse rutilans atque radians e fluctu Oceani sublevaretur, inter præruptos montium scopulos evadens quasi ad cœlestia videtur evadere.*

L Abu-

Abulensis censet, per quatuor Solis equos quatuor diversas anni & dierum partes significari, quas certe cursu suo citatissimo Sol facit & distinguit.

In sensu allegorico sunt quatuor Evangelistæ, qui per totum Orbem curram Solis justitiæ scripture & prædicatione Evangelii circumduxere. Vide S. Gregorium L. moral. 31. cap. 11.

Moralem sensum nobis explicat S. Ambrosius L. de Isaac & anima cap. 8. *Si currus est anima, habet equos vel bonos vel malos, boni equi virtutes sunt anima, mali equi passiones sunt corporis. Bonus ergo rector malos equos restringit & revocat, bonos incitat. Boni equi sunt quatuor, prudentia, temperantia, fortitudo, justitia.*

LIB. JUDITH.

CAP. XVI. V. 8.

Nec filii Titan percusserunt eum, nec excelsi Gigantes opposuerunt se illi.

JUDITHA Amazon Judæorum gratias DEO agens pro reportata ab Holoferne victoria, & carmen Eucharisticum intonans, singulari encomio Divinam exaggerat fortitudinem, quod non per Titanas
Ducem

Dacem Assyriorum percusserit, nec Gigantes eidem opposuerit, sed per se infirmam mulierem prostraverit. Hinc satis nota tunc temporis videntur fuisse, quæ de Gigantum robore referuntur.

Distinguit Servius in Æneid. 6. inter Titanes & Gigantes; illos dicit fuisse, quos contra superos deos terra primum effudit; gigantes, quos posterius. Hesiodus in Theog. putat, Titanes esse subterraneos dæmones, quos contra superos deos irata Tellus in ultionem effuderit. Fabulantur vero Poetæ, Titanes ac Gigantes cæli terræque filios mole corporis admodum proceros eo processisse audaciæ & temeritatis, ut adversus Jovem rebellare, ejusque cælum expugnare tentaverint; sed trifulco Jovis fulmine percussos, & ad inferorum barathrum fuisse deturbatos.

Origo hujus fabulæ desumpta videtur ex lib. Genes. cap. 6. ubi dicitur: *Gigantes autem erant super faciem terræ in diebus illis. Isti sunt potentes a saculo; viri famosi*, qui immanitate scelerum Deum & cælum quodammodo oppugnarunt; sed justo Dei supplicio extincti sunt. Ovidius de iis l. 1. Metam. *hujusmodi*

Affectasse ferunt regnum caeleste gigantes;

Atque congestos struxisse ad sidera montes.

Quæ fictio inde forsan derivata est, quod Babylonii turrim tam altam cœperint æ-

dificare, cujus culmen ad cœlum pertingeret.

Ut ex umbra hujus fabulæ veritas rerum naturalium magis nobis innotescat, juvat proferre in medium, quæ de Titanibus Ægyptii memoriæ prodiderunt. Primo igitur dicuntur fuisse Cæli filii, & mater eorum Terra. Per illos filios intellige Vapores: illi enim sunt gigantes, quia a terra fiunt & nascuntur; cum gigas derivetur a verbo γίγμαι, nascor, fio, & γαῖα vel γῆ, terra. Illi Titanes sunt, eo quod, dum e terra nascuntur, & in aerem ascendunt, se extendant: nam Titan a Græco verbo *τείνω* suam videtur originem trahere, & idem significat, quod extendo. Fingitur Rhea sive Terra Titanes educasse; quod humus apta sit emittendis & recipiendis vaporibus. Rhea Hyperioni uni ex Titanum fratribus in matrimonium data est: quia vaporibus multum quoque terreæ materiæ jungitur & commiscetur. Sic Rhea Hyperioni, sive super terram eunti & elevato vaporis commixta masculum & fœmellam Solis & Lunæ nomine vocatam genuit: id est, vapores terreis particulis immixti, & altius elevati imagines subinde generant Soli & Lunæ non absimiles. Alii interim fratres dicuntur sceleris plenum facinus excogitasse, ut jugularent Hyperionem, & Solem parvulum in Eridano fluvio suffocarent:

rent: hoc est, alii vapores crassiores, nec tam altum ascendentes, dum coeunt in nubes, subtrahunt nostris oculis clariores vaporum imagines, & ipsum Solem parvulum, dum oritur, obscurant, & suis quasi aquosis nubibus submergunt. Mater cum illam crudelitatem fratrum ægerrime ferret, dicitur fuisse monita, non esse lugendum, eo quod Titanes essent a Sole castigandi, & in terram dejiciendi. Quod fit, dum Sol altius ascendens, radiis suis vapores coeuntes dissipat, & in pluvias solvit, unde non raro serpentes, ranæ, stelliones, & alia ejusmodi venenata animalcula nascuntur. Et hoc est, quod dicitur ex Titanum profligatorum sanguine in terram defluo varia viperarum & serpentum genera fuisse exorta, ut Nicander in Theriacis ait:

*Serpentes, pariterque Phalangia noxia;
& atrum*

*Vipereum genus, & qua terra plurima
monstra*

*Producunt, sunt Titanum de sanguine
nata.*

Nihil communius fuit Gentilibus, quam rerum naturalium causas ejusmodi involucris regere, & pro Divinis Mysteriis venditare. Hunc abusum acri stylo persecutus est Arnobius L. 5. advers. Gentes circa finem.

Sensus moralis clarus est ac apertus ex noto versu: Sequitur superbos ultor a tergo

Deus. Nec ullus hucusque extitit Theomachus, ac contemptor DEI, qui non cum Gigantibus vindictam ejus fuerit expertus. Sic Rex Pharaon toties ausus Deo resistere, suam cum suis in molli elemento duritiem Job. 26. debuit luere. *Ecce Gigantes genuit sub aquis*. Quis adversus Deum contumacior fuit Antiocho? Sed non tantum sepulchrum patens factum est guttur ejus, sed corpus totum, ita ut de corpore impii vermes scaturirent, & viventis in doloribus carnes ejus effluerent, 2. Machab. 9. Quis Rege Herode insolentior? Quo fine? *Consumptus a verminibus expiravit*, Act. 12. Omnium ejusmodi Theomachorum agmen claudet Antichristus. Hic quasi novus Titan Deum & Christum ausu prorsus temerario tentabit expugnare. Nomen ejus, cum S. Joannis testimonio in se complexurum sit numerum 666. secundum S. Irenæum & Hyppolytum TEITAN vocabitur: in eo enim prædictus numerus continetur. Sed hunc Dominus Iesus interficiet Spiritu oris sui, & destruet illustratione adventus sui. Ut discant omnes terrarum populi, Jos. 4. *justum est, subditum esse Deo, & mortalem non paria DEO sentire*, 2. Machab. 9. V. 12.

J O B

CAP. IX. V. 9.

Qui facit Arcturum, & Oriona, & Hyadas, & interiora Austri.

QUemadmodum multa Gentiles de Sole, Luna, aliisque Planetis finxerunt; ita de constellationibus, quarum in præfenti fit mentio; quæ nomine Ethnicis usitato exprimuntur, ut S. Gregorius ait, addens rationem: *Hæc quippe astrorum nomina a cultoribus sapientia carnalis inventa sunt; sed Scriptura Sacra idcirco eisdem vocabulis utitur, ut res, quas insinuare appetit, notitia usitata appellationis exprimantur.* Bene tamen monet S. Hieron. in cap. 5. Amos, quando audimus Arcturum, & Oriona, non debere nos sequi fabulas Poetarum, ridicula & portentosa mendacia, quibus etiam cælum infamare conantur, & mercedem stupri inter sidera collocare, quod vel ipsa Juno apud Ovidium indigne ferens ait:

Sideraque in cælum stupri mercede recepta pellite.

Arcturus nomen Græcum est, idem significans ac Urfina Cauda. Signum hoc

168 *Explicatio Fabularum,*
cœleste in Bootæ asterismo post Caudam
Minoris Ursæ suam habet stationem. La-
tini Plaustrum nominant. In Hebraico le-
gitur ghas a radice ghus, quod idem est
ac congregare. An vero stellarum qua-
rundam congregationem, aut pluviarum,
vel utramque significet, Astrologi diri-
mant. Cæterum Plinius lib. 2. c. 39. de
Arcturo ait, quod non ferme sine procel-
loso grandine emergat. Ante eum Plau-
tus in Rudente: *Arcturus signum sum*
omnium acerrimum, vehemens sum, cum
exorior, cum occido, vehementior. Hora-
tius lib. 2. Carm. Od. 2.

Desiderantem quod satis est, neque
Tumultuosum sollicitat mare,
Nec sævus Arcturi cadentis
Impetus, aut orientis Hædi.

Orion sidus cœleste est, vehemens &
horridum, teste Plinio cum Poeta:

Dum pelago desævit hyems, & aquosus
Orion,

Dum pecori lupus & nautis infestus Orion.
Hinc volunt aliqui, nomen illud deriva-
ri a Græco verbo *ὀρίω*, quod significat
turbo & concito. Idem eruitur ex Hebrai-
co nomine Cecib a radice Cacal, quod
varietatem & inconstantiam denotat. Mul-
ta ac varia de Orione finxerunt Poetæ;
qua ratione locum inter sidera obtinuerit,
Diocles refert, quod cum Orion per insi-
dias

dias Apollinis a forore sua ex ignorantia occisus esset, ipsa dolore commota a Jove impetravit, ut inter stellas locaretur. Cæterum sub figmentis Orionis exhibetur nobis vis, energia & potestas illius cælestis sideris in nubes, nives, grandines, pluvias, imbres & tempestates; quæ exortu illius stellæ tum indicantur, tum causantur. V. g. 1. Dictus est Orion filius *Sensus poeticus & naturalis.* Neptuni, Jovis & Apollinis; quia ad generationem eorum, quæ in aere fiunt, concurrunt sol, aer, & mare. 2. Orion in Chium veniens, & Meropem violare quærens, extra regionem privatus lumine ejicitur; quia materia vi Solis e mari extracta & extenuata, dum ad partem aeris summam & regionem igneam accedit, in qua magis diffunditur, (nam χέειν, a quo Chium, significat fundere) accensa deorsum ad crassiorem materiam repellitur, & cæcis nubibus immiscetur. 3. Orion benigne a Vulcano exceptus, ad Solem vero profectus, pristinae sanitati restitutus, & inde in Chium reversus, quod nihil est aliud, quam circularis elementorum & mutua inter se generatio & corruptio. Idem fere est, quod fingatur a Diana occisus; eo quod illam ausus esset attingere? Dum enim vapores nimis alte ascendunt, vi Lunæ congregantur, & in pluvias imbresque convertuntur, &c.

Hya-

Hyades septem stellæ sunt in capite Tauri. In ortu & occasu pluvias creant; hinc & nomen sortitæ sunt; ut Ovidius ait:

Ora micant Tauri septem radiantia stellis

Sidera, quas Hyades Grajus ab imbre vocat.

De hoc asterismo Lib. 2. de natura deorum ait Cicero: *Ejus (Tauri scilicet) caput stellis conspersum est frequentibus. --- Nostri imperite succulas, quasi a suis essent, non ab imbris nominata.* Poetæ fabulantur, has Hyadas a fratris nomine sic appellatas, Bacchi nutrices fuisse. Dodonides Nymphæ etiam vocatæ sunt, a Dodona Epiri civitate, quæ cum Junonis iram vererentur, fugerentque Lycurgi Regis sævitiam, a Jove in cælum translatae sunt. Alii tradunt Athlantem ex Æthra uxore Hian filium suscepisse, septemque puellas, quæ cum fratrem a Leone devoratum implacabili luctu prosequerentur, dolorisque magnitudine contabescerent, Jovis miseratione in septem stellas sunt conversæ; ut perpetuum maneret tantæ pietatis testimonium.

Historicus. In sensu historico fertur septem stellas in Tauri capite Hyadas fuisse nominatas ab Atlante Lybico astronomo peritissimo, qui prior stellas istas, & quas vires exerceant

geant in res sublunares, creditus est ob-
servasse; proin in perpetuam rei memo-
riam filiarum suarum nomina astris indi-
derit. Quod & alii plerique fecerunt: in
specie Conon, qui Ptolomæi tempore co-
mam vocavit Berenices. Sub naturalis ve-
ritatis imagine Atlantis filiæ Hyades fue-
re: quia post cœli sive axis ortum & stel-
læ ipsæ natæ sunt.

Sensum allegoricum Arcturi ita nobis
explicat S. Greg. Magnus Lib. 9. mo-
ral. cap. 6. Quid Arcturi nomine, qui in
cœli axe constitutus, septem stellarum ra-
diis fulget, nisi Ecclesia universalis expri-
mitur, quæ in Joannis Apocalypsi per se-
ptem Ecclesias, septemque candelabra fi-
guratur, quæ dum dona in se septiformis
gratiæ spiritus continet, claritate summæ
virtutis irradians quasi ab axe veritatis lu-
cet.

Secundo, Oriones cœlum edidit, dum
S. Ecclesia martyres misit, ait idem S.
Doctor: nunquam enim emicare solent
clarius & frequentius ~~martyrum~~ lumina,
quam dum persecutionum ingruunt tempe-
states. Per Hyades Doctores S. Pater in-
telligit, & Prædicatores Ecclesiæ, qui dum
intelligentiæ Divinæ Spiritu sunt repleti,
tanquam imbres mittunt eloquia sapientiæ
suæ. Denique per interiora Austri fervo-
rem Spiritus ait designari. Hunc deside-
rabat

172 *Explicatio Fabularum,*
rabat, Sponsa Cant. 4. cum diceret: *Veni*
Auster, perfla hortum meum, & fluant a-
romata illius.

In sensu morali, ut Sol cum signis Zo-
diaci mira operatur per quatuor anni tem-
pestates in mundo hoc inferiori; ita Sol ju-
stitiæ in fidelibus, qui vel in hyeme pœni-
tentium, vel vere incipientium, vel profi-
cientium æstate, vel autumnno perfectorum
inveniuntur, mira agit influxu inspiratio-
num suarum; dum enim pœnitentes plan-
gunt, & in semetipsos instrumentis pœni-
tentiæ defæviunt, in se, quod Arcturi est
proprium, repræsentant. Et quid aliud
sunt incipientes, quam Oriones? dum pe-
riculosam carnis turbant malaciam, & fer-
vore spiritus perfectionis obstacula e medio
tollunt. Qui vero de virtute in virtutem
proficiunt, fœcundum seminis irriguum
quasi Plejades subministrant. Nulli tamen
sic interiora Austri, & arcana spiritualis vi-
tæ gaudia experiuntur, quam qui perfe-
ctionis apicem conscenderunt; digniores
profecto, qui mæchorum & meretricum
loco cælesti inferantur firmamento: ut lu-
ceant tanquam stellæ in perpetuas æterni-
tates.

J O B

CAP. XXI. V. 33.

Dulcis fuit glareis Cocyti.

HUffæus Vates præfenti capite caufam
 quærens, cur malorum nonnulli ufque
 ad finem vitæ felices fint, boni vero af-
 fligantur, refpondet: *Quia in diem perdi-*
tionis fervatur malus, verf. 30. Vita, quæ
 propter afflictiones continuas molefta ju-
 ftis eft & amara, *dulcis fuit glareis Co-*
cyti, id eft peccatoribus. Hæc Lyrani ex-
 plicatio brevis & expedita. Glarea mini-
 mi funt lapilli, arenæ mixti, vel terra
 fabulofa, quæ fubinde cum flumine deve-
 hitur. Homines vero præfertim multos
 arenæ comparari, in Scriptura nihil no-
 vi. Cocytum fabulati funt antiqui effe
 rivum Stygis, & cum Periphlegethonte in
 Acherontem fluere, eumque defunctis ani-
 mabus tranfeundum effe, priusquam ad in-
 feros deveniant. Si etymon Cocyti fpectes,
 a Græco verbo κωύω derivatur, id eft,
 ploro, lugeo. Addit Græcum Lexicon, *Gallice co.*
 quod fit verbum fictitium ad vocem gal- *qu idem*
 li, forfan ideo quod gallum avem nocti *quod Gal-*
 facram Poetæ finxerint: ut enim nox *lus.*
 atra

174 *Explicatio. Fabularum;*
atra dicitur, ita & Cocytus :
Vifendus ater-flumine languido
Cocytus errans.

Horat. Lib. 2. od. 14. Et Claudianus :

Cocytusque sinu labens circumfluvius atro;
Revera autem nihil aliud videntur voluisse veteres Mythologi per hanc fabulam, quam quod homines per Cocytum, hoc est, non sine dolore & luctu hinc discedant.

*Cluverius
in Italia
antiqua.*

Fundamentum hujus Fabulae præbuit Campania, in cujus litore Cumas inter & Puteolos multi fontes calidi, haud procul inde antrum, & juxta lacus magnus cum pestilenti exhalatione. Campus præterea Phlegræus montibus in orbem cinctus, igneis quasi caminis sulphureos vapores exspirans. Ibidem fluvii Styx, Periphlegethon, Cocytus & Acheron dicti. Locum hunc pulchris versibus describit Silius Poeta Lib. 12. eundemque Plutoni sacrum, & inferorum limen esse rudis vestustas credidit.

In sensu allegorico impii, ut S. Joanni Baptistæ, sunt paleæ ignis inextinguibilis, Luc. 3. ita Hussæo Vati glareæ Cocyti, quibus ut dulcis fuit voluptas hujus sæculi, ita & dulcis erit, ironice, quemadmodum S. Hieronymus explicat, infernus. Paucis, iniquos esse glaream Cocyti, & cum hoc atro mœstoque flumine ad inferos

feros defluere, est illos mitti & ejici in tenebras exteriores, ubi erit fletus & stridor dentium, Matth. c. 8.

J O B

CAP. XLII. V. 14.

Nomen tertia Cornustibii.

HUffæus Vates post afflictionem gravissimam de manu Domini æquanimiter susceptam, supra modum a Deo locupletatus tres genuit filias, & vocavit nomen unius Diem, & nomen secundæ Cassiam, & nomen tertiæ Cornustibii. Per nomina gradatim ascendit, ut ipsa nominum impositione perpetuum gratitudinis & acceptorum beneficiorum Deo monumentum dedicaret, contestans, se ex calamitatum tenebris ad lætitiæ lucem, ex fænore sterquilini ad odorem insignis famæ & gloriæ, ex infirmitate ad robur, quod cornu significat, ex egestate ad summam opulentiam pervenisse, quam 70. Græci Interpretes sua versione nobis metaphorice significarunt, ἀμαλθείας κέρας, Amaltheæ cornu, de quo sic Olympiod. Nam Veteres illi Amalthea Cornu ad honorum copiam significandam transfulerunt. Fuit autem Amal-

malthea nomen Capræ illius, cujus lacte Jupiter nutritus dicitur, Adiaſtes & Idæ Nympharum miniſterio & opera; cum autem Capra cornu, quod habebat ampliffimum, in objecta fregiffet arbore, Nympha id ſuſtulit diverſis pomis ac herbis onuſtum, & ad os ipſius Jovis detulit: is memor accepti a Capra beneficii donavit cornu illud Nymphæ, cujus fuerat Capra, ea virtute imbutum, ut quidquid appeteret, ex eo cornu protinus efflueret. Fabulam hanc Ovidius refert Lib. 5. Faſtorum.

Lactantius Lib. 1. cap. 21. ait: Sacra Cretici Jovis oftendere, quomodo ſit aut ſubtractus, aut nutritus Jupiter. Addit ſequentia: Capella Amaltheæ Nymphæ, quæ uberibus ſuis aluit infantem, de qua Germanicus Cæſar in Aratæo carmine:

- - *Illa putatur*

*Nutrix eſſe Jovis, ſi vere Jupiter infans
Ubera Cretea mulſit fidiffima Capra,
Sidere qua claro gratum teſtatur Alu-
mnus.*

Hæc quoad fabulam. Addit hic Nicetas, cum Scriptura cornu-copiæ, aut Sirenium, aut Vallis Titanum, aut Gigantum mentionem facit, tantum utilitatem illis fabulis ſignificatam, non vero falſitatem ullam nobis propinare. Sunt igitur tractandæ, quæ in Scripturis occurrunt, fabu-

fabulæ in morem anethi, quod exsuccum & decoctum projicitur. Utitur hac similitudine Cassiodorus quoad Origenem legendum. Fuerunt, qui originem hujus fabulæ ad historiam retulerunt, quorum meminit Olympiodorus hisce verbis: Alii ad persuadendum magis dicunt, Amaltheam Capram fuisse hoc vocatam nomine, quæ cornu terram effodiens thesaurum retexerit, ibidem antiquitus depositum. Caprarium eo potitum ex inope repente divitem extitisse; atque ita Amaltheæ cornu ad opimum & beatum statum significandum usurpari cœpisse. Propter hanc pecuniæ inventionem forsan a Philemone Comico ipsa pecunia vocata est Amaltheæ cornu:

Putasne Amalthea cornu esse hujusmodi

Quale depingunt pictores cornu bovis?

Argentum est, quod si habueris, pete

Ab ipso, quidquid voles, omnia tibi obtingent.

Nam pecuniæ obediunt omnia. Eccles. cap. 10. vers. 19.

In sensu physico, ut Stobæus narrat, habuit Socrates cornu-copiæ pro symbolo industriæ & laboris, quod facile omnis generis bona ad illum defluant, volut ex cornu-copia, qui est ἀμείνων, hæc est, non dissolutus nec ignavus. Est etiam Amaltheæ cornu signum illius felicitatis,

M

quæ

quæ ex pietatis & virtutis cultu solet provenire, ut Horatius indicavit in suo sæculari carmine, & Lib. 1. car. od. 17.

Sensum mysticum nobis explicat S. Hieronym. Nomen Cornustibii competentissime Evangelicis copiis, Ecclesiæque divitiis coaptatur, quæ spiritualium rerum thesaurus est, cornu vero ad insigne regium & dignitatem Ecclesiæ pertinet, sicut ait Propheta: *Exaltavit cornu Christi sui*, e quo velut inexhausto fonte bona cœlestia & æterna in nos defluerunt; ut enim S. Joannes ait: *De plenitudine ejus nos omnes accepimus*, cap. 1. Idem insinuat Olympiod. tunc nos esse Cornustibii, cum spiritualium charismatum ubertate complemur, & ad perfectionem properamus.

In morali sensu Jobus post ærūmnas gravissimas patientissime toleratas generans filiam, cujus nomen cornu Amalthææ, designat pariter patientiæ filiam esse bonorum omnium abundantiam, cujus fundamentum est pacifica animæ possessio. Hæc vero unde acquiratur, docet nos ipsa veritas: *In patientia vestra possidebitis animas vestras*, Lucæ 21. vers. 19. quis autem hujus patientiæ finis sit, Apostolus tradit 2. ad Timoth. 12. *Si sustinebimus, & conregnabimus*. Quæ vero hujus regni felicitas, & quæ in eo bonorum omnium abundantia, adhuc *oculus non vidit, nec*
auris

auris audivit , nec in cor hominis ascendit , 1. Corinth. cap. 1. vers. 9.

In sensu anagogico , & alio sensu allegorico verum Cornu Copiæ nulli magis convenit creaturæ , quam Matri Creatoris : illa in se fontem omnis boni , abyssum gratiarum , & omnes thesauros sapientiæ & scientiæ DEI conclusit : *Multa quidem filia congregaverunt divitias , hac supergressa est universas . Vix ex illa prodit Dilectus , quemadmodum Filius unicornium Jesus Christus amore & odore Virginis illectus , non solum quievit Dei ira , sed fuit pariter erectum cornu salutis nobis in tanta bonorum copia , ut iis cælum & terra scatuerint & exultarint .* Audiatur S. Chrysologus serm. 140. *Una puella sic Deum in sui pectoris capit , recipit , oblectat hospitium , ut pacem terris , cælis gloriam , salutem perditis , vitam mortuis , terrenis cum cælestibus parentelam , ipsius Dei cum carne commercium pro ipsa domus exigat pensione . Quod exegit , factum est ; nam ut S. Augustinus de eadem ait serm. 35. de tempore : Deum hominibus peperit , vitam mortalibus dedit , cælos innovavit , mundum purificavit , paradysum aperuit , & hominum animas ab inferis liberavit . Et ex his constat liquido , in nulla unquam creatura fuisse plenius & exuberantius cornu copiæ , quam in Maria*

vera summi ac veri Jovis nutrice. Fingunt Poetæ Jovis nutriculam inter astra fuisse collocatam, de quo Ovidius:

Sidera nutricem, nutricis fertile cornu

Fecit, quod Dômina nunc quoque nomen habet.

Faceſſant e cœleſti firmamento tam monſtroſa ſidera, & eorum loco ſuccedant longe illuſtiores Sancti Religionis Catholice, ut tam operum quam nominum ſuorum gloria utriuſque poli regionem exornent. Quo ſplendore inter omnes cœli ſtellas Chriſtus Matrem nutricem ſuam chariſſimam, & omnium noſtrum Dominam fecerit eminere, Joannes vidit in Apocalypſi ſua cap. 12. *Mulier amicta Sole, & Luna ſub pedibus ejus, & in capite ejus corona ſtellarum duodecim.* --- *Quidni conent ſidera, quam Sol veſtit? Quis ſtellas numeret, quibus Maria regium diadema compactum eſt? Supra hominem eſt, coronæ hujus rationem exponere. Quare præſtat illam ritu Harpocratis, id eſt, ſilentio venerari.*

PSALM. LXVII. Vers. 14.

Si dormiatis inter medios cleros , penna columba deargentata , & posteriora dorsi ejus in pallore auri.

UT hic versus melius intelligatur , sciendum , qualem Gentiles Palæstinę imprimis & Syrię populi de columbis habuerint superstitionem . Lucianus Lib. de dea Syria ait : *Columba ex avibus videtur res sanctissima esse , & ne tangere quidem ipsam fas habent ; quod si quando inviti etiam attingunt , scelerati & execrabiles illo tum die habentur.* Hinc Martialis Lib. 14. ita canit :

*Ne violes teneras prædæ dente columbas,
Tradita si Cnidia sint tibi sacra dea .*

Ex quo patet , esu columbarum seu pignonum , ut eas vocat Lampridius , interdictum fuisse Mystis Veneris , qui si ministram Veneris avem comedendo violassent , contra jus sacrorum suorum fecissent . Hinc censet Raderus noster in Martialem melius legendum esse : *Ne violes teneras perjuræ dente columbas.*

Per columbam deargentatam intelligo albam . Sic & Virgilius candidum anserem vocavit :

182 *Explicatio Fabularum,*
Atque hic auratis volitans argenteus an-
ser.

Porticibus, Gallos in limine adesse canebat.
Et Leander in Ovidium notat Lunam modo candidam, modo argenteam appellari:

Quarto cum radiis fulges argentea puris,
Concedunt flammis sidera cuncta tuis.

Quæ vero columbæ candidi erant coloris, præcipue a Syris in gratiam forte Veneris colebantur, modo pallor auri non defuisset. Hinc Ovidius de sacrificio Veneris Lib. 1. Fastor. ait:

Uritur in calidis alba columba focis.

Et Martialis Lib. 8. ep. 28. Paphias columbas ob candorem Cygnis conjungit. Lucianus in Jove tragoædo ait; columbas cultas esse propter castitatem, cujus signum candor est ab iis specialiter amari solitus & exquiri, secundum illud Ovidii:

Aspicias, ut veniant ad candida testæ co-
lumba,

Accipiat nullas sordida turris aves.

Potius illas pro incontinentiæ symbolo & exemplo servire dixeris cum Theophylacto, ob lasciviam & immodicam generationis frequentiam, cum decies quotannis pariant, ut Athenæus refert, ideoque ab Ethnicis Veneri sunt consecratæ.

Causæ, cur hæ alites ita sint cultæ, assignantur variæ. Diodorus Siculus ideo
ait

ait sacras fuisse has alites, quod Semiramidem Dercetus Syriæ deæ filiam a columbis in deserto educatam crederent. Proinde in grati animi mnemosynon tale venerationis obsequium ipsis deberi. Lucianus ante memoratus hanc adducit causam, quod Semiramis, cum expirasset, in columbam versa putaretur. In quas duas opiniones Justinus Martyr in Orat. Athenag. pro Christianis ita invehitur: *Quidam execrandi & DEO inuisi opinionem, quod dii essent, obtinuerunt. Et Dercetus filia Semiramidis mulier petulans, & cadibus contaminata dea Syria existimata est, & ipsius Dercetus causa columbas quoque & Semiramidem Syri colunt; nam, quod impossibile est, fœminam in columbam mutatam esse, apud Cæsiam fabula est.* Forasan bona illa a Gentibus concepta opinio de columba, tanquam symbolo securæ felicitatis, suam traxit originem a Noemi columba tam beatæ pacis nuntia; certum enim videtur, Gentiles aliqua ex vetustissimis historiis cognovisse, & ex relictis quasi in vetusta quadam tabula lineis omnino obscuris aliquid divinasse. Cæterum ex religiosa columbarum veneratione ortum est: 1. Ut Beroso teste ab earum esu abstinerent, 2. Immunes ab omni minimæ lationis periculo per urbes & campos libere volabant, ut Tibullus canit:

*Quid referam, ut volitet crebras intacta
per urbes*

Alba Palestino sancta columba viro?

3. Erant compascuæ ipsis Syris, & domos eorum frequentabant, & pascebantur in urbe sacra, uti anseres olim in Capitolio. Hinc non sine fundamento dici posset, inter illos populos symbolum quietæ & securæ felicitatis fuisse pennas columbæ deargentatæ.

Per cleros intelliguntur a S. Hieronym. termini, hostiles scilicet, & a Genebrardo sortes: sic enim ille explicat primam versus partem: Si versemini in præsentissimis & certissimis periculis, qualia sunt, dum de captivorum vita, libertate, fortunis, &c. victores sortem mittunt, eritis quali pennæ columbæ deargentatæ, id est, liberi & securi. Ex versibus præsentem antecedentibus satis licet colligere, agi hic in sensu allegorico de Ecclesia, de Christo, de Apostolis, *verbum evangelizantibus virtute multa*, Vers. 12. & eos inter summâs angustias, adversitates, & pericula, non terrendos a Tyrannis, (habent enim & hoc columbæ, ut etiam captæ niteant eodem colore, statu, & specie) & fore liberos omninoque tutos a fatali saltem ictu animæ, animam enim non possunt occidere, & securos præterea æternæ felicitatis, modo simplices manserint, sicut columbæ.

Sed

Sed quid hoc : *In pallore auri posteriora dorsi ejus* ? In sensu literali videtur elaborata fuisse figura columbæ , forsan in templo exposita , cujus pennæ fuerint deargentatæ , & posteriora dorsi ejus in pallore auri . Dixi , forsan in templo exposita : nam referente Basso & Pierio Syri in venerationem & gratiam Facelitidis in piscem mutatæ , argenteos pisces in templo religiose posuerunt ; an non & columbam eodem modo , in quam credebant Semiramidem esse mutatam ? Sed a priori redeundo ad posteriora dorsi ejus in pallore auri ; videntur albas inter columbas illæ singularem præ cæteris venerationem & cultum obtinuisse , quæ deargentatæ essent in pallore auri , seu maculis aureis ad speciem saltem variegatæ ad pallentis auri similitudinem . Sic apud Ægyptios bos colebatur pro Numine , non quilibet , sed cui insigne esset in dextro latere candicans macula , similis cornibus Lunæ crescere incipientis . Ita & Syri in iis columbis videntur Deam suam respexisse & coluisse , quæ in albis alarum pennis auri splendorem , & Semiramidis monilia referrent .

Notandum hic primo : In columbino candore auri colorem apparere pallidum pro diverso motu corporis , aut colli situ . Sic Nero Cæsar apud Senecam ait lib. 1. quæst. nat. cap. 5.

Col.

Secundo, non esse verum colorem aureum & argenteum, qui ad splendorem lucis in eis apparet, ut patet ex subitanea & inconstanti ejus facie & repentino interitu. Hinc idem dicendum de columbæ & iridis specie, de qua Seneca lib. 1. quæst. nat. cap. 6. *Tu dicis illum colorem esse, ego videri.* Per posteriora dorsi caudam columbæ intellige, quæ si candeat, & in modum coronæ erecta hinc & inde moveatur, pro diversa lucis incidentia quamdam argenti & pallentis auri speciem videtur exhibere.

In sensu allegorico per columbam significatur Ecclesia, Per deargentatas pennas Judæorum Synagoga, quæ dormivit & quievit inter medias sortes & terminos Palestinae in pace & abundantia bonorum temporalium, secuta ab hostili gentium invasione, ut columbæ in Syria; sed quam diu unum & solum Deum coleret, non vero, si etiam diis alienis inserviret. At vero quæ in novissimis temporibus futura erat Christi Ecclesia, in pallore auri; tantum enim a Veteri Testamento distat Evangelium, quantum ab argento aurum. Quia, ut S. Bernardus ait serm. 30. in Cant. *Non pari profecto acceptabitur voto umbra & lux, ira & pax, judicium & misericordia.*

misericordia , figura & veritas , virgo & hereditas , frenum & osculum .

In sensu tropologico pennæ columbæ deargentatæ secundum Jacobum Vitriacensem D. 7. post 8. Pent. sunt viri sancti : Hi sunt, inquit, velut pennæ columbæ deargentatæ inter medios cleros dormientes, qui ob duplicem gratiam, scilicet actionis & contemplationis, columbini, per studium simplicitatis deargentati, per puritatem locutionis inter medios cleros dormiunt, dum a mundana cupiditate oculos claudunt. Nec quis speret somnum ejusmodi in terra, aut volatum mentis in cælum, si non corporis & animæ puritatem exquisierit. Hinc bene ait S. Bernard. serm. 4. de duplici adventu: *Omnis penna nostra ad nihilum valet, si non sit deargentata.* Apud eundem S. Patrem alium sensum tropologicum de præsentī textu vide sermone 51. in Cantica.

P R O V E R B.

CAP. XXVI. V. 8.

Sicut qui mittit lapidem in acervum Mercurii, ita qui tribuit insipienti honorem.

IN acervum, hebraice legitur, in margema, quod interpretantur aliqui esse purpuram, alii, ut Septuaginta, fundam, S. Hieronym. acervum Mercurii. Græca versio habet ἑρμαῖον, Hermæum, qua voce comprehendi potest delubrum, statua vel acervus Mercurii, quanquam delubrum ipsas Mercurii ædes significet. Statuæ autem illius Hermulæ dicuntur vel Hermæ, acervi Hermaces, a Græco ἑρμᾶνες. Hic proprie fit mentio de acervo vel statua Mercurii. Præses hic erat viarum apud Gentiles, & statua illius tam privatim in ædibus, quam publice in biviiis maxime & triviis erat posita. Habebat subinde aliam statuam sibi adjunctam in una basi, quæ Hermathenæ vocabantur, si Pallas erat socia; vel Hermeracæ, si Hercules erat junctus. Solitariae Mercurii statuæ frequentiores erant in sepulchris, in fulcris lectorum, in delubrorum & privatorum ædi-

ædium vestibulis . Figura statuæ quadrangularis erat : ea enim inter quantitatis species omnino solida & perfecta est ; indicabat hæc præterea , sicut ipsa in quascunque partes cadat , stat firma semper & recta ; ita orationem viri boni & veritatem semper sibi esse similem . Mercurius autem creditus est deus veritatis & rationis . Scientias pariter primus deorum invenisse traditur , & quidem has quatuor , Literas , Musicam , Palæstram , Geometriam , & ideo servatus illi quaternio : Plutarch. lib. 9. Sympol. quæst. 3.

Materia statuæ ut plurimum erat ex lapide , Thucydidis testimonio lib. 6. belli Peloponnes. subinde ex ligno , sed certo quodam ; unde ortum illud proverbium : *Non ex quovis ligno fit Mercurius.* Ovidius Lib. 1. Fastor. ita canit :

*Termine siue lapis , siue es defossus in agro
Stipes .*

Tibullus lib. 1. eleg. 1.

*Nam veneror , seu stipes habet desertus
in agris ,*

Seu vetus in trivio florea fersa lapis .

Lactantius lib. 1. cap. 20. *Et huic ergo supplicatur publice quasi custodi finium Deo , qui non tantum lapis , sed etiam stipes interdum est .* Habitus illius Truncus erat sine corpore apud Græcos & Romanos , vel pectore tenus humano , ut Alciatus putat ,

tat, vel capite & collo, etiam sine brachiis & manibus. Hinc Mercurius dictus est Cyllenius, quod Græce κυλλός mancus est; forsan ideo, ut constaret Deum totum esse mentem, vel quod etiam sine manibus multum possit, & præstet sermo: hic enim Mercurii filius dictus est, eo quod sermo interpret sit animi; hoc enim significat ἐρμῆς ab ἐρῆν. Quod infra statuum erat, scripturam aliquam præferebat, ut testatur Theocritus: *Triceps dicitur Mercurius tanquam vias docens, subscriptionemque habens quoniam hac via ferat, quo illa; forte etiam ad quamlibet viam caput habebat.* Item Ulpianus Demosthenis scholiastes: *Ligna seu lapides erant quadrati, Mercurii faciem desuper habentes; subter vero in corporis planitie Epigrammata.* Confirmat idem apud Martianum Capell. lib. 1. de Philolog. Viales Hermæ quadrati fuerunt lignei & lapidei, summa parte Mercurii faciem, inferiori plana inscriptiones viarum præferentes; erant autem hæ: ὀδῖος, id est, auspicatus ad iter. Ὀδῆγός dux viæ. Hinc ἐνὸδῖος, teste Hesychio, vel ἐνὸδῖος. A Latinis Deus viarum præses dictus est Viacus. Ab antiquis Judæis Mercolis vel Mercurius, & in ejus honorem solebant viatores ad Hermos, seu Mercuriales statuas lapides adjicere in tanta copia, quemadmodum Alciatus censet,

set, ut ex lapidum adjectorum cumulo tantum statuae summitas extaret. Hesychius de isto cumulo sic loquitur: Mercurialis acervus significat cumulos lapidum Mercurii, quos in viis coacervabant in honorem dei Vialis. Eadem Suidas cum Phavorino tradit, uti & Didymus in Homerum: *Quid de iis dicam, qui colunt talia, nisi ipsos potissimum lapides ac stipites esse?* Tempore Caroli Magni in Saxonia adhuc vestigium fuit, (ut volunt aliqui) lapidis erecti in honorem Mercurii; ut Crantzius testatur his verbis: *Progressus autem cum exercitu victore Carolus venit ad montem Martis; ibique fanum & idolum Gentis, quod Irminsuel appellavere, subvertit.* Videtur autem Irminsuel fuisse Mercurii statua voce semi-græcâ & Germanica: nam ἐρμῆς Græcis est Mercurius. Ita Tetmarus Marspurg. Episcopus, cujus vita incidit in annum Domini 1020.

*Lactan-
tius lib. 1.
de fals. re-
lig. c. 22*

Videtur quidem superstitio illa de Mercurio certo initium suum sumpsisse a Mercurio, sed qua occasione, incertum. Phavorinus autumat, inde ortam esse, quod solitus sit Mercurius vias elapidare, & commodiores reddere, saxis, quæ gressum impedire possent, remotis, & in unum cumulum congestis, nec non viatores recti itineris, & viæ regiæ certiores reddere. Aliam causam affert Anticlides, cujus me-
mi-

minit Didymus Odyss. 1. in fine: scilicet inde consuevisse Gentiles lapides congerere in honorem Mercurii, quod ipse ob interfectum Argum Centoculum a Junone citatus sit ad iudicium quidem; sed cum necem Argi ex Jovis imperio factam esse dii intelligerent, absolutus sit, ita ut dii iudices omnes calculos suos tam atros quam candidos ad pedes Mercurii projecerint: & hinc ait enatam esse consuetudinem, ut quos in via media invenissent lapides, ad latus in cumulum coacervarent honorandi Mercurii gratia. Phornutus alias acervorum originationes congerit. Accumulant Mercuriis lapides: quicumque enim illac præterit, unum adjicit, sive tanquam utile quid faciens, quodque omnium communiter intersit, dum via purgatur; sive obtestans Mercurium, aut ut venerationem ipsi exhibeat, si nihil præterea habeat, quod ei offerat; sive ut Mercurii collocationem prætereuntibus faciat manifestiorem, aut innuat ex modicis partibus orationem constare. Prima Hieronymo Aleandro videtur melior: ut enim sus Cerei, Baccho hircus mactatur, quia hic vitem lædit, ille segetes; ita Mercurio viarum præsidii struem erigebant saxorum, quæ per vias sparsa impedimento videntur esse itinerantibus.

Salomon in præsentî capite satis innuit,
quam

quam inutilis & inconueniens hic mos fuerit Gentilium honorandi statuas Mercurii, passim in biviis maxime & triviis poni solitas. Jure illas omnes e viis publicis & e conspectu oculorum sustulerunt Christiani, ut Prudentius testatur 2. in Symmachum:

— — — *Lapis ille*

Si stetit antiquus, quem cingere sueverat error

Fasciolis, vel gallina pulmone rigare, Frangitur, & nullis violatur terminus extis;

Et qua fumificas arbor vittata lucernas
Servabat, cadit ultrici succisa bipenni.
 Econtra earum loco imagines Crucifixi, scilicet Cruces sunt collocatz. Qui mos fuit in Ecclesia antiquissimus, & illo tempore maxime frequentatus, quo, invalescente Fidelium numero, cœpit idololatria succumbere; ubi enim rerum potiti sunt Christiani, consueverunt ea loca, quæ superstitionum sordibus contaminata erant, prius Cruce expiare, & erecto Crucis titulo dedicare, antequam ad usum suum applicarent. Nec in ædibus & templis solum, sed in viis etiam publicis signum illud prostabat, ut testatur S. Chrysostomus in Orat. quod Christus sit Deus: *Crucem celebrari videre licet in viis.* Idem confirmat Nicetas in Ignatio Constantinopoli ad æ-

In oratione de inventis

N

dem

*reliquiis
S. Enphe-
mie.*

*Leontius
l. 5. con-
tra Iu-
deos apud
Dama-
scenum
orat. 3. de
imag.*

dem S. Gregorii Theologi Crucem in pū-
blica via marmoreæ columnæ fuisse impo-
sitam. Et Constantinus Episcopus Tii Pa-
phlagoniæ refert, ab Iconoclasta Coprony-
mo *dejectas esse Cruces, quæ in triviis fidei
convenienter figebantur.* Tum, ut loca
prorsus omnia ethnica impietate expiaren-
tur, a veneficiis & illusionibus dæmonum
fierent immunia, tum *ut his.* (Crucibus
scil.) *assidue perspectis memores simus &
non obliviscamur Domini Dei nostri.*

Hanc tam sacram Crucifixi memoriam
per erectas passim Cruces excitari, non
passi sunt antiqui, non patiuntur recentio-
res hæretici; ut Severiani, Constantinus
Copronymus, Leo Isauricus, Julianus A-
postata, irridens Christianos, quod lignum
Crucis venerarentur. Mercerus hæreticus,
fidelis Iconoclastarum affecla, in præsen-
tem versum scribens ait: Veteres Hebræi
margema accipiunt pro simulacro Mercurii,
quod ex magna lapidum mole factum
esset, quo sensu vulgatus. Interpret vertit
acervum Mercurii; qualis est imago Chri-
stophori, quæ magnæ mole lapidis in no-
stris templis alicubi cernitur. Quam insci-
te, tam impie. Idem ait Theodorus Be-
za in præsentem versum, qui imagines
Crucifixi sacrilego audet vocabulo affice-
re, & immania Christi idola appellare.
Dolet hic eadem a Lutheranis adhuc con-
fer-

servari in plerisque, ut ait, non tantum
templis, urbibus & pagis, sed & in agris;
ita ut Copronymi alicujus aut Juliani ani-
ma ex inferorum sedibus egressa in hunc
Calvinistam immigrasse videatur.

Sensus tropologicus satis clare in versu
patet, scilicet nihil esse inutilius, & ma-
gis indecorum, quam insipientem honora-
re: ut enim statua non sentit honores si-
bi oblatos, ita, nec illos stultus æstimat.
Hinc bene Juvenalis eum Mercurii statuæ
comparat:

*Truncoque simillimus Herma,
Nullo quippe alio vincis discrimine,
quam quod*

*illi marmoreum caput est, tua vivit i-
magō*

In sensu allegorico dici potest, eos in
Ecclesia esse acervos Mercurii, qui ad Ec-
clesiasticas dignitates indigni promoventur:
sunt enim in templis quasi aureæ & argen-
teæ statuæ omni doctrina & pietate vacuæ,
de quibus B. Petrus Damiani L. 1. Ep. 8.
ad Alexand. II. Rom. Pontificem ita scri-
bit: *Insipienti honor tribuitur, cum ad Ec-
clesiastici gradus apicem non Deo sed pecu-
nia deditus promovetur.*

LIB. SAPIENTIÆ

CAP. XI. V. 16.

*Quidam errantes colebant mutos serpentes,
& bestias supervacuas.*

PER serpentes videntur dracones intelligi, vel alii majores aspides, sub quarum specie quam libenter diabolus lateat, & homines decipiat, in Paradiso ostendit. Alibi dictum est de Æsculapio grandi illo serpente Epidaurio. Verisimile est, ab Ethnicis, præsertim incolis accolisque Arabiæ Libyæque, quæ magnam serpentum copiam nutriunt, ideo cultos fuisse serpentes, ut a lethiferis eorum ictibus immunes possent fieri. Innotuerit illis etiam vis & efficacia serpentis illius a Moyse in deserto erecti, cujus intuitu, qui ab ignitis serpentibus læsi erant, sanati sunt. Judæos certe serpentem illum cultu idololatræico veneratos fuisse Liber Reg. 4. testatur c. 18. v. 4. Herodotus l. 2. in Euterpe c. 74. ait: *Circa Thebas sunt sacri serpentes nihil omnino hominibus noxii, pusillo corpore, binis praditi cornibus e summo vertice enatis, quos defunctos in foris adæ sepeliunt; huic enim Deo sacros illos esse prædicant.*

Ad-

Additur *mutos serpentes*; hoc enim est proprium animalium Epithetum, Græce ζῶα ἄλογα, quæ & rationis & veri sermonis sunt expertia. Fuerunt, qui putarint, ante Adami peccatum animalia inter se fuisse collocuta, ut Basilius; & Eusebius de Platone refert, eum censuisse loquelam brutis fuisse sæculo aureo. Sed improbat communiter hæc sententia & rejicitur. Hinc merito Josephum reprehendit Abulensis asserentem, naturale fuisse serpenti Evam tentanti intelligere & loqui; sed iratum Deum vocem illi ademisse, & venenum linguæ ejus indidisse. S. Bonaventura censet serpentes dici mutos ex comparatione illius serpentis, qui Evæ locutus est.

Et bestias supervacaneas, Græce κνώδαλα ἐντελῆ, id est, bestiolas viles. κνώδαλον enim significat animalia omnis generis tam terrestria, quam aquatica & aëria, qualia Ægyptii solebant colere; de quibus ita Epiphanius in Anchorat. Ægyptii omnibus amplius errore involuti non solum proprios affectus coluerunt; sed etiam volatilia, & quadrupedia, terrestria & aquatica, & quedam animantia fera, & quæ ipsis in servos a Sancto Deo tradita, eorum ordinem alteraverunt, & velut qui mente bruti sunt nimium, colunt animalia, deificare ipsa non erubescences. Hucusque ille. Qualia

vero illa fuerint; alibi modo dictum est, Talia certe fuerunt, ut eorum religio propterea aliis, præsertim Romanis, vilis visa sit & abjecta: Hinc Virgilius l. 8. *Æneid.* ait, fuisse apud eos monstra omnigenum deorum. Fuit quidem subinde cultus deorum etiam *Ægyptiorum* Romæ admixtus, ut *Lucretius* testatur l. 8.

*Nos in templa tuam Romana accepimus
Isin,*

Semideosque canes, & sistra iubentia luctus.

Sed postmodum visa est Romanis tam absurda *Ægyptiorum* superstitio; ut prohibuerint eorum deos delubris suis inferri; ait enim *Tertul.* in suo *Apologetico*, *Serapidem*, & *Isidem*, & *Harpocratem* cum suo *Cynocephalo* prohibitos *Capitolio* inferri; id est, deorum numero pullos; imo, ut testatur *Valerius Maximus*, iussit *Senatus* deorum *Ægyptiorum* fana dirui; & cum *Opificum* nemo auderet ea attingere, ipse *L. Æmilius Paulus* Consul executus est: quod *Joan. Bess.* hoc disticho expressit:

*Impleat ut Paulus Patrum decreta, securi
Proscindit postes Isidis atque viri.*

Videntur tamen hic indicari animalia viliora ab *Ægyptiis*, aliisque coli solita: ut

canes, feles, anguillæ, ichneumones, scarabæi, fues, mures, aranei, & muscæ, qui tamen ab iis deorum loco sunt habiti, & Divino cultu. fuere affecti. Non sine justa mercede: ut quæ credebantur fore media ad salutem, vero Deo sic ordinante, punitionis & vindictæ facta sint instrumenta. Per serpentem seducta peccavit Eva, nec ipsa solum, sed & tota ejus posteritas per eundem vexatur, & ad extremam perniciem quæritur. Vere Rupertus in c. 2. Joannis: *Plerumque ea, in quibus peccamus, sunt flagella peccantium.* Per cultum animalium etiam vilissimorum Ægyptus deliquit, per similia, ut locustas, ranas, ciniphes, & muscas a Deo per Moysen fuit castigata. Ut bene notavit Sapiens: *Immisisti illis multitudinem mutorum animalium in vindictam, ut scirent, quia per quæ peccat quis, per hæc & torquetur.*

S A P I E N T I Æ.

CAP. XII. V. 4.

*Quoniam odibilia opera tibi faciebant
per medicamenta.*

OMnis fere idololatria ab Astrologia,
Philosophia, & Arte Medica suam

traxisse videtur originem: abstrusas enim cognitiones & occultarum rerum notitias hæ scientiæ continent, quibus se dæmon solet immiscere; ut intellectum nimis curiositate seductum etiam ad eorum notitiam alliciat, quæ non nisi ope dæmonis sciri possunt. Plinius l. 30. c. 1. expressis verbis ait: *Artem magicam natam primo e medicina nemo dubitat, ac specie salutari irrepisse velut altiore sanctioreque medicina.* Primum Medicinæ inventorem Apollinem Gentiles credidere tam Græci, quam Latini; sic enim Ovidius de se loquentem proponit:

*Inventum medicina meum est, opifexque
per Orbem*

Dicor, & herbarum subiecta potentia nobis.

Quid? Quod ab ipsis deorum oraculis, hoc est, dæmoniorum responsis, sæpe sæpius petita sunt medicamenta, ut Plinius testatur l. 29. c. 1. Eo certe deventum est in hac scientiæ, ut crederent aliqui ejusdem artificio etiam vivum hominem posse fieri. Julius Camillus homo fide dignus asserit, ab amico suo per allembicum formatum fuisse infantem, qui ad aliquot horarum spatium vixerit. Sed vere vixisse, est incredibile. Ab Æsculapio artis medicæ fama celeberrimo Minois filios ab Atheniensibus occisos, fuisse suscitatos antiquitas credi.

didit, cui Q. Serenus Sammonicus alluisse videtur.

*Tuque potens artis reduces qui tradere
vitas*

Nosti, atque in cælos manes revocare sepultos:

*Qui colis Ægeas, qui Pergama, quique
Epidaurum.*

Et Propertius:

*- Extinctum Cretis Epidaurius herbis
Restituit patriis Androgeona focis.*

Sed ejusmodi opera vere non contigisse, sed ad speciem tantum per illusiones & præstigias dæmonum, nemo Catholicorum est, qui dubitet. Cæterum per medicamenta hic Interpretes intelligunt etiam maleficia & venena, quibus alios homines inficiebant Chananæi & necabant; quæ certe opera erant Deo odibilia. Observandum interim, periculosum esse inordinatum res quasque occultas indagandi & cognoscendi desiderium studiumque; cum talium hominum ingeniis non raro abutantur maligni spiritus, ut evanescant in cogitationibus suis, se præ aliis sapere judicent, dubitent de mysteriis fidei, perperam interpretentur miracula, irrideant simplices, in Deo minus confidant, in hæresin denique aut Atheismum delabantur. Et hic unicus finis est doctrinæ illius, quæ per nimiam

202 *Explicatio Fabularum,*
miam curiositatem adjutore diabolo com-
paratur.

LIB. SAPIENTIÆ

CAP. XII. V. 5.

*Filiorum suorum necatores sine misericor-
dia, & comestores viscerum hominum,
& devoratores sanguinis a medio sacra-
mento.*

DE hac crudeli consuetudine immolan-
di filios ita canit Silius L. 4.

*Mos fuit in populis, quos condidit adve-
na Dido,*

*Pascere cade deos venia ac flagentibus
aris,*

Infandum dictu! parvos imponere natos.
Pescennius Festus apud Lactantium per Sa-
tyram refert L. i. c. 21. Carthagenenses
Saturno humanas hostias solitos immolare.
Et Tertul. advers. Gnosticos; *Scytharum
Dianam, aut Gallorum Mercurium, aut
Afrorum Saturnum, hominum victima pla-
cari apud saculum licuit.* Præsertim cum
per oraculum Delphicum esset indicatum,
nihil posse diis gratius offerri, quam ho-
minem, vel lumen; & sic facta est supersti-
tio paganorum, artificium necandi homi-
nes,

nes, ut videretur sic demon velle delere humanum genus universum. Hinc prodiit mos, usurpatus a parentibus in Africa, immolandi infantes suos. Ita Menech occisus fuit a Creonte patre suo, & misera Iphigenia oblata per Agamemnonem ad placandam iram deæ, Græcis offensæ. Sic Erichthius sub prætextu boni publici in victimam destinavit suam filiam: sic & prisca Druides, Lacedæmonii, Rhodii, Scythæ, Athenienses deos suos sanguinarios colebant, qui non nisi latrociniis & carnificina humana placabantur. Lib. Reg. 4. c. 3. v. 27. refertur, quod Rex Moab in summis angustiis constitutus, extremo usus medio, filium suum proprium, primogenitum & regni sui hæredem immolarit, sperans deos suos insigni adeo & electo holocausto placandos, & tam murum, quam urbem defensuros. Porphyrius tradit, fuisse in more positum apud Reges Phœnicum, ut ad summas redacti angustias rem sibi charissimam, v. g. filium, deo suo immolarent. Testatur idem Eusebius l. 4. de præp. Evang. c. 7. quod eundem ritum placandi deum Carthaginenses de Phœnicibus oriundi observarint.

Non sane verus Deus voluit aut desideravit unquam litari sibi humano sanguine, quamvis sit supremus vitæ mortisque Dominus. Hinc licet Abrahamo immolationem

nem proprii filii imperarit; imperii tamen executionem fieri vetuit; sola parentis obedientia contentus. Econtra volupe fuit dæmoni videre, quod parens non nisi invitus faceret: & Diana dicitur lentis tractibus Iphigeniæ sanguinem sorbuisse; dum Agamemnon averteret caput præ horrore, quem ei natura ingerebat ad tam lamentabile spectaculum.

Jud. c. 11.
7. 40. Potuit historia Jephthæ Ducis filiam suam immolantis occasionem aliquam præbuisse Ethnicis instituendi ritum tam crudelem: quemadmodum mos ille per se indifferens plangendi filiam Jephthæ per annos multos a Judæis continuatus, pro nova idolatria diabolo servivit. Tradit enim Epiphanius Sichemitas & Samaritanos Jephthæ filiam retulisse in dearum numerum, & solenni quotannis sacrificio coluisse. Porro infantium sacrificia ita offerri debebant, ut nisi libenter fuissent immolata, a diis rejicerentur. Et qui offerebantur, & qui offerebant, sive mater filium, aut alius amicum suum charissimum daret in victimam, nec lacrymas fundere, nec ullum aliud tristitiæ signum audebant præferre. Hinc Plutarchus de superstitione ait: Eum, qui filios non habebat, emisse victimas liberorum ea lege, ut adstaret mater sacro rigida & absque gemitu; si enim ingemisset, jacturam faciebat & honoris & filii,
 Imo

Imo parentes ipsi blandiebantur pueris, ne lacrymarentur: *Quos quidem*, ait Tertul. in Apolog. c. 9. *ipsi parentes sic offerebant, & libenter exponebant, & infantibus blandiebantur, ne lacrymantes immolarentur*. Idem confirmat Minutius Felix: Merito ei (Saturno) in nonnullis Africæ partibus a parentibus infantes immolabantur, blanditijs & osculis vagitum comprimantibus, ne flebilis hostia immolaretur. Redarguit jure Seneca crudelitatem Caji in hoc, quod impediret etiam violenter, quominus ii, quos cruciari jubebat, vocem flebilem aut lamentum aliquod possent emittere: *Cui unquam morituro non est relictum, qua gerneret? - Cum spongia non invenirentur, scindi vestimenta miserorum, & in os farciri pannos imperavit: qua ista scivitia est?* Multo major, & in ipsam injuriosior naturam fuit Diaboli immanitas exigentis, ut spectarent parentes fundi sanguinem filiorum suorum, nec dolerent quidem; conscindi viscera, nec suspirarent; comburi flammis, nec lacrymam affunderent. Quis crederet, inveniri posse, qui Tyranno tam truculento adhuc servirent? Et tamen non e Gentibus solum, sed etiam e Judæis, electo Dei populo, fuerunt, qui tam abominandum ei præstarent obsequium; cum tamen sacrificia tam horrenda ne cogitaverit quidem unquam Deus

ab

ab eis habere; ut ipse per Jeremiam testatur cap. 19. v. 5. *Ædificaverunt excelsa Baalim ad comburendos filios suos igni in holocaustum Baalim, quæ non præcepi, nec locutus sum, nec ascenderunt in cornu meum.* Summum, quod potuit bonitas Dei infinita in præsentī materia, fuit, ut tentaret tantum Abraham ad immolandum sibi filium suum: & quantum eidem præstitit pro sola tantum voluntate & obediētia? Nonne in semine ejus omnes sumus benedicti? Ubi econtra Dæmon præter orbitatem filiorum temporalem, maledictionem reddit sempiternam. Verbo, tantum abest, ut Deus noster sanguinem humanum sitiat, aut illorum filios sibi immolari desideret, ut ipse potius Filium suum unigenitum in mortem tradiderit pro salute hominum.

Et comestores viscerum. Possunt hæc verba intelligi, non solum de Epulo humanarum carniū & viscerum in sacrificio; sed etiam in profano convivio. Verba sunt Alexandri ab Alexand. *Essedonum traditur mos, ut parentum funera cantibus prosequantur, mox catibus propinquorum advocatis, quod dictu auditque fœdum est, ipsis cadaveribus immistis ovillis carnibus vescantur.* Id quod ab Indis & Massagetis usurpatum ferunt, quorum propudiosa immanisque natura est: nam lenio confectos

in

*Genial.
dier. l. 3.
c. 2.*

in frustra cadere, illorumque carnibus immistis pecudibus vesci assuevere. Idem apud Derices Persicam gentem cum Hibernis ieffertis hominibus commune fuit; ut parentes & affines, qui succubuerent comesse pietatis maximæque honestatis munus putarent. Tertullianus Tractat. Apologet. ady. Gentes: Ajunt et apud quosdam Gentiles Scytharum defunctum quemque a suis comedi; quasi dignissimus sit aliorum illocutus humanum corpus atque cognatum. Idem Plinius tradit lib. 7. cap. 2. Petronius in Satyr. refert: Apud quasdam Gentes scimus adhuc legem servari, ut a propinquis suis consumantur defuncti, adeo quidem, ut objurgentur agri frequenter, quod carnem suam faciant pejorem. Quis non hic jure exclamet cum Sulmonensi Vate:

*Pro quantum scelus est! in viscere visce-
ra condi;*

*Congestoque avidum pinguescere corpore
corpus.*

Sic scelestam esse calumniantur Calvinistæ Religionem illam, quæ docet, fideles in communione fieri anthropophagos, sed tantum abest, quod propterea turbentur Catholici, ut oporteat inde lucem fidei nostræ illustriorem reddi, & ardorem charitatis vehementius inflammari. Hæc enim calumnia est recantata Ethnicorum contra Christianos fabula: quis enim neget subaudiisse

diisse saltem eos aliquid de cœna Domini, & fidelium communione? Quis Gentilium vel somnare potuisset, in fractione panis carnem Christi a fidelibus manducari? si de hoc mysterio vel a fidei Christiano, vel apostata nihil percepissent? In hoc cum Capharnaitis errarunt, quod Corpus Christi mactari, dividi, & inter fideles more aliarum carniū distribui, similiter sanguinem ejus bibi putarint. Hinc Tertul. Apolog. cap. 7. ait: *Dicimur sceleratissimi de Sacramento infanticidii, & pabulo.* Cæcilius quoque apud Minutium ait de Christianis: *Infans-farris superficie occiditur, infantis sanguinem sitienter lambunt, hujus certatim membra disperitiunt, hac fœderantur hostia.* Et Athenagoras in Apologia pro Christianis: *Trium flagitiorum rumor de nobis spargitur: Impietas, qua deos tollit, Epule Thyestæ, concubitus incesti:* ideo enim credebant fieri communes Agapas, & antelucana Catholicorum in Cryptis conventicula institui. Sed quantum per hanc falsam Gentilium opinionem veritas Catholicæ fidei stabilitur, tantum illa cruentam ejusmodi manducationem damnat, rejicit, execratur, melius a Spiritu S. edocta, verum Christi Corpus totum & integrum modo prorsus admirabili a fidelibus manducari.

Et devoratores sanguinis a medio Sacramento. Moris fuit apud Gentiles aliquos,

sub

dis-

diffuso humano sanguine fœdera jungere ; quod expressit Tertul. in Apolog. cap. 9. *De sanguinis pabulo , & ejusmodi tragicis ferculis legite necubi relatum sit (apud Herodotum opinor) diffusum brachiis sanguinem ex alterutro degustatum nationes quasdam fœderi comparasse.* Lucius Florus de Catilina lib. 4. cap. 1. *Additum est pignus conjurationis sanguis humanus, quem circumlatum patenis bibere ; summum nefas , nisi amplius esset, propter quod biberunt.* Tacitus lib. 12. Annal. ait: Mos est Regibus, quoties in societatem coeunt , amplificare dexteras, pollicesque inter se vincire , nodosque perstringere ; mox ubi sanguis in artus extremos se effuderit, levi ictu cruorem eliciunt, atque invicem lambunt. Id fœdus arcanum habetur, quasi mutuo cruore sacratum. Mela lib. 2. c. 1. de Axiacis refert: Sauciant se , qui paciscuntur , exceptumque sanguinem , ubi permiscuere , degustant. Id putant mansuræ fidei signum certissimum.

Inter cætera nefanda opera , quæ Chananæi commiserant, & hoc erat, quod in contrahendis fœderibus humanum sanguinem biberint , adjuncto sacramento deos suos in testes vocando. Hinc recte Sà interpretatur illud : *A medio sacramento , interposito sacramento ; ut sensus sit : Perdere voluisti filiorum necatores per sacrificia*

210 *Explicatio Fabularum,*
ficia confessorum viscerum hominum, seu
defunctorum patrum, epulones & devo-
ratores sanguinis a medio sacramento,
dum fœdera paciscerentur.

LIB. SAPIENTIÆ

CAP. XIII.

*ut ignem, aut spiritum, aut citatum ae-
rem, aut Gyrum stellarum, aut nimiam
aquam, aut Solem & Lunam
rectores Orbis terrarum
deos putaverunt.*

*L. de na-
tura deo-
rum.*

Ignis duplex est, cœlestis & terrestris;
ille, ut Cicero ait, est corporeus, vi-
talis & salutaris, conservans omnia, alens,
sustentans, & sensu quodam afficiens; hic
noster sublunaris est confector omnium, &
pariter consumptor. Utrumque ignem ob
utilitatem maximam venerati sunt Genti-
les sub Vestæ & Vulcani nomine. Etiam
sub Jovis titulo ignem subinde Veteres
voluerunt significari; quemadmodum pro
aere Junonem intellexere; unde etiam ae-
rem ob viciniam cum igne cœlesti Jovis so-
rorem esse sunt fabulati, & nescio quos
incestus ob commixtionem aeris cum igne
fluxerunt. De divino ignis cultu alibi satis.

Ant

Ant spiritum ; qui totum Universum permeat, & movet, quidquid in eodem agitur . Censuit Plato ; Mundum corpus esse, spiritum vero & animam mundi Deum ; secundum illud Virgilii :

Spiritus intus alit ; totumque infusa per orbem

Mens agitat molem , & magno se corpore miscet .

Potest etiam per spiritum Ventus intelligi ; nec mirum est , eum ab Ethnicis in deorum numerum relatum ; cum plurima illius flatu in hunc mundum proveniant beneficia , quæ apud Senecam invenies lib. 5. Nat. quæst. cap. 18. Apud Giraldum pariter & alios leges , multis & exemplis & testimoniis probatum , Ventos hymnis ; thure , templis , altaribus , simulacris & sacrificiis fuisse cultos . Romanus Sapiens lib. 5. Nat. q. cap. 17. testatur , incolas Galliæ Circio licet ædificia quassanti ; tamen gratias egisse , tanquam salubritatem cæli sui debeant ei ; & Augustum , cum in Galliâ moraretur , templum illi & vovisse & fecisse . Typhonem quoque Gentiles coluere . Terribilem ejus formam lib. 1. Apollodorus describit ; vim vero ventorum sub Typhonis nomine videntur fuisse reveriti ; si non ut prodesset , saltem ne noceret . Sensum ejus historicum , allegoricum , physicumque vide apud Kircherum in Oedip. Ægy-

212 *Explicatio Fabularum;*
Piaçco Syntag. 3. de orig. idolol.

Præsidem Ventorum Æolum finxere :
Notat Plinius, hunc rationem ventorum invenisse ; & cum ex nebulis consurgentibus, vel, ut alii volunt, ex ignis diligenti observatione futuros ventos ac tempestates prædiceret, creditus est ab imperita multitudine eos in potestate sua habere, imperioque suo premere. Ita Servius ex Varronis sententia, & Strabo. Sunt, qui eum volunt Astrologum fuisse, quod nosset tempora, quibus flare venti & possunt & debent ; ideoque ventorum deum existimatum.

Alii ventum interpretantur annum, & 12. ventos 12. ejus filios. Ut autem venti omnes pro diis sunt habiti, ita & singulis, tum iis, qui mundi cardines obtinent, tum inde ortis, (quorum omnium triginta duos statuunt Navarchi communiter) tanquam diis sacra peculiararia fuerunt facta. Exemplum aliquod refert Apollonius Rhodius lib. 4. de Medea, quod ventis maxime odorifera & suavia obtulerit sacrificia :

Tantum effata leves mulcentia pharmaca ventos

Ætheraque insperfit, procul illa e montibus altis

Deduxere feram silvestrem, quo illa cupivit.

Aut aerem citatum. Duplicem Veteres aerem statuerunt, masculum & foeminam.

Ana-

Anaximenes imprimis & Diogenes Apolloniates, ut videre est apud Ciceron. lib. 1. de nat. deor. & Deum esse censuerunt generabilem, immensum, infinitum & semper in motu. Vulgo sub Dianæ nomine cultus est; & Artemis, ut Theodoretus explicat, ἀερόπιμνη, id est aeriseca, quod per aerem pergens eum secet, est vocata. Præcipue tamen Gentiles sub Junonis nomine intellexerunt & coluerunt aerem. Hinc Græci Junonem vocant Ἥραν, & Plato imprimis in Cratylo: Zenon quoque apud Minutium Felicem Junonem aera interpretatur. Quæ vox cum Græca voce ἄηρ magnam habet affinitatem. Macrobius in somn. Scipionis cap. 17. ait: Juno aëria cognominata est, quod ipsa aer putaretur, & aeris arbitra. Fabulati sunt illam Jovis sive ignis (ut supra dictum) sororem esse, & hinc sicut illum cœli regem, ita hanc cœli reginam dixere. Ignis enim & aer sublimiorem mundi partem cum majori virtute in res terrenas agendi possident, quam duo cætera Elementa. Hinc etiam actiones & passionēs, quæ de Jove & Junone finguntur, nihil aliud sunt, quam variae aeris affectiones & operationes, quas vel habet cum æthere supra se, vel cum terra infra se. Exemplo res fiet clarior, quomodo naturas rerum sub fictis nominibus, quasi deos, Gentiles coluerint.

*Colonia
porta
quedam
civitatis
dicitur
Eren-
Port I
olim He-
ra sive Ju-
noni dedi-
cata.*

Juno fingitur fratrem habuisse Jovem, cui nupta fuit: per Junonem aerem intellige, per Jovem igneum ætherem, per nuptias commixtionem caleſcentis ætheris cum aere, Dicitur Juno habere poteſtatem timoris & audentiæ: quia aer multum confert ad humorum temperiem, conſequenter ad paſſiones dictas. Nata eſt Juno in Samo iſula: ibi enim aer eſt ſaluberriſmus. Educata eſt ab Oceano & Thetide: aquæ enim maris rarefactæ aerem pariunt & augent. Ex Jove Vulcanum Juno edidit: quia aer ætheris beneficio calefactus fulgurum & fulminum ignes generat. Vulcanus a Junone ob deformitatem in terram dejectus eſt: quia ignis in ſpiſſis nubibus genitus, & ob antiperiſtaſin agens fortius, conatur quidem ſuſum ferri, & ad purum æthera eluctari; ſed, cum impurus ſit, nec etiam ſufficientem materiam habeat, (ut obſervat Seneca) violenter retroagitur, & Vulcani ad inſtar cruribus fracti in terram dejicitur. Habuit præterea Juno duas proles, Heben, & Martem: quod aer valde calidus cauſet tempeſtates, & bene temperatus ubertatem, quæ etiam non raro litium mater eſt. Fingitur vero Juno Heben genuiſſe, quando fuit in domo Apollinis lactucas comedens. Poſtquam vero Hebe Jovi ad tempus miniſtraſſet, & lapſu coram eo fuiſſet denudata, ab eodem reje-

*I. natuſ.
queſt.*

reje-

rejeſta eſt, & in locum ejus aſſumptus eſt
 Ganymedes. Hoc eſt: aer tunc dicitur u-
 bertatem generare, quando incaleſcit, &
 ſimul frigori permiscetur, ita ut fiat cor-
 ruptio, quam ſequitur generatio. Inde
 naſcitur Hebe præſes floridæ juventutis,
 animalium, plantarum, arborum, &c.
 quæ dum temporum ſuccedentium injuria
 foliis denudantur, perit quali juvenus na-
 turæ & decor, & inſtar Hebis rejicitur.
 Succedit Ganymedes, id eſt hyems; nam
 ipſe in Aquarium converſus eſt, ſub quo
 ſigno hyemis dominium eſt. Simili ratio-
 ne de rebus naturalibus explicari poſſunt
 aliæ fabulæ, v. g. Cereris & Proſerpinæ,
 &c. Sic Arnobius ait lib. 5. circa finem,
 quod per Jovis & Cereris conjunctionem
 irrigatio ſit ſignificata telluris. Et alio lo-
 co ejusdem libri ait: Quod, dum Gentilis
 peritior de adulterio Jovis loquitur, Jo-
 vem pro pluvia, pro tellure Cererem no-
 minat; vel dum inceſtus meminit, nihil
 de frædis voluptatibus loquitur; ſed pro
 imbris nomine ponit Jovem, in filiæ ſigni-
 ficatione ſementem, &c. Jure autem re-
 darguit ibidem Arnobius Gentiles, quod
 res naturales per nomina tam obſcœna, &
 quidem diis eadem attribuendo voluerint
 ſignificari: *Ita non advertitis? Non vide-
 tis? quanta iſtud dicatur & cum ignomi-
 nia fieri, contumeliæque divorum? An in-
 juria*

juria gravior ulla potis est reperiri, quam terram & pluviā, vel quodlibet aliud, (nihil enim refert, quā fiat interpretatione conversio) Jovis & Cereris dicere atque appellare concubitum? & cum deorum criminibus labem imbris e cælo, & telluris significare madorem? Nonne millies optatius fuit, elinguem fieri, atque mutum, atque scauriginem istam vocis & strepitum fæda loquacitatis amittere, quam deorum nominibus res appellare turpissimas? quinimo turpibus deorum factis negotia significare vulgaria? Hucusque ille.

Similiter Gentiles sub nomine Saturni, Osiridis, Asthartes, Vestæ, Isidis, &c. Cælum, Solem, Lunam, Æthera, Aerem, Ignem, Terram, & cæteras creaturas pro diis habuerunt & honorarunt. O quam vere lib. de incarnat. ait S. Athanasius: *Mirum est, quod nihil ex rebus creatis errabat in Numine intelligendo, præter solum hominem; non Sol, non Luna, non cælum, non astra, non aqua, non æther immutant suum ordinem; sed agnoscetes suum Opificem & Principem rationem, Verbum Dei, eo tenore permanent, quo condita sunt: soli autem homines averſi ab illa statione veritatis, iisque, quæ non erant, effectis, Dei honorem ac ejus cognitionem demonibus & hominibus in lapide effigiatis dedicaverunt.*

Aut

Aut Gyrum stellarum. Sive Zodiacum, qui est signifer & circulus obliquus. Inter circulos sphaerae majores alios, coluerunt Aequinoctialem seu Aequatorem, utrumque meridianum, horizontem, qui cum sit maximus, merito Gyri nomine indicatur.

Aut Solem, aut Lunam. De his dictum alibi. Eusebius citans Platonem in Cratyllo lib. 3. de præp. Evangel. cap. 1. ait: *Vetustissimos Græcorum cælum, stellæ, Solem, Lunam, quæ nunc etiam multi Barbarorum colunt, deos putavisse manifestum est.* Quid mirum, ait Lactantius, si aut L. 2. c. 9: *barbari aut imperiti homines errant; cum etiam ipsi Philosophi Stoica disciplina in eadem sint opinione, ut omnia cælestia, quæ moventur, in deorum numero habenda esse censeant?* Sane Gentiles, cum viderent Christianos Orientem versus orare, censebant illos communem secum Deum, Solem scilicet, habere & adorare, ut Tertull. refert in Apolog. c. 16. *Alii plane humanius & verisimilius Solem credunt Deum nostrum.*

Aut nimiam aquam, hoc est, Thetis, vel Neptunum ejus maritum, tridente armatum. Uti Heraclitus censuit omnium rerum principium fuisse ignem, Democritus atomos, Pythagoras numerum, teste Aristotele lib. 1. Phys. Ita Thales aquam
sic

sic dictam, a qua omnia fierent. Ab Ægyptiis aquas fuisse adoratas, testatur Athanasius lib. 2. de incarnat. Verbi, ab Alemannis, Agathius lib. 1. & 2. histor. a Persis, Arnobius lib. 6. contra Gentes, ab hæreticis Ebionæis, Damascenus de hæresibus, ab Ægypto, Veteres passim, quæ tamen videtur non tam coluisse pluvias seu aquas cœli, quas parum curabat, quam illas, quas sinu suo complectitur; quare

Epig. 6. Claudianus de eadem canit:

*Ægyptus sine nube ferax, imbresque serenos
Sola tenet, secura Poli, non indiga venti,
Gaudet aquis, quas ipsa vehit, Niloque
redundat.*

Eiudem vero pro Deo habitum, & etiam sub alio nomine Canopi cultum fuisse, Abenephiius Arabs testatur hisce verbis: *Et adorabant eum veluti Numen, quod præsidet mari, fluminibus, & toti humida natura, & vocaverunt eum nomine fluminis Nilum.* Addit Kircherus noster: Verisimile est, unumquemque Ægyptiorum in domo sua saltem vasculum aliquod habuisse, quo exceptas sacri Nili aquas veneraretur.

Sed unde fluxit, quærit Arnobius lib. 7. contra gentes infra med. vel ex quibus enata est causis opinionum hæc pravitas? Ex eo scilicet maxime, quod nequeunt homines, quidnam sit Deus, scire, quidnam sit vis ejus, natura, substantia, qualitas,

tas, utrumne habeat formam, an nulla sit corporis circumscriptione finitus, agat aliquid, an non agat, &c. hæc omnia, ut dixi, nequeunt scire, neque ratione aliqua pervidere, in eas sunt opiniones lapsi, ut deos ex se fingerent, & qualis sibi natura est, & illistalem darent. Idem fere Lactantius ait lib. 1. de fals. religione, cap. 17. quia non pervident, quid sit in vero, conantur eos deos scilicet cum rerum naturalium ratione conjungere. Juvit errorem hunc mystica Philosopherum Theologia, elegantibus Poetarum fabulis intermixta, de qua sic Eusebius lib. 3. de præp. Evangelica: Generosa Græcorum ac Ægyptiorum Theologia ad sublimiora nos perducere fabularum allegoriis pollicita, ad corpora rursus deduxit, nec aliud quam ignem, & aquam, & partes mundi colere adhortata est. Quomodo igitur Salvatoris nostri Evangelium mirabile non est? quo Solis & Lunæ, totiusque mundi Creatorem decenti fide colere, nec elementa corporum, nec visibilia quædam, sed eum, qui per hæc invisibiliter cognoscitur, creantem intellectum solum admirari, solumque adorare didicimus.

S A P I E N T I Æ

CAP. XIV. V. 23.

*Obscura sacrificia facientes, aut insania
plenas vigilias habentes.*

ALia apud Veteres erant diurna, alia nocturna sacrificia, qualia Nocti offerre consueverant: illam, ut ex hymnis Orphei & Hesiodi licet colligere, deorum antiquissimam, Chaus filiam, ætheris & diei, imo deorum hominumque matrem, & omnium rerum genesin appellabant. Huc referenda obscura illa sacrificia, & clandestina mysteria, quæ in secretis locis, antris, lucis, speluncis & cavernis de die vel de nocte celebrabant, ut major vacandi libidini foret copia & licentia; qualia erant Isidis, Plutonis, Proserpinæ, Ditis, Veneris, Priapi, & quæ Ekulina dicebantur sacra. Item Cottyia Atheniensium sacra, & alia inferorum sacrificia: hujusmodi enim nocturna festa turpissimarum libidinum, amorum, stuprorum, cædium, aliorumque facinorum occasiones & causæ erant; ita ut ipsi Ethnici ea sæpius detectati sint ac sustulerint: nam ut verissime cecinit Poeta:

Nox,

Nox, & amor, vinumque nihil modera-
bile suadent:

Illā pudore vacat, vīna Venusque metu.
Victimæ nocturnorum sacrificiorum nigræ
erant, ut Virgilius tradit:

-----Huc casta Sibylla

Nigrarum pecudum multo te sanguine
fundet.

De Gallo Gallinacio canit Ovid. in Fastis:

Noctē dea noctis cristatus caditur ales,
Quod tepidum vigili provocet ore diem.
Tibullus:

Interea nigras pecudes promittite Dii,
Et nivei lactis pocula mista mero.

Consueverunt autem (ut notat Myrtilus) In secun-
do rerum
Lesbiaca-
rum.
Sacerdotes victimis, quæ inferis mactaban-
tur, humi capita incidere: sic enim subter-
raneis sacrificant. At cælestibus immolan-
tes colla sursum vertentes jugulant. Victi-
mæ quoque horum deorum in effossis fo-
veis jugulabantur; sanguisque vino mixtus
effundebatur in terræ foveas ad id destina-
tas; uti notat cum Ovidio Apollonius.

Quæ interim nefanda fierent scelera in
obscuris illis & secretis conventiculis, cum
obscœna etiam in publico exhiberentur in
honorem deorum spectacula, silere magis
expedit, quam effari. Sic enim suadet
Arnobius lib. 5. Sacrorum innumeri ritus,
atque affixa deformitas singulis corporaliter,
prohibet universa nos exequi. Quinimo, ut

222 *Explicatio Fabularum,*
verum exprimamus, a quibusdam nos ipsi
consilio & ratione desectimus: ne dum expli-
care contendimus cuncta, expositionis ipsius
contaminationibus polluamur.

Videntur hic præterea indicari Bacchanalia, & his similia sacra, quæ nominari solebant congruo nomine, nocturna, later-naria, carnioria, comestipotia, & furiosa; in quibus sacrificantes efficiebantur interdum arreptitii. Quid? quod ipsi Gentiles referant, in festivitate eorum sacrificio-rum, quæ Baccho & Cybeli deorum matri fiebant, deos ipsos congregatos totam noctem lusibus & luxibus vacantes turpiter insaniendo transegisse; ita ut mirum non sit, eos existimasse, gratum diis præstari obsequium ab illis, qui conati fuerint in pari insania eos strenue imitari.

O quam diversa ab his Christianorum sacra! quam casta eorum religio, quam immaculatum sacrificium, quam piæ sobriæ-que vigiliæ! tales in frequenti usu apud primos fuisse Catholicos S. Basilus innuit, regul. interrog. 37. ubi ait: *De tempore autem dimidia noctis, quod id ad orationem necessarium sit, traditum est nobis a Paulo & Sila in Actis.* Hinc Epiphanius in Compend. Psalmos, qui prima noctis hora cantari solebant, lucernales nominat. Alii quoque SS. Patres meminerunt de præcibus lucernariis, ut Clemens, Cassianus, Chry-

Chrysostomus. Ipsi adeo Gentiles, ut Lucianus in Philop. ex Christianorum personis, ad hymnos tota nocte decantandos vigilantes talia somniamus. Ammianus quoque Marcellinus lib. 28. meminit de pernoctatione in Christianorum Ecclesia: quæ utique desiderat, ut fideles omnes Christum imitentur; de quo Lucas ait, cap. 6. *Erat pernoctans in oratione Dei*. S. Augustinus in celebratione Dominicæ in Serm. de tempore 252. ait: *Veniat ergo, cuicumque possibile sit, ad vespertinam & nocturnam celebrationem, & oret ibi in conventu Ecclesiæ pro peccatis suis Deum.* - In die vero nullus se a sacrarum Missarum celebratione separet. Audiant hæc Calvini seu novi Luciani & veteres sectatores; ambo enim tam vigilias Christianorum, quam sacrificia irriserunt; audiant hæc, & erubescant more Gentilium veram Christi Ecclesiam calumniari, execrari Missarum sacrificia, & virginalem statum infra matrimonium abjicere contra sensum omnium SS. Patrum. Puto autem, quod & ipsi Spiritum Dei habuerint cum Apostolo.

Notandum porro, vigilias, quas primis Ecclesiæ temporibus indiscriminatim Christiani observabant, modo abrogatas esse: refrigescente enim successu temporis charitate, visus est alius malignus calor inter vigilias easdem gliscere; ita ut satius visum sit

sit Episcopis, illa per se laudabili consuetudine instituta, sed hominum vitio corrupta Fidelibus interdicere; quemadmodum cum Agapis & osculo pacis factum est. Melius est enim innocenter dormire, quam nocenter vigilare. Hinc Concilium Eliberitanum Can. 35. ait: *Placuit prohiberi, ne fœmina in cœmeteriis pervigilent, eo quod sæpe sub obtentu orationis scelera latenter committant.* Idem vetuit Antisiodorensis cap. 1. & 5.

ECCLESIASTICI

C A P. XXX. V. 18.

Bona apposita in ore clauso, quasi appositiones epularum circumposita sepulchro.

UTi Diis Manibus solebant Veteres mensam instruere ex cibis delicatioribus, quam Hecatis cœnam nominabant, eo quod illa Hecati Triviæ Inferorum Dæ pararetur; ita & defunctorum suorum Manibus consueverant in sepulchris eorum cibum & potum apponere. Erant hæ funebres Epulæ, quæ in Festo & Ovidio dicuntur inferiæ & feralia, a deferendis epulis ad mortuorum sepulchra, vel potius a ferendis

dis pecudibus sic appellata. In Nonio Sili-
cernia, in Plauto Pollincturæ, in Livio
viscerationes, in Cicerone de legibus cir-
cumpotationes, in Tertulliano lib. de test.
animæ obsonia, & Maltæ; & quidem in-
ter obsonia imprimis fabas apponere moris
erat; ut in pervigiliis ciceres; eo quod
dicantur sensus hebetare, & insomnia face-
re. Alii aliam causam assignant. Festus
ait fabas in sacrificiis parentalibus adhibe-
ri solere, Manes placandi gratia, in quarum
flore luctus literæ apparere videntur. Un-
de forsan pallens a Martiali dicitur, &
Manes idcirco sese vulgo dicebantur in fa-
bas abdere. Confirmat idem Plinius lib.
18. cap. 12. Quoniam mortuorum animæ
sunt in ea, (faba scilicet) qua de causa
parentando utique assumitur. Hinc impura
censebatur, nec licebat Diali flamini eam
tangere vel nominare, quod putaretur ad
mortuos pertinere. Lentes etiam & offas
ad sepulchra eorum ferebant, quibus debe-
bantur parentalia. Lucretius lib. 3. refert,
parentantes nigras etiam mactasse pecudes,
quas Manibus divi inferias mittebant.
Censebant enim animas vel esse corporeas,
vel habere corpora omnino tenuia, & æ-
ria, quæ aliquam ex nidore ciborum deli-
cato possent voluptatem percipere, & san-
guine earum pecudum, quæ immolaban-
tur, satiari. Hinc ejusmodi parentationes

*Maltæ
Athenæo
interprete
sunt om-
nia pre-
tiosa edu-
lia.*

*αἷμα san-
guis, κοῖμ
saturus.*

a Bæotiis αἰμακρίαι dictæ sunt; Non enim credebant animas in loca remotiora secedere; sed circa sepulchra versari, & feralibus interesse; ut Ovidius refert cum ritu celebrantis inferias:

*Nunc animæ tenues, & corpora juncta
sepulchris*

Errant, nunc posito pascitur umbra cibo.

*Tum cantata tenet cum plumbo Licia
fusco,*

Et septem nigras versat in ore fabas.

Tomo I. l.

Il. c. 4.

Nobis Christianis solenne est, ait noster Lælius Biscoliæ, festo commemorationis omnium defunctorum die legumina pauperibus cocta distribuere, quæ sunt veteris ritus illius reliquia in pietatem conversi: in mea patria faba dividuntur, Vercellis ciceres, alibi phaseli.

Cæterum quod præter ciborum appositionem Gentiles etiam soliti fuerint, præsertim Bythini, si justa defunctis fierent, nominatim vocare eorum animas, qui extra patriam inopinatam mortem subiissent, & invitare ipsos ter, & rogare, ut redeant, quo participes convivii fiant, refert Arrianus apud Eustat. lib. 9. Ulyss. Quod Virgilius confirmat lib. 3. Æneid. ubi Polydoro honor funebri impenditur:

*Inferimus tepido spumantia cymbia læ-
te,*

Sarr.

*Sanguinis & sacri pateras ; animamque
sepulchro
Condimus ; & magna supremum vocē
ciemus :*

Quibus vero uterentur verbis ; aliisque ritibus ; meminit Epiphanius in Ancorat. ii. 87. *Græci rursus redarguuntur , resurrectionem in totum negantes ; deferentes in monumenta cibos & potus diebus solennibus ; edulia quidem in totum exurunt ; vina vero libant ; nihil commodi mortuis ex hoc afferentes ; imo potius se ipsos ladentes : verumtamen coguntur a consuetudine confiteri mortuorum resurrectionem ; nam ubi posita sunt corpora defunctorum , accedunt & inclamant nomina proferentes mortuorum ; dicentes : Resurge tu ; comede , bibe , & letare .* Tertullianus contra Gentes negantes resurrectionem ita disserit in rem præsentem : *Vulgus irridet ; (mortuorum resurrectionem) existimans ; nihil superesse post mortem , & tamen defunctis parentant ; & quidem impensissimo officio pro moribus eorum , pro temporibus esculentorum ; ut quos negant sentire quidquam ; etiam desiderare præsumant .*

Cæterum credebant Gentiles , per epulas funebres non parum funera mortuorum honestari ; hinc tales ab hæredibus suis splendide adornari subinde curabant . De Atheniensibus tradit Pollux ; Præfectos fune-

rum observare solitos, ne deesset parentale convivium. De Scythis docet Herodotus lib. 4. de Romanis probant multorum exempla, qui testamento jusserant, ut epulum etiam publicum in suo funere præberetur populo. Testantur id sepulchrales lapides, in quibus defunctorum epitaphia leguntur.

Videtur hic mos apponendi ferales epulas a Gentilibus conversis inter ipsos Christianos locum obtinuisse, ut paulo ante innuavi. S. Augustinus serm. 15. de Sanctis morem illum taxans ait: *Miror, cur apud quosdam fideles hodie tam perniciosus error irrepserit, ut super tumulos defunctorum cibos & vina conferant, quasi egressa de corporibus anima carnales cibos requirant.* Eundem morem reprehendit S. Ambrosius de Elia & jejunio c. 17. & S. Cyprianus de duplici martyrio. Præterquam enim quod error esset, credere, animas appositis ferculis quodammodo refici, abusus magni & excessus in iis fiebant, ut S. Augustinus refert de moribus Ecclesiæ cap. 34. *Novi multos esse sepulchrorum adoratores, qui, cum luxuriosissime super mortuos bibant, & epulas cadaveribus exhibeant, super sepultos se sepeliunt.* Hinc idem S. Doctor lib. 6. Confess. cap. 2. ait: *A præclaro quodam Predicatore atque Antistite pietatis preceptum esse, ista non fieri, nec ab eis, qui*
so-

sobrie facerent , ne ulla occasio se ingurgitandi daretur ebriosi , & quia illa quasi parentalia superstitioni Gentilium essent simillima . Nondum omnia Gentilis illius ritus vestigia deleta esse Læ. Bisciola testatur loco citato ; sic enim habet cap. 13. in Navigatione Egnatii ad Sinas ; & in Petri *Egnatii*, Leonis historia de rebus Peruanis legi , millies consuevisse Indos ac Sinas in defunctorum tumulis varia ciborum genera deponere , & pretiosam vestem ac suppellectilem , quod opinentur hæc omnia usui in alia vita ipsis futura ; quam item superstitionem in multis Poloniæ locis & apud Russos scimus vigere .

Quod si consuetudo illa careret vitiosis excessibus , nec cum errore in fide conjuncta esset , tolerabilis videri posset . Hinc S. Paulinus excusat quodammodo suos rusticos in Italia , qui per simplicitatem veterum more Gentilium epulas deferebant ad sepulchrum S. Felicis :

----- *Quia mentibus error*

Insedit rudibus , nec tanta conscia culpa

Simplicitas pietate caret , male credula ,

sanctos

Perfusus halante mero gaudere sepulchris.

Cæterum si ex bono fine instituaturs illa ciborum appositio , ut major fiat amicorum in Domino conjunctio , aut egenorum refectio , vel afflictorum consolatio ,

laudabile & gratum Deo opus fieri censendum est. Hinc bene monet Ecclesiast., cap. 7. *Non desis plorantibus in consolatione, & cum lugentibus ambula. Date ficeram marentibus, & vinum his, qui amaro sunt corde; quos dolor & luctus non finit de cibo & potu sibi providere. Sane Judæis usitatum fuit amicis & pauperibus in sepultura funebre epulum instruere, ut eorum orationibus & sua eleemosyna defunctorum animas juvarent. Hanc intentionem habuerit mater S. Augustini: Cum ad memorias Sanctorum, ut in Africa solebat, pulres, & panem, & merum attulisset, ut de ipsa refert S. Augustinus lib. 6. confess. cap. 2. Hinc idem S. Doctor ait lib. 9. de civit. Dei cap. ult. *Quicumque epulas eo deferunt, quod quidem a Christianis melioribus non fit, & plerisque terrarum nulla talis est consuetudo; tamen quicumque id faciunt, cum apposuerint, orant & auferunt, ut vescantur, vel etiam ex eis indigentibus largiuntur; sanctificari ibi eas volunt per merita Martyrum in nomine Domini Martyrum.* Videtur etiam Tobias, cum filio suo diceret, *Panem tuum & vinum tuum super sepulturam iusti constitue*, eo respexisse, ut hac ratione defunctorum animæ juvarentur: vere enim & pie monet Siracides, cap. 7. *Mortuo ne prohibeas gratiam; ita tamen, ne fiat ritu Gentilium,**

lām, qui superstitiose panem & vinum collocabant super suorum sepulchra : talis enim collocatio & appositio defunctis nullo modo est utilis ; & huic comparat Ecclesiasticus bona illa tam doctrinæ quam virtutis in præsentī textu , quæ in corde tantum latent, nec ad aliorum utilitatem proferuntur . Proin bene ait Cicero pro Archia Poeta : *Pudeat illos, qui ita in studiis se abdiderunt, ut ad vitam communem nulum fructum proferre possint.* Vere Seneca : *Nullius boni sibi solum jucunda possessio est. Nemo accendit lucernam, & ponit eam sub modio,* Lucæ 11. *Sapientia absconsa, & Thesaurus invisus, qua utilitas in utrisque?* Ecclesiast. cap. 20. v. 32. Cor, si non præbeat aliis membris spiritum, cito deficiet. Fons, si aquas non emittat, in se ipso computrescet . *Quare deriventur fontes tui foras.* *Proverb. c. 5.*

ECCELESIASTICI

CAP. XXX. V. 19.

Quid proderit libatio idolo ?

Quemadmodum Gentiles deos suos variis ciborum eduliis quasi esurientes ridicule profecto solebant pascere, ita

P 4 non

non minus absurde sitim eorum levare quodammodo intendebant, & extinguere liquorum quorundam profusionibus, quæ libationes dictæ sunt, ut Lactantius ait l. 6. c. 2. Mactant opimas & pingues hostias deo quasi esurienti; profundunt vina tanquam sitienti, accendunt lumina velut in tenebris agenti. Materia libationum istarum erant vinum, oleum, lac, mel. De vino canit Virgil. *Æneid.* 4.

Georgic.
l. 4.

— — — *Extaque salsos*

Porriciam in fluctus, & vina liquentia fundam.

Ter liquido ardentem perfudit nectare flammam.

De oleo *Æneid.* 6.

Et solida imponit taurorum viscera flammis,

Pingue superque oleum fundens ardentibus extis.

De lacte meminit Statius l. 6. *Thebaid.*
Spumantesque mero patera verguntur & atri

Sanguinis, & rapti gratissima cymbia lactis.

De melle Silius Italicus l. 13. *Punic.*

Corpora lanigerum procumbunt lecta bidentum,

Fundunt mella super, Bacchique & lactis honorem.

Quam stulte vero ejusmodi libationes id-
do-

dolis suis Gentiles præstiterint, l. 7. adp. Gentes describit Arnobius, & irridet: *Monstrate, liquor iste cur detur?* Id est, vinum superfundatur altaribus? Nunquid enim Numinum corpora sitim sentiunt aridam, & eorum necesse est siccitates humore aliquo temperari? - Date quæso immortalibus diis, bibant scyphos, Brias, pateras, sympiniaque depromite; & quoniam tauris, pinguibusque se dapibus atque opimis inferciunt: escis, ne quod in stomachi tramite male transvorum substituerit viscus, succurrite, properate, Jovi optimo maximo merum, ne præfocetur, date. -- Sed frustra, inquit Gentilis, inequitas nobis; non enim nos superis ob eas profundimus merum causas, tamquam illos existimemus aut sitire aut bibere. Honoris ergo eis datur, quo fiat illorum elatior, amplior, angustiorque sublimitas, altaria super ipsa libamus, & venerabiles *Cnissos*, id est, usturam carniū & fumum in sacrificio carbonibus excitamus extinctis. Et quæ gravior infligi contumelia diis potest, quam si eos credas accepto mero propitios fieri, ut honorem existimes his habitum magnum, si modo vini exigui rorem super vividam jeceris atque instillaveris flammam? Hucusque ille.

Omniū libationum loco nobis Christianis ad salutem nostram satis superque est

est ac sufficit unica illa Christi Domini libatio, hoc est, pretiosissimi Sanguinis ejus in ara Crucis profusio, qui sanguis, & aqua, & vinum, & oleum, & lac, & mel nostrum est suavissimum, saluberrimum, & ad salutem nostram quam efficax, tam necessarium; modo ex parte nostra defectus aliquis non fuerit. Hic vero cum plerumque contingat, apud Regium Prophetam jure Christus de frustrato libationis suæ fructu conqueritur: *Qua utilitas in sanguine meo?* Psalmo 29. v. 10.

I S A I Æ

CAP. II. V. 20.

Ut adoraret talpas & vespertiliones.

L Astantius l. 2. de orig. err. c. 1. ait: Cum cetera animales pronis corporibus in humum spectent, quia rationem & sapientiam non acceperunt, nobis autem status rectus, sublimis vultus ab artifice Deo datus sit, apparet istas religiones deorum non esse rationis humane; quia curvant caeleste animal ad veneranda terrena; imo terrenorum peripsemata; ita ut etiam vespertiliones, amphibia teterrima, ad opacas noctis tenebras damnatae volucres, forices, (quos

(quos Victorinus nominat aves semimiores, alii alas talpas) deorum loco habeantur & adorentur. Nonne *signatum est super nos lumen vultus tui Domine*? Et tamen illud adeo hebetat & confundit superstitio, ut talpas, cæcutientes bestias, monstrosa & subterranea quadrupedia Divino honore prosequatur. Quam vere exclamat Lucretius:

O stultas hominum mentes! o pectora caeca!

Qualibus in tenebris vita, quantisque periculis

Degitur hoc ævi, quodcunque est.

Iisdem tenebris Ægyptus maxime videtur fuisse involuta: quam enim abjecta, turpiaque animalia coluerit, quasi Numina, alibi satis dictum est. Ita ut mirum non sit, si talpæ etiam & vesperiliones locum aliquem in deorum numero invenerint. Ab utrisque non multum differt migalis seu mus araneus. Hoc animal ab Ægyptiis cultum fuisse tradit Herodotus l. 2. Præterea sicut alia sacra animalia pro hieroglyphicis servierunt Ægyptiis, ita & credibile est, duo antedicta ab iis illum in finem fuisse usurpata. Gesnerus l. de avibus 3. testatur, Bellonium in magna Ægypti pyramide vidisse matres vesperilionum lactantes suos fœtus admotis uberibus, quod est symbolum fœcunditatis, ut Plinius testa-

statutur l. 10. c. 16. *Sola volucrum lacte nutrit, ubera admovens geminos volitat amplexa infantes, secumque deportat.* Confirmat illud ipsum Horus Apollo in hieroglyphicis Ægyptiorum, scilicet vespertilionem esse imaginem mulieris bene lactantis & nutrientis. Præter Orientales, refert Paulus Gryfaldus l. 3. Historiæ Indicæ, a Gentibus Occidentalibus adoratum fuisse dæmonem sub simulacris efformatis ad imaginem vespertilionis, quem nemo miretur a tenebrarum principe eligi & amari. Idem ait Garcilasus Inca in Commentariis Regiis.

Hinc apparet, quam apte D. Basilii vespertiliones dæmonibus compararit, Comment. in c. 2. Isaïæ, ubi ait: Est vespertilio animal nocturnæ caliginis appetens, versans in tenebris, Solis splendorem non ferens, & in desertis locis perlibenter conversatur. Quid autem dæmones? An non tales? Neque vastitatis opifices, lucem eam averfantur, quæ est vera Lux totius mundi. Idem S. Chrysostom. confirmat: Vespertilionibus similes esse diabolos propter tenebricosam caliginem erroris, & quod a dæmonibus fiant omnia clam, *ut sagittent in obscuro rectos corde.* Idem Sanctus aliam adhuc allegat causam, scilicet, quod imbecillitas dæmonum indicetur. Horus Apollo in symbolis Ægyptiorum c. 49. ait:

ait: Imbecillum hominem, lascivientem tamen, & audacius aliquid molientem cum monstrare voluerint, vespertilionem pingunt: hic enim, etsi alas non habeat, volare tamen conatur. Nota satis dæmonum infirmitas: latrare possunt, non mordere, nisi volentem. Ne brutis quidem nocere vel minimum possunt; & tamen quæ non audent & tentant?

S. Hieronymus ideo ait, idola dictis animalibus fuisse comparata, quod cæca & tenebrosa colantur a cæcis. S. Clemens Alexand. l. contra Gentes de sculptilibus, & eorum cultoribus ait: *Estis plane caci, sicut talpæ, degitis in tenebris, circumfluentes interitum, & corruptione*. Certe ut vespertilioes nunquam magis, quam de die periclitantur, & hinc eo tempore tectorum latebras custodiunt, & ut talpæ de caver-nis terræ exire fugiunt; ita nihil adeo horret superstitio, quam in lucem protrahi, & sceditates suas manifestari.

I S A I Æ

CAP. XIV. V. 22.

*Habitabunt -- Sirenes in delubris
voluptatis.*

SIren nomen suum trahit secundum aliquos a verbo *σῦρω*, latine traho, quod cantus suavitate ad se homines trahat. Alii volunt deduci a *σείρω*, quod idem est ac connecto, aut retineo, vel a Græco nomine *σείρω*, quod catenam significat. Sunt, quibus videtur Sirenum nomen esse Punicum: Pœnis enim Sir cantum significat: hinc Siren monstrum canorum est, quale a Poetis fingitur. Proin credibile est, non fuisse unquam tale in rerum natura, quod superius verus homo fuerit in specie virginis, & in forma piscis inferius. Quanquam non videatur negandum, marinas belluas in tali figura dari posse, & ut historici fide digni referunt, captas fuisse.

Fabulantur interim Poetæ, Sirenes fuisse Acheloi fluminis & Terpsichores filias, quæ tam suaviter canerent, ut homines sui ipsorum oblitos in apertam traherent perniciem. Hinc non male nominat Martialis illas, hilarem navigantium pœnam,
blan-

blandasque mortes, gaudiumque crudele l.
3. Ep. 64. Fabula satis nota est. Hinc
totam enarrare supersedeo. Sensus histo-
ricum breviter nobis explicat Servius in
versum illum Æneid. 5.

*Famque adeo scopulos Sirenum adveſta
ſubibat.*

Ubi ait: Secundum veritatem meretrices
fuerunt, quæ tranſeunt, quoniam ad e-
geſtatem ducebant, fictæ ſunt iis inferre
naufragia. Sensus moralis fabulæ notiſſi-
mus, cum nemo non ſciat, per Sirenes
illecebroſas intelligi voluptates, quæ blan-
dis homines præſtigiis irretiunt, & irreti-
tos in interitum dant præcipites.

I S A I Æ

CAP. XIX. V. 1.

*Ecce Deus aſcendet ſuper nubem levem, &
ingredietur Ægyptum, & commo-
vebuntur ſimulacra ejus.*

Multorum gravium ac ſanctorum vi-
rorum eſt ſententia, ſic, ut quaſi
traditio ſit Maldonati iudicio, in introitu
Chriſti in Ægyptum idola ejus omnia cor-
ruſſe. Confirmat illud Palladius in Lauſia-
cæ c. 52. & Ruſſinus l. 2. c. 7. *Vidimus,*
in-

inquit, in *Thebaide* in finibus *Hermapolis* templum, in quo, ingresso in urbem *Salvatore*, ceciderunt omnia simulacra in faciem super terram. Hanc ruinam jam ante diu præcinnit *Sibylla Ægyptia* ita canens.

Isi Dea infelix! Nili remanebis ad amnem

Sola, furens Mœnas permixta Acherontis arenis,

Fama nec ulla tui toto remanebit in Orbe.

Tuque Serapi sedens in saxis multa dolebis,

Magnaque in Ægypto infelice ruina jacebis.

Quique per Ægyptum studuere tibi, acriter omnes

Te flebunt, sed queis illasa in pectore mens est,

Noscent, te nihil esse, Deum quicumque celebrant.

Imo jam ante adventum Christi suum dæmones præfagierunt exterminium, & instare tempus, quo domus Dei Jacob idolis omnibus esset evacuanda. Certe Dio Philosophus, cujus mentio apud Philostratum in *Tyanæo* l. histor. c. 37. mira quædam refert Romæ contigisse anno ab Urbe condita sexcentesimo nonagesimo, id est annis ante partum Virginis duobus circi-

citer & sexaginta, dicens: In Capitolio multæ statuæ de cælo tactæ, liquefactæque fluxerant, dejectæque tum erant alia simulacra, tum Jovis columnæ insistentis.

Præterea imago Lupæ cum Remo ac Romulo consecrata ceciderat; literæ etiam in columnis, in quibus Leges scribebantur, confusæ atque oblitteratæ erant. - Hæc omnia Gentiles quidem, ut variis ducebantur superstitionibus, ignari divinorum eloquiorum & propheticarum prædictionum alio torquebant; sed appropinquante potius Christi in Orbem adventu idola illa contremuisse, & liquefacta concidisse merito asserunt Christiani: nam & hæc causa est, quare oraculum Apollinis obmutuerit; hanc enim silentii sui rationem dæmon ipse effari coactus est his verbis:

Me puer Hebraus divos Deus ipse gubernans

Cedere sede jubet, tristemque redire sub orbem.

Aris ergo dehinc tacitis abscedite nostris.
Admodulatur huic veritati suavi symphonia Aurelius Prudentius in carmine vel Apotheosi contra Judæos:

Ex quo mortalem præstrinxit Spiritus alium,

Spiritus ille Dei, DEUS & se corpore Matris

Q

In.

243 *Explicatio Fabularum,*

Induit, atque hominem de Virginitate creavit;

Delphica damnatis tacuerunt sortibus antra:

Non tripodas Cortina regit, non spumat anhelus

Fata Sibyllinis fanaticus edita libris.

Perdidit insanos mendax Dodona Vapores;

Mortua jam muta lugent oracula Cumma;

Nec responsa refert Lybicis in Syrtibus Ammon.

I S A I Æ

XXXIV. V. 14.

Occurrent demonia Onocentauris.

CUm ex meliori generis cognitione clarior fiat speciei notitia; Centaurus autem genus esse videatur respectu Onocentauri, Hippocentauri, Minocentauri, iuverit prius scire, an Centaurus dari possit, vel unquam fuerit. Diodorus Siculus l. 4. c. 8. refert, Centauros ex diversa specie animalium, ut Hippocentauros, natos fuisse in Africa; sed reprehenditur a Gal. c. 1. l. de usu part. 3. Si, ut Sapiens inquit,

quit, id putavit fieri posse, sapientiam sibi arrogavit, si vero, ut Poeta, ei condonandum est. Etiam Cicero l. de nat. deorum secundo satis insinuat, opiniones fictas atque vanas de centauris diuturnitate extabuisse. Et Seneca ex Stoicorum sententia refert Epist. 56. *Centauri, Gigantes, & quidquid aliud falsa cogitatione firmatum, habere aliquam imaginem cepit, quamvis non habeat substantiam*. Clare Lucretius:

*Sed neque Centauri fuerunt, nec tempore
in ullo*

*Esse queat duplici natura & tempore
bino*

Ex alienigenis membris compacta potestas.

Sic & Minutius Felix in suo Octavio, Centauros inter fabulosa reponit. S. Augustinus l. de Civit. Dei c. 19. & 13. ait de Centauris: *Ficta fabula sunt, quod eorum hominumque fuerit natura conjuncta*. Et lib. contra Faustum Manichæum c. 1. & 9. fabulosa ejus ridet: inventa sub fabulosi hippocentauri nomine.

Originem fabulæ quidam referunt ad historiam, quod scilicet Rex quidam Thesaliæ jussit, ut homines equis insidentes insequerentur tauros æstro percitos, longis hastis pungerent, (*κυντέω* enim Græce pingo significat) atque ita in urbem co-

gerent. Forte & hinc ortum est de Centauris figmentum; quod rudiores, qui primo insidentes equis homines conspexere, putarint naturam hominis & equi in unum quasi corpus fuisse coagmentatam. De Indis Quitenfibus refert Petrus Leo p. 1. histor. c. 39. eos mirari solitos, cum Hispanos equis vectos intuerentur, existimantes, unum atque idem corpus equos, hominesque esse. Verisimilius est sub Centauri fabula veritatem aliquam physicam aut moralem Veteres intellexisse; ut per Sphingem arcanam sapientiam, per Chimæram hominem variis feris quoad mores non dissimilem; sic per Centaurum, sive corpus, cujus pars anterior hominem referret, posterior equum, prudentiam, quæ docet negotium deliberata prius consultatione suscipiendum, fortiter postmodum & velociter executioni dandum.

Censet interim Empedocles Centauros in rerum natura esse posse & fuisse; uti constat alia subinde monstra dari ex diversis specierum figuris congenita; præsertim in Africa, quæ omni fere anno novum dicitur monstrum parturire. Apud Plinium l. 7. c. 3. scribit Claudius Cælar, Hippocentaurum in Thessalia natum eodem die interiisse. Legitur quoque in Phlegrontis Tralliani l. de mirab. & longævis, in Sauna urbe Arabiæ inventum
hip-

hippocentaurum in monte altissimo, qui mortifero veneno abundabat, quem Rex vivum cepit, & cum donis aliis ad Cæsarem in Ægyptum misit. Vescébatur hic carnibus, sed aeris mutati impatiens mortuus est: facies erat truculentior humana, manus ac digiti pilis tecti, latera ventri & prioribus pedibus contigua, ungulæ equinæ solidæ. Commemorat S. Hieronym. in vita S. Pauli: Magnum Antonium per deserta Ægypti ambulantes conspexisse monstrum ex equo & homine, quod eidem non sine obscuro quodam ac indistincto murmure viam ostenderit.

Hæc si vera sint, negari pariter non potest, Onocentaurum dari posse, aut fuisse. Ælianus l. 19. c. 9. meminit Onocentauræ, quæ homini ore erat similis, pilis circa faciem prolixis, collo ac pectore humano, humeris, brachiis, cubitis, manibus mammisque turgidis instar hominum, cum dorsum, latera, venter, posteriores pedes & color asinina essent. Addit Gesnerus ex Crate, & Pythagora animal illud servitutis adeo esse impatiens, ut præ desiderio libertatis, si captum sit, ab omni cibo absteineat, & inedia se conficiat.

In sensu allegorico non male ait S. Epiphanius hæres. 78. contra Pneumatomachos, eos quasi monstra, ut Centauros, Panes, Sirenes duplicis naturæ & semiper-

sectos ab orthodoxis, & semi-Arianis ortos fuisse. Pariter quis monstrosam dixerit nostrorum hujus temporis Acatholicorum doctrinam ex damnatis veterum hæreticorum dogmatibus compilatam. Docet hæc asseclas suos, quasi Onocentauros, omnia potius sus deque vertere, quam se Ecclesiæ subicere, omnes Christianæ Antiquitatis ritus, traditiones, cæremonias pro obtinenda libertate conscientiæ conculcare.

Sensum tropologicum nobis explicat S. Greg. in c. 6. Job l. 7. Mor. c. 12. Quid vero Onocentaurorum nomine, nisi lubrici signantur & elati? Græco quippe eloquio ὄνος asinus dicitur, & appellatione asini luxuria designatur, Propheta attestante, qui ait: *Ut carnes asinorum, carnes eorum*; tauri autem vocabulo cervix superbiæ demonstratur, Onocentauri ergo sunt, qui subjecti luxuriæ vitiis, inde cervicem erigunt, unde humiliari debuerunt, &c.

Leo Castrius non solum luxuriam per Onocentaurum intelligit, sed ex mente Basilii, Athanasii & Theodoreti quævis vitia & peccata: per illa enim fit homo sicut equus & mulus, quibus non est intellectus, omni bellua & monstro turpior in oculis Dei & abominabilior. S. Hieronymus ait, hic Isaiam vaticinari, habitaturos in jerusalem idololatrias, & variis superstitionibus

nibus servientes, eisdemque Onocentauris, pilosis, lamiisque a Propheta comparari.

Dicet aliquis: Ergo & viri Spiritu Sancto afflati utuntur fictis Gentilium nominibus, & contra Apostoli mentem ad fabulas convertuntur? Credo equidem, qui hæc objicis, ipsum redargues Apostolum; quod ad probandum Areopagitis unum verum Deum, Gentilis Poetæ testimonio usus fuerit; cum tot, tamque clara ex scripturis ipsi suppeterent argumenta. Sed hæc (ut bene advertendum est) minus apud Ethnicos valuissent, quam quæ ex ipsorum libris attulit. Stulte enim ex testimonio S. Scripturæ unicum Deum existere, illis probatur, qui talem negant unquam extitisse. Ex notis & admissis optime urgentur adversarii & vincuntur; hinc temere ab imperitis culpantur, quæ in sacris literis ex rebus Gentilium adducuntur ad veritatem propositam magis explicandam & exprimendam. Quantum in eo desudavit Patrum industria, ut ex ipsorum Ethniconum fabulis, Philosophorum, oraculorum & Sibyllarum testimoniis ostenderent, non indecorum fuisse, Deum nasci, pati, & mori, ut alia fidei nostræ mysteria confirmarent. Hoc est, Goliathum proprio gladio interficere, Ægypti spoliis tabernaculum Dei exornare, ex lignis e luto deorum succis vero Deo lu-

culentius offerre sacrificium. Hac ratione, dum profana sacris serviunt, sacrantur potius profana, quam Divina profanentur.

S. Hieronymus in Amos Proph. c. 6. docet, Interpretes tam septuaginta quam alios subinde Hebræa nomina, quæ apud Hebræos aliter appellantur, vocabulis fabularum Gentilium in nostram linguam transferre; non quod fabulas narrent, aut approbent; sed quoniam Gentiles neophyti, quæ dicebantur, non facile intellecturi erant, nisi per vocabula, quæ usu imbibebant. Ita verisimile est, Idumæos, quibus Isaias minitatur, dum extremam vastitatem aliquam & solitudinem vellent indicare, talem locum expressisse, in quo Onocentauri, Sirenes, Pilosi, Lamixque, & nescio quæ alia monstra vera sive ficta habitarent & quiescerent. Bene igitur Prophetæ nominibus ejusmodi usus est, ut majorem populo terrorem incuteret, & maturiorem pœnitentiam persuaderet.

Observandum denique, ut superstitiosa & fabulosa applicentur apte, raro, & decore. Aptè quidem, ut ad majorem veræ fidei commendationem serviant. Sic corona Idoli Melchom admodum congruenter in regni Israelitici capite resplenduit. Applicant quidem hæretici Sanctorum, imò ipsius Dei statuis & imaginibus, quæ in
Scri-

Scriptura de Idolis Gentium leguntur, sed inepte, fraudulenter & maligne. Quod si in societatem aliquam venire cupias cum Arca Testamenti idolum Dagon; veniat, sed ut fractum jaceat ad limen templi & comminutum; hoc est, sic fiat mentio rerum Gentilium, ut tantum vergat in earum contemptum & ignominiam, quantum cedit in veri Dei Fideique laudem & gloriam. Dein decore; decet enim, quod Dei sacris ex Gentilismo adhibetur, cunctis prius superstitionum sordibus expurgari. Hinc prohibuit Judæis Deus, ne in ullo mel sibi offerretur sacrificio, quia pati non poterat religionis suæ exercitia infandis carnum voluptatibus, quibus Ethnicorum sacra abundabant, contaminari. Nec vacat mysterio, quod Gentilis *Dentron.c.21 v. 12* fœmina Israelitæ veri Dei cultori non posset nubere, nisi rafa prius cæsarie, & circumcisis unguibus. Raro denique, ut gratiam habeant, & ejus, de qua tractatur, materiæ gravitatem non impedian. Non pronò corpore, sed obiter e fronte Ethnicorum bibat orator Christianus, ut canis e Nilo: per modum hospitis tractetur, quod ex Ægypto venit, non concivis. Sic vicissim de sapiente ait Ecclesiasticus c. 39. *Terram alienigenarum gentium pertransiet*, non incolet. In quo ergo loco demorabitur, ut veram addiscat sapientiam?

250 *Explicatio Fabularum,*
tiam? In Sion & in Jerusalem; *Quia de*
Sion exhibita lex, & verbum Domini de
Jerusalem, Isaïæ c. 2. v. 3.

I S A I Æ

CAP. XXXIV. V. 14.

Pilosus clamabit alter ad alterum, ibi
cubavit Lamia, & invenit
sibi requiem.

DE Pilosis dictum est alibi. De Lamia
in præsentī paucis. Fertur esse de-
formis quædam ac crudelis. belluarum spe-
cies, ficta potius quam vera; proin vide-
tur pertinere ad stabulum eorum animal-
um, quorum Virgilius meminit:

Centauri in foribus stabulant, Scyllæque
biformes

Et centumgeminus Briareus, ac bellua
Lerna.

Horrendum stridens, flammisque armata
Chimæra &c.

Sunt, qui cum Aristotele l. 1. histor. a-
nimal. 5. Lamiam esse dicunt ex Cetorum
genere mammosam & admodum voracem.
Præter hanc marinam alia terrestris datur,
ut Gesnerus ait l. de quadrup. fol. 569. de
qua videtur hic Propheta loqui; animal
gran-

grande, ut ait Albertus Magnus, & crudelissimum, in desertis & ruinosis locis habitans, foeminae speciem aliquantum referens. Dion, qui Lybicum scripsit historiam, hac de Lamiis habet: Facies est mulieris, inferiora speciem serpentis exhibent, & quidem horribilis, (in Hebræo enim, Threnorum quarto, pro Lamiæ legitur tannin, id est Draco secundum 70. Chaldaeos, aliosque) alas non habent, sibila acutissima draconum more emittunt; non vi, sed fraude ac dolo expugnant homines, pectora aperiunt, ostendunt ubera, & intuentes veneficiis quibusdam ad se alliciunt, imo cogunt; accedentes rapiunt, occidunt, devorant. Hac ferme de Lamiis Dion. Et hinc nomen suum sortiuntur, non a laniando, ut Isidorus putat, sed ἀπὸ τοῦ ἔχειν μέγαν λαιμόν, quod magnum guttur habeant ad vorandum.

Referunt quidam Lamias ad Striges, Lemures, Empusas, seu potius spectra daemonum & phantasmata. Meminit de eorum aliquo Philostratus in vita Apollonii l. 2. dicens: Apolloniū, & socii cum lucente claque Lupa nocte iter facerent, Lamiæ, Græce Empusæ, Phantasma illis occurrit, modo in hanc, modo in aliam figuram se convertens, quandoque ab oculis repente evanescens. Quæ satis indicant spectrum fuisse daemonis. Solent autem spe-

spectra ejusmodi in solitudinibus & locis desertis errare ac vagari; & in simili loco ait hic Propheta cubuisse Lamiam, & requiem invenisse. Sic Matth. c. 12. dicitur, dæmonem per loca arida ambulare: hæc enim videntur destinata in hoc mundo malignis spiritibus habitacula, & sic congrue dæmonium a Raphaele religatum est in deserto superiori Ægypti. Hinc legitur apud S. Athanasium, Palladium c. 20. Cassian. collat. 7. c. 23. dæmones conquestos esse de S. Antonio, Macario, aliisque eremorum sanctissimis incolis, quod sua homines loca invaderent, & eadem Christi cultu consecrarent.

*Tob. c. 8.
v. 3.*

A Poetis fingitur Lamiam valde speciosam a Jove adamatam, omnes vero ejus liberos a Junone ex zelotypia fuisse interfectos; quare ex nimio mœrore deformata omnes aliorum proles, quas rapere potuit, devoravit. Fundamentum hujus fabulæ fuisse videtur mulier Africana, Lamia nomine, fera ac deformis, ex simili forsan genere prognata, sic enim canit Euripides:

*Quis Africana nesciat Lamia genus,
Infame nomen & tetrum mortalibus?*

In sensu allegorico per Lamiam intelligitur secundum Rabanum duplicitas Judæorum, & fictio hypocritarum. Lamia enim habet faciem humanam, sed corpus bestia.

stiale. Secundum S. Gregorium l. 19. Moral. c. 15. denotantur hæretici: *Qui humanam quidem faciem, sed belluina per impietatem corda gestant: hi mammam nudant, cum errorem libere predicant; catulos lactant, cum male sequaces parvulorum animas ad impietatem nutriendo confirmant. Denique voluptatem, cujus symbolum Lamia est, quasi spectrum evanescere, docet Greg. Nyssenus: Non enim est fruitionis illius & voluptatis, qua momento temporis fit, in hominum natura penu, ut delectationem illam asservare & recondere possint, quam omni ope comparare conantur; sed instar fallacium phantasmatum, cum teneri a voluptatum amatoribus creditur, de repente evanescit, & in nihilum recidit.*

I S A I Æ

CAP. LXV. V. 11.

Qui ponitis Fortuna mensam, & libatis super eam.

Fortunam Deam esse, Gentiles censuerunt. *A fortuitis nomen habere dicunt.* Alii volunt, primo dictum esse *Vortuna* a *Vortendo*. Postmodum fortuna, cujus vis præcipua esset, omnia sus-deque *vertere,*

*Lactan-
sius l. 3.
c. 29.*

tere, & mundi bona, cui vellet, pro li-
bitu dare vel auferre. Græcis videtur i-
dem fuisse fortuna, quod occasio, mascu-
lino nomine *καρπός*: & ideo forsitan *Philo-
sophi*, ne aliquando non errent, in re stul-
ta volunt esse sapientes, qui fortuna sexum
mutant, eamque non deam, sicut vulgus,
sed deum esse dicunt.

In Hebraico pro fortuna ponitur Gad;
id est, felicitas; Gad enim fuit Ethnico-
rum deus, a quo omnem suam in bello
fortunam & victoriam pendere existima-
bant. Hinc Germani veteres bellis & ra-
pinis addicti, deum suum God vocabant;
eumque ut sortis bellicæ ac fortitudinis præ-
sidem colebant. In statu is olim Fortuna
plerumque fuit exhibita in manu habens
Cornucopiæ, felicitatis & abundantiae sym-
bolum; & hæc, *Videns Fortuna* dicta est,
bonis omnibus salutaris, eorumque præ-
miatrix. Verisimile est illam a Judæis Di-
vino cultu fuisse honoratam exemplo Æ-
gyptiorum, quorum dea præcipua Isis e-
rat. Iisdem vero fortunam esse, ex Apu-
lejo licet colligere; sic enim apud illum
lib. 11. Sacerdos Isis eundem Apulejum
sacris hujus deæ initiatum alloquitur: *In
tutelam receptus es Fortuna, sed Videntis,
quæ suæ lucis splendore ceteros etiam deos
illuminat.* In his verbis insinuat, & a-
liunde satis notum est, Isidem Ægyptio-
rum,

tum, Lunam fuisse. Philastrius Brixienſis I. de hæreſib. ait: *Alia eſt hæreſis in Judæis, qui reginam (quam & Fortunam Cæli nuncupant, quam & Caeſtem vocant in Africa) adorabant, eique ſacrificia ſua offerre non dubitabant.*

A variis varie fuit nuncupata: ſcilicet Primigenia, Virginalis, Obſequens, Inconſtans, indignorum fautrix, improba, Publica, Equeſtris, Redux, Barbata, Brevis, &c. *Stultitia, & error, & caci-* *Laſtan-*
tas, ut Cicero ait, ignoratio rerum atque *tius loco*
cauſarum natura ac fortune nomina indu- *citato.*
xit tam varia. Qua autem in veneratione hæc apud omnes fuerit, Plinius nobis refert lib. 2. cap. 7. *Toto quippe mundo & locis omnibus, omnibuſque horis fortuna ſola invocatur, - huic omnia expenſa, huic omnia feruntur accepta.* Orpheus fertur hymnum Fortune cum Thuris Thymiamate concinuiſſe; Pindarus ut deam celebraſſe. Horatius canit illam lib. 1. od. 35. omnibus non venerabilem ſolum eſſe, ſed etiam formidabilem.

Primus Fortune templum dedicaſſe memoratur Ancus Martius ſorore Numæ natus; hic cenſebatur Fortunam feciſſe cognominem fortitudini, cui multum confert ad obtinendam victoriam. Blondus lib. 1. de Roma triumphante ſcribit, apud Nemorenſem lacum fuiſſe templum Fortune.

næ Virilis, & eidem deas virgines immo-
 lasse. Vetustum quoque illius templum fuit
 Præneste, ubi per sortem oracula fiebant.
 Apud Antium Fortuna templum habuit
 famosissimum; multorum etiam Principum
 & Imperatorum donis ornatum; unde e-
 tiam Civitas fortunæ ipsius tutela dicta
 est. Omnium maxime censetur Servius
 Tullus Fortunæ vim Divinam extulisse,
 omnibusque eam inscripsisse actionibus:
 non enim fortunæ duntaxat bonæ spei, A-
 verruncæ, Blandæ, Primigeniæ & Virili
 templa condidit, sed etiam parvæ, quam
 Brevem vocant, - statuæ quoque eidem fue-
 re dedicatæ. Pausanias scribit in Mes-
 sen. Bupalum quendam præstantem tem-
 plorum ædificandorum, & animalium fin-
 gendorum artificem primum Smyrnæis
 Fortunæ statuam fecisse, Polum in capite
 sustententem, altera manu Amaltheæ cor-
 nu gestantem. Clavus eidem tribuitur, vel
 ad significandam illius firmitatem, vel ad
 exprimendam vim & necessitatis poten-
 tiam.

Qua ratione Fortunam Gentiles, &
 eosdem imitantes Judæi coluerint, versu
 præsentis exprimitur: *Qui ponitis fortuna
 mensam, & libatis super eam;* in quæ
 verba sic commentatur Hieronymus: *Est
 in cunctis urbibus, & maxime in Ægypto,
 idololatria vetus consuetudo, ut ultimo die
 anni*

anni ponant mensam refertam varii generis epulis, & poculum musto mixtum, vel prateriti anni vel futuri fertilitatem auspicantes; hoc autem faciebant Israelita, omnium simulacrorum portenta venerantes. Sanctius ait hic, pro mensa Altare posse intelligi, probatque variis Scripturæ locis Altare pro mensa subinde poni, ut sit sensus: Qui ponitis altare fortunæ, in quo statò & solenni ritu pocula aut aliud libationis genus offerretur: sic enim Jovî ac Bonæ Fortunæ in mensis litari solitum docet Athenæus lib. 15. cap. 20. ubi Authores citat antiquos.

Cæterum frequens apud Historicos fit mentio mensarum, quibus Gentiles suis in sacrificiis utebantur. Erant tales diis consecratæ, & in locis sacris religiosisque repositæ, sine quibus nihil conficiebatur. In his mactare, immolare, omnis generis vasa reponere solitum erat. Vide Diog. Laert. in Pherecid. & Polluc. lib. 4. de partibus Theatri. Arnobius lib. 1. *Saccas facitis mensas salinorum appositæ, & simulacris eorum. Mensa*, inquit Festus, *in adibus sacris ararum vicem obtinebant.* Ut proinde Cicero non sine ratione aras, focos & mensas in orat. de Arusp. responsis appellare voluerit: *Deorum*, inquit, *ignes, solennes mensa, abditi & penetrales foci.* Porro mentiam divinis my-

Aeris aptam Festus tradit Ancelabrin fuisse dictam, ab antiquo Plautino verbo ancilare seu antlare, sive id a Græco verbo ἀντλάω, id est, haurio, sive a prisca voce anculare, (quod idem ac ministrare significabat, unde & ancillæ nomen trahunt aliqui) deductum sit. Fuerunt autem diversis diis diversæ mensæ dedicatæ: hinc mensæ Curiales Junoni; mensæ Mythriacæ apud Polluc. Μῦθρæ; Mensæ Aphrodisiæ Veneri; mensæ denique Iliacæ Ildi erant consecratæ; & hæc forsitan communes erant Fortunæ: siquidem Ægyptiorum Isis fortuna fuit, ut supra probatum. Legimus præterea, mensas diis ac deabus sacras diversis figuris ac diversis ex materiis fuisse confectas. Plutarchus enim quadratas, ascarias, rotundas, cibiles, assidelas olim fuisse dictas testatur. Jovi ac Apollini mensæ erant aureæ; Dianæ, Veneri, Junoni argenteæ, reliquæ deorum turbæ marmoreæ; ligneæ denique pedissequis numinibus destinabantur.

Quid in iis mensis fieret, textus noster declarat: *Qui ponitis Fortuna mensam, & libatis super eam.* Seu effunditis vinum aut alium liquorem super mensam vel aram: De libatione alibi actum. Arias Montanus & Delrio censent τὸ super eam ex Hebræo vertendum esse ad numerum. Talem enim in libationibus servatum esse

se non pauci tradunt . Sic Virgil. lib. 4.
Georgicorum.

*Ter liquido ardentem perfudit nectare
Vestam.*

Et Hor. lib. 3. od. 19.

Tribus aut novem

Miscentur cyathis pocula commodis ,

Qui musas amat impares .

Ternos ter cyathos attonitus petet

Vates tres , prohibet supra.

Sic in sacris ad memoriam Annę Perrenę (sic dictę , quod annorum pręses esset) fieri solitis ad numerum bibebant ethnici , sperantes tot annos sibi adjectum iri , quot cyathos in solenni ejus festo ebibissent . De quo Ovidius :

*Sole tamen vinoque calent , annosque pre-
cantur ,*

*Quos sumunt cyathos , ad numerum
que bibunt .*

Sic putat Arias per Gad numerum septenarium denotari , scilicet ternarium per γ , quę est tertia alphabeti Gręci litera , & quaternarium per δ sive delta , & sic pocula Numini & Nomini Gad indicta septena fuissent numerata . Pœna tali modo vel alio Fortunę libantibus versu sequenti exprimitur : *Numerabo vos in gladio* ; quasi diceret Deus : ad numerum libatis , ad numerum pariter in gladio cadetis .

R 2 Quam

Quam varius fuerit omnis cultus ab Ethnicis Fortunę ut deę exhibitus, fuse Lactantius ostendit lib. 3. de fals. relig. cap. 29. Verisimilius putarunt alii Gentiles, nihil aliud esse Fortunam, quam fatum subjectum & ministrum eterne providentię; quę ab Homero describitur per catenam auream, a Jove de cœlo in terram demissam, qua Jupiter omnia comprehendit, constringit, & ad se trahit. Macrobius lib. 5. c. 16. eleganter ostendit, Fortunam unam esse, licet ab effectu diverso duplicem Gentiles finxerint, Videntem & Cęcam, sive prosperam & adversam: nam Jupiter ille duobus, veluti e doliis (ut Homerus finxit) nunc læta, nunc tristia nobis immittit; nec aliud est fortuna, quam rerum omnium vicissitudo, non modo cum doliis, ut dictum est, sed etiam cum lancibus illis aureis comparanda, quibus non Gręcorum tantum ac Trojanorum, sed mortalium omnium fata nunc huc, nunc illuc inclinans Jupiter dispensat, ut in Phœdone narrat Socrates, miscendo malis bona; natumque inde dolorem; hinc voluptatem catena quadam adamantina ita inter se jungit & devincit, ut licet maxime dissideant, tamen nequeant separari.

Ex Christianis nemo est, qui credat Fortunam deam esse; cum fateri debeat cum

cum Sapiente cap. 14. *Tua Pater providentia gubernat omnia ; in regno autem providentię nihil licet casui , nihil temeritati .* Confirmat hæc S. Augustinus quęst. 91. in Genes. ubi ait : *Fortuna intelligenda est pro his rebus , quę fortuito videntur accidere ; non quia numen aliquod sit ; cum hac ipsa , quę fortuita videntur , causis occultis divinitus dentur .* Hinc idem S. Doctor lib. retract. taxat pessimam (ut ipse ait) hominum consuetudinem , qui pro eo , quod dicere deberent , hoc **DEUS** voluit , dicunt : hoc voluit *Fortuna* ; quasi illa mundum regeret , non Dei providentia .

In sensu tropologico , juxta explicationem S. Hieronymi , omnes , qui *Ecclesiam deserunt , & obliviscuntur montem sanctum Dei , & se tradunt spiritibus erroris & doctrinis demoniorum , parant Fortuna mensam , nihil ad Deum pertinere credentes , sed vel stellarum cursu vel varietate fortune omnia gubernari .* Quos Paulus increpat dicens : *Non potestis mensa Domini participare & mensa demoniorum .*

Prodicus philosophus, teste S. Epiphanio, docuit Lunam esse deum. Sic & Manichæi Solem & Lunam adorabant, teste S. August. lib. 14. contra Faustum cap. 11. Etiam Mahomet in Alcorano sanxisse dicitur cultum Cubar, seu Lunæ.

Cæterum quoad presentem versum, conqueritur Deus, quod Judæi in plateis Jerusalem & in civitatibus Juda placentarum oblatione reginæ cæli sacrificent more Gentilium. Et hi quidem varia panum, placentarum & liborum genera, quæ ex frumento, farre, & leguminibus confecta erant & composita, diis suis offerre solebant, quibus eos placarent. Et inde forsitan deductum est nomen placenta, quod deos placaret, nisi a Græco *πλακᾶς* velis derivari, quod diis placeret. Magnam certe cognationem inter se habent duo hæc verba, ut unum ab altero videatur derivatum: quæ enim placent, placant; & quæ placant, placent. Hinc bene ait S. Bernard. epist. 41. *Si non places, non placas*. Porro diis quibusdam proprii panes erant consecrati; de quorum nonnullis meminerunt Pollux lib. 6. & Athenæus. Cujusmodi præ aliis erant Obeliophori in Bacchi celebritatibus; Peloni vero omnibus diis erant communes. In præsentī versu certa placentarum species videtur esse oblata, quæ bos cornuta dicta est, a

cornu similitudine, quale refert Luna accrescens, cui placentas illas præsentabant. Alii Dianæ seu Lunæ ἀμειψόμενες seu placentas, affixis circum circa accensis cereis, in templo Munichia dicto offerebant, teste Polluce lib. 6. cap. 14. Hesychio, & Eustat. Iliad. λ. Lyra putat, formas placentarum rotundas fuisse, additque fuisse morem Gentium, quas Judæi imitabantur, ex filigine aliove farinæ genere deos fingere, & illis vesci, in amoris & observantiæ signum erga illos, vel ut essent iis simillimi. Sic Romani deum Hellepontiacum ex filigine fingeant & edebant, teste Martiali lib. 4. Epig. 69. titul. *Priapus filigineus*. Ita credibile est, stultum Israel in similitudinem Lunæ libæ aut placentas formasse, illasque religionis gratia edisse, aut Lunæ obtulisse; & quidem singulari cum diligentia & fervore, ita ut nullus domi remaneret, dum Reginæ cæli esset sacrificandum. *Filii colligunt ligna, patres succendunt ignem, mulieres conspergunt adipem, &c.* Æmulum laborem & parem zelum describit Ovidius Fastor. 2. dum deo Termino sacrificium pararetur: *Ara fit, huic ignem curia fert rustica testa*
Sumptum de tepidis ipsa colona focis.
Ligna senex minuit, concisaque construit
altæ,

Et

*Et solida ramos figere pugnat humo?
Tunc sicco primas irritat cortice flammæ,
Stat puer, & manibus lata canistra
tenet.*

*Inde ubi ter fruges medios immisit in
ignes,*

Porrigit incisos filia parva favos.

*Vina tenent alii, libantur singula flam-
mis;*

*Spectant, & linguis candida turba
fave.*

Fervor hic Gentilium idolis suis sacrificantium jure confundit damnabilem multorum socordiam in servitio unius & veri Dei. Quoties non conqueritur in Scripturis Deus per Prophetas suos de ingratitude populi sui, quod, cum multo plura illis contulerit beneficia, quam conferre dii gentium potuerint; multo tamen minus sibi, quam idolis serviretur. Modo redarguit inconstantiam illorum, & perfidiam; *Judicio contendam vobiscum, ait Dominus, transite ad insulas Cethim, & videte, & in Cedar mittite, & considerate vehementer, si mutavit gens deos suos; & certe ipsi non sunt dii.* Nonne vides, ait hoc versu ad Jeremiam Deus, quid illi faciunt? Quam commune sit, & alacre domesticorum omnium studium, ut Regi-
næ cæli sua deferant obsequia? Ubi par
zelus est in domo Domini? Aut fervor si-
milis

milis in Synagoga Judæorum? Habent certe Christiani, quod plus timeant, ne ansam de se conquerendi Deo præbeant: tanto enim atrocius erit, quod eos in inferno expectat supplicium, quanto majus fuerit, quod ingratis illis præstitum est beneficium.

Non parum sibi ex præsentī versu applaudunt Hæretici, exprobrantes Catholicis, quod more Gentium colant & adorent Reginam cæli, Mariam scilicet; quod oblationes in nomine ejusdem faciant, quod Collyridianos imitentur, damnatos a SS. Patribus hæreticos; quorum meminit Epiphanius hæres. 79, aitque, solitos illos fuisse collyridia aut placentas quodam anni festo per dies aliquot proponere ac offerre Beatæ Virgini, quasi Deæ, per mulieres, currum, seu sellam quadratam adornantes, linteo desuper extento; quos jure Epiphanius redarguit, confutat ac condemnat; & Catholici omnes cum eodem nemo enim eorum adeo vesanus est, ut Mariam Virginem, deam esse credat, & ut talem veneretur; quemadmodum dicti hæretici faciebant; quanquam SS. Patrum exemplo eam colendam esse censeant & invocandam. *Honoretur sane Maria, S. Epiphanius, Pater vero, Filius, & Spiritus S. adorentur.* Non sentiunt quidem cum Collyridianis nostrates hæretici; tamen (ut de alijs

aliis hereticis B. V. honorem diminuentibus ait idem Epiphanius) in contrariam partem declinantes in noxam ad perniciem inciderunt, ut Gentilium Philosophorum celebre illud dictum in ipsis comprobetur: Extremitates, aequalitates, quales sunt nimio honore & nullo Deiparam afficere.

J E R E M.

CAP. XLVI. V. 16.

A facie gladii Columba.

Censent aliqui, sensum esse metaphoricum, & in columba celeritatem tantum designari, ob velocissimum & constantissimum volatum; metum scilicet incutiendum ob appropinquantem subito & opinione citius hostium exercitum. Idem putat Sanctius, sic discurrens: Si proprium Chaldeorum signum in vexillis fuerit columba, cur Jeremiæ cap. 50. vers. 16. etiam de Persis dicitur: *A facie gladii columbe* cum tamen constet signum militare Persarum fuisse auream Aquilam in oblonga hasta patentibus alis, ut refert Xenophon lib. 7. Cyropædiæ. Sed nihil obstat, quominus signum commune possit esse magis proprium uni nationi; si aliunde

4. 3. 5. 0

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

200000

de per adjunctum, v. g. aliud signum, sufficiens habeatur distinctio. Certe si ratio Sanctii stringeret, nec aurea aquila fuisset militare signum Romanorum; quia Persis fuisset proprium: & tamen imaginem Aquilæ auream hastæ suffixam Romanis legionibus in signum militare fuisse Dion refert lib. 40. & ex eodem Plinius lib. 10. cap. 4.

*Ovid. l. 4.
Metam.*

Hinc alii Interpretum censent, Chaldaeos in vexillis suis habuisse figuram columbæ, in honorem & memoriam Semiramidis generosissimæ viraginis, quæ Babylonem condidisse creditur, vel auxisse, vel muniisse: eo quod a columbis fuerit enutrita, & cum iisdem *extremos altis in turribus egerit annos*, post mortem denique in columbam conversa. Credibile est, Gentiles non parum fiduciæ collocasse in signis deorum suorum, vexillis, clypeis, aut aliis armis impressis, ut victoriam de hostibus reportarent. Valerius Flaccus lib. 6. Argonaut. ait:

*Cuncta Phalanx insigne Jovis, celata
que gestat
Tegmina, dispersos trifidis ardoribus
ignes.*

Plus terroris & cladis intulit Infidelibus insigne S. Crucis: illius enim virtute Maxentium cum suis copiis a Constantino Magno superatum esse, testatur Eusebius. Accinit

cinit eidem Prudentius, victoriæ causam
subjungens:

*Christus purpureum gemmantis textus in
auro*

*Signabat Labarum, clypeorum insignia
Christus*

*Scripserat, ardebat summis Crux addi-
ta cristis.*

B A R U C H

C A P. VI. V. 3.

*Videbitis in Babylonia deos, aureos & ar-
genteos, & lapideos & ligneos.*

A Signatur hoc versu causa idolorum
materialis, & præcipua quidem au-
rum & argentum, secundum illud Psal-
mographi: *Simulacra Gentium argentum
& aurum, opera manuum hominum.*
Quam notus aureus ille deserti vitulus, ab
ingratis perfidisque Judæis ad Apis Ægy-
ptii similitudinem fabricatus? Notissimi
quoque duo illi vituli aurei a Jeroboamo
Rege Israel conflati. Fuerunt autem ido-
la Gentium vel plane aurea & argentea
ex solido auro & argento, vel inargenta-
ta aut deaurata. Alia erant elaborata ex
lapide, & quidem aliqua ex atro lapillo,
quo

quo significabant Deum ab oculorum acie penitus remotum esse. Refert Pausanias in descriptione Achajæ, in quadam ejus regione extitisse triginta quadratos lapides deorum nominibus inscriptos, quibus, mos Græcis erat, parem cultum atque deorum simulacris exhibere. Meminerunt quoque simulacrorum marmoreorum scriptores veteres. Cicero pro domo sua: *Ejus simulacrum e marmore in sepulcro positum fuit*. Et in sexta contra Verrem ait: Chrysam amnem ab Assorinis deum esse habitum, & in fano ejus fuisse simulacrum præclare factum ex marmore. Vide Plinium lib. hist. nat. 36. cap. 5.

Vetustissima & communis passim idolorum materia fuit lignum. Pausanias enim scribit, primis temporibus lignea apud Græcos in usu fuisse simulacra. Sic lignei signi admodum vetusti meminit Cicero orat. 6. contra Verrem, quod erat Bonæ Fortunæ. Notum satis est ex historiis, Veterum Gallorum Sophos ac Sacerdotes divinis honoribus quercuum robora affecisse; & ideo forsitan Druidæ dicti sunt a *druis*, hoc est quercubus, ut vult Sulpitius, addens verba hæc, lib. 16. capite postremo: *Nihil habent Druidæ visco & arbore, in qua gignantur, si modo sit robur, sacratius*. In sacrificiis epulisque rite sub arbore præparatis duos admovent candidi colo-

druis
quercus.

coloris tauros, quorum cornua tunc primum vinciantur; sacerdos candida veste cultus arborem scandit, falce aurea demetit, candido id excipitur sago, dein victimas immolant, precantes, ut suum donum deus prosperum faciat his, quibus dederit. Etiam humano sanguine arboribus litatum fuisse Lucanus meminit lib. Pharf. 3.

- - - Sed barbara ritum

*Sacra Deum, structæ diris altaribus ara,
Omnis & humanis lustrata cruoribus arbor.*

Max. Tyr. serm. 38. affirmat, Celtas excellentiam Quercum coluisse, & Jovis nomine solenniter appellasse. Videtur, aliquot sæculis post Christum natum ritus aliquis colendæ arboris fuisse reliquus; id quod colligere licet ex lege lata Luitprandi Longobardorum Regis: *Qui ad arborem, quam rustici Sanctivam vocant, adoraverit, vel incantationes fecerit, componat medietatem pretii sui in sacro palatio.* Nihil hic mentionis faciam de quercu Dodonæ celeberrima, quæ semen fuit infinitarum superstitionum. Testatur præterea Phalarchus, antiquissima tam apud Græcos, quam Romanos simulacra fuisse lignea; hinc simulacrum ligneum delubrum fuit dictum; nam, ut Festus inquit, delubrum dicebant fulstem delibratum, id est, decorticatum, quem

*Vide Læ-
lium Bi-
sciolam s.
2. l. 17. c.*

272 *Explicatio Fabularum,*
quem pro deo venerabantur. Ridicule
Horatius Priapum de se ita loquentem in-
troducitur :

*Olim truncus eram ficulnus , inutile li-
gnum ,*

*Cum faber , incertus , scamnum , face-
retne Priapum ,*

Maluit , esse Deum ; Deus inde ego .

Propertius Vertumnum proponit ita lo-
quentem de simulacro suo :

*Stipes acernus eram properanti falce do-
latus ,*

*Ante Numam grata pauper in Urbe
deus .*

Tibullus deos Penates lib. 1. eleg. 10. sic
alloquitur :

*Nen pudeat prisco vos esse e stipite factos ,
Sic veteris sedes incoluistis avi .*

*Tunc melius coluere fidem , cum paupere
cultu*

Stabat in exigua ligneus ade deus .

Ita primis Ecclesiæ Catholicæ tempori-
bus melior erat ejusdem status , quando
erant lignei calices , & aurei Sacerdotes ,
quam postmodum ; dum refrigescente mul-
torum charitate , aurei quidem sunt calices ,
sed lignei non raro sacerdotes .

Notandum hic est , singulis diis non li-
gna quævis obvia , sed certa quædam fuisse
destinata . Pausanias scribit advertisse se ,
has plerumque arbores ad idolorum fa-
bri-

bricam selectas fuisse: Buxum, Ebenum, Cupressum, Cedrum, Quercum, & Smilacem. Isaias meminit cap. 44. Cedri, Illicis, & Quercus, e quibus simulacra deorum conficiebantur. Priapus, ut supra dictum, ex ficulno fiebat, Hercules ex populo, Venus ex myrto, ex quercu Jupiter, Minerva ex Olea, Mercurius ex Buxo, præcipue tamen ex Thya, quam Trogem Homerus appellavit.

Arbor non facile putredini obnoxia.

Arnobius lib. 6. contra Gentes non sine confusione Gentilium & irrisione de materia idolorum ita discurret: „ Simulacra ista, quæ vos terrent, quæque templis in omnibus prostrati atque humiles adoratis, ossa, lapides, æra sunt, argentum, aurum, testa, lignum sumptum ex arbore, aut commixtum glutinum gypso, ex ornatibus fortasse meretricis, aut ex muliebri mundo, camelinis ex ossibus, aut ex Indici animalis dente, ex cacabulis, ollulis, ex candelabris & lucernis, aut ex aliis obscenioribus vasculis congesta, conflata, in has species ducta sunt, atque in formas, quas æternitatis, exierunt. Fornacibus incocta figulinis, ex incudibus & malleis nata, grossis rasa, discobinata limis, ferris, forficibus, aculeis, ascis secta, dolata, effossa terebrarum excavata vertigine, &c. *Ita iste.* Non error est? Non

S

„ (ne

95 (*ut proprie dicatur*) amentia Deum
 „ credere , quem tu ipse formaris ? Sup-
 „ plicare tremebundum fabricatæ abs te
 „ rei ? Et cum scias & certus sis , tui es-
 „ se operis & digitorum artem , pronum
 „ in faciem ruere , opem rogare supplici-
 „ ter , adversisque in rebus , atque in tem-
 „ poribus asperis propitii Numinis favo-
 „ re succurrere ? *Arnobius.*

B A R U C H

C A P. VI. V. 3.

*Videbitis deos in humeris portari, ostentan-
 tes metum Gentibus.*

ARnobius lib. 6. adv. Gentiles prope
 finem ostendit, quam miseri & fu-
 tiles Gentium dii nullo modo fuerint ti-
 mendî : „ Præter innumeras, inquit, cri-
 „ minum & facinorum formas, ipsa etiam
 „ videamus templa sacrilegis violationibus
 „ appeti a tyrannis, a Regibus, a latro-
 „ nibus, & nocturnis a furibus, ipsosque
 „ illos deos, quos ad metus faciendos ve-
 „ tus finxit & consecravît antiquitas, va-
 „ dere in antra prædonum, cum ipsis au-
 „ reis metuendisqûe fulgoribus: quid eni-
 „ „ signa ista, quæ dicunt, habent in se
 „ „ ma-

magnum? Ut merito sperarit atque exi-
stimarit antiquitas, posse frangi homi-
num vitia, & mores & maleficia tem-
perari? Falx messoria scilicet, quæ at-
tributa est Saturno, metum fuerat inje-
ctura mortalibus, vitam vellent ut pa-
cificam degere, ac malitiosas abjicere
voluntates? Fronte Janus ancipiti, aut
dentata illa, qua insignitus est, clavis;
riciniatus Jupiter atque barbatus, dex-
tera fomitem sustinens perdolatum in
fulminis morem; Mercurius pinnatus
Argiphontes, Æsculapius baculo; Mul-
ciber fabrili cum habitu; Anubis cani-
na cum facie? O species formidinum
diræ, metuendique terrores! propter
quas genus hominum torpedine in per-
petua affligeretur, ab omni se actu sce-
leroso flagitiosoque frænaret. Falciculæ,
claves, caliandria, fomites, talaria,
baculi, tympaniola, forcipes, &c. non-
ne satius fuerat saltitare, cantare, quam
sub titulo gravitatis & securitatis obten-
tu tam frigida atque inepta narrare si-
mulacra, ab antiquis ad cohibenda pec-
cata, & ad nocentium formata; impio-
rumque formidines? Illas verò omni-
no vanas fuisse ulterius probat Arnobius,
plus scilicet leges hominum ad coercen-
dam malitiam valuisse, quibus debent &
ipsa simulacra, quod incolumia adhuc per-

276 *Explicatio Fabularum*;
stant, & honoris alicujus concessione muni-
ta.

Lucæ 12.
v. 9. *Ostendam autem vobis, quem timeatis,*
ait Christus, *timete eum, qui postquam oc-*
ciderit, habet potestatem mittere in gehem-
nam. De eodem vere ait Regius Prophe-
ta: Magnus Dominus & laudabilis nimis,
Psal. 95. terribilis est super omnes deos.

B A R U C H

C A P. VI. V. 9.

Coronas aureas habent super capita sua.

ANtiquitus, teste Plinio lib. 16. nulla
corona nisi Deo dabatur: imo ipsum
donum diis destinatum non erat sine coro-
na: nam ut Athenæus ait lib. 25. *Sacrifi-*
cantes id, quod diis offerebant, coronabant.
Lactantius lib. 2. ait: *Postquam metus de-*
sevit, & pericula recesserunt, tum vero
alacres ad deorum templa confugiunt, his
libant, his sacrificant, hos coronant. Cice-
ro ad Atticum lib. 15. ep. 12. *Quod me*
de Bacchi, de statuarum coronis certiore
fecisti, valde gratum. In celeberrimis in-
clytorum Regum pompis, quas Athenæus
lib. 5. descripsit, multæ Numinum effigies
ferebantur, sed omnes coronatæ. Euripi-
des

des Heracl. act. 1. ait : *Quo vertamur ? Quis enim incoronatus Deus ?* Hinc illa Apulejana querela : *Ceremonia negliguntur, incoronata simulacra.* lib. 2. Metam.

Non capita solum idolorum , sed etiam aliæ subinde partes coronis honorabantur . Salii ad deorum statuas jacere coronas erant soliti . Interdum ad pedes earum ponebantur secundum Poetam :

Ut caput in magnis , ubi non est tangere signis ,

Ponitur hic imos ante corona pedes .

De corona Baccho offerri solita vide Augustin. lib. de civit. Dei 4. cap. 10.

Varia erat coronarum materia . Aliquæ ex frondibus fiebant , aliæ ex floribus , ex auro aliæ & argento . Pausanias meminit in Eliacis , Jovem ex auro & ebore factum , & olea coronatum in æde sua sedere . Nota est ex lib. 1. Paralip. cap. 20. aurea idoli Melchom corona , quam David de capite ejus tulit , & invenit in ea auri pondo , talentum , & pretiosissimas gemmas , v. 2.

Causa vero coronandi idola sua , Gentibus duplex videtur fuisse . Prima , quod corona symbolum sit summæ authoritatis & potentiæ , quam inesse diis suis credebant . Altera est , ut significarent , non quid mutilum , sed integra & perfecta diis offerenda esse : & hanc suggerit Aristote-

278 *Explicatio Fabularum;*
les lib. sympos. idem enim est rem perficere, ac eidem coronam imponere.

Tali modo optandum esset, ut Fideles Christiani verum DEUM semper quærent coronare: uti enim *DEI perfecta sunt opera*, sic vicissim quæ eidem offeruntur, omnino perfecta esse deberent, *exquisita in omnes voluntates ejus*: secundum illud Christi Salvatoris monitum: *Esote perfecti, sicut & Pater vester celestis perfectus est.*

B A R U C H

C A P. VI. V. 10.

Dant ex eo prostitutis, & meretrices ornant, & iterum cum receperint illud a meretricibus, ornant deos suos.

SI ullus unquam, tunc certe hic circulus est vitiosus, dare meretricibus oblatum diis aurum, & illud ipsum ab iisdem iterato diis offerri. Nec mirum ejusmodi circulis scatere religiones Gentium, cum illarum principia sint vitiorum documenta. Quid propudiosius, quam virgines & matronas stupris & adulteriis deorum cultum promovere? Testatur Herodotus, *Babylonicas & Cyprias Virgines ante mat-*
tri-

trimonium solitas esse semel in vita cum altero habere negotium, oblato tamen prius pretio, quod illæ templo Veneris dedicabant; sperantes se utpote Veneri jam dicatas felices nuptias habituras. Confirmat idem Hipponensis Præsul lib. 4. de Civit. Dei cap. 10. *Veneri Phœnices donum dabant de prostitutione filiarum, antequam eas jungerent viris.* Idem asseruit Athanasius in orat. contra idola, ubi idolatriæ originem investigans eam institutam esse ait, *Desiderio eorum, qui stupris & propudiis pleni figmentis representantur;* Itaque sibi turpissimam deorum suorum vitam idolorum cultores imitandam proposuisse. Notissimum e Veterum monumentis, Veneri multis in locis sacras fuisse meretrices, de quibus dictum alibi. Vide Lactant. lib. 1. de falsa relig. cap. 17. proin nemo miretur, quod Strabo lib. 11. de sacris Persarum & Armeniorum in fine scribit de Anatide: *Hæc est Venus in Oriente culta, Armeniorum idolum: illustrissimi ejus nationis filias suas virgines ei dedicant; ac lex est, ut longo tempore apud deam constuprata, deinde nuptum dentur, neminis talis mulieris conjugium dedignante.* Cum vero tres fuerint Veneres, locundum aliquos, & etiam S. Augustinum, cui addunt alii quartam *Παρθένον* seu largitricem opum; huic ultimæ imprimis sup-

280 *Explicatio Fabularum*;
plicabant meretriculæ, ut plus ditescerent.
Vide, quæ dicta sunt Deuteron. cap. 23.
vers. 17.

B A R U C H

CAP. VI. V. 42.

*Mulieres autem circumdata funibus in viis
sedent, succendentes ossa olivarum.*

PER funes illos intelligunt nonnulli ferta
de juncis & floribus contexta, quibus
mulieres istæ cingebant capita sua, teste
Herodoto & Strabone, qui ait, eas Tho-
minge, seu vinculo aut funiculo coronatas
fuisse. Idem satis insinuat Ovidius lib. 4.
Fastor. de mulierculis Veneri sacris, ita
canens:

*Cumque suo Domina data grata Sisy-
mbria myrto,*

Textaque composita juncea vincla rosa.

Melius tamen per funes videtur intelli-
gi cingulum, quo corpus suum vinciebant,
denotando se virgines esse, sed captas re-
ligione & amore Veneris; & hinc a quovis
obvio petebant illud solvi, ut quod debe-
bant, Veneri citius possent persolvere. I-
dem conjugatæ faciebant se deæ isti di-
caturæ. Quia vero has inter mulieres
quædam

quædam erant valde deformes , ait Herodotus , eas subinde in diverticulis prope templum Veneris ad duos aut tres annos confedisse , & procos in tentoriis suis expectasse . Unde mirum non est , contigisse ea , quæ in hoc Capite v. 45. referuntur , alteram scilicet , quæ cum transeunte aliquo convenerat , exprobrasse alteri , quod non digna sit habita , sicut ipsa , neque funis ejus disruptus sit .

Videntur autem mulieres tam diu relictæ , & funibus circumdatæ ad arcana sua , id est amatoriâ sacrificia confugisse , ut prætereuntium amorem sibi conciliarent ; atque ita citius statione sua liberarentur . Sic legitur Dido apud Virgil. sacra diis inferis magica factura :

Unum exuta pedem vinculis in veste re-
cinctâ .

Quia , ut notat Servius , id agitur , ut ista solvatur , & Æneas innectatur . Addit Herodotus , mulieres tales fuisse nodis corollisque tempora revinctas . Nodos vero & Serta in veneficiis usurpata esse constat ex lib. 4. Æneid. ubi de Elisa sacrum factura magicum dicitur :

Intenditque locum fertis , & fronde coronat
Funerea .

Quo instrumento usæ fuerint mulieres , de quibus hic fit mentio , ad conficiendum veneficium suum , ex verbis patet sequentibus :

tibus: *Succedentes ossa olivarum*, id est, nucleos duos, & quasi osseos olivarum. In Græco *πιτορα*, Beroaldus apud Henricum Stephan. in Lexico *πιτοριον* vocat ossiculum olivæ. Contritæ olivæ *πιτορα* dicuntur, quod furfurum colorem referant, vel quod in olivis contritis sint quasi furfures & excrementa. Sed cur diabolares istæ, quæ & genus, & forma & opes destituebant, pro philtro seu magico suo veneficio usæ sunt ossibus olivæ? Constat, ab aliis ceram, fila, rhombos, herbas, & præter sacra res abominabiles & infandas a matorio maleficio fuisse adhibitæ.

Propertius l. 3.

*Illum turgentis rana portenta rubeta,
Et lecta e sectis anguibus ossa trahunt.*

Romani, Virgilio teste, laurum pro oliva urebant quasi amasio supplicantes. Sed magis oliva symbolum est supplicationis, spei, & precum. Hinc Virgil. *Æneid.* 8. ait:

Velati ramis olea, veniamque rogantes.

Et Statius 12. *Theb.*

Vittata & laurus, & supplicis arbor oliva.

Cremabant autem ossa sive nucleos olivæ, ut flammam concupiscentiæ suæ testarentur, procorumque duritiem mollirent ac incantarent, eos ad se ocyus alliciendo; ne diutius residere opus foret. Simul etiam in crematione ossium supplicabant, ut hospites pariter amore earum æstuarè inciperent, & quodammodo torrerentur.

De

Demum ubi ossa erant adusta, trans caput
jacta in ventum spargebantur.

Ex his patet extrema libidinis mali-
tia, ut pro implendis suis desideriis abju-
rato Deo ipsius dæmonis petat & exquirat
auxilium. Vere Lactantius: *Ex luxuria*
ut vitia omnia, sic impietas adversus Deum
nascitur, lib. 2. cap. 1. Porro philtum
quam sit res diabolica, mentibus corpori-
busque ut plurimum valde noxia, & quibus
remediis adversus illud uti conveniat, tra-
dit noster Delrio disquisition. magicarum
lib. 3. part. 1. quæst. 3. per 3. sectiones.

B A R U C H

CAP. VI. V. 31

Rugiant autem cla-
sces sicut in

Exemplum

8.

ha-

pro diis habuere, homines fuisse, præclare & satis fusc Lactantius ostendit lib. 1. de falsa relig. per aliquot capita. Pro se cap. 15. allegat Ciceronem, qui in eo libro, quo se de morte filiae consolatus est, *Non dubitavit dicere, deos, qui publice colerentur, homines fuisse; quod ipsius testimonium eo debet gravissimum judicari, quod & augurale habuit Sacerdotium, & eosdem se colere venerarique testatur.* Hinc & putabant Ethnici, deos instar hominum ex uno loco migrare in alium. Gigantum Jovi rebellantium tempore deos in Ægyptum migrasse, ibidemque latuisse, Lucianus testatur lib. de sacrificiis. Præterea manducare eos censebant, bibere, vesci nectare & ambrosia. Unde Homerus Iliad. 2. inducit Jovem apud Ægyptios & Æthiopes epulantem cum aliis diis. Et sic facile potuisset contingere, ut ad preces hominum minus attenderent.

Creteases simulacrum Jovis feruntur formasse sine oculis & auribus; Spartani vero quaternas aures affixisse Jovi & Apollini. Sed quamvis centum addidissent, vera manet Psalmistæ sententia: *Aures habent, & non audient.* Modus clamoris additur: *Sicut in cæna mortui.* Mos imprimis habuit apud Ethnicos, ut ii, qui morientibus vel defunctis adessent, clamorem excitarent: Hinc Ovidius timens, ne sic,

ut

ut in patria fieri solebat, moreretur, aje-
bat lib. 3. Trist. eleg. 3.

*Nec mandata dabo, nec cum clamore su-
premo*

Labentes oculos claudet amica manus.

Causa clamoris erat, vel ut retardarent
exeuntes animas, ut apud Propertium lib.

4. Cynthia putabat, cum diceret:

*At mihi non oculos quisquam inclama-
vit euntes;*

Unum impetrassem, te revocante, diem.

Vel in corpore animas adhuc delitescentes
expergefacerent; ut vult Servius ad lib. 6.
Æneid. Plinius in naturali Historia dicit:
*Hanc esse causam, ut mortui & calida
abluantur, & per intervalla conclamentur,
quod solet plerumque vitalis spiritus exclusus
putari, & homines fallere. Denique refert
quendam suppositum pyra adhibitis ignibus
erectum esse, nec potuisse liberari; unde &
servabantur cadavera octo diebus, & cali-
da abluantur, & post ultimam conclama-
tionem comburebantur. Ne igitur semivivi
adhuc, & in quibus vitæ adhuc aliquid de-
litesceret, pro mortuis sepulturæ traderen-
tur, consuetudinem hanc ciendi clamorem
introducere. Hinc dicti sunt conclamati,
in quibus nulla spes vitæ superesset. Inde
quoque ortum videtur proverbium, ut in
re qualibet prorsus perdita dicatur: *Con-
clamatum est*. Imo & moris erat, ipsos
jam*

jam mortuos in cœna clamore prosequi ,
 & eorum nomina invocare . Nam Arrianus
 ita referente Eustatio lib. Ulyss. 9. cum
 iusta defunctis apud Bithynos fiunt , nomi-
 natim vocari narrat eorum animas , qui
 extra fines casu mortui sunt , & invitari
 ipsos ter , & rogari , ut redeant ; quo par-
 ticipes convivii fiant . Confirmat idem E-
 piphanius in Anchor. Ad sepulchrum
 ferentes cibum insolenti clamore evoca-
 bant defunctos , dicendo v. g. Resurge o
 Hector , comede & bibe ; aut aiebant : Va-
 le . Sic Achillem in funere Patrocli fecisse
 ait Homerus Iliad. 18. Idem de Ænea in
 funere Pallantis Virgilius testatur Æneid.
 lib. 11.

Mithis ferendum est , Gentiles ejulatu
 lamentabili in suorum funeribus concla-
 malle ; hæc soli infideles solent vivendi spem
In orat. de dormient. in fine. quasi termino certo circumscribere ; ac idcir-
 co mortem pro calamitate ducunt : quoniam
 id , quod nobis persuasum est , non sperant :
 Gregorius Nyssenus . Christianos autem ita
Epist. 1. ad Thessal. c. 4. v. 13. instruit Apostolus : Nolumus vos ignorare
 fratres de dormientibus , ut non contriste-
 mini , sicut & ceteri , (Gentiles scilicet)
 qui spem non habent . Vel si clamare pro
 defunctis lubeat , magis affectus fiat quam
 voce . Bene enim observat & monet paulo
Lib. de vi- sa Moysis. ante adductus Gregorius : Sonoram vocem
 esse , & usque ad divinas aures magnitudi-
 ne

ne sua pervenire ; qua non intentione clamoris , sed puritate cordis sua meditatione concipitur .

B A R U C H

CAP. VI. V. 36.

*Hominem cecum ad visum non restitunt,
de necessitate hominem non liberabunt .*

ARnobius lib. 2. advers. Gentiles ob-
jicit Ethnicis , quam fuerint dii il-
lorum cum idololatriis infirmi , nec un-
quam virtutes tam mirabiles operati sint ,
quemadmodum Christus ; & cultores Chri-
sti ; eæque causa fuerint tantæ passim de-
fectionis a superstitione , & conversionis
ad Catholicam fidem . *Quisquamne* , in-
quit , *illorum aliquando verbo uno potuit*
aut unius imperii jussione , non dicam *maris*
insanias aut tempestatum favores compesce-
re ? non cæcis restituere lûmina , aut sine
luminibus natis dare ? non ad vitam revocare
defunctos ; sed quod levissimum multo
est , *furunculûm ; scabiem ; aut inhaerentem*
spinulam collo una interdictione sanare ? E
contra quot & quanta in Christi Ecclesia
facta sunt singulis sæculis , & adhuc sunt
hodie dum miracula , sigilla quædam , & Di-
vina

vina veræ religionis testimonia? A quibus non malis, Sanctorum patrociniis, liberati sunt homines? Quo cum fructu, enarrat Arnobius loco citato: *Virtutes sub oculis posita, & inaudita illa vis rerum, vel qua ab ipso (Christo) fiebat palam, vel ab ejus preconibus celebrabatur in Orbe toto, eas subdidit appetitionum flammæ, & ad unius credulitatis assensum mente una concurrere gentes & populos fecit, & moribus dissimillimas nationes; ipsam denique apud dominam Romam, in qua cum homines sint Numæ Regis artibus atque antiquis superstitionibus occupati, non distulerunt tamen res patrias linquere, & veritati coalescere Christiana.*

Quod Arnobius olim Gentibus, idem nos Catholici modo possumus obijcere hæreticis. Quis eorum (ut Erasmus illis exprobrat) vel claudicantem equum curavit? Potius cum Tertulliano lib. de præscriptionibus dixeris: *Agnosco maximam virtutem hæreticorum, qua Apostolos in adversum amulantur; illi enim de mortuis vivos suscitabant, isti de vivis mortuos faciunt.* Adde, si vis, e Tertulliano, Apostolos cæcos illuminasse, hos, videntes oculis luminibusque privasse. Id verum esse comperies apud Gregorium Turonensem lib. 2. historię Francorum cap. 30. ubi refert, quam ægre tulerit de Cirola Ariano-

norum Episcopus , Catholicos Antistites virtutibus & miraculis claruisse , ac proinde voluisse ex composito ementitum cæcum illuminare , quem pro miraculo excæcavit .

Dicet aliquis , apud Gentiles etiam patrata fuisse miracula ; nam tabula , quæ Romæ in templo Æsculapii suspensa literis Græcis notata in Latinum conversa , hæc habet : *Valerio Apro militi cæco oraculum reddidit Deus : veniret , & acciperet sanguinem ex gallo albo , admiscens mel , & collyrium conficeret , & tribus diebus uteretur supra oculos ; & vidit , & venit , & gratias egit publice Deo* . Tradiderunt quoque Authores gravissimi , postquam Vespasianus excremento oris genas cæci & orbes oculorum resperisit , subito visum illi fuisse restitutum . Idem fertur manu ægrum pede suo calcatum morbo solvisse . Quin & Spartianus memorat , scæminam cæcam lumen recepisse , quod genua Adriani fuisset exosculata . Sed verosimilius est , sub adulationis specie fucum populo factum esse , a quo accepta ejusmodi miracula Authores in literas miserunt . Credibile enim est , Imperatores , ut quandam de se divinitatis opinionem excitarent , & Apotheosin post fata facilius consequerentur , subornasse aliquos , aut ab aliis , qui hoc pacto eos sibi demereri volebant , subornatos , ut se claudos v. g. aut cæcos fingerent , & ad Imperato-

T rem

rem accedentes palam profiterentur⁶, ab eodem visum sibi aut pedes esse restitutos. Eandem merentur glossam, quæ superius ex tabula Æsculapii de Valerio relata sunt: finxisse scilicet sacerdotes talia, ut maiorem diis suis potentiam & auctoritatem conciliarent: notissimum enim est, Gentiles propagata Christianorum religione & fama miraculorum ubique celebri, nihil habuisse antiquius, quam similia de diis suis & sacerdotibus in vulgus spargere, ne apud suos vilescere inciperent. Ostendit illud præter alios Patres Catholicos prolixè & graviter Eusebius contra Hieroclem, qui (ut colligere licet ex historia Philostrati) cum ipso Salvatore nostro Apollonium Tyanæum impie nimis ausus est contendere. Observandum præterea, quoad beneficia, quæ a diis Gentium, hoc est dæmoniis in speciem miraculi collata referuntur, quod Tertullianus ait in Apologetico de malignis spiritibus: *Benefici plane & circa curas valetudinum; ladunt enim primo, dehinc remedia præcipiunt ad miraculum nova, sive contraria, post quæ desinunt ladere, & curasse creduntur*. Facile enim fuit dæmonibus, Deo ita permitte, ingredi corpora, & occupare, & mox deferere, sic, ut ægra paulo ante, eorum beneficio pristinae sanitati restituta crederentur. Non debet autem censeri pro-

mi-

miraculo , id tollere , quod factum non fuisset , nisi fecisset ille , qui tollit ; talis enim nil admiratione dignum agit ; sed tantum non agit diutius , quod agere ipse primum cœpit . Nec vim præstat , cum sanat , sed aufert , quam primo intentavit ; & intentavit , ut auferret ; & aufert , ut in eo divinam virtutem probasse credatur , in quo suam diminuit , & nihil minus , quam illam probavit .

B A R U C H

CAP. VI. V. 56.

*Non a furibus , neque latronibus se
liberabunt .*

JUre irridet Arnobius Rhetor Africæ celeberrimus Gentiles L. 6. quod deos colant tam debiles & infirmos : *Cur , inquit , eos sub validissimis clavibus , ingentibusque sub claustris , sub repagulis , pectusculis , aliisque hujusmodi rebus custoditis , conservatis , atque habetis inclusos ? Cur canes in Capitolis pascitis ? Cur anseribus victum alimoniamque prabetis ? Quinimo , si fideatis , deos isthic esse , nec a signis uspiam simulacrisque discedere , permitte illis curam sui . Indigna enim res est , & potentiam*

destruens auctoritatemque summorum, custodiam Numinum canum sollicitudinibus credere; & cum aliquam quaris formidinem furibus, non ab ipsis petere, sed in anserum ponere & collocare gingritibus. Idem

In Apologia 2. pro Christianis.

Gentilibus exprobrat Justinus Martyr: O vos stupidos! qui ab hominibus obscænis deos, quos adoratis, fingi refingique creditis, & his similes sacerdotes adiuosque constituitis, nec advertitis, quam nefarium dictu cogitatuque sit, deos custodiri a mortalibus. Antiochum Cyzicenum ferunt decem cubitorum Jovem ex delubro aureum fustulisse, & ex ære bracteolis substituisse fucatum. Si in simulacris præsto sunt atque habitant dii suis; quibus negotiis Jupiter, quibus curis fuerat illigatus, quo minus privatas subsequeretur injurias, & suppositum se sibi in viliori materia vindicaret? Ubi Apollo divinus, cum a piratis maritimisque prædonibus exspoliatus ita est & incensus, ut ex tot auri ponderibus ne unum quidem habuerit scrupulum, quod hirundinibus hospitis ostenderet?

Valerius Maximus lib. 2. cap. 2. narrat de Dionysio Syracusis genito, quod sacrilegia sua jocosis dictis prosequi, voluptatis loco duxerit. Fano enim Proserpinæ spoliato Locris, cum per altum secundo vento veheretur, ridens amicis, *Vi-*
de

desine, ait, quam bona navigatio ab ipsis diis immortalibus sacrilegis tribuatur? De-tracto etiam Jovi Olympio magni ponderis aureo amiculo, quo eum tyrannus Hiero e manubiis Carthaginensium ornat, injectoque ei laneo pallio dixit: *Æstate grave esse aureum amiculum, hyeme frigidum, laneum autem ad utrumque tempus anni aptius*. Idem Epidauri Æsculapio barbam auream demi iussit, quod affirmaret: *Non convenire Patrem Apollinem imberbem, ipsum barbatum conspici*. Victorias quoque aureas, & pateras, & coronas, quæ simulacrorum porrectis manibus sustinebantur, tollebat, & eas se accipere, non auferre dicebat, perquam stultum esse argumentando, a quibus bona precamur, ab his porrigentibus nolle sumere. Et hunc Dionysium subjungit Valerius debita sacrilegiis suis supplicia non exsolvisse. Ex his liquet veritas supradicti versus: *Non a furibus neque latronibus se liberabunt*. Paucis, omnia, quæ in hoc Capite a Propheta referuntur, eo collimant, ut constet omnibus, quam Dii Gentium sint miseri, turpes, infirmi, & abominabiles; sed magis illi, qui divinis eos honoribus prosequuntur. Certe Gentiles ipsi vanitatem idolorum agnoverunt. Hinc in præsentī Capite versu 4. dicitur, quod Chaldæi ipsi illa non honorarint. Satis Platoni & Socrati

innotuit, quam vana & superstitiosa foret Ethnicorum religio. De Cicerone testatur Arnobius, quod ita confutarit deorum & superstitionum falsitatem, & Religionem pariter Christianam stabilierit, ut judicarent, qui idololatriæ observantiores erant, libros illius ex oculis hominum manibusque submoveri oportere. Juvat Arnobii verba proferre in medium: *Tullius Romani disertissimus generis nullam veritus impietatis invidiam, ingenue, constanter & libere, quid super tali opinione sentiret, pietate cum majore monstravit, a quo si res sumere judicii veritate conscriptas, non verborum luculentias pergeretis, perorata esset & hac causa, nec secundas, ut dicitur, actiones nobis ab infantibus postularet.* Tum subjungit fuisse, qui libros ejus fugerint, nec in aurem voluerint admittere lectionem opinionum suarum præsumpta vincentem; dixerintque, oportere statui per Senatum, aboleantur ut hæc scripta, quibus Christiana religio comprobetur, & vetustatis opprimatur autoritas.

Sed ad textum redeundo, *non a furibus neque latronibus se liberabunt.* Posset Gentilis objicere, Deum Judæorum etiam subinde non liberasse populum suum a servitute, Arcam fuisse captam ab Allophylis, vastatum templum, & quæ non sacrilegia mansisse non raro hic impunita! Nec tamen

men ideo Deum ab ipsis cenſeri impotentem . Sed facilis reſponſio eſt , hæc non contigiffe DEI impotentia , ſed voluntate : minatus eſt enim non ſemel populo ſuo maledictiones horrendas , & afflictiones maximas , ſi a cultu veri DEI ad idololatriam deſlecteret . Lib. Reg. 3. cap. 9. v. 6. *Si averſione averſi fueritis vos & filii veſtri non ſequentes me , ſed abieritis , & colueritis deos alienos , &c. auferam Iſrael de ſuperficie terra , quam dedi eis , & Templum , quod ſanctificavi nomini meo , projiciam a conſpectu meo , eritque Iſrael in proverbium , & in fabulam cunctis populis .* Confirmat idem VValfridus lib. de rebus Eccleſ. cap. 3. ubi ait : *Propter peccata hominum loca ſacra a DEO negligi , teſtis eſt Arca ab Allophylis capta , Templum toties everſum vel profanatum , & multa Chriſtianorum Baſilica a Barbaris vaſtata . Non poterat , quærit Rupertus , Deus Templum ſuum illaſum cuſtodire ? Plane poterat , ſed erudiendus erat mundus , ut ſciret , quod Deus Excelfus non pulchris lapidibus delectetur ; ſed fide , charitate , & mundis affectibus .*

L. 6. de vi-
for. Verbi
Dei c. 5.

EZECHIELIS

CAP. VIII. V. 3.

Ubi erat statutum idolum Zeli ad provocandam æmulationem.

AN Zelus sit idoli alicujus nomen, an vero ab effectu sit ita appellatum, quod Deum irritaret, incertum videtur. S. Hieronym. censet, fuisse idolum Baali; nam pro eo quod in vulgata editione habetur, ad provocandam æmulationem, in Hebraico legitur Makneh, quod Septuaginta vertunt possidentem, vel dominum, qualis habebatur Baal. L. 2. Paralip. cap. 34. legitur, Josiam idolum Baal, quod in templo Manasses posuerat, abstulisse, & postmodum videtur idolum illud fuisse repositum in Aquilonari parte Templi; & cum in ea regione offerrentur victimæ & holocausta, ut Prado ait, mirum non est, Deum ad æmulationem provocatum esse, dum videret viciniam altaris sui idoli tam nefandi ignominia profanari. Maldonatus ait, idolum excitasse Deum ad zelotypiam, sicut adulter verum maritum solet concitare. Idem exemplum Div. Thom. de zelo agens allegat, 1. 2. q. 28. art.

art. 4. Sicut maritus zelat uxorem, ne per consortium aliorum impediatur singularitas, quam in uxore quærit; ita Deus magis quæsit & zelavit in populo suo singularitatem, ut se unum colerent & adorarent; cum verus Deus non possit in se esse multiplex, aut partes aliquas habere. Hinc Prudentius Deum ipsum contra Symmachum loquentem sic proponit l. 2. contra Sym.

Tu me præterito meditaris. Numina mille,

Ut me per partes minuas; cui nulla recidi.

Pars aut forma potest; quia sum substantia simplex.

Et Lactantius lib. 1. cap. 30. *Deus, quia perfectus est, non potest esse nisi unus; ut in eo sint omnia; quidquid enim capit divisionem, & interitum capiat necesse est. Idem de iis dixeris, qui plures credunt, & venerantur, secundum illud Osæ: Divisum est cor eorum, nunc interibunt.*

Quare age mortalis, soli mihi construe templum,

Meque unum venerare Deum.

Prudentius supra.

EZECHIELIS

CAP. VIII. V. 14.

*Et ecce ! ibi mulieres sedebant plangentes
Adonidem.*

PRæter omnigenas deorum effigies in templo a sacerdotibus quasi in quodam Pantheo collocatas, conspexit Ezechiel ad portam. Templi Aquilonarem mulieres solennibus lamentis plangentes Thamuz, quem fuisse Adonidem probant communes utrique in sacris cæremoniæ, communis mensis utrique dedicatus, communes planctus & lamentationes; ob quas Adonis ab Orpheo *Ἄδωνις* dictus est, isque fingitur fuisse filius Cinaræ Cypriorum Regis, Venerisque Amasius, cum juvenis esset pulcher; sed apri dente occisus; quem Venus postmodum jugi planctu prosecuta est, habens pro solatio metamorphosin Adonidis in florem.

De imagine ejus ac statua ita scribit Macrobius: *Pingitur Adonis capite obnupto, specie tristi, faciem manu lava intra amictum sustinens; lacryma visione conspicientium manare creduntur.* Ajust enim R. Salomon & R. David, idolum Tammus, aut Ado-

Adonidis fuisse concavum, cujus oculos plumbo implebant, quod accenso intus igne liquefiebat, atque ita imago flere videbatur. Quamquam non imago, sed colentes eam in præfenti Capite legantur flevisse. Maximus fere Adonidis cultus per planctum fuit in regionibus Palæftinæ proximis, & in monte Libano fertur effigies fuisse Veneris Adonidem plangentis. De annuo ejus fefto & planctu ita Ovidius lib. 11. Metam. sub Veneris perfona:

----- *Luctus monumenta manebunt;*

*Semper Adoni mei, repetitaque mortis
imago*

Annua plangoris peraget fimilamina noſtri.

Addit Lucianus in dea Syria: *Postquam verberandi & plorandi finis factus est, primum quidem Adonidi tanquam defuncto inferias agunt. Postea vero altero die eum vivere fabulantur, & in aerem mittunt, & capita detondent, ut Ægyptii, cum mortuus est Apis, sive Osiris; & hunc cum Adonide eundem fuisse cenſet Kircherus* *In Oedipo*
noster, ita dicens: Quod Ægyptiis est *Ægyptia-*
Osiris a Typhone interfectus, ab Ifide & *co.*
fodalibus ejus deploratus, hoc Phœnicibus
& Syris est Adonis ab Apro occiſus, a
Venere & Proſerpina deploratus, & ab
inferis revocatus.

Tempus, quo anniverſaria Adonis ſolenitas celebrabatur, indicatur per ipſum nomen

300 *Explicatio Fabularum*,
men Adonis lingua Hebraica, Chaldaica
& Syriaca expressum, quod est Tammus,
& idem est ac Junius: in eo enim mense
occisus credebatur, eidemque sacrificium
in planctu maxime consistens fiebat: & in-
de mensis Junius dictus est Tammuz, uti
Februarius a sacrificiis lustralibus, quæ
Februa vocabantur.

Involucrum hujus fabulæ evolvit Macro-
bius, & hanc veritatem physicam sub ea
latere refert. Adonis Sol est, ajunt Æ-
gyptii; Aper lutulentus, hyems; Venus,
pulchritudo terræ in vere, quæ deplorat
Solis absentiā per Hyemem; Sol enim
dum a nubibus excipitur, quasi ab Apro
pulcher Adonis conficitur. Adonis vero
reviviscens cum latitia susceptus a Venere,
est Sol Vernus, a terra jam pridem expe-
titus, & cum gaudio exceptus.

Alii censent, & imprimis enarrator
Theocriti, Adonim tritici semen esse: ut
enim Adonis per sex menses apud Proser-
pinam, per alios sex apud Venerem fuisse
fingitur, ita & semen per sex menses quasi
mortuum sub terra tegitur, per alios sex
Veneris seu caloris & humoris beneficio
quasi reviviscit, & in latum germen, flo-
rem, fructumque erumpit.

Forte sub fictione illa significare Vete-
res voluerunt fluvium illum, qui Adonis
vocatur, & per amœnissima loca montis

Li.

Libani defertur, & ex iisdem per campos in mare labitur. Quod autem fluvius ille quotannis cruore infici dicatur, magnamque pelagi partem cruentare, *hac quidem vulgo dicunt*, ait Lucianus, aliam causam ex homine quodam Byblio afferens, quod scilicet venti exorientes terram minio simillimam in fluvium deferant. *Ita non sanguis, quem ajunt, sed terra hujus rei causa est.*

In sensu morali significatur dolorem ex voluptate nasci, secundum illud Proverb. 14. *Extrema gaudii luctus occupat*. Hinc volunt aliqui, quod Adonis a Græco nomine ἄδωνι proveniat, quod voluptatem significat. ὀδύνη idem est ac forma doloris vel planctus: quo nomine, ut refert Fulgentius lib. 1. Mythol. Syrophanes idolum filii sui vocavit, cujus mortem deplorabat; quod idolum Prædo censet fuisse omnium primum, secundum dicta Sapient. 14. Forte ab Hebræo Adonai nomen Adonis Ægyptii formavere; nam Adonai oni idem Hebræis est, quod Dominus doloris; ut Benoni, filius doloris. Umbram citius a corpore separaveris, quam dolorem a voluptate. Bene id Romanis notum erat; hinc in eadem ara judicarunt collocandum esse simulacrum Doloris, & Voluptatis. Et ut Adonis fluvius per amœna prati spatia jucunde fluens, postmodum rubro

bro infectus colore , dum in mare fluit , non nitorem solum & jucunditatem , sed ipsum adeo nomen perdit ; sic & voluptas plus fellis in fine invenit , quam mellis ante gustarit . Proin illam abeuntem potius spectandam esse , monet Philosophus , quam venientem .

E Z E C H I E L I S

CAP. VIII. V. 16.

Adorabant ad ortum Solis.

INter cæteras cæremonias in oratione ab Ethnicis adhiberi solitas erat adoratio ad ortum Solis. De eadem passim in veterum Scriptorum monumentis plura extant exempla , & luculenta testimonia . Tacitus l. 3. historiar. memorat , usitatum Syris fuisse , solem orientem salutare . Idem refert Herodianus l. 4. de Parthis , & Plato l. 10. de Legibus : *Oriente Sole & Luna , iisdemque occidentibus in terram inclinationes & adorationes sunt Græcorum , & omnium Barbarorum .* Historicis concinunt Poetæ . Primo Ovidius l. 4. Fastorum :

*Hæc dea placanda est , hæc in conversus
ad ortum*

Dic quater .

Se.

Secundo Virgilius l. 4. Æneid.

*Surgit, & aetherei spectans orientia Solis
Lumina, rite cavis undam de flumine
palmis*

Sustulit, ac tales effudit ad aethera voces.

Item l. 12.

*Illi ad surgentem conversi lumina Solem
Dant fruges manibus salsas, & tempora
ferro*

*Summa notant pecudum, paterisque al-
taria libant.*

In hos versus ita commentatur Servius:
Non utique Solem surgentem dixit; jam
enim dudum dies erat, sed disciplinam cæ-
remoniarum secutus est; ut orientem So-
lem spectare diceret, qui esset precaturus.
Mirum est, quod Solinus refert, & cum
eo alii, ne Solinus solus id dixisse creda-
tur, Elephantes Luna splendente gregatim
omnes fluvium petere, ac mox aqua asper-
sos, purgatosque Solis exortum certis ge-
stibus salutare, proboscidem scilicet quasi
manum adversus Solis radios allevando, ut
Ælianus ait l. 7. c. 44. Tertullianus in A-
polog. adv. Gentes ait: *Sed & plerique
vestrum in affectione aliquando, ut cælestia
adorandi ad Solis ortum labia vibratis.* Lat.
Pac. Drepanius Gallus in Panegyri, quam
dixit Theodosio Augusto: *Nam ut divinis
rebus operantes in eam cæli plagam ora con-
vertimus, a qua lucis exortus est; sic ego*
vota

vota verborum, quæ olim nuncupaveram, soluturus, id orationi tempus afficiam, quo Romana lux caput. Ad eundem finem monuit & ordinavit Vitruvius, ut in æde sacra id observetur maxime, ut ædis signum, id est Dei, cui locus ille sacer est, Solem spectet occidentem, ut qui conversi ad signum, contrario videlicet aspectu, adoraturi sunt, regionem spectent orientalem.

*Causa conversionis adorantium ad Solis ortum illa videtur Ethnicis fuisse maxima, quod passim Solem ut deum coluerint. Ægyptii sub nomine Osiridis, ut Macrobius ait l. 1. Satur. c. 21. Persæ sub Mythræ nomine, Græci sub nomine Apollinis. Immo testatur Macrobius l. 1. Satur. c. 17. omnes deos ad Solem referri; id quod Kircherus noster confirmat ex Mercurio Trismegisto asserente, quod omnes alii dii Osiridem constituent, & πολυνομία in uno Osiride repræsentata nihil aliud significet, nisi unius Solis multiplicem & variam virtutem, quam in inferiorem mundum obtinet. Videntur etiam Gentiles per matutinas salutationes primam diei horam diis nuntiasse, quasi dormientes prima luce vellent excitare: id quod Arnobius indicat l. 7. *Quid sibi volunt excitationes illæ, quas canitis matutini collatis ad tibiā vocibus? Obdormiscunt enim superi, remeare ut ad vigiliās debeant.**

Ne

Ne in hanc idololatriam Judæi inciderent in Palæstina, jussit Deus, Sanctum Sanctorum erigi ad occidentem. Hinc ad Sanctum Sanctorum conversi ad occidentem orabant: proin recte visi sunt ab Ezechiele seniores illi ad ortum Solis dorsa sua contra Templum vertentes.

Per hoc tropologice significatur, ait Theodoretus, eos, qui se dedicare volunt DEO, debere terga vertere Orienti, id est pompis, quæ in hoc mundo oriuntur. Uti econtra ambitiosi adorant orientem Solem in novis Principibus, quibus adulantur, ut epulentur, se incurvant, ut eleventur, blandiuntur, ut quod volunt, eblandiantur.

Ritus sunt non pauci, quos Catholici cum Ethnicis communes habuere; cum enim secundum se fuerint adiaphori, nec periculum idololatriæ post se amplius traxerint, licite ob bonum ac laudabilem finem fuere usurpati. Talis erat oratio ad Orientem a primis Christianis longo tempore observata. Origenes, Justinus, & Basilii ajunt, traditionem esse Apostolicam, ad Orientem orare. Sed quibus inducti sunt rationibus ad sic orandum?

1. Quia ad Orientem fuit Paradisus. Hanc causam assignat S. Chrysostomus, & Theodoretus; si enim Judæi in Babylone captivi ad Jerusalem conversi oraverunt,

V non

non sine dolore exilii, & reditus desiderio; quis vitio vertat cunctis Adæ posteris, illuc sæpius respicere, unde ejecti sunt; & ad eam, quam perdiderunt patriam, dum orant, suspirare?

2. Cum Christus ita cruci suffixus fuerit, ut facie ab Hierusalem averſa Occidentem ſpectaret, quemadmodum Sol oriens; Hinc ad Orientem verſa eſt prima Chriſtianorum ætas, dum oraret, ut ſpecies Crucifixi ante oculos ſemper videretur obverſari. Teſtis eſt Joannes Damascenus Orthod. Fid. l. 4. c. 13. *Dominus cum in cruce penderet, ad occaſum proſpicebat, eoque nomine ita adoramus, ut eum obtueamur.* Hinc manavit vetus mos templa conſtruendi ad Orientem, in quibus imago Crucifixi in Occidentem proſpectabat, quam qui colebant, Orientem neceſſario aſpiciebant.

3. Talem ſitum verſus Orientem exigit converſatio Chriſtiana, principi tenebrarum contraria. Hinc ait Ambroſius de iis, qui myſteriis initiantur c. 2. *Ad Orientem converteris: qui enim renuntiat diabolo, ad Chriſtum convertitur, illum directo cernit obtutu.* Eundem in finem olim baptizandus, ut renuntiaret diabolo, Occidentem verſus ſtatuebatur, & ſic poſitus renuntiantis verba proferebat; & idem poſtea Chriſtum Dominum profeſſurus, ad Orientem

ver-

versus id totidem vicibus faciebat. S. Dionysius, & Cyrillus Catech. 1. Mystag.

4. Quia cum Sole prima beneficia DEI, simul quasi illo die nobis orientis excipimus, quibus ut novo semper grati animi affectu respondeamus, vel ipse corporis situs monere nos potest, & Solis respectus. Hinc bene Sapiens monet c. 16. v. 28. *Quoniam oportet praevenire Solem ad benedictionem tuam, & ad ortum lucis te adorare*; nam, ut exoriens Sol major appareret æque, ac mitior, propitiorque, ut qui se conspici fixis oculis permittat; si vero paulo superius conscenderit, omnino arcet læditque humanos oculos; ita plures gratias & favores illis promittit cœlestis Sapientia, qui ad se diluculo vigilaverint.

5. Quia ex Scripturis docemur, Orientis locum & nomen a Christo amari specialiter & præligi. *Stabunt pedes ejus in die illa super montem Olivarum, qui est contra Jerusalem ad Orientem*, Zachar. 14. Item Psalm. 67. ascendisse legitur *super calum cali ad Orientem*. Etiam secundus Christi adventus ab Oriente expectatur, secundum illud Matth. 24. *Sicut fulgur exit ab Oriente; ita erit adventus ejus*. Lucæ c. 1. Christus ipse *Oriens ex alto* vocatur, lucem veritatis nobis afferens. Hinc ait S. Clemens Alexand. 7. Strom. 4. *Iis, qui versabantur in ignorance, exortus est*
V 2 dies

308 *Explicatio Fabularum;*
dies cognitionis veritatis: ea ratione ad o-
rientem Solem fiunt orationes.

6. Allegat D. Thom. 2. 2. quæst. 84.
art. 2. ad 3. propter Divinæ Majestatis in-
dicium, quod nobis manifestatur in motu
cæli, qui est ab Oriente. Ad eandem ra-
tionem facit, quod Iustinus Martyr ait
quæst. 118. *Quoniam nostrorum honorabilis-*
sima quaque ad DEI honorem seponimus,
et est hominum opinione Solis ortus honora-
bilius, quam alia partes mundi: propterea
tempore precum spectamus omnes ad Orien-
tem; quemadmodum dextra manu in nomi-
ne Christi consignamus eos, qui hoc signo e-
gent: quia honorabilior existimatur, quam
sinistra; sic et ortus tanquam mundi pars
honoratior adorationi est destinatus, et qui-
dem a sanctis Apostolis, ut ipse Iustinus
asserit eodem loco.

In quæ-
stionibus
ad ortho-
doxos.

Piæ fuerunt hæ & sacræ intentiones,
quæ primos movere Christianos, ut, cum
templis carerent, illud cæli spatium elige-
rent, quod non parvum foret pietatis in-
centivum. Verum ut nullum opus Reli-
gionis adeo sanctum & purum est, cui
non quærant suos furfures immiscere dæ-
mones, ita videtur ritus ille in abusum
aliquem & perversum modum Priscillianis-
tis & Gentibus communem deflexisse,
ut colligere licet ex serm. 7. de Na-
tivit. S. Leonis Papæ, in quo valde con-
que-

queritur, quod Christiani converso corpore ad nascentem se Solem deflectant, & curvatis cervicibus in honorem se splendidi Orbis inclinent, quod fieri partim ignorantiae vitio, partim paganitatis spiritu multum tabescimus & dolemus; quia etsi quidam Creatorem potius pulchri luminis, quam ipsum lumen, quod est creatura, venerentur, abstinendum tamen est ab huiusmodi specie officii: *Vetemus igitur salutationibus matutinis fungi*, ait Seneca, *& foribus assidere templorum. Humana ambitio istis officiis capitur. Deum colit, qui novit.* Epist. 95.

E Z E C H I E L.

CAP. VIII. V. 17.

Ecce! applicant ramum ad nares suas.

Applicant ramum, Hebraice Zamora, quod interpretantur aliqui, esse canticum, alii foetorem; complures magis proprie ramum. Inter ceteros Gentilium sacrorum ritus & hic erat, ramos naribus applicare, non qualescunque, sed quibus vel ornabantur aræ, vel coronabantur victimæ, aut ipsi etiam adorantes; quod fuisse usitatum idololatriæ, ex sacris & profanis

constat literis. Sic Arcades in sacris Herculis se coronasse populeis frondibus ait Virgilius *Æneid.* l. 8.

- - *Herculea bicolor cum populus umbra
Velavitque comas, foliisque innexa pependit.*

Et l. 6. de Numa apud Romanos:

Quis procul ille autem ramis insignis olivæ

Sacra ferens.

Quid? Quod templa ipsa legamus fuisse coronata? Virgil. l. 2.

Nos delubra deum miseri, quibus ultimus esset

Ille dies, festa velamus fronde per urbem.

Arnobius l. 7. adv. Gentes addit: *Etiam dii fertis, coronis afficiuntur & floribus.* Hinc pronum est judicare, Judæos idololatrias ramos gestasse manibus, idolis consecratos, aut impio victimarum sanguine, vel scelerato aliquo libamento conpersos ad nares applicasse. Legere est apud *Æschylum*, quod Senior quidam e choro monuerit mulieres supplicantes, ut manu caperent ramos albo, id est, alba lana coronatos. Eadem manu dextra retinebant statuas Numinum, sinistra supplices ramos. Porro rami illi a supplicantibus frequenter movebantur; erat hoc signum animi intentius rogantis,

Quæ-

Quæri hic posset, cujus arboris ramus ille fuerit, cujus sit mentio præsentis Capite? Cum jam dictum sit, seniores illos ab Ezechiele visos adorasse ad ortum Solis, credibile est Solem ipsum fuisse adoratum. Uti vero diis quibusdam certæ plantæ, aut arbores sacræ erant; uti Pani pinus, Sylvano & Diti cupressus, Isidi abrotonus, ita Apollini vel Soli laurus. Hinc eidem sacrificabant redimiti &c. tempora lauro. Sic legitur, Athenienses habuisse diem festum ramorum, quo in Bacchi honorem tenues ramos ex vite imprimis præferebant. Uti vitis grata erat & dicata Baccho, sic laurus Soli. Hinc Virgil. Eclog. 7. canit: *Gratissima calo laurea*. Et Ovid. *Laurus Apollinea ac Phœbaa*. Ut enim Sol est igneus, sic laurus igneæ naturæ esse dicitur. Ideo ferunt Empedoclem dicere solitum: Si hominibus in plantas transmigrandum foret, in nullam melius, quam in laurum transitueros; quia animam credidit esse igneam. Sane Plinius l. 16. c. 29. tradit, ignem facile ex lauro elici. Origo Solem cum ramo venerandi, ex Æliano potest colligi; ait enim ipse variarum historiar. l. 3. ex relatione Thesalorum, Apollinem ex mandato Jovis purgatum, Pythonem serpentem jaculis intermisisse, qui oraculum Delphis habebat, sed Jovis ac Latonæ filium ex lauro Tem-

pica coronatum, & ramo ei in dextram sumpto ex ipsa lauro venisse Delphos, & oraculum occupasse.

Forsan etiam olivæ ramus fuit, quem ad nares applicarunt; tam enim ramus olivæ, quam lauri apud Gentes insigne fuit supplicum. Sic Livius l. 9. Decad. 3. refert, decem legatos Locrensiū velamenta supplicum, ramos oleæ, ut Græcis mos est, porrigentes ante tribunal cum flebili vociferatione humi procubuisse. Demosthenes quoque de Atheniensibus refert, eosdem olivam præferentes supplicare solitos. Virgilius quoque l. 2. ait: Oratores advenisse ex urbe Latina ramis oleæ velatos, & veniam rogasse; Ubi Servius notat, non coronatos venisse, quod lugentes non decebat; sed in manibus tantum ramos prætulisse, quod erat miserantium. Accedit, quod oliva symbolum sit misericordiæ, quam supplices sperabant.

Josephus l. 3. c. 10. docet, Judæos solitos in gratiarum actionem sacrificare, manibus gestantes ramos myrti, & palmæ, ex quibus mala Persica dependebant: ut significarent cor & linguam Deo sacrandæ esse; nam & fructus & folia in acumen desinunt, ut lingua & cor. Etiam apud Christianos rami palmarum in usu sunt, in memoriam Salvatoris olim Hierosolymæ ramis palmarum excepti; ut ejusdem pariter vi-

sto.

etoriam de mundo, carne, & diabolo cum Sanctis æmulemur in terra, & cum iis tandem in cælo signum fructumque victoriæ referamus. Nam, ut S. Joannes vidit in Apocalypsi sua c. 7. *Et palma in manibus eorum.*

E Z E C H I E L.

CAP. XXI. V. 2.

Commiscens sagittas.

S Hieronymus in hæc verba ita commentatur: „Stabit Rex Babylonis in ipso compito, & ritu Gentis suæ oraculum consullet, ut mittat sagittas suas in pharetram, & commisceat eas inscriptas, si ve signatas nominibus singularum urbium; ut videat, cujus sagitta exeat, & quam prius civitatem debeat oppugnare. „Notum satis est, varias fuisse apud Veteres fortium conjecturas, & diversos sortitionum modos: aliqui enim eum in finem utebantur parvis lignis; alii chartulis, literisque; quidam globulis aut lapillis. Vasa etiam, in quæ mittebantur calculi, erant varia. Cicero orat. 4. in Verrem meminit de sortitione in hydriam facta: Virgil. Æneid. 6. in urnam; in Casina Plautus, in si-

314 *Explicatio Fabularum,*
in situlam: Homerus Iliad. 8. in Galeam,
uti & Virgil. l. Æneid.

Convenere viri, dejectamque area sor-
tem

Acceptit galea.

Sagittæ, de quibus hic fit mentio, videntur in pharetram fuisse conjectæ, & confusæ: earum tamen provinciarum nominibus signatæ, quas bello tentare Babylonii decreverant; ut quarum fors prima exiret, eadem bello præ aliis peterentur. Usus hunc sortium probabile est militiæ fuisse proprium. Græce *βελομαντεία* vocatur. Moris etiam erat præmittere in urnam folium oleæ, cui *έρμης* Mercurii nomen erat: inde, quod Mercurium præsidere fortibus credebant, & idem folium, cum fors duenda esset, primo eximere.

Vatablus verba illa, *commiscens sagittas*, vertit, polivit sagittas. Habebant Gentiles genus aliquod divinationis, quod Catoptromanticum vocabant, quo Augures in splendenti cuspide, velut in crytallo: vel in ungue pollicis manus splendente futura inspiciebant & divinabant; & tali modo posset dici, Divinatores ex ferro sagittarum splendente divinasse, qua sit eundum.

Forte hunc morem divinandi a Judæis didicerunt, & perperam imitati sunt Gentiles; si tamen verum est, quod referunt Lyranus, Abulensis, Lipomanus, Ribera
in

in textum illum Deuter. *Pones in Rationali iudicii doctrinam & veritatem*. Hebraice Urim & Tummim, & idem est, quod lucēs aut illuminationes perfectæ. Censent enim Authores illi, duodecim pretiosos lapides in Rationali dictos esse Urim & Tummim, eo quod per hosce lapides Deus perfectissime illuminaret Pontificem, & responderet consulentibus de rebus dubiis aut futuris: si enim hæ gemmæ aut lapides pretiosi splendorem emitterent, significabant Deum Judæis placatum esse, & exitum rei bonum sperandum esse: si non fulgerent, sed obscurarentur, iratum illis Deum esse, & infelicem fore rerum eventum indicabant.

Bona, nec levis Christiano homini conjectura est de vita æterna obtinenda, si arma salutis suæ non torporis rubigine obstita, sed fervore spiritus renovata semper habeat & polita. Ad hoc ipsum videtur nos adhortari Jeremias Propheta, dum ait c. 46. v. 4. *Stare in gateis, polite lanceas, induite vos loriceis*. Hæc enim militiæ Christianæ instrumenta non sordida indecoro pigritiæ pulvere, sed usu continuo magis polita terrorem hostibus ingerunt, & victoriam augurantur.

E Z E C H I E L.

CAP. XXI. V. 21.

Extra consuluit.

EXta, seu viscera, aut intestina internæ hostiarum partes sunt, quorum in sacrificiis Gentilium maximus usus fuit. Continentur autem viscerum, ac extorum nomine hepar, lien, cor, renes, splen, ventriculus, &c. Festus dicit, ideo dici extra, quod ea diis profecentur, quæ extant maxime, & eminent. Ex illorum inspectione solebant Aruspices res & eventus futuros, sive bonos, sive malos prænoscere & prædicere. Jecur vaticinationis istius sedem, & quasi fontem constituebant, quo recte constituto & optime temperato, pro victimæ natura, læta promitti; eo autem vitiatò aut mutilato, adversa portendi, opinabantur; hinc & ab illius contemplatione Extispicium incipiebant. Romani divinationes extis proditas tanti faciebant, ut & libris describi rationem consulendi, eosque instar oraculorum custodiri publice, & in ea disciplina suos exerceri a teneris curarint liberos; nihilque alicujus momenti cœperint aut moverint, nisi sacrificiis diligenter.

genter perlustratis & examinatis; erant enim persuasissimi, affici victimas, notisque eventorum monitricibus subito ceu consignari ab iis Numinibus, quæ adessent coram vocata, & ritus spectarent; ut ex verbis Arnobii licet colligere: *Cur ergo, e vobis fortasse aliquis dixerit, esse falsos istos deos* L. 4 adv. *contendis, si invocati ab Haruspibus parent, & suis acciti nominibus veniunt, & fidelia reddunt responsa quærenibus?* Genes. Tum scilicet, quando pecora primum mactata adhuc vivunt. Imo ut Virgilius ait: *Viscera vivis eripiunt; & tum Aruspex reclusis* L. Æneid: *pectoribus inhians spirantia consulit exta,* 4. quasi exta adhuc spirarent, & possent responsum dare. *Et videntur respondere,* ut Donatus citatum Virgilii locum explicat, dum consulentium visibus commissæ signa consultationis ostendunt: illisque gaudium fuisse scribit Arnobius, vidisse ex residuo cæsarum victimarum spiritu exultantia adhuc corda, tremebundasque & palpitantes in visceribus venas. Illustre exemplum ejusmodi consultationis videre est apud Senecam in Oedipo act. 2. scen. 2.

Porro munus Extispicum & Interpretum ex Etruria plerumque venientium erat, victimas in ara inspicere, considerare, & ex illis, dæmonum artificio, futura præaugurare: & ideo Democritus censet, sapienter instituisse Veteres, ut hostiarum immolata-

rum

rum inspicerentur exta, quorum ex habitu, colore, situ, & aliis ejusmodi notis, tum salubritatis, tum pestilentiae signa possint perspicui, nonnunquam etiam, quæ sit vel sterilitas agrorum, vel fertilitas futura. Juvenalis de quodam Aruspice ita canit:

*Spondet amatorem tenerum, vel divitis
orbi*

*Testamentum ingens calida pulmone co-
lumba*

*Tractato Armenius vel Comagenus A-
ruspex;*

*Pectora pullorum rimatur, & exta ca-
relli,*

Interdum pueri.

Porphyrius l. 2. de quibusdam meminit Barbaris, qui etiam per hominum viscera capere solebant augurium, quod Græce *ανδροπομαντεία* dicitur. Mensa certa in extispiciis destinata erat, partim hostiarum dissectioni, partim inspectioni; uti & culter, de quo Ovidius Fastor. 1.

*Hic, qui nunc aperit percussis viscera
tauri,*

In sacris multum culter habebat opus.
Culter ille ferreus erat, & oblongus, manubrio eburneo, clavis æneis, ære Cyprio, & capulo argenteo ornatus. Hoc cultro sacerdos, sive Aruspex (neque enim licebat eidem viscera ipsis manibus contrectare, ne qua offensa pollutis sacris intercideret)

so-

solebat viscera ex corpore hostiæ evellere, diligenter eadem explorare ac rimari; quomodo singula essent affecta, & num quid deesset, indeque mala vel bona significabat: v. g. si jecur occisi animalis grata & nativa purpura ruberet, nec esset vitiatum; vel si caput jecinoris auctum, aut jecur geminum reperiretur; vel si extremæ illius fibræ versus interiora replicatæ viserentur, ac convolutæ, certissimum erat eximiæ cujusdam felicitatis augurium: & si alterum hepatis caput corrugatum emarcuisset, coloremque suum ac habitum mutasset; alterum vero colore florido emarcuisset, motuque alacri & continuo micasset, successus pariter felicissimos spondere illi censebatur, cujus nomine divinatio fiebat. Ita Lucanus notavit, exta Cæsarem contra Pompejum victorem renuntiasse:

*Quodque nefas, nullis impune apparuit
extis.*

Ecce videt capiti fibrarum increfcere molem;

*Alterius capitis pars agra, & marcida
pendet,*

Pars micat, & celeri venas movet improba pulsa.

Trebatius lib. de religionib. observat, duplex fuisse hostiarum genus; alterum animale, in quo solenne erat solas victimarum animas diis sacrare; alterum consulto.

torium, in quo voluntas Dei per exta disquirebatur. Sed quam vana fuerit victimarum observatio, & superstitiosa Gentilium Aruspicina, Cicero ostendit l. 2. de Divinat. ubi contra eam disputat; quanquam enim ipse Augur fuerit, & in disciplina hac exercitatissimus; ait nihilominus: *Licet verum exquirere sine invidia mihi praesertim de plerisque dubitanti.* 1. quod inter se aruspices non conveniant, alios enim alio more videmus exta interpretari, nec esse unam omnium disciplinam. 2. Si in extis est aliqua vis, quæ declaret futura, necesse est, eam aut cum rerum natura esse conjunctam, aut conformari quodammodo Numini deorum. Atqui divina cum natura tanta tamque præclara, in omnes partes motusque diffusa quid habere potest commune, non dicam gallinaceum fel, (sunt enim, qui hæc argutissima exta putant esse) sed tauri opimi jecur, aut cor, aut pulmo? Quid habet naturale, quod declarare possit, quid futurum sit? Hinc de Extispicibus inquit: *Dum Haruspicinam veram esse vultis, Physiologiam totam pervertitis.* 3. Quid? Cum pluribus diis immolatur, qui tandem venit, ut litetur aliis, aliis non litetur? Quæ autem inconstantia deorum est, ut primis minentur extis, bene promittant secundis? &c. Arnobius l. 4. adv. Gentes ita Aruspices infesta-

Etatur : Possumus obtinere, falsum esse, quod dicitur, vel quod superstitionibus plenissima res tota est; vel quod multas quotidie predictionum videmus aut aliter cadere, aut in contrarios exitus frustrata expectatione torqueri. Sed sint, ut asseritis, vera, nunquam tamen facietis fidem, Melloniam (verbi causa) vel Limentinum inserere se fibris, & ad rerum, quas quaritis, significantias aptare, &c. Sed omissis his aliisque veterum Sapientum argumentis, vel hoc solo titulo non contemptibilis solum, sed etiam execrabilis nobis esse debet hæc Gentilium Aruspicina; quod non sine dæmonum commercio inventa sit, instituta, & conservata.

Longe melius & utilius extispicium hominis Christiani est scrutinium & cognitio sui ipsius, a diis ipsis olim credita commendari. Hinc inter cæteras gnomas ante Templum Apollinis & hæc scripta erat: γνῶθι σεαυτόν. Nihil hac inspectione ad bona acquirenda, nihil ad mala avertenda efficacius.

E Z E C H I E L.

CAP. XXVIII. V. 14.

Imagines Chaldaorum expressas coloribus.

L Oquitur hic Propheta de intemperantia Jerusalem, quod etiam in absentes, nec de facie notos insanierit; cum enim videret expressas in pariete Chaldaeorum imagines, sic in eos exarsit, quos picturae referebant, ut eorum etiam congressum expetierit. An imagines illae in ipsa fuerint civitate, vel in locis finitimis, textus non exprimit. Verisimile est Judaeos habuisse in aedibus suis virorum illustrium effigies, quibus rerum praecclare gestarum memoriam servarent, ut ex eorum moribus & habitu ritus & instituta eorum cognoscerent. Nec hoc lege erat prohibitum, sed tantum, ne ulla imago aut statua ad cultum religiosum & adorationem poneretur. Et quis dubitet, tales fuisse in privatorum aedibus, & quas non alias imagines?

Ezech. 8. Cum in ipso templo, aut ejus pariete universa idola domus Israel in circuitu per totum depicta fuisse legamus.

Videtur etiam veritati propinquius, eas inter picturas fuisse quoque deorum Chaldaei-

daicorum imagines, quibuscum fornicari Jerusalem dicitur, phrasi Scripturis usitata, dum eas ut divinas veneratur. Josephus l. 1. Judaic. antiquit. c. 16. testatur, a Chaldaeis primum instructos fuisse Aegyptios in Arithmetica, & siderum scientia; hanc tamen ipsi Aegyptii magis perspicuam illustrioremque reddidere, imagines deorum ad stellarum similitudinem efformando, ut Lactant. l. 2. de orig. err. c. 14. confirmat: *Omnium primi, qui Aegyptum occupaverunt, (quos inter Chaldaeos ceu magistros fuisse, ex Josephi testimonio potest colligi) caelestia suspicere atque adorare coeperunt. Dum ea sapientius venerantes curiosius atque liberius inveniuntur; postea deinde portentificas animalium figuras, quas colerent, commenti sunt, quibusdam prodigiis induci: Ita ut merito a Cicerone l. 2. de Divinat. monstra nominata sint, quae de stellis Chaldaei finxere. Videntur vero per eorum imagines Ignis, Sol, Luna, Lucifer, aliaeque stellae fuisse repraesentatae. Tales erant pariter effigies Hori, Dionysii, Mercurii, Apollinis, Anubis, Osiridis, Serapidis, Astartes, Dianae, Veneris, &c. subinde in memoriam virorum illustrium; sed Apotheosi donatorum figurae caelestes confictae sunt, quales erant Beli, Jovis, Herculis, Ganymedis &c.*

Porro credibile admodum est, picturas

saltem aliquas fuisse turpitudinis illices: scitis enim ex præsentī capite intelligitur, in sana quadam libidine exæstuasse eos, qui picturas illas fuerant intuiti: proprium enim fuit ac familiare Gentium genio, tales efformare effigies aut statuas, quibus deorum dearumque suarum actiones etiam nefandas exprimebant. Testatur illud Clemens Alexandrinus l. 3. pædag. C. 11. *Abjeto pudore & metu, domi demonum libidines depingunt, &c.* Erat videre tabulas, in quibus penicillo adumbratæ erant deorum ac dearum nuptiæ, fornicationes, stupra, adulteria, & convivias, &c. Nec mirum est, similia ab Ethnicis expetita fuisse, ac perpetrata: Cum imitatores deorum esse pulchrum cuncti autumant, religiosissimisque eorum cultus sit. Certe turpitudinem deorum honestatem sunt interpretati, nec sibi vetitum credebant, quod diis licuisset, ut apud Ovidium mulier illa impudens:

Lactantius l. 5.
instit.
c. 10.

- - - *Nos cuncta decere.*

Credimus, & sequimur magnorum exempla deorum.

Hinc Chærea impurus adolescens apud Terentium stuprum sibi licitum persuasit; viderat enim in tabula pictum Jovem Danaæ sub specie imbris fucum facientem. At quem Deum? *Qui templa cæli summa concutit, ego homuncio id non facerem?*

Acce-

Accedit, quod imagines illæ coloribus fuerint expressæ. De similibus meminit Clemens Alexandrinus in Protreptico: *Tabellis pictis in sublimi positis lascivia thalamos exornant.*

In Veneris tabula summam sibi ponit Appelles,

Canit Propertius l. 3. De Scopa ait Horatius l. 4. od. 8.

Quas aut Parrhasius protulit, aut Scopas,

Hic saxo, liquidis ille coloribus

Solers nunc hominem ponere, nunc Deum.

Solebant autem minio pingi deorum simulacra, quod a Trojanorum tempore in usu fuisse ait Plinius. Aurum enim non tantum lucere, sed etiam ardere videtur, dum minio quasi accensis prunis mittum est. Sic Alexander ab Alexand. l. 4. c. 12. Æthiopum usum esse ait, ut deorum simulacra minio illinerent, illa pro maiestate Numinum sanctiora & augustiora arbitrati. Juvenalis Satyra 8. refert Lateranum iurasse

Solam Hippo, & facies olida ad altaria pictas.

Varias scilicet pictas imagines deæ Hipponæ jumentorum & agasorum præsidis. De Pane deo Arcadiæ Virgilius:

— — — *Quem vidimus ipsi*

X 3

San

*In Encl.
Ecl. 10.*

Ebulum Nec Pan tantum minio ob æris (ut tra-
Attich- dunt Glossographi) similitudinem pingitur;
Staud verum etiam Jupiter : Plinius I. 33. c. 7. Et
virgul- Bacchus, Pausanias in Achaicis, ac reli-
rum sam- quorum deorum simulacra, Brad. I. 3. c. 13.
buco si- Digna lectu verba Plinii huc transferam:
milli- *Invenitur in argentariis metallis minium*
um. *quoque, & nunc inter pigmenta magna au-*
thoritatis, & quondam apud Romanos non
solum maxima, verum etiam sacra. Enu-
merat Auctores Verrius, quibus credere sit
necesse, Jovis ipsius simulacri faciem die-
bus festis minio illini solitam.

Ad hæc infames & obscænas icones ad
vivum depictas quasi sacras speculabantur.
Superi! quæ inde flagitia! S. Gregorius
Magnus ait: *Dum exteriorum rerum in-*
trinsecus species attrahuntur, quasi in cor-
de depingitur, quidquid fictis imaginibus de-
liberando cogitur. De tali jure dixeris,
quod Ecclesiastici c. 38. legitur: *Dabit cor*
suum in similitudinem pictura. Hinc non
facile casti sunt judicandi, qui difficulter a
lascivis oculos suos continent imaginibus,
quamvis exterius modesti & ad speciem
probi videantur. *Fode parietem,* dicitur
Ezechielis c. 8. *ingredere, & vide abomina-*
tiones pessimas universa idola de-
picta erant in pariete in circuitu per totum:
quæ

quæ Deo & Superis summam creent nau-
seam, & maximam aversionem. Procul i-
gitur hinc Aristidis, vel Pausaniæ, aut e-
tiam Nicophanis infames labores, quos
meretricios pictores antiqui nominabant:
procul depictæ in minoribus tabellis proje-
ctæ libidines Parrhasii: apage hoc artifi-
cium, quod oculis se vendit, & pudorem
eripit. Sanctorum potius Martyrum, & ca-
starum Virginum imagines sub aspectum
collocentur, quæ intuentium animos a fœ-
dæ libidinis concupiscentia revocent, & ad
amorem Dei purum alliciant & invitent.
Ad eum finem tales in templis poni, aut
etiam in privatis ædibus suadet & com-
mendat Ecclesia. Narrat S. Gregorius
Nazianz. in carmine de virtute, quod ci-
tatur a 7. Synodo act. 4. fœminam impu-
ram, cum domum ingressura esset, ut suæ
& alterius turpi concupiscentiæ satisfacere-
ret, in ipso limine imaginem conspexisse
Polemonis, cujus nota erat atque laudata
continentia, sic erubuisse ac mutasse ani-
mum, ut confusa & pœnitens domum e-
vestigio redierit. Eandem vim habuit pia
imago Deiparæ gestantis Filium suum, *Iustus*
conspecta ab illa Virgine, quæ a Franci- *Lipsius*
sco Sfortia, alii dicunt, a Carolo Gallia- *l. 1. de*
rum Rege VIII. ad scelus sollicitata, & jam *Monitis*
in lectum abjecta erat, cum diceret: *Exem-*
plis Poli-
nicis c. 17.
n. 12.
Per intactam hanc Virginem oro, adjuro, virgi-

328 *Explicatio Fabularum,*
ni mihi parce. Quæ verba sic lenonem
moverunt, ut libidinem jam exsurgentem
coerceret; & lacrymis etiam profusis so-
lo amplexu prosecutus liberam dimiserit
cum dote quingentorum aureorum. Et ex
his patet, pias ejusmodi & sacras imagi-
nes bene a Catholicis fieri, & conservari;
pessime vero ab hæreticis aboleri.

E Z E C H I E L I S

C A P. XXVI.

Statua tua nobiles in terram corruent.

Solebant Veteres custodire imagines, &
statuas Majorum suorum factis illustrium;
& quo erant vetustiores statuae, ita ut vel
nasus aut auris vetustate obtrita esset, eo
erant in majori pretio & honore. Hunc
morem irridens Juvenalis Satyra 6. ita ca-
nit:

----- *Quid prodest Pontice ostendere
Et Curios jam dimidios, nasumque mi-
norem
Corvini, & Galbam auriculis nasoque
carentem?*

Videtur Tyrus, de qua hic Propheta lo-
quitur, urbs antiquissima & laudis supra
modum appetens, tales imagines & statuas ha-

habuisse, quarum ruinam in præsentî capite prædicit Ezechiel. Magnificis columnis & pyramidibus marmoreis nobilem fuisse Adrichomius testatur.

Prædo hunc versum de idolis explicat, præsertim simulacris Apollinis & Herculis, non illius, quem Græci decantant; sed alterius multo vetustioris, qui a Luciano Tyrius Heros appellatur. Utriusque simulacra & statuæ magis videntur a Tyriis fuisse culta, ut colligere licet ex Curtio Lib. 4. de vita Alexandri, & ex Plutarcho problem. 16. quæ Tyrû tam anxie custodiebant, ut etiam vinculis illa annecterent. Idem Petronius confirmat, dum ait: *Juvenes adhuc laboris expertes patiemur panes pati & vincula, statuarum ritu*. Ratio erat, ne hostili carmine dii evocati, aut indignati discederent, quemadmodum apud Virgil. *Æneid.* 2. legimus contigisse:

*Excessere omnes adytis, arisque relictis
Dii, quibus imperium hoc steterat.*

Hinc Plutarchus in Rom. ait: Ne dii custodes ab urbe decederent, solitos esse a Tyriis constringi vinculis. A Lacedæmoniis statuas Martis & Apollinis aureis catenis fuisse alligatas testatur Pausanias lib. 3. & Plutarchus. Meminit Curtius lib. 4. cum de obsidione Tyri ageret, & de eodem rerum articulo, in quem tunc redacta erat a Babyloniis, Apollinem Tyri custodem

ex-

*De dea
Syria.*

excessisse ab urbe, & in Alexandri castra transfugisse. Ceterum Tyrus speciatim Herculis Numini erat consecrata: in eadem urbe præter nova deorum templa Rex Hiram fertur statuas Herculi erexisse.

Primas deorum statuas rude lignum aliquod aut impositum lapidem fuisse, Authores passim tradunt. Unde illud Prudentii: *Deasciato supplicare lapidi*. De Pharensibus ait Pausanias p. 228. quod lapides quadrangulari figura pro diis fuerint venerati, singulis certa deorum nominatribuendo. Clemens Alexand. l. 1. Strom. narrat, quod Corinthi deorum simulacra fuerint columnæ pyramidis instar teretes. Sic Apollo Vicanus columna erat in acutum desinens, seu turbinata, in vestibulis ædium. Arnobius lib. 6. *Videtis Arabas informem lapidem coluisse, lignum indolatum Carios pro Diana, Pessinuntium, filicem de calo lapsum pro deorum matre*. Et hanc cæcam parentum superstitionem secuti filii, ut Aurelius Prudentius ait:

*Sacratumque domi lapidem, consistere
parvus*

*Spectarat, matremque illic pallere pre-
cantem;*

*Mox humeris positus nutricis, trivitt &
ipse*

*Impressis filicem labiis, puerilia vota.
Janoni Argivæ lignea columna posita e-
rat,*

rat, coronis fimbriisque exornata; nam & moris erat, ut tellis est Lycophron, patria deorum simulacra vestibus ornare, pelis, lunulis, coronis, &c. & unguentis delinere. Tertullianus in Apologet. quanto distinguitur a Crucis stipite Pallas Attica, vel Ceres farrea, quæ sine effigie rudi palo & informi prostat. Lucanus lib. 3.

----- *Simulacraque mæsta deorum*

Arte carent, casisque extant informia truncis.

Successu temporis, mirabili artificio deorum statuarum fuere elaboratæ, ex auro, argento, ære, ebene, ebore, marmore, aut alia pretiosiore materia. Jure Tertullianus irridet Ethnicos deorum statuas venerantes in Apologet: *In deos vestros per omnia membra validius incumbunt ascie, & runcina, & scobina*. Minutius: *Ecce funditur, fabricatur, scalpitur, nondum Deus. Ecce plumbatur, construitur, erigitur; necdum adhuc deus est. Ecce ornatur, consecratur, oratur; tum postremum Deus est*. Quis talem deum colat, veneretur, aut timeat; & non explodat potius, contemnat vel exurat? Quemadmodum fecisse legimus Diogenem, dum Lentem vellet coquere, nec nisi ligneum Herculis idolum haberet; quod versibus expressum invenies apud Bidermannum nostrum, L. 3. Epig. 79.

Ma-

Maximæ olim statuæ Colossæ vocabantur, turribus pares, diis magna ex parte positæ ac consecratæ. Talis fuit in Capitolio Apollo translatus a M. Marcello ex Apollonia Ponti urbe, 30. cubitorum, centum & quinquaginta talentis factus. Talis erat in campo Martio Jupiter a Claudio Cæsare dicatus, a vicinitate Theatri Pompejanus dictus. Talis fuit Tarenti, factus a Lysippo, 40. cubitorum. Omnes has aliasque statuas superavit Colossus Rhodius Soli consecratus, quem fecerat Chares Lydius, Lysippi supradicti discipulus. Erat hic Colossus quoad altitudinem 70. cubitorum; pauci pollicem ejus circumplecti poterant, & digiti majores erant, quam pleræque statuæ, &c.

Tam ingentes fabricas diis suis Gentiles erexere, ut suam erga illos æstimationem, & affectum testarentur. Magnam quoque statuis venerationem conciliarunt mirabiles quidam effectus, qui per statuas contigerunt. Meminit illorum Lucianus in Philopseud. In libro vero de Dea Syria hæc habet de templo quodam: *In eo autem sunt & pretiosa opera, & antiqua donaria, & mirabilia multa, deorumque statua, diique ipsi admodum conspicui: nam statua sudant, moventur, & oracula edunt. Quæ per dæmonum præstigias facile possunt fieri.*

La-

Lactantius lib. 2. de orig. err. cap. 11.

multis rationibus confutat eorum stultitiam, qui fabricant statuas, & pro diis habent: *Qua amentia est, aut ea fingere, qua ipsi postmodum timeant, aut timere, qua finxerunt?* Probat deinde deos non esse, qui absunt, quorum sunt statuæ, vel si adsint, statuas eorum esse supervacaneas. Verum Dei viventis simulacrum esse hominem, opificem statuarum, ipsis statuis multo perfectiorem esse, & tamen homines vereri magis & suspicere statuas, quam earum opificem, imo eum sæpe contemni. Sed quid inter se tam contrarium, quam statuarium despicere, statuam adorare? Et eum ne in convictum quidem admittere, qui tibi deos faciat? &c. Adorant insensibilia, qui sentiunt, irrationabilia, qui sapiunt, exanima, qui vivunt, terrena, qui oriuntur e celo. O curva in terras anima, & celestium inanes!

In sensu allegorico statuæ nobiles hujus sæculi sunt fastuosi homines, quos non male Hugo Eterianus dixit idolum esse animatum. Hinc & Lucianus eos comparavit Colossis Myronis & Praxitelis, qui exterius multo ebore & auro fulgebant, sed intus nihil erant, nisi pix, clavi, araneæ, mures, & sordes. Quanta vero ejusmodi statuarum sit infirmitas, ex pede luteo statuæ a Nabuchodonosore visæ satis licet colligere.

LIB.

LIB. DANIELIS

CAP. I. V. 8.

Proposuit autem Daniel in corde suo, ne pollueretur de mensa Regis, neque de vino potus ejus.

Ratio hujus propositi fuit, quod solitæ sint Gentes multa comedere, quæ prius fuerant idolis immolata, vel super quæ implorabant deorum nomina; ut Christiani in more habent invocato DEI nomine mensæ benedicere. Proin timebat Daniel, ne, si tales cibos comederet, signum daret aliquod abjuratæ Religionis. Idem intellige de vino, quod conditum erat in regia cella, aut certe quod propositum esset in Gentilium mensis, & prius ex more, ritu Gentium, sacrum fiebat. Hujus moris meminit Virgilius lib. 4. *Æneid.*

Jupiter omnipotens, cui nunc Maurusia pictis

Gens epulata toris Lenaum libat honorem.

Jovi plerumque aut Baccho vinum libaminum offerebant, id est, e patera leviter vini aliquid in mensam, vel aram, aut

ter-

terram defundebant. Nec e potu solum ,
 sed de cibis quoque fiebat libatio , & in
 focum sedem Larium ea ipsa libamina de-
 ferebantur. Bonartius ad 1. Thebaid. Sta-
 tii . Deuteron. cap. 32. v. 38. dicitur :
*Ubi sunt dii eorum , in quibus habebant si-
 duciam , de quorum victimis comedebant a-
 dipes , & libabant vinum libaminum ?* E-
 rant hi adipēs carnesque , sacrificiorum
 reliquæ , ad vescendum reservatæ ; quæ
 tamen ante diis oblatae fuerant & conse-
 cratæ , quæ ab Apostolo *εἰδωλόθυτα* , id
 est , idolis sacrificata appellantur ; Et talia
 vel attingere religioni sibi ducebant Judæi :
 Hinc horrebant communem mensam , con-
 gressum & commercium habere cum Gen-
 tilibus , ita ut vicissim ipsi Ethnici He-
 bræum populum ut inhumanum ac fastuo-
 sum contempserint , & mutuo usu convi-
 ctus indignum reputaverint . Hinc Sama-
 ritis illa , Joannis 4. ita ad Christum :
*Quomodo tu Judæus cum sis , bibere a me
 poscis , quæ sum mulier Samaritana ? Non
 enim contuntur Judæi Samaritanis .*

Præterea , dubium esse non potest , fuisse
 inter cibos de mensa Regis carnes Judæis
 vetitas , quarum esu legalem immunditiam
 contrahebant . Hinc ne pollueretur Da-
 niel , tam firmum conceperat propositum
 abstinendi a carnibus ; & hæc abstinentiæ
 ratio erat legitima . Cæterum quatuor o-
 lim

lim fuerunt vitiosæ carniū abstinentiæ :
 Prima erat Philosophorum , ut Pythagoræ , qui metempsychosin animarum docuit , uti & Empedoclis ita de se canentis :

*Olim namque fui cespesque , puerque ,
 puellaque ,*

*Et volucris cali , atque alti maris incola
 piscis .*

Hinc carnis cujuscunque mactationem & comestionem velut inhumanam respuebant , metuentes , ne hominis alicujus animam ex occisa pecude ejicerent , aut devorarent . Quod ipsum Seneca confirmat Epist. 109. de Pythagora : *Hominibus parricidii metum fecit ; cum possint in parentis animam inscii incurrere , & ferro morsuue violare , in quo cognatus aliquis spiritus hospitaretur .* Altera fuit Hæreticorum quorundam abstinencia , asserentium , damnabilem esse esum carniū , eo quod malæ essent , & a malo creatæ principio . Authores erroris hujus fuere Marcion , Tatianus , & Encratitæ , contra quos S. Paulus scribit ad Timoth. cap. 4. *Omnis creatura DEI bona est , & nihil rejiciendum , quod cum gratiarum actione percipitur .* Et S. Augustinus cum Cyrillo Jerosolymitano , qui Catech. 4. ait : *Jejunamus a vino & carnibus abstinentes ; non quod hac tanquam abominaciones oderimus ; sed quod premium expectamus , ut sensibilia despicientes spirituali*
dein-

deinceps & intellectuali mensa fruamur, & nunc seminantes in lacrymis, in futuro saculo in exultatione metamus. Tertia eorum fuit in exordio Ecclesiæ, qui censebant post Evangelium publicatum servandam eorum ciborum abstinenciam, quos lex Moysis vetabat. Sed hæc ab ipsis Apostolis est abrogata, ut legere est in Actis Apostol. cap. 15. Quarta ab esu carnum mala est eorum abstinencia, qui in ea perfectionem esse sitam arbitrantur, aut ex vana gloria, aut alia intentione prava illam observant. Tales erant Pharisei, de quibus Matth. cap. 16. dicitur: *Exterminant facies suas, ut appareant hominibus jejunantes.*

DANIELIS

CAP. II. V. 17.

Præcepit Rex, ut convocarentur Arioli, Magi, Malefici, & Chaldaei.

HIs quatuor generibus hominum omnis Gentilium illorum sapientia videtur fuisse comprehensa. Arioli secundum translationem veterem, teste Hieronymo, appellati sunt Sophistæ: in Græco textu a Septuaginta nominantur ἐπιστολῆς, seu in-

Y can-

cantatores ; & hi sua peragebant mysteria verbis quibusdam & characteribus . Innuit hoc satis Hebræum illorum nomen Char-tummim, a radice Charat; hinc Græcum *χάρτιον*, & Latine redditum character : nam certis verborum, carminum, characterum, & figurarum incantamentis, plantas, animalia, & homines etiam incantabant; dæmones quoque evocabant, quorum opera possent futura prædicere, aliaque mira ad speciem perpetrare . Augustinus, Plinius, Justinus, alique opinantur, Ariolos suam traxisse originem a Zoroastre Bactrianorum Rege, qui solus inter mortales, statim ubi natus est, risisse fertur, & postmodum Astrologiam, quæ siderum consideratione & naturalibus rationibus nitebatur, primo ad pestilentem dæmonum communicationem & incantationum portenta traduxisse .

Magos vetus translatio Latina, ut Hieronymus Author est, nominavit Philosophos : nempe sunt Magi Barbaris, quod Gymnosophistæ Ægyptiis, Druidæ Gallis, & Græcis Philosophi, humanarum & divinarum rerum scientiam profitentes . Philo in lib. de specialibus legibus ait: Magiam veram, quæ est speculativa scientia, ut honestam, expetendamque, non plebeiolum, sed Reges etiam Persici sectantur . Imo Cicero lib. de Divinat. inquit: *Apud Per-*

Persas nemo Rex esse poterat, qui non ante Magorum disciplinam percepisset. Plinius lib. 30. in init. ait: Magi toto Oriente Regum Regibus imperabant. Et S. Hieronymus: Omnia Reges de Magorum consilio & sententia faciebant. Existimat Origenes, primum authorem Magorum fuisse Balaam, qui a Rege Moab accersitus est, ut maledictis filios Israel everteret. Diogenes Laertius Zoroastrem Persam, de quo meminit Euseb. Cæsar. lib. 1. de præp. Evang.

Malefici, Græce φάρμακοί, id est, venefici, juxta interpretationem Hieronymi. *Tom. 2. l. 13. c. 7.* φάρμακον pro veneno accipi probat Lælius Bisciola, pariter docens, derivari παρὰ τὸ πόρειν ἄχθ, quod dolorem & exitium adferat, vel, quod ipsi verisimilius videtur, ἀπαρμάσσειν, id est, inficere, corrumpere, nocere. Vocantur autem Malefici, quod sanguine ac victimis utantur, & corpora mortuorum contingant: vulgo Necromantici appellantur. Lyranus putat, eos dici maleficos, qui a sensibus alienant homines; quibus tunc secreta quædam a dæmonibus revelantur, aut falsæ potius imaginationes imponuntur.

Chaldæi principem locum apud Babylonios habebant, de quibus ita Diodorus Siculus: *Chaldæi Babyloniorum antiquissimi eo loco sunt apud Babylonios, quo in Æ-*

340 *Explicatio Fabularum,*
gypto sacerdotes cultui deorum deputati.
Deditissimi erant siderali scientia, ex astro-
rum animadversione, qua cuique hominum
in vita aliquando essent eventura, divinan-
tes: nam Alexandro Magno & victoriam
de Dario, & mortem, qua ipsum manebat
Babylone, prænuntiarunt. Similia Antigono,
Nicanori, & Seleuco prædixerunt. Omnes
certe concedunt Chaldaeis supra ceteros mor-
talium scientiam astrologia, in qua illi se
per quadraginta tria annorum millia usque
ad Alexandrum Magnum observationes a-
strorum collegisse prodiderunt. Hucusque
Diodorus.

Hi Chaldæi a Nabuchodonosore quæsi-
ti, ut edicerent, quale somnium habuisset;
idemque explicarent, responderunt a nullo
id homine præstari posse, *exceptis diis,*
quorum non est cum hominibus conversatio.
Cicero lib. 1. de natura deorum circa ini-
tium refert, fuisse aliquos, & inter eos
lib. 3. Epicurum nominat, qui dicerent,
deos nihil agere, nil curare ea, quæ in
hoc mundo aguntur, nec ullum deos inter
& homines commercium & conversationem
intercedere: stulte enim metuebant, ut
Deus innumeris mundi negotiis, iisque ad-
modum operosis implicatus beatam vitam
posset agere, quam in animi securitate, &
in omnium vacatione munerum ponebant.
Lactantius lib. 5. de justitia cap. 10. ait:

Lo.

Locum invenit Epicuri Philosophia, nihil ad deos pertinere, (quid, & quomodo in mundo agatur) nec gratia eos tangi, nec ira moveri; quia & contemptores eorum saepe videant beatos, & cultores saepe miseros. Quorum si vera est sententia, infert Cicero lib. 1. de nat. Deor. qua potest esse pietas? Qua sanctitas? Qua religio? Qui negat Deum nobis providere & benefacere, tollit id, quod maxime proprium est optima præstantissimæque natura. Qua autem animans natura, nihil curans? Verius nullus Deus fingitur quam talis. Et si dii neque possunt nos juvare, nec volunt, nec curant, nec quid agamus, animadvertunt, quid est, quod ullos diis immortalibus cultus, honores & preces adhibeamus? Certe non legimus in præsentì Danielis capite ullos cultus & preces à Chaldæis fuisse adhibitas, ut regiî somnii notitiam a diis suis impetrarent; quemadmodum Daniel fecit, quarens misericordiam a facie Dei cali super sacramento isto. v. 18.

Quanta verum Deum inter & deos Gentium differentia! expertus illam fuit cum toto Israele Moyses Deut. c. 4. exclamans: Nec est alia natio tam grandis, qua habeat deos appropinquantés sibi, sicut DEUS noster adest cunctis obsecrationibus nostris. Quæ ista fuit familiaritas, ut facie ad faciem loqueretur DEUS homini; quemad-

modum Moyſi locutus eſt. Sed majora multo oſtenſa ſunt nobis divinæ amicitie argumenta. *Post hac in terris viſus eſt, & cum hominibus converſatus eſt*; imo delicias ſuas eſſe cum filiis hominum teſtatus eſt Proverb. cap. 8. Et cum ſimilitudo mater amoris ſit, ut nos pariter in amorem ſui alliceret, *in ſimilitudinem hominum factus eſt, & habitu inventus ut homo*; ad Philipp. cap. 2.

D A N I E L.

CAP. V. V. 4.

Bibebant vinum; & laudabant deos ſuos.

CUM Rex Balthaſſar mero incaluiſſet, afferri juſſit vaſa ſacra tum aurea; tum argentea, quæ avus ipſius Nabuchodonosor e templo Solymæ quondam abſtulerat, & menſæ ſuæ profanæ adhiberi, ut non ipſe ſolum, & Regni Proceres; ſed & Reginæ etiam uxores, imo & concubinæ iſdem uterentur. Quod & factum; nam *bibebant vinum, & laudabant deos ſuos.* Quos credibile eſt de more Gentium hinc inde in menſa fuiſſe diſpoſitos. Teſtatur enim Arnobius de Ethnicis, quod menſas ſacras facerent idolorum appoſitu, & ſimulacris

lacris deorum . Idem Athenæus confirmat lib. 8. cap. 13. apud Veteres deos fuisse inter convivas dispositos . De Hercule factis notum est, & illius simulacrum videtur in mensis fuisse locatum , ut ab Hercule vorace ac belluone monerentur , non esse ducendum dedecori , quod deorum quoque nomini non censetur indecorum . Statius ita de eodem canit :

----- *Pellæus habebat*

Regnator latis Numen venerabile mensis.
Apud Virgilium lib. 8. dicitur, quod convivium Evandri personuerit laudibus Herculis, & instauratis epulis interfuerint Sallii, juvenes & senes, qui carmine laudes *Herculeas* & facta ferunt. Circa finem sic plaudentes :

Salve vera Jovis proles, decus addite divis,

Et nos, & tua dexter adi pede sacra secundo.

Scholiastes Aristophanis in Irene docet, solitam libationem fieri Bonæ Fortunæ in mensarum principio, in fine autem Servatori Jovi.

Materia laudis in mensa Balthassaris sine dubio fuerit, quod idolorum suorum potentia aliarum Gentium idola succubuerint : imprimis, quod Judæorum DEUS eorum virtute superatus sit, excisa ejus domo, & detractis spoliis : cujus rei argu-

mentum vasa erant aurea & argentea, e quibus bibebant: *Quanta fuit stultitia*, ait hic S. Hieronymus, *in vasis aureis bibentes ligneos & lapideos deos laudare? Laudant autem deos suos insultantes Deo Judeorum, quod de eodem, & ejus Gente, urbe & Templo victoriam retulerint.* Idem S. Doctor hoc loco ait: Juxta tropologiam omnes hæreticos & doctrina imbutos contraria veritati, qui assumunt verba Prophetarum, & testimoniis Divinæ Scripturæ abutuntur ad sensum suum; & dant bibere iis, quos decipiunt, & cum quibus fornicantur, tollere vasa templi Dei, & inebriari in eis, nec laudare Deum, cujus vasa sunt, sed deos aureos, argenteos, æreos, ferreos, ligneos, & lapideos, quos pari tropologia apud eundem invenies explicatos.

In alio morali sensu discant Christiani vel ab Ethnicis, qua ratione secundum religionem suam tempus convivii debeant impendere. *Bibebant vinum, & laudabant deos suos.* Hæc agebantur, ait hic P. Oliva Societ. Jesu Orator Pontificius, non in cænula Religiosi, sed regio convivio Balthassaris. O quam religiosior est interdum superstitio, quam Religio! Impii in convivio deorum recordantur ligneorum, nec recordantur solum; sed eos laudant: Christi sacerdotes nonnulli utinam Deum

Deum laudare non fastidiant vel inter Choros psallentium Deo ! Illi meminerunt idolorum in mensis , nos mensarum recordamur in aris , &c. Vere dixit S. Augustinus lib. 2. Parall. cap. 15. Mensam , in qua nulla Dei memoria adhibetur , a brutorum stabulo non discrepare . Hinc monet S. Chrysostomus homil. in Psal. 41. patresfamilias , ut doceant uxores & filios suos cantare cantica , ex Psalmis sumpta , *maxime in mensa : quando enim diabolus ut plurimum insidiatur convivii , cum & ebrietatis & ingluvici , risusque profusi & remissi animi auxilio utitur , tunc maxime oportet , & ante mensam , & in mensa , se munire psalmorum prasidio .* S. Cyprianus in Epist. ad Donatum ita scribit : *Nec sit vel hora convivii gratia celestis immunis , sonet psalmos convivium sobrium , quale habuerunt Raguelis convivæ , de quibus legitur Tobix cap. 7. v. 17. Epulati sunt benedicentes Dominum .*

DANIELIS

CAP. XIV.

Erat quoque idolum apud Babylonios nomine Bel, & impendebantur in eo per dies singulos simila artaba 12. & oves 40. vinique amphora 6.

BEl idem est, quod Dominus, & hoc nomine Chaldæi & Assyrii deum suum & idolum ejus appellabant. Verisimile est, prima hominum ætate post diluvium Deum verum suis a cultoribus Bel esse nominatum; sed postmodum nomen illud, ubi mores hominum corrupti sunt, & in superstitionem lapsi, etiam creaturis, ut igni, aut Soli, aliisque pro diis habitis fuisse inditum: meminit enim Philo Bybliensis Sanchomatonis interpres, Phœnices Solem sub Beli nomine coluisse.

Belum Chaldæorum, qui Genes. c. 10. Nemrod nuncupatur, fundatorem Regni Babylonici, & patrem Nini fuisse, traditur ab Eusebio, Hieronymo, Augustino, Cyrillo, aliisque. De Nino vero ejusdem filio ait S. Hieronymus in explanatione cap. 2. Osee: Postquam civitatem Ninyen condidisset, & Regem Zoroastrem subju-

subjugasset, tanta vanitate elatum esse, ut Belum patrem suum in deorum numerum retulerit: cum enim eidem templum magnificentissimum a Semiramide erectum esset, & simulacrum ejus venerationis causa in eodem collocatum, idemque locus quasi facer asylum foret nocentium, factum est temporum successu, ut non aliter Belum, quam Numen aliquod haberent & colerent. Et hunc Chaldæorum morem aliæ Nationes pariter imitatæ sunt, ut notavit vetus Poeta Marius Victor l. 3. ita canens:

----- Plus inquinat illud,

Quod speciem virtutis habet: nam protinus omnes

*Amplexæ Gentes scelus hoc, sine fine litantes
Manibus inferias, uti nunc testantur
Alani,*

Pro Diis quique suis caros habuere parentes;

Post etiam Reges; quorum sub nomine mendax

Gracia, dum veris falsa insinuare laborat,

Addidit obscuras variis rationibus umbras,

Excusans tumulos, & condita nomina bustis.

Observarunt quoque Gentes ceteræ nomen Bel, Baal, aut Beel, eoque deos suos significabant. De Belo deo Carthaginensium,

348 *Explicatio Fabularum*;
suum, qui suam e Phœnicia traxere origi-
nem, meminit Dido apud Virgilium l. 1.
*Æneid. Quem Belus, & omnes a Belo so-
liti, &c.*

De Templo Beli Jovis scribit Herodo-
tus, fuisse illud in medio Babylonis æreis
portis, duorum undecunque stadiorum am-
plitudine, figuraque quadrata; extitisse pa-
riter in sacri medio turrim solidam cras-
sam, juxta ac sublimem ad stadii altitudi-
nem, cui alia rursus turris erat superpo-
sita, & huic subinde alia ad octavam us-
que, & in ea verisimile est fuisse sepul-
chrum Beli, operis magnitudine & stru-
ctura mirandum. Erat Pyramis, ait Stra-
bo l. 16. quadrata, ex latere coctili con-
structa, stadii altitudine, quolibet ejus la-
tere pariter unius spatium stadii complexo.
Hanc Xerxes demolitus est.

Ornatum Templi refert Diod. Siculus
l. 3. rer. antiq. c. 4. In summo templi tres
ingentes aureas statuas Jovis, Junonis,
Opisque erexit, (Semiramis) quarum Jo-
vis adhuc extat longitudine pedum 40. mil-
le Babyloniorum talentorum ponderis. O-
pis simili pondere in sella aurea residet,
ad cujus genua duo adstant leones, juxtaque
serpentes argentei ingentis magnitudinis,
ponderis quilibet est talentorum triginta..
Junonis stans signum, ponderis est talen-
torum octingentorum. His omnibus com-
mu-

munis erat mensa aurea longitudinis pedum 40. 12. latitudinis, ponderis talentorum 50. duo præterea Carchesia ibidem erant, crateres ex auro tres, & totidem vasa vaporibus apta. Meminit præterea Herodotus duplicis altaris, & in uno plurimas fuisse immolatas hostias, in altero quotannis centum talentorum millia libanoti, id est thuris oblata fuisse ac incensa.

Additur in Scriptura: *Et impendebantur in eo per dies singulos simila artaba 12. & oves 40. vinique amphora 6.* Si ullus, certe Arnobius hanc insanam Gentium superstitionem non minus acriter quam lepidè refutat: *Si deus (ut dicitur) nullius est corporis, omnique est incontiguus tactu, qui fieri potest, ut corporalibus rebus nutriatur incorporeum? quod mortale est, ut immortale sustineat, subdatque salutem rei, quam contingere nequeat, & motus subministrare vitales? Ostendit deinde eodem libro, quam stulte Gentiles faciant, offerendo diis cibos, quibus vesci solent homines: „ Si vos canes, (necesse est enim „ quædam fingi, perspicui ut liquidius res „ possint) si, inquam, canes, & asini, si „ motacillæ, si hirundines garrulæ, pari- „ terque cum his porci sensu aliquo humanitatis accepto deos putarent atque eximarent vos esse, sacraque vobis intenderent honoris ergo facere, non ex ma-*

„ te.

„ teriis aliis, aliisque de rebus; sed qui-
 „ bus ali moris est illis, & naturali appo-
 „ sitione fulciri: audire ex vobis exposci-
 „ mus, utrumne hunc honorem, an con-
 „ tumeliam potius esse judicaretis amplissi-
 „ mam? Cum hirundines vobis muscas,
 „ motacillæ cæderent consecrarentque for-
 „ miculas? Cum altaribus vestris darent
 „ asini fœnum, palæasque libarent; cum
 „ imposerent canes ossa, & humani ster-
 „ coris proluviem consecrarent? Cum ad
 „ ultimum porculi cœnum vobis profunde-
 „ rent ex volutabris horrentibus lutosis &
 „ voraginibus sumptum. „ Alio ejusdem
 „ libri loco quærit ex Gentibus, „ Quid cum
 „ pultibus Deo sit, quid cum libis? Cur
 „ opiparis Numina cœnis afficiuntur aut
 „ prandiis? Ut innumeras conveniat exco-
 „ gitare his dapes? Aversionibus stoma-
 „ chorum laborant? Et ad expellenda fa-
 „ stidia saporum varietas quæritur? Ut
 „ modo his assa, modo cruda ponantur,
 „ semicocta modo & semicruda? O deo-
 „ rum magnitudo mirabilis! „ Sic legitur
 „ Danielis c. 14. Regem Nabuchodonosorem,
 „ cum dapes Belo præpositas absumptas esse
 „ adverteret, exclamasse: *Magnus es Belo,*
 „ v. 17. Quis non rideat & explodat bellui-
 „ nam ejusmodi magnitudinem? Additur in
 „ fine textus nostri, oblatas fuisse Belo *sex*
 „ *amphoras vini.* Sed pari modo argumenta-

tur Arnobius contra vinum diis libari so-
litum: „ Nunquid enim Numinum corpo-
ra sitim sentiunt aridam? Et eorum ne-
cesse est siccitates humore aliquo tempe-
rari? Quid, inquam, Deo cum vino?
Veneris re proxima, nervos omnium de-
bilitante virtutum? Verecundiæ, pudor-
is & castitatis inimica? Itane istud non
nefas & plenum sacrilegii crimen est,
honori hoc dare, quod si tu id avidius
sumpseris, quid facias, nescias, quid lo-
quaris, ignores, ad extremum temulen-
ti, luxuriosi & perditi convicium infa-
miamque merearis?

Utcunque interim Gentiles Arnobius ar-
guat, quod esculenta cum vinis obtulerint
diis suis, hortatur nihilominus Christianæ
religio Catholicos, ut Christo mensam ster-
nant, parent convivium, cibum & potum
apponant. Constat enim ex Euangelio, Chri-
stum adhuc esurire ac sitire, non in se qui-
dem, sed in minimis egenisque servis suis.
Et ideo Matth. c. 25. *Non dixit, esurivit
pauper, sed esurivi ego, & dedistis mandu-
care mihi; se manducare dicit, quod come-
derit pauper, quod bibit pauper, sibi resti-
tuitur infusum.* S. Chrysolog. serm. 18. *Quo-*
modo potuit, ait S. Cyprianus, magis mi-
sericordia nostra opera provocare, quando
prestari id sibi dixit, quod egenti prestatur?

*De Elec-
mos.*

DANIELIS

CAP. XIV. V. 22.

*Erat Draco magnus in illo loco, &
colebant eum Babylonii.*

MIrum nemini videatur, dracones magnos ab Ethnicis deorum loco habitos. Refert enim Philo Biblius, priscos censuisse, eosdem esse naturæ cujusdam immortalis ac divinæ. Quod ipsum confirmasse videtur Tacotus Ægyptiorum deus de dracone inquires: Spiritualissimum est omnino animal, & maxime igneum, longævum præterea, & senectam cum pelle deponens revirescit, & vix naturali nece conficitur. Juvit hanc Gentilium opinionem ea, quæ in animali isto præ cæteris eminet, magnitudinis excellentia, quæ non raro aut spem magni alicujus boni, aut timorem ingentis mali afferre Gentibus consuevit. De magnitudine Draconum refert Onesicretus l. 6. c. 20. duos fuisse in India proceræ adeo molis, ut alter 46. cubitos faceret, 80. alter, & horum intuitum intrepide expetivisse Alexandrum Magnum. Plinius l. 8. c. 11. ait, tantæ vastitatis in India dracones inveniri, ut cum Elephantis

tis bellum gerant, tricenum & amplius cubitorum. Eorum aliqui Boæ nominantur, tam immanes, ut boves glutiant. Ad hæc quamvis terribiles sint, amœnam nihilominus speciem præ se ferunt. Veri enim Dracones splendent, ac si aurum variis coloribus suppositum emicaret; non secus ac splendere solent aureis variisque splendoribus columbæ; ita ii superciliis, crista, mento, cute dorfi, scapulis, collo, juba emicant. Nicander in *Theriacis* refert, in Pelio monte, quem Pheletronium appellant, reperiri dracones, qui colore sunt virides, & nigri, pulcherrimæ omnino formæ, triplicem dentium obtinentes seriem, frontem & supercilia eminentiora aliis partibus multo, obesos oculos, mentum auratum, &c. ita, ut regia quædam eorum majestas videri posset non minus grata quam terribilis. Quis enim a bestiis tam venenatis sibi non timeat? Et si Cleantis testimonio, ut Cicero ait l. 2. de nat. deor. terror & timor mali deorum notionem animis hominum imprefferit, facile a Gentibus fuit creditum, Numen aliquod metuendum animantibus tam portentosis inesse. De Alatis ita canit Lucanus l. 9.

*Vos quoque, qui cunctis innoxia Numina
terris*

Serpitis, aurato nitidi fulgore dracones;
Z Pe-

354 *Explicatio Fabularum;*
Pestiferos ardens facit Africa, ducitis
altum

Aera cum pennis, armentaque tota secuti
Rumpitis ingentes amplexi verberet auros.
Nec tutus spatium est Elephas, datis omnia
letho,
Nec vobis opus est ad noxia fata vene-
no.

Ælianus l. 11. c. 16. constituit illos divinatores, præsensores temporum rerumque multarum; forsitan ideo, quod visus sint acutissimi; nam ἀπὸ τοῦ δέρεω, id est videre, per metathesin derivatur δράκων. Artemidorus l. 4. c. 69. ait: Draco sacer est & Mystes, præsensque omnibus mysteriis; & ideo refert Strabo l. 14. Gentiles habuisse templa draconibus sacra, quæ ipse draconica vocat: & l. 9. in Delo insula Draconis effigiem coli solitam. Dio scribit, Hadrianum Imperatorem in Templo Jovis Olympii, quod Athenis sumptuosissime crexerat, posuisse pro Numine Draconem ex India deportatum. Narrat quoque Lucianus in Pseudomante, Alexandrum impostorem discipulum Apollonii Tyanæi serpentem palam adorandum exposuisse, & finxisse eum dare oracula, & ad hoc novum vocale oraculum Jones, Galatas, Cilices, & Romanos confluisse. De Ænea l. 5. meminit Virgilius, quod cum stupore serpentem viderit inter pocula non sine

ne gravitate quadam meantem, nesciens;
an deus vel genius loci cujusdam aut tute-
laris fuerit. Certius divinitatis indicium &
auxilium Romani inesse credebant Serpen-
ti Æsculapii, quem proin ad triennalem
pestilentiam, quæ Urbem afflixerat, depel-
lendam legatione Epidaurum missa hono-
rarunt, magnaue religione advectum Ro-
mam divinis honoribus affecerunt. Quid
vero depulso per adventum ejus malo sub-
secutum sit, Ovidius enarrat l. 15. Meta-
morphos.

*Incerti quid agant Proceres, ad templâ
petiti*

*Conveniunt operosa Dei, quaque ipse mô-
rari*

*Sede velit, signis caelestibus indicet, orant.
Vix bene desierant, cum cristis aureis
altis*

*In Serpente Deus prænuntia sibila misit:
Territa turba pavet, cognovit Numina
castus*

*Evinctus vitta crines albente Sacerdos:
En Deus est, Deus est, animis linguis-
que favete,*

*Quisquis ades, dixit: Sis, o pulcherrime
visus!*

*Utiliter, populosque juves tua sacra cõ-
lentes.*

Incertum quidem est, an serpens aut dra-
co Babylonicus, de quo in præsentì sermō

Z 2 est,

est, templum habuerit sibi dedicatum. Josephus Geronides l. histor. c. 10. & Comestor in Histor. Danielis, & ex eo S. Thom. aliique censent: Draconem illum non in templo fuisse; sed in fovea quadam, quem horribili sono velut tonitruo ex hydraulicis instrumentis excitato evocabant sacerdotes; ille vero excitatus ad illum strepitum quandoque fumum emittebat, interdum ignem, visibiliter subinde apparebat. Huic cibum fuisse appositum liquet ex præsentī capite; quemadmodum & serpenti Epidaurio factum esse notat Valerius; illud vero nihil novi esse apud Gentiles, colligi potest ex Æliano; is enim refert l. 11. c. 16. in Lavinio Luco apud Italos templum fuisse Junonis, Argolicæ dictæ, quod Argos occiderit industria Mercurii, in quo antrum erat amplissimum profundumque satis, & draconis cubile, in quod certis diebus sacræ virgines concurrebant panis offam ferentes manibus, velatis oculis linteo purissimo, via recta in cubile deductæ; non secus ac si revelatis & apertis venirent oculis, e quibus draco capebat cibos castos, si quidem castæ essent, secus respuebat, quo ingenio examinabantur virgines, accusabanturque corruptæ; ut ex lege suppliciiis afficerentur. Virgines proinde sacrorum suorum antistites habebant dracones, ut quidam tradunt, puel-

puellarum maxime, puerorumque amatores Virginum. Vide Bustamantium de animantibus Sacrae Scripturae lib. 4. cap. 1.

Dubium esse Christiano homini nullum potest, quin ea bona, quae per serpentes aut dracones Ethnicis collata sunt, aut quae mala per eosdem depulsa, maligno daemonum artificio contigerint. Nam ut S. Augustinus ait l. 11. de Genes. ad Lit. c. 28. *Gaudent daemones hanc sibi potestatem dari, ut ad incantationem hominum serpentes moveant, ut quolibet modo fallant, quos possunt; hac autem permittuntur ad primi facti memoriam commendandam, quod sit ejus quadam cum hoc genere animantium familiaritas.* Quam nequiter nequam ille spiritus per fallum suum nequaquam, sub serpentis specie, primis nostris illudit parentibus? Quantum hoc successu animatus nocere pergit humano generi? Clara sunt S. Scripturae verba Apocalypf. c. 12. *Projectus est draco ille magnus, serpens antiquus, qui vocatur diabolus & Satanas, qui seducit universum Orbem, & projectus est in terram, in qua dominari quæsit, & sub serpentum ac draconum specie adorari, votisque suis aurigante hominum malitia potitus est, usque dum caelestis Aquila (quam inter & draconem bellum est continuum) JESUS Christus e caelo de-*

358 *Explicatio Fabularum,*
scendit, quæ eundem contrivit penitus, &
in puteum abyssi dejecit,

O S E Æ

CAP. IV, V. 12.

Populus meus in ligno suo interrogavit, &
baculus ejus annuntiavit ei.

S Hieronymus, Haymo, Hugo, & Vatablus per lignum hoc accipiunt baculum divinatorium: eo enim quasi instrumento præfagiebant futura. Septuaginta vertunt; *In symbolis eorum interrogabant;* nam baculi illi symbola erant divinationis. Veteres Chaldæi, & secuti eos Hebræi utebantur divinationibus per virgas & sagittas, de quibus dictum est alibi, Moyses Sampsonis filius in explicatione præcepti negativi quinquagesimi secundi commemorat talem ritum: Decorticabant baculum ligneum uno tantum ex latere, tum in aërem projiciebant. Si primo jactu apparuisset superior pars decorticata, & secundo jactu superior pars adhuc vestita, prosperum successum augurabantur; sin contra, primum pars vestita, infelicem: si utroque jactu vestitum vel nudatum latus superius fuisset, mixtum eventum sibi pollicebantur.

bantur ; & talem, inquit, divinandi modum ab Osea hic carpi. Theophylactus in eundem textum ait: Virgas duas statuentes, carmina quædam admurmurant ; deinde virgis, ministerio dæmonum, cadentibus considerant, quonam utraque cadat, retrorsum, an antrorsum, ad lævam, aut ad dextram, sicque tandem responsa dant insipientibus, virgarum casu pro signis usi. Vocatur autem divinatio, quæ per virgam aut baculum obtinetur, Græce παλομάντεια, vel ραβδωμάντεια, quam Tacitus l. de moribus Germ. tribuit Germanis: *Sortium consuetudo simplex; virgam fructifera arbore deciduam in surculos amputant, eosque notis quibusdam discretos super candidam vestem temere ac fortuito spargunt; mox, si publice consulatur, sacerdos civitatis; sin privatim, ipse paterfamilias precatus deos, calumque suspiciens, ter singulos tollit, sublatis secundum impressam ante notam interpretatur.* Hucusque Tacitus. Apud Sinas quoque hodieum esse dicitur similis quædam divinatio duorum lignorum æqualium, quæ fusius describitur a Gonzalo Mendozio l. 2. histor. Chinenf. c. 4. Nec non apud Philipenses in India, teste Martino Ignatio itinerarii c. 8.

Illustrant hunc discursum nostrum, quæ Rhodiginus refert l. 7. c. 29. *Virgas in rebus divinis eximii cujusdam usus fuisse Ve-*

360 *Explicatio Fabularum,*
teribus, ex plerisque conjectare licet: nam
qui Persicos ritus diligentius animadversos
litteris mandarunt, illorum magos, qui sa-
crificiis præficiuntur, carnes super myrto
& lauro positas tradunt subtilibus ignibus
adurere, mox oleum lacte melleque commix-
tum conspergere, ac comprecari, fasciculos
ex myrica pertenuēs manu tenentes. In Py-
rothiorum meditullio surrecta stabat ara,
ubi inextinctus servaretur ignis, fierentque
eadem comprecationes, non sine myricinis
virgis: sicut in Sythia quoque, ubi vaticini
traduntur plures, salignis virgis divinatio
concepitur, quas dissolvunt, ac separatim
singulis humi constratis vaticinantur; inte-
rim virgas comprehendentes componentesque.
Narees vero, quos esse Androgynos putat
Herodotus, tiliam scindentes trifariam, di-
gitosque implicando ac resolvendo præcinnunt
futura. Et post aliqua: Etenim in plerisque
locis virga, ut diximus, præagiunt; quod
in primo compositionis tertia Dion quoque
confirmat. Hæc ille de Persis Magis ab
Herodoto l. 1. & Strabone l. 15. est mu-
tuatus.

Quali ligno usi sint Hebræi, non constat;
hoc certum, in Myrica solita olim
fieri vaticinia, ut ex paulo ante dictis pa-
tet. Apud Nicandri interpretem in The-
riacis ita legimus: Apollo vaticinos sanxit
Myrica prænuntiare mortalibus futura:
hinc

hinc fruticem hunc insignem Nicander Mantin vocat, id est Vatem. Quin & magi, item Scythæ Myricino vaticinabantur ligno: nam in plerisque locis virga fiebat prælagium. In Lesbo Apollo Myricæ ramos tenebat, qua ratione Myriceus quoque est appellatus: & Archæus prodit, quandoque in somnis visum Deum illum Myricæ ramo decorum. Rhodiginus l. 7. c. 29. Forsitan lauri lignum fuit adhibitum. Claudianus l. 2. de raptu Proserpinæ cum antiquioribus & junioribus cecinit Laurum venturi præsciam; eo quod Apollini oracula reddenti sacra esset, & ideo dicta est *μαντική φυτόν*, hoc est vaticinatrix planta; & divinationis Symbolum vocat Aphtonius. Hinc illud Lucretii l. 1.

Pythia, quæ tripode ex Phœbi lauroque profatur.

Scholiales Theogoniæ Hesiodi de eadem inquit, quod divinos instinctus efficiat; unde illud Lycophronis in Alexand. *Lau-ro vorata ex gutture emitto vaticinia*. Vide Lælium Bisciolam tom. 1. l. 12. c. 3.

Quæri hic posset, an uti Gentiles beneficio ligni & baculi occulta quædam annuntiari sibi quærebant, ita possint licite Christiani uti ficulni aut coryli ligno, vel alia quadam virga divinatoria uti pro invenendis occultis limitibus, thesauris, metallis, fontibus? &c. Quæstionis hujus decisio ex

eo pendet, an sit naturalis aliqua connexio inter virgam indicantem, & ea, quæ per illam indicantur? Quæ cum abesse videatur, nec extendere se possit virga ad morales circumstantias, quæ non raro intercurrunt, jure merito usus ejus ad tales effectus reprobatur.

Aliam virgam cum baculo sacre nobis Scripturæ offerunt, non sine spe fortunæ melioris obtinendæ ab iis, qui illa virga & baculo bene usi fuerint. Meminit illorum Regius Propheta David Psal. 22. *Virga tua & baculus tuus ipsa me consolata sunt.* Hæc virga, & hic baculus est tribulatio amore Dei & Jesu Christi suscepta, quæ non vanum est prædestinationis nostræ symbolum, nec obscurum futuræ salutis nostræ vaticinium, Blosii testimonio, qui Margarit. Spiritual. c. 19. §. 10. ait: *Nul- lum certius signum divine electionis habetur, quam si quis tribulationem humiliter, patienterque propter DEI amorem sustineat.*

O S E Æ

CAP. IV. V. 13.

Super capita montium sacrificabant.

FRequenter Gentiles diis suis templa & aras extruebant in montibus, & sacrificia in iis offerebant. Forsan loca, quo cælo propinquiora, hoc diis gratiora, & magis sacra esse censebant, præsertim si arboribus essent consita, & luco exornata. Virgil. *Æneid.* 8. ita canit:

Hoc nemus, hunc, inquit, frondoso vertice collem

Quis Deus, incertum est, habitat Deus, Arcades ipsum

Credunt se vidisse Jovem.

Omnes fere montes in septicolli Roma diis erant sacri. Mons Palatinus aut Palatium nomen suum a Pale dea pastorali adeptum esse, refertur Authorum quorundam sententia apud Solinum c. 11. Quam celebris mons Capitolinus ob amplissimum Jovis Capitolini Templum? Collis Quirinalis ideo sic dictus, ut quidam censent, quod in eo templum fuerit Quirino positum. Idem dictus est Agonius ob Agonia sacrificia. Viminalis mons, teste Varrone Ro-

ma-

manorum omnium doctissimo, a Vimineo Jove nomen habet, quod ibidem aræ ejus sint. In monte Aventino tria erant templa, Dianæ, Minervæ, & Victoriæ consecrata. In monte Palantio templum erat Cereris. Vaticanus mons a Vaticano aut Vagitano Deo sic appellatus est. Solinus c. 14. de Olympio ait: *Excellenti vertice tantus attollitur, ut summa ejus, calum accolæ vocent. Ara est in cacumine Jovi dicata, cujus altaribus si qua de extis inferuntur, nec disflantur ventis, nec pluviis diluuntur; sed volvente altero anno, ut relicta fuerint, ita plane reperiuntur.* Similia scribit de monte, qui Athos vocatur, quod in aris, quas cacumine sustinet, nunquam cineres eluantur.

Verisimilius est prima Ethnicorum Numina in lucis tantum aut montibus fuisse culta. Strabo Amasianus l. 7. Georg. scribit. *Apud Getas sacerdos deus dicitur, & mons sacer existimatur, & ita appellatur.* Idem c. 15. in fine ait: Indi sacrificant in sublimi, editore loco, ut merito Orgia Bacchi sacra vocentur, ἀπὸ τῶν ὄρων, a montibus. Servius ad versum 303. *Æneid. 4. Hinc illud Virgilii: Bacchus amat montes.* Ritus ille sacrificandi in montibus non modo apud Indos, sed Græcos etiam, Getas, & Dacos receptus fuit.

Quid? quod ab Ethnicis montes ipsi deo-

deorum loco culti sint, aut dii montium inquilini & tutores sint habiti. Ab iis putabant Syri, cum victi essent, Judæos habere auxilium suum; hinc ad Regem suum dicebant: *Dii montium sunt Dii eorum, ideo superaverunt nos; sed melius est, ut pugnemus contra eos in campestribus, & obtinebimus eos*, 1. Reg. 3. c. 20. Deus, qui jugis montium præsidebat, dictus est Gentilibus Jugatinus, collium dea ac præses Collina, Oreades Nymphæ, quod in montibus frequenter apparerent. Hinc mirum non est, Gentiles in excelsis, quorum toties Scriptura meminit, & *super capita montium* sacrificasse. Voluit scilicet eorum author diabolus Patriarchas imitari, & Prophetas, a quibus non raro montes pro DEI servitio sunt electi; Imo DEUM ipsum, qui sua nobis mysteria in montibus plerumque declaravit, ut ex pluribus Scripturæ locis patet, tam in Veteri, quam in Novo Testamento.

O S E Æ

CAP. IV. V. 13.

*Et super colles accendebant
Thymiama.*

THymiama a græco verbo θυμιάειν oritur, & idem est, quod suffire, vaporare, odores incendere & adolere. θυμιάειν vero derivatur ὡς τὸ θυῶ, quod verbum, ut apud Eusthatium videre est locis pluribus, duo significat. Primo idem, quod θυμιάειν suffire, odoramenta Diis incendere. Secundo significat sacrificare, mactare, immolare. Cum autem sensus proxime antecedens expresse de sacrificio meminisset, textus præsens de suffitu aut suffimentis intelligendus est. Porphyrius, & Grammatici ideo censuerunt sacrificium θυμίαειν vocari, quod primi mortalium ex combustis arboribus sive plantis, earumque partibus & fructibus θυμιάειν, id est suffimentum Diis impenderint. Forsan tale sacrificium primus Cain fecit, cum legatur Gen. c. 4. *De fructibus terra munera Domino obtulisse.* Odores sacrificiales varii erant, alii suaves, jucundi, & beneolentes; alii insuaves, tetri, fœtidi, putridique; ut trif-

trisque autem miseri Idololatæ Deos suos, seu Dæmones potius, idque illorum ipsorum suggestionem, monitis atque oraculis, delectari atque placari putabant. Fuerunt ex Gentilibus, qui censuerunt antiquitus herbas tantum simplices, domesticas, patriasque ad sacros illos suffitus conficiendos fuisse adhibitas; qui postea ex thure, myrrha, croco, cinnamomo, aliisque ejusmodi aromatibus pretiosis transmarinis fieri sunt soliti. Quibus suffragatur Diodorus apud Eusebium Cæsar. l. i. c. 6. *Sella celestia, ut Dii, non victimarum cadibus, sed herbarum fumis colebantur.*

Accinit Ovid.

Nondum portabat lacrymatas cortice myrrhas

Acta per aquoreas hospita navis aquas.

Thura nec Euphrates, nec miserat India costum,

Nec fuerant nobis cognita fila croci.

Ara dabat fumos herbis contenta Sabinis,

Et non exiguo laurus adusta sono.

Præter Sabinas herbas Verbenarum meminit Propertius:

Flore sacella tego, & Verbenis compita velo,

Et trepat ad veteres herba Sabina focos.

Virgilius:

Ver-

Verbenarium nomine subinde solent intelligi quævis herbæ, quarum usus in sacris erat pro suffitu; ut Laurus, myrtus, olea &c. Notandum porro est, quod Jamblichus ait de mysteriis Ægyptiorum segmento 3. c. 24. *Suffumigationes adhibita affinitatem & cognationem habent cum Deo ipso, cui offeruntur*; hinc videntur factæ suffumigationes in certis herbis aut arboribus, quæ Diis sacræ erant, & magis gratae. Sic Virgilius canit Eclog. 7.

*Populus Alcide gratissima, Vitis Jaccho,
Formosa Myrtus Veneri, sua Laureæ
Phæbo.*

Ita legitur fuisse ara vetus Veneri Myrtæ, quæ nunc Murtia vocatur. Inter prima, quæ pro sacris olim suffitibus serviebant, numerari potest Sulphur, de quo ita Plinius l. 35. c. 15. *Habet & in religionibus locum sulphur ad expiandas suffitu domos.* Hinc pro re sacra & divina est habitum, quod magna vi polleret ad quælibet expianda.

Antiquissimus juxta ac frequentissimus thuris usus fuit olim in sacris Gentilium; ita ut nonnulli ipsum nomen thus probabili sane ratione *ἀπὸ τοῦ θυῆν*, id est sacrificando dictum esse voluerint; eo quod primis temporibus solo thure sacrificatum fuerit;

rit; præsertim a pauperibus; unde illud postea in omnibus sacrificiis fuit adhibitum. Thus præstantissimum est, quod Sabæorum regio in Arabia sita producit. Unde Virgilius:

- - - - *Molles sua thura Sabæi.*

Item:

- - - - *Solis est thurea virga Sabæis.*

Et in alio loco:

- - - - *Centumque Sabæo*

Thure calent aræ.

Plinius l. 12. c. 14. refert, Alexandro Magno, cum magnam thuris vim sine parsonia aris inferret, Leonidem Pædagogum dixisse, ut tali modo, si Gentes thuriferas devicisset, Diis supplicaret; cui Alexander Arabia potius thure onustam navim misit, simul illum cohortans, ut large Deos adoraret. Augustus, teste Suetonio, instituit, ut Patres Curiam ingressi, priusquam sederent, thure & vino sacrificarent. Herodotus l. 1. testatur, quod Babylone in Jovis templo mille quotannis talenta thuris adolerentur. Ægyptios quoque thure ac precibus Deos suos placasse memorat Macrobius. Plinius libro vigesimo secundo cap. 24. ait: *Thure supplicamus & costo.* Laribus thure supplicari solitum ex Plautinis constat in Aulularia. Et hic frequens usus thuris in sacris causa est, cur *pinum* sit dictum, *votivum*, *sacrum*. Ovid.

A 2

--- Su-

- - - *Superis pia thura ferebat.*

Idem Eleg. 3.

*Aspicit ara preces, votivæque thura pio-
tum.*

Crinitus:

Cum Thure sacro suscipias rogo.

Imo & Arabiam sacram, quod thuris ferax sit; & eos, qui thuris vel metendi vel incidendi curam haberent, sacros ac divinos vocari & haberi, Plinius scribit, qui & alio loco ait: *Homines intelligere thurs Diis* (nimirum colendis) *esse gentium*. Quid? quod ex Ecclesiasticis constat historiis, primos olim Christianos ab Ethnicis adactos fuisse ad thurificandum Diis: hinc qui talem commisissent idololatriam, dicti sunt *Thurificati*; de quibus Cyprianus de duplici Martyrio: *Horres, inquam, abominandum Thurificati aut Libellati cognomen, ipse forte Thurificatis ac Libellatis deterior.*

Sed quid causæ, quod Gentiles odoribus & suffimentis tam frequentem in sacris usum, tantamque res quasvis purificandi, Deosque suos propitiandi vim tribuerint? Quia odores, si vis illorum & natura probe inspiciatur, res sunt maxime tenues, subtiles, ignis ac spiritus naturam habentes: proinde eos censebant Ethnici esse similiores Diis suis, quos quasi corpus & quasi sanguinem habere fabulatus est Epicu-

cu-

curus, ut Cicero testatur l. 1. de Naturæ Deorum. Certe vis odorum subtilis, ac quasi spiritualis adhuc magis patet, si cum reliquorum sensuum objectis conferatur. Verba quoque odoribus plerumque tribui solita ipsos significant flatus, halitus, ac spiritus quosdam esse; & ideo naturæ Deorum suorum sive Dæmonum, *Quos dicebant esse aëria quadam animalia*, (verba sunt S. Thomæ, 2. 2. q. 94. a. 1.) odores & suffimenta maxime convenire, & idcirco plurimum illis placere, nec minorem eos placandi vim habere existimabant.

Sed jure Lucianus in Dialogo, qui inscribitur *Prometheus*, irridet consuetudinem faciendi suffitum Diis; quasi vero ingentem iis lætitiæ fumus iste pareret, aut epulas appararet suavissimas; ubi nidor simul cum fumo volutatus in cælum usque tollitur. Pariter illudit & explodit eos Arnobius l. 7. contra Gentiles, probans alienum a ratione esse, existimare Deos honorari aut placari posse Panchaïcis, id est Arabicis resinulis &c. Addit sequentia: *Quod si contendunt Deos odorum atque nidorum hujusmodi suavitatem capi ac delectari; inde colligi potest, ipsos esse corporeos, & mortaliū similes. Sin autem, ut a sapientibus creditur, sunt incorporeales, neque odore aliquo afficiuntur, inanis apud hos odor est, nec sensibiliter commovere aura eos potis est*

A 3 2 nido-

372 *Explicatio Fabularum,*
nidoris alicujus, non si mille tu pondera
masculi thuris incendas, calumque hoc to-
tum redundantium vaporum nebulositate clu-
datur. Hucusque ille.

Objici hic posset ex Tobiae l. c. 7. potuisse fumum cordis certi cujusdam piscis supra prunas positi extricare omne genus Dæmoniorum. In Hebræo & Græco textu legitur, Dæmonem percepisse odorem, & fugisse, ita ut bene consideratis S. Scripturæ verbis videatur cordi ac fumo, ob quam nescio antipathiam, efficientia quædam hujus aversionis ac fugæ tribui debere. Serarius noster concedit cordi illi ac fumo inditam fuisse vim quandam naturalem ad fugam dæmonis; non tamen de se tantum sufficientem. Pariter dici posset oblata Dæmonibus Thymiamata, ob occultam quandam sympathiam superius insinuatam, fuisse quoddam illicium Dæmonum ac delictum. Verisimilius respondetur, nullis bonis odoribus vere pasci Dæmones; cum non sint animalia quædam aëria, ut falso Gentiles rati sunt, sed meri spiritus; nec textus Scripturæ probent naturalem Dæmonis aversionem fuisse a fumo cordis accensi. Proin dicendum, quod S. Augustin. ait: Dæmones libenter habere, ut offerantur ipsis odoramenta, *non quia nido-*
re ac fumo, sicut nonnulli vani opinantur;
sed hominum pascuntur erroribus.

Quam

L. 20. de
Civitate
Dei c. 22.

Quam iniquum & execrandum est Thymia-
mama, quod Diis incenditur, tam justum
ac sacrosanctum est, quod vero Deo præ-
paratur & offertur. Exod. c. 34. legitur,
Deum mandasse Moyfi, ut sumeret sibi a-
romata *Stacten*, & *Onycha*, galbanum bo-
ni odoris, & *thuris lucidissimum*, aqualis
ponderis omnia, faceretque *Thymia-
ma compositum opere unguentarii*. Apostolus Epist.
1. ad Timoth. c. 2. quatuor nobis assignat
species, ex quibus fieri possit *pietatis com-
positum mixtum diligenter*, & *purum*, & *san-
ctificatione dignissimum*, scilicet, obsecratio-
nes, orationes, postulationes, gratiarum a-
ctiones. Sacra hæc aromata separata, &
secundum se sumpta Deo quidem grata
sunt, sed permixta invicem thymia-
ma efficiunt *in odorem suavissimum Domino*,
modo non defuerit ignis charitatis, ut di-
rigatur oratio sicut incensum in conspectu
Dei. S. Gregorius Magnus l. 1. Moral.
c. 39. ait: *Thymia-
ma ex aromatibus com-
positum facimus, cum in altari boni operis
virtutum multiplicitate redolemus*.

Symbolice S. Basilus in c. 1. Isaïæ an-
te medium. Thymia-
ma hoc, inquit, e cor-
poris sanctimonia fit per temperantiam &
frænum rationis in corpus, quod quatuor
elementis constat. Sta-
cte ad aquam refer-
tur, thus ad aerem, onyx ad terram ob
ariditatem; galbanum ad ignem ob calo-

rem præservidum. Hæc ergo inter se contemperat & moderatur sanctimonia, quasi Thymiana sanctum.

Notandum denique, ut dæmones deletati sunt herbarum pecudumque suffitibus; ita magis Angelos recreari orationibus Sanctorum, quæ instar aromatum Deo per Angelos offeruntur, ut Apocalypsi. c. 8. dicitur: *Ascendit fumus incensorum de orationibus Sanctorum de manu Angeli coram Deo.* Et ut fumus incensi jecoris Asmodæum fugavit, ita magis oratio affligit Diabolum, cruciatque. Ait enim S. Bernard. serm. 2. de dedicat. Eccles. *Gravis nobis est inimici tentatio; sed longe gravior illi nostra oratio.* Et S. Laurentius Justinian. de orat. c. 2. *Oratio est anima sancta subsidium, Angelorum solatium, diabolo supplicium.*

O S E Æ

CAP. X. V. 5.

*Vaccas Bethaven coluerunt habitatores
Samarie.*

CUM L. Reg. 3. c. 12. legatur Jero-boam fecisse duos vitulos Samariæ aureos, & unum posuisse in Bethel, alterum
rum

rum in Dan, & hic Samariæ habitatores coluisse vaccas in Bethaven; verisimile est præter aureum vitulum vaccas quoque a Samaritis cultas fuisse: nam eodem c. 12. ante allegato dicitur, Jeroboam ascendentem altare similiter fecisse in Bethel: *ut immolaret vitulis* sive vaccis: Hæc enim duo nomina pro eadem pecude, etiam ejusdem ætatis, quandoque sumi colligi potest ex Osee. c. 9. Judic. c. 14. Vide Riberam in Osee. Vocantur autem in Scriptura Dii ab Idololatriis Judæis culti, tum vituli, tum vitulæ, & modo singulari, modo plurali numero exprimuntur: cum enim pecorum illorum capita solummodo ad adorandum fuerint proposita, non facile distingui poterat, cujus essent generis: Probabilius tamen est fuisse vitulas: sic enim habet 70. Interpretum translatio. Idem asserit Josephi historia: & cum Ægyptiacam Idololatriam imitati sint, vaccas coluisse sunt censendi. Ait enim Herodotus de Ægyptiis l. 2. *Boves faminas venerantur ex omnibus pecudibus longe plurimum*. Et hinc sub vaccis Isidem coluere. Illius enim simulacrum muliebre erat bubulis præditum cornibus; quemadmodum Græci Io describunt; & forte sub forma vituli aurei Apim sive Serapim, qui etiam (ut S. Clemens docet l. 6. Constit. Apost. c. 20. & Lact. l. 4. c. 10.) ab Israelitis in

deserto fuit adoratus. Erat hic bos corpore nigro, candida fronte, & in tergo nota alba insignis, quem certos vitæ annos excedere non licebat; atque ideo in lacum demersum, defunctumque plangebant, & alio invento mirifice lætabantur. Alexander ab Alexand. l. 6. Genial. diæ. c. 2.

Posuit autem Propheta Oseas Bethaven pro Bethel, quod idem est, ac domus Dei: sic enim locus ille dictus est a Patriarcha Jacob, ob mirabilem scalæ a terra ad cælum pertingentis visionem in somno, e quo expergefactus dixit: *Vere non est hic aliud, nisi domus Dei.* Non autem merebatur locus ille vocari Bethel, eo quod a Jero-boamo factus esset sedes idololatriæ; hinc vocare voluit Bethaven, id est, domum iniquitatis, ut vertit Theodotion, seu domus inutilis aut nihili, ut verterunt Aquila & Symmachus; quam translationem ipse probat S. Hieron. & bene cum eo congruit, quod Apostolus ait 1. Epist. ad Corinth. c. 8. *Scimus, quia nihil est idolum.*

O S E Æ

CAP. II. V. II.

*Et volabunt quasi avis ex Ægypto,
& quasi columba.*

QUomodo a servitute sua Judæi dimit-
tendi essent, per duarum avium,
Ægyptiacæ scilicet & Syriacæ similitudi-
nem Propheta voluit declarare. Per a-
vem Ægypti Ibis potest intelligi, quæ est
ciconiæ species excelso corpore, rigidis
cruribus, & procero rostro. Avis hæc ad-
eo propria est Ægypto, ut extra eam non
possit vivere; & si extra illam asportetur,
ocyssime moriatur. Æliani verba sunt :
Extra Ægyptum nunquam progreditur Ibis.
Columbas apud Assyrios in magna véné-
ratione fuisse, alibi dictum est. Symbolum
illis erat aureæ libertatis & securæ felici-
tatis. Eandem lædere aut perimere nefas
erat. *Sacrificant Assyria columba*, ait Lu-
cianus in Jove tragædo. Voluit ergo O-
seas dicere: Judæos ex captivitate reditu-
ros citissime in patriam suam, & quidem
secure, foreque, ut hostibus metus quidam
insuper incutiatur, ne malum aliquod ipsis
ulterius inferre audeant.

Mi.

Mirum sane est, quem cultum ac venerationem Gentiles iis exhibuerint animalibus, quæ utilitatem aliquam conferre hominibus solebant, quam gratitudinem referre iis bestiis conati sunt, quarum servitio Dii usi fuere. Ibis, teste Diodoro Siculo, Ægypto est utilissima ad serpentes, locustas, bruchosque delendos. Ut ait Cicero lib. 1. de nat. Deorum: *Ibes maximam vim serpentium conficiunt, aver-*

Kircher. in
classe 3.
Sphinxis
Mystagog.

tunt pestem ab Ægypto &c. Et si pennæ ejus Crocodilum tangunt, statim immortum reddunt & quasi sideratum. Eam ob causam invocantur ab ipsis Ægyptiis, nec sine metu, ne quid mali iis inferatur, coluntur. Hinc Juvenal. Satyr. 7. canit:

Quis nescit Volusi Bethynice, qualia demens

Ægyptus portenta colat? Crocodilon adorat

Pars hac, illa pavet saturam serpentibus Ibim.

Si quis Ibin, ait Herodotus, volens aut nolens occidisset, necessario morte afficiebatur. Plutarchus de illa refert sequentia: *Hac reptilia mortifera interimis, hac prima clysteris usum in se ipsa ostendit, & religiosissimi sacerdotum non alia lustrali aqua purgantur, quam de qua Ibis biberit. Præterea sacram quandam divinandi vim isti inesse censebant. Quid est quod Cylle-*

nus

nus aut Mercurius in pugna Gigantum contra Deos sub alis Ibis latuerit, ut Ovidius canit lib. 5. Metam. & ejus simulacrum sub forma Ibis in præfectura Racotis dicta ab Ægyptiis sit cultum. Apud eosdem, ut Clemens Alexand. refert lib. 5. Stromat. Ibis fuit hieroglyphicum Zodiaci: quod hæc avis illos primo induxerit in cognitionem numeri & mensuræ. Posset non sine fundamento dici avem hanc per stellare signum Zodiaci Δ delta dictum significari: talis enim figuræ situs Ægypti est, & similem dicta avis in incessu pedum & oris apertione format exprimitque. Nec quid novi esset, tam utilem avem ac necessariam ab Ethnicis in Deorum numerum relatum, & firmamento astrifero insertam esse; sic enim & Columba Assyriorum, quod Semiramidi Venerique fuerit ad servitium, inter sidera locum obtinuit. Percurre constellationum seriem, & invenies animalia cœlestia ob præstita quædam Diis aut hominibus obsequia Apotheosin esse merita. Ideo Taurus, Aries, Scorpius, Caper, Pisces &c. tam illustrem consecuti sunt stationem. Sic Cygnus, quod ad tegendum Jovis flagitium juverit, inter astra ab eodem relatus est. De quo Manilius in primo Astronomicorum:

*Proxima sors Cygni, quem calo Jupiter ipse
Impo-*

Imposuit, formam pretium, qua cepit amantem,

*Cum Deus in nivem descendit versus
olorem.*

An non dolendum summopere Gentiles volucris cæli, & bestiis terræ talem cultum ac gratitudinem rependisse, nullo habito respectu ad fontem bonorum omnium? pecudes vilissimas ob propudiosa Jovi præstita obsequia sic honoratas? Vere de iis S. Hieron. in c. 5. Osee: *Calum infamare conantur, & mercedem stupri inter astra collocare.* Hipponensis Præsul rei indignitatem non ferens jure queritur lib. 1. de conf. Euangel. Venerem tam infamem mulierem ab Ethnicis inter stellas relatam esse, & non Minervam Virginem tam pudicam. *Quid tantum mali castitas, aut quid tantum boni voluptas commeruit? ut inter astra, quæ cum Sole & Luna circumcumeunt, Venus habeat stellam, & Minerva non habeat? Pudet vero me recensere ciconias, simios, hircos, & alia his longe absurdiora, quæ nescio quomodo ex Ægypto se in calum inferuerunt. Quam abjectum cæli constellati officium est, urfos, dracones, & centauros, dæmonesque supposititios ac spurcos Deos stabulare, eorumque fabulosas libidines velut cælo dignas universo orbi celeberrimo apparatu, quasi in scena quotidie exhibere? haudqua-*

*Lucian. in
Deorum
concilio.*

quaquam Christianæ fidei, honestæque rationi videtur congruere, dæmones, bestias, probrososque homines stellis designare. Beatis potius spiritibus, virisque sanctitate conspicuis hieroglyphicum stellæ communi sacrorum interpretum sententia debetur, juxta illud Danielis: *Qui docti fuerint, fulgebunt quasi splendor firmamenti, & qui ad virtutem erudiunt multos, quasi stella in perpetuas aternitates.*

A M O S

CAP. VI. V. 10.

Et tollet eum propinquus suus, & comburet eum, ut efferat ossa de domo.

TEXTUS hic de sepultura agit, cujus varios modos, ritus ac consuetudines Gentiles habuere. Enumerat eorum aliquos Silius Italicus lib. 13. belli Punici, ita concludens:

*Cecropidæ, ob patriam Mavortis sorte
peremptos
Decrevere simul communibus urere flammis.*

Et hic mos comburendi cadavera fuit antiquissimus, ut ex Cicerone constat lib. 2. de legibus; item ex notis Scholiastis in lib.

lib. 4. Iliad. Homeri ad versum illum, quo Minerva Pindarum impellit ad fœderis violationem; & ex pervetustis monumentis, in quibus ingentes urnæ erant, & vasa fictilia corporum crematorum cineres continentia. Antequam vero corpus aliquod cremaretur, pyra extruebatur ex lignorum feralium congerie; hæc si arde-
re cœpisset, Rogus vocabatur; quod tunc Manes rogari solerent; Bustum vero, cum jam exustum esset, quasi beneustum. Ritus qui præterea adhibebantur, accurate descriptos habe ex Virgilio lib. 6. de funere Miseni.

*Nec minus interea Misenum in litore
Tœncræ*

*Flebant, & cineri ingrato suprema fe-
rebant.*

*Principio pinguem tædis, & robore se-
cto*

*Ingentem struxere pyram; cui frondibus
atris*

*Intexunt latera, & ferales ante cupressos
Constituant, decorantque super fulgenti-
bus armis.*

*Pars calidos latices, & abena undantia
flammi*

*Expediunt, corpusque lavant frigentis,
& unguunt.*

*Fit gemitus; tum membra toro defleta
reponunt,*

Pur-

Purpureasque super vestes, velamina
nota

Conjiciunt; pars ingenti subiere feretro,
Triste ministerium, & subjectam, more
parentum,

Aversi tenere facem, congesta creman-
tur

Thurea dona, dapes, fuso crateres olivo.
Postquam collapsi cineres, & flamma
quievit,

Reliquias vino, & bibulam lavere fa-
villam,

Ossaque lecta cado texit Chorineus abeno.
Qua vero ratione a sceminis ossa prius
colligerentur, Tibullus meminit lib. 3. e-
leg. 20.

- - - Ossa

Incincta nigra candida veste legant.

Causa Ethnicis non una erat comburendi
defunctorum corpora. Servius in l. 11.
Æneid. ait: *Heraclitus, qui vult omnia
igne constare, sustinet, debere corpora in
ignem resolvi; Thales vero, qui sustinet,
omnia ex humore procreari, dicit obruenda
corpora, ut humore resolvi possint.* Idem
Servius in lib. 3. Æneid. ait, Romanos
ideo combussisse corpora, *ut statim anima
in generalitatem, id est, in naturam suam
rediret.* Forte aeriam quandam substan-
tiam esse putabant animam hominis. Sic
Ovidius L. 1. Trist. eleg. 4. ait:

Spi-

*Spiritus hic vacuas prius extenuandus in
auras*

Ibit, & in tepido deferet ossa rogo.

Et Silius Italicus l. 10. in funere Pauli:

*Hac Lybis atque recens crepitantibus un-
dique flammis*

*Æthereas anima exultans evasit in au-
ras.*

Quintilianus declamatione decima aliam dat causam: *Dixerunt animam flammei vigoris, impetum, perennitatemque non ex nostro igne sumentem, sed quo sidera volant, & quo sacri torquentur axes, inde venire ortum; unde omnium rerum Authorem parentemque spiritum ducimus, nec interire, nec solvi, nec ullo mortalitatis affici fato; sed quoties humani pectoris carcerem effregerit, & exonerata membris mortalibus levi se igne lustraverit, petere sedes inter astra.*

Videntur Judæi in Idololatriam lapsi, & hunc morem comburendi defunctorum corpora ab ipsis Gentibus didicisse; minatur autem illis Deus in præsentī textu extremam vastitatem & ruinam; ita ut ne unus quidem e decem viris in una domo commorantibus evasurus sit, nec alias habituri reliquias, quam ossa combustorum a propinquis e domo efferenda.

Christianis in more positum est defunctorum corpora non comburere; sed ter-
ræ man-

ræ mandare. Hic sepeliendi modus magis videtur congruere primæ ab Authore Naturæ latæ sententiæ: *Pulvis es, & in pulverem reverteris*. Quid opus est violenter destruere, quod ipso Naturæ ductu in sua paulatim principia resolvitur? Nec inconueniens, ut Tellus, ex qua tanquam matris alvo corpora primum educta sunt, mortua eadem recipiat, in se convertat, & instar Saturni, quod semel genuit, subinde idem devoret & conficiat. S. Thomas 4. Sentent. dist. 15. q. 2. art. 3. ait: quod humatio corporum Christianis fidem & spem resurrectionis ingerat; committitur enim terræ corpus, quasi depositum; sed extremo Judicii die restituendum. Et, ut sperantur germina & flores, dum putrescunt semina; ita spes est, ut, dum corpus *seminatur in corruptione, surgat in incorruptione*. Ep. 1. ad Corinth. cap. 15. vers. 43.

A M O S

C A P. VIII. V. 14.

*Qui jurant in delicto Samaria, & dicunt:
Vivit via Bersabea.*

IN sensu literali communior explicatio per delictum illud intelligit vitulum collocatum a Jeroboam filio Nadab in Dan; quæ ex eo confirmatur, quod sequitur: *& dicunt, vivit Deus tuus Dan.* De juramento Gentilium per Deos suos alibi actum est.

In sensu allegorico ait hic S. Hieronymus de delicto Samariæ, quam in persona hæreticorum semper accipimus, dicente hoc eodem Propheta: *Væ, qui despiciunt Sion, & confidunt in monte Samaria.* Despiciunt enim Hæretici Ecclesiam Dei, & confidunt in falsitate dogmatum suorum, erigentes se contra scientiam Dei, & scisso populo ejus dicentes; *Non est pars nobis in David, neque hereditas in filio Isai.* Si quis ergo jurat in delicto Samariæ, & dicit, *vivit Deus tuus Dan*, & *vivit via Bersabeæ*, iste cadet, & resurgere ultra non poterit.

In sensu tropologico jurant in delicto
Sa-

Samariæ, qui per ipsa etiam perjuriam student fideles esse Mammonæ filii, per fas & nefas fastuosi & nefarii Plutonis subditi: hi sunt qui adorant vitulum aureum non sine sui, proximi, Deique injuria. Vere nihil iniquius, quam amare pecuniam. Sed Christicola non est Nummicola.

Petrus Damianus ep.
12. c. 8.

Via Bersabeam versus, & ipsa Bersabea in magna veneratione erat Judæis ob memoriam Patriarchæ Abraham, qui locum illum suis olim precibus consecravit. Nam Genes. 21. de eodem dicitur: *Plantavit nemus in Bersabee, & invocavit nomen Domini Dei æterni*. Sed Jeroboami tempore locus iste in via profanatus est cultu idolorum. Verisimile est enim non tantum in Bersabee idolum fuisse positum; sed etiam in via, quæ illuc ducebat; ut colligi potest ex cap. 23. Lib. Reg. 4. in quo dicitur de Josia: *Contaminavit excelsa, ubi sacrificabant Sacerdotes de Gabaa usque Bersabee*. Ad hanc urbem Idolatriæ sedem peregrinationes solebant Hebræi suscipere, via quidem illa multis longa, difficili, & periculosa, attamen in Deorum honorem frequentari solita; hinc sacra iis visa est, adeo ut jurisjurandi loco dicerent: *Vivit via Bersabea*: floreat, teratur, frequentetur. Et sicut viæ desertæ ac inhospitæ quasi mortuæ habentur ac lugentes, ut Thren. c. 1. v. 4. *Via Sion*

ludent, eo quod non sint, qui veniant ad solennitatem; Ita viæ ob affluxum frequentem hominum, & motus pedum continuos dicuntur vivere; ut argentum vivum, aqua viva &c. Sed Deus minatur præsentī capite iis omnibus, qui hac iurandi formula uterentur: *Vivit via Bersabea: cadent, & non resurgent*. Apud Catholicos vivunt viæ ad loca mysteriis Fidei Christianæ nobilia, & Sanctorum Reliquiis celebria; vivere autem vias illas ad ejusmodi loca faciunt peregrinationes fidelium. S. Hieron. Epist. 27. de obitu Paulæ inquit: *Cujus gentis homines ad loca sancta non veniunt?* Vide Prudentium in hymno de SS. Hemetrio & Chelidonio. S. Paulinus natal. 3. de S. Felice turbas innumeras ex locis etiam remotis ad Corpus S. Felicis peregrinari solitas describit pluribus versibus:

Nec modus est populis coeuntibus agmine denso,

Nec requies, properant in lucem a nocte, diemque &c.

Vincit iter durum pietas, amor omnia Christi

Vincit, & alma fides &c.

M I C H E Æ

C A P. V. V. 13.

Evellam Lucos de medio tui :

LUcum locum esse arboribus constitum , extra controversiam est . Dubitant vero viri doctrina clarissimi , unde suam Lucus trahat originem ? an a luceo ? vel , luce careo . Isidorus lib. 14. cap. 8. de etymo Luci ait : *Potest & a collucendo crebris luminibus dici , qua ibi propter religionem Gentilium cultumque fiebant .* Insinuat idem Prudentius lib. 2. in Symmachum :

*Et que fumificas arbor vittata lucernas
Servabat , cadit ultrici succisa bipenni .*

Accedit , quod Heroum & piorum animæ apud priscos sua plerumque in Lucis habuerint monumenta : de quibus Plato lib. 12. de legib. *Lucum arborum in circumis plantant .* Et Cicero in Orat. pro Milone Lucos & tumulos conjungit . Idem colligere licet ex Lib. 1. Reg. cap. 31. vers. 31. & Lib. Reg. 4. c. 24. vers. 15. & 16. Constat autem ejusmodi monumentis appositæ aut impositæ fuisse lucernas , ut ferunt , perpetuo ardentes . An ab his luminibus , vel ab ignibus , qui religionis

B b 3 & sa.

& sacrificii causa in illis locis sæpius apparebant, Lucus dictus sit, incertum est. Alii volunt Lucum per antiphrasin sic esse nominatum; cum revera locus fuerit obscurus & tenebrosus. Sic enim canunt

1. Virgilius;

---- *Lucis habitamus opacis.*

Secundo Lucanus:

Sylva capax avi, validaque incurva senecta

Æternum intonsa frondis stat pervia nullis Solibus.

Tertio Papinius Latinus, qui præclare nobis Lucum Diis sacrum, & quid in eodem fuerit, ita describit;

Lucus erat longo nunquam violatus ab ævo,

*Obscurum cingens connexis æra ramis,
Et gelidas alte summotis solibus umbras.
Illis & volucres metnunt insistere ramis,
Et lustris recubare fera; nec ventus in illas*

Incubuit sylvas, excussa que nubibus atris Fulgura, non ullis frondem præbentibus auris.

Arboribus suus horror inest, tum plurima nigris

Fontibus unda cadit, simulacraque moesta Deorum

Arte carent, casisque extant informia truncis.

Ipse

Ipse suus, patrique facit jam robore pal-
lor

Attonitos.

Subscribit Poetis Quintilianus, qui L. 1. afferit Lucos esse dictos, quoniam, cum nullæ illic arbores propter religionem cæderentur, opaci essent, & sine luce. Erant igitur Luci apud Gentiles Diis consecrati. Primus Lucos & ædes Numinibus consecrassè Faunus dicitur, a quo Fana nominata, ut Probus ait. Servius notavit in Virgilio, quod ipse nunquam posuerit Lucum sine religione, & quem non aliqua consecuta sit consecratio. Hinc Virgilius *Lucos* nominat *sacratos*. Confirmat idem Valla lib. 4. ubi ait: *Lucus nequam caduus est, quin potius manu confitus religiosusque, atque vel alicui Deo, vel alicujus hominis cineribus consecratus*. Erat hæc fanatica & satanica Ethnicorum persuasio, ut, ubi saltum aliquem vetustis densisque arboribus confitum invenirent, illi Numen aliquod inesse crederent. Sic Ovid. lib. 3. Fastor. de Fauni Luco ait:

Lucus Aventino suberat, niger ilicis um-
bra,

Quo possis viso dicere, Numen inest.

Apte in hanc rem Romanus Sapiens Epist. 41. Si tibi occurrerit vetustis arboribus; & solitam alitudinem egressis frequens lucus, & conspectum cæli densitate ramo-

rum aliorum alios protegentium summo-
vens; illa proceritas sylva, & secretum lo-
ci, & admiratio umbra in aperto tam den-
sa atque continua fidem tibi Numinis fa-
cit. Imo arbores & sylvas fuisse Gentili-
bus instar Numinum, Plinius testatur l. 2.
cap. 2. Tempia scilicet prisco ritu simpli-
cia, & non magis auro fulgentia atque
ebore simulacra, quam lucos, & in iis
silentia ipsa fuisse adorata. Suffragatur
Plinio Quintilianus: *Sacros ex vetustate
Lucos adoramus, in quibus grandia & an-
tiqua robora jam non tantam habent cultu-
ram, quantam religionem.* Hinc quæ in
Lucis decreta erant, sanctiora ob loci re-
ligionem habebantur. Vix ullus erat Deo-
rum aut Dearum, qui non haberet Lu-
cum & arborem hominibus venerabilem.
Meminit stultæ hujus venerationis S. Au-
gustinus serm. 241. de tempore: *Quicun-
que in agro, aut villa, aut juxta villam ali-
quas arbores, aut aras, vel qualibet fana ha-
buerit, ubi miseri homines solent aliqua vo-
ta reddere.*

Benedictus Curtius Symphorianus plures
Lucos enumerat, qui olim Jovi, Junoni,
Minervæ, Isidi, Cybelæ, Osiridi, Æscu-
lapiο, Dianæ, Apollini, Vulcano, Vene-
ri, Cupidini, Bellonæ, Libero Patri,
Sylvano, Aricini omnium maximo &c.
fuerunt consecrati. Non prætereundi sunt
nobis

nobis hic ii Luci & arbores, quæ præsci olim Germani Dii suis dicarunt, eisdemque in iis coluerunt, ut Tacitus refert in Annalibus suis, & in libro de moribus Germanorum. Ex Ernesto Brotusio scribit Petrus Albinus l. 1. cap. 6. quod civitas Merspurgenfis (quasi Martis-Berg) antiquitus ad Caroli usque Magni tempora Martem atque Zuttiberum (quem Græci Dendrodæmona, Germani Holsß-Teuffel appellarunt) coluerit in querceto, seu Lucu quernis arboribus confito, ad quem certis temporibus, sacra ei faciendi gratia, maxima hominum multitudo confluerit. Hujusmodi autem sylvas, Lucosque sacros (in quibus & equos sacros aiebant, e quibus de futuris divinarent) Hagen appellarunt, a nomine Græco ἄγος, ut nonnulli censent: erant enim sacrosancti, in quibus arbores cædere, aut earum ramos amputare capitis supplicio erat interdictum. Cum vero antiquitus ad lucos hujusmodi confluerent quamplurimi homines ex locis etiam remotissimis; hinc peregrinatio Germanis Wall, quasi Waldfarth, id est profectio ad sylvam dicta est.

Notandum porro, Lucos non solum Diis consecratos; sed etiam nominibus eorum fuisse insignitos. Sic Ovid. lib. 2. Fastor. ait:

*Monte sub Esquilio multis incadens annis
Juno-*

Junonis magna nomine Lucus erat.

Apud Justinum & Plutarchum legere est de Luco Martis, in quo Mars Iliæ Vestali virgini fertur vim intulisse, ne rei, scilicet tam præclaræ, memoria interiret. Fuit & Martis Lucus apud Colchos, cujus meminit Juvenalis Satyr. 1. Verisimile quoque est, Lucos iis arboribus fuisse constitos, quæ certis Diis sacræ erant. Constat de Daphne nemore Laurifero prope Antiochiam Apollini sacro, & querceto Jovi Dodonæo. Lucus Belo consecratus videtur fuisse salicetum in medio Babylonis prope Euphratem, qui eandem urbem interfluit; & eodem forte spectat illud Psalmi 137. *In salicibus, in medio ejus suspendimus organa nostra.* Philo lib. de Monarchia indicat, tum ex frugiferis, tum ex sylvestribus constitisse Lucos. Erant apud Hebræos Idololatræ illæ arbores & in usu, & in pretio, quarum Oseas meminit cap. 4. *Subtus quercum, & populum, & terebinthum, quia bona umbra ejus.*

Dici interim vix potest, quanta apud Ethnicos fuerit Lucorum veneratio: erant Asylum reorum, ut ex Libris Machabæorum constat de Luco Daphnitico. Virgil. lib. 8. *Æneid.*

--- *Hunc Lucum, quem Romulus acer
asylum.*

Et

Et Ovidius l. Faltor.

*Romulus ut saxo Lucum circumdedit alto ,
Quilibet huç , dixit , confuge , tuus
eris .*

Præterea , nec in ipsa necessitate per Lucos invios fas erat meare . Nec uti iis licebat ad venationem , aut eorum animalia occidere , nisi sacrificii & Numinum gratia . Nefas erat non mediocre , loca ejusmodi profanare ; hinc capitalis pœna in sacrilegos profanatores statuebatur , & expiandum erat violatoris caput . Horatius Jovem ipsum canit Lucorum hyperaspistæ & vindicem : *Tu parum castis inimica mit-
tis fulmina Lucis* . Diana fertur aerem pestilentia infecisse ob Lucum in Aulide ab Agamemnone violatum ; nec prius lues sedata fuit , quam Iphigenia Agamemnonis filia immolaretur . Auxere hanc Lucorum religionem prodigia & portenta , quæ circa arbores dæmonum fraudulentia contigerunt . Apud Græcos Aristander volumen de iis conscripsit . Apud Latinos C. Epidius commentarios , in quibus multæ arbores locutæ reperiuntur ; aliæ feruntur amputatæ subito germinasse ; virentes illico aruisse ; ligna vetera excisa floruisse &c. Quid ? quod oracula Deorum & responsa ex arboribus Gentiles acceperint . Nihil notius Dodonæa quercu , de qua Homerus Odyss. 3.

Dodo-

396 *Explicatio Fabularum,*
Dodonamque ferunt illum mox esse pro-
fectum;

Consilium Jovis e quercu captaret ut
alta.

Tibull. l. 2. Eleg. 5.

Atque tubas atque arma ferunt strepitan-
tia cælo

Audita, & lucos pracinuisse fugam.

Ovid. 15. Metam.

--- *Cantusque feruntur*

Auditi, sanctis & verba minacia Lu-
cis.

Virgil.

Vox quoque per Lucos vulgo exaudita si-
lentes

Ingens, & simulacra modis pallentia mi-
ris

Visa sub obscurum noctis.

Sed quid causæ, quod in Lucis coli Dæ-
mon voluerit? 1. est: quia veræ religionis
est Simius. Adverterat sacrosanctum ve-
ri & unius Dei cultum a Patriarchis olim
in lucis, arboretis, locisque ad silentium
& vacandum Deo opportunis solere fieri.
Abraham enim, ut locum invocando Nu-
mini haberet commodum, nemus plantas-
se legitur in Bersabee.

Cajetanus ait, fuisse nemus illud tan-
quam templum & oratorium tam Abrahæ,
quam aliis verum Deum colentibus. Isaac
Genes. 24. legitur egressus ad meditandum
in

in agro. Videtur Jacobo fuisse sacra quercus illa, sub qua Deus illi (ut ex textu potest colligi) apparuit. De Josue autem *Josue c. 24.* dicitur, quod *tulerit lapidem pragrādem, & posuerit eum subter quercum, quæ erat in sanctuario Domini*; ubi vides, infert *L. 5. de rebus Salom. c. 8.* Pineda noster, quercum, aut quercetum esse sacrum Deo & sanctuarium. Quare & diabolus loca similia sacris suis voluit destinari. Secunda causa est; quia non poterat aptiora tegendis suis fraudibus atque nequitiiis loca eligere, & cultoribus suis præscribere, quam Lucos. Hinc forsan malignus ille spiritus persuasit Persarum Magis, destruenda esse templa Diis posita, sub hoc specioso titulo, quod a ratione & pietate alienum videretur, Deos cæli terræque dominos templorum parietibus includere. Sed ipse eadem, velut minus idonea illudendis hominibus videtur respuisse: quanquam non improbarit alias, imo placere sibi significarit, ut in Lucis delubra, Deorum fana, ac sacella erigerentur; atque ita quasi duplici velo lucorum & fanorum sacra sua abominanda magis tegerentur.

Ex dictis patet, quam in præsentī versu iusta fuerit Dei comminatio: *Evellam Lucos de medio tui.* Quanquam alias Judæis mandarit, ut Lucos Gentilium excinderent, comburerent & loca ejusmodi sacri-

sacrilega penitus everterent ac profanarent. Vetuit illis præterea in Deuteronomio, ne plantarent sibi Lucum ex ullis arboribus juxta altare Domini. Hinc Jeroboamum, aliosque Judæorum Reges corripuisse Deus legitur, & puniisse, quod vel Lucorum religionem amplexi sint, vel non sustulerint. E contra laudem immortalem est promeritus Rex Josias; quod contriverit statuas, Lucos succiderit, & repleverit loca eorum ossibus mortuorum.

Ad Eph. cap. 5. Lucos cum Josia odio habent & succidunt, qui non *communicant operibus infructuosis tenebrarum, sed ut filii lucis ambulant in omni bonitate & justitia & veritate.* Hi manifestari opera sua non refugiunt in ædificationem proximi. E contra *omnis, qui male agit, odit lucem, lucos quærit, & loca tegendis suis sceleribus idonea, ut non arguantur opera ejus, quæ tamen olim patebunt omnibus in conspectu cæli & terræ, non sine summa confusione & ignominia.*

H A B A C U C

CAP. I. V. 16.

Propterea immolabit sagena sua , & sacrificabit reti suo .

Videtur Metonymia hic esse , & poni continens pro contento , scilicet sagena & rete pro piscibus ; cujusmodi est illud apud Virgilium : *Nunc pateras libate Jovi* , id est , vinum , quod in pateris continetur . Refert igitur hic Propheta , & explodit absurdissimam Syrorum superstitionem , quod Nabuchodonosor pro triumphis reportatis captisque Judæis Derceti relaturus sit in acceptis victoriam , & piscibus sacrificium oblaturus , qui non solum vincendi & capiendi vim præstare ei non potuerunt ; sed ne se ipsos quidem valent defendere , quin ab ipso , aut quovis alio , quotiescunque libuerit , reti ac sagena capiuntur .

Causa pisces ut Deos colendi assignatur non una . Hyginus ex Diogeneto hanc fuisse occasionem scribit : quod Venus tunc cum Cupidine filio suo in Syriam ad Euphratem venerit , ibidemque Gigas Typhon apparuerit , quo viso sic exterrita fuit

fuit Dea, ut in fluvium se cum filio projecerit, & sic piscium formam induta periculum evaserit. Ob id factum ab esu piscium Syri abstinere, cum Deos capere vereantur, aut eorum præsidia impugnare. Aliam causam vide relatam L. Reg. 1. cap. 5. Nigidius narrat, a piscibus servatum fuisse ovum quoddam, ex quo Venus Syria postmodum fuerit prognata, Jovem vero gratitudinis loco pisces inter duodecim signa Zodiaci collocasse, ideoque Syros ab esu piscium abstinuisse; quanquam alii abstinentiam illam in honorem Rheæ institutam fuisse putent; cum Dea hæc sit credita pluviis potissimum præsidere: *πέα* enim græce *fluo* significat; & cum putarent Assyrii ex aere & aqua naturas rerum constare, pro unda ipsos pisces coluere. Vide dicta Deuter. cap. 4. Quamvis autem Chaldæi alios Deos colerent, piscium tamen præ aliis Propheta meminit, ut eo majorem in hominibus excitaret aversionem, quo stolidiorem eorum superstitionem esse cognoscerent: tum ut crederent Judæi, permisisse Deum ut subjugarentur non in gratiam Nabuchodonosoris Idololatræ; sed tantum ut populum sibi peculiarem corripere, ac emendaret.

H A B A C U C

CAP. II. V. 18.

Ut facerent simulacra muta.

QUæri hic posset, qua ratione simulacra dicantur muta, cum legantur in historiis sæpius esse locuta, & edidisse oracula. Lætantius l. 2. Divin. instit. c. 8. *Illud etiam mirabile, quod simulacrum Fortunæ Muliebris non semel locutum esse traditur.* Confirmat idem Dion. Halicarnasæus, impium scilicet & irreligiosum esse, si quis Fortunæ simulacrum locutum fuisse non credat; verba etiam refert ab eodem prolata: cum enim ex Senatus consulto publice locutum esset Dæ templum, atque simulacrum, seorsim ex collatitia matronarum pecunia alia effigies locata fuit; cumque utraque consecraretur, eo ipso die dedicationis, ea, quæ mulierum sumptu parata fuerat, Latine locuta fertur in mulierum præsentia, voce clara & disertâ: *Rite me matronæ dedicastis*; & cum quidam ex populo dubitarent, majore voce iterum totidem verba a simulacro fuisse repetita. Certe S. Augustinus in L. de Civit. Dei Fortunæ Muliebris simulacrum locutum es-

se non abnuit, & loqui potuisse facile concedit: ait enim: *Quod quidem, si verum sit, mirari nos non oportet: non enim malignis demonibus etiam sic difficile est fallere.* Refert Valerius Max. l. 1. sub tit. de miracul. Milites, captis a Furio Camillo Vejis, jussu Imperatoris simulacrum Junonis Monetæ, quod ibi præcipua religione cultum erat, in Urbem translaturus, sede sua movere conatos esse, quorum ab uno per jocum interrogata Dea, an Romam migrare vellet? *velle se*, respondit, & hac voce audita Iusum in admirationem versum esse. Idem narrat Lætantius l. 2. c. 18. Suidas tradit, quod Dodonæ, ubi Jupiter colebatur, quercus fuerit una cum oraculo mulierum fatidicarum, consultoribus autem accedentibus movebatur, scilicet quercus, & resonabat: dæmonum enim voces inarticulatæ sunt; illæ vero, fatidicæ nempe, dicebant: *hac ait Jupiter.* Alexander Magnus in epistola quadam ad Philosophum data de rebus Indiæ mirabilibus scribit: Arbores duas Soli & Lunæ sacratas, Indice & Græce fuisse locutas, & de his, quæ consultare tacite cogitarat apud se, certa & aperta protulisse responsa. Philostratus quoque meminit, in summis finibus Thebanorum ulmum, a Thespasio incantatam, Apollonio fuisse locutam voce articulata, ac muliebri. Cyrillus l. 3. con-

3. contra Julianum ait : fluvium Cauſum Pythagoram , ſalve Pythagora , ſalutaſſe . In Inſulis Fortunatis , quas Canarias vocant , priuſquam in ditionem Chriſtianam venirent , damones in Idolis aperte loquebantur populo , & ſe jubebant coli ac adorari . Verba ſunt Joannis Ludovici Vives . Addit Joſephus Acoſta , & pro certo conſtare teſtatur in rerum Indicarum hiſtoria , ipſamet ſimulacra apud Indos de quæſitis oracula reddidiſſe . Denique Euripides in Iphigenia , Dianæ ſimulacrum locutum fuiſſe in Tauris memoriæ prodidit :

Sed quod delapſum fuit e calo , Jovis filia

Simulacrum , navi o media ſonuit

Clamorem quendam : O terra Gracia nante , navis

Incumbite remis , & fluctus verrite .

Fuerunt , qui idola unquam locuta eſſe negarunt . Titus Livius fabulam fuiſſe cenſuit ſimulacrum Reginæ Junonis locutum eſſe . Plutarchus in Coriolano inquit : arduum eſſe , & ègre credi , ſimulacrum Fortune vocem articulatam edidiſſe . Ut ipſa Gentilium Numina , ſic & Oracula eorum irriſit Lucianus . Benediſtus Arias Montanus negat unquam locuta fuiſſe idola , & loqui potuiſſe ; non quod dæmon id facere non poſſet ; ſed quod Deus idem fieri nunquam permiferit . Sed cum alia in ſpeciem

miranda ope dæmonum fieri Deus non prohibuerit, non absolute videtur negandum, locutionem ejusmodi factam esse. Vocat igitur Scriptura, & Habacuc Propheta muta simulacra, quod lapides, ligna, & metalla, quibus constabant, suapte natura omnis vocis sint expertia. Confirmari illud ex eo potest, quod sequitur: *Omnis spiritus non est in visceribus eorum*; sive, nullus est in eis spiritus, nulla anima, quæ informet, ac vivificet; fuerunt proinde lignorum voces aut lapidum ministerio dæmonum effectæ.

In sensu tropologico simulacra muta sunt ii omnes, qui ex officio tenentur quidem monere alios vel corripere, sed metu aut spe impediti, silent, quæ dici oporteret. Quorum silentium suo tempore mutabitur in ejulatum, quem dudum Jeremias incepit: *Va mihi, quia tæui*.

S O P H O N I Æ

C A P. I. V. 4.

Disperdam reliquias Baal, nomina adituum cum Sacerdotibus.

Fuerunt ex Hebræorum Regibus, qui pro laudabili zelo Religionis suæ supersti-

stitiosum Idolorum cultum abolere conati sunt ; sed non semper omnem ita , quin reliquæ saltem aliquæ non superfuerint . Tales erant Excelsa , in quibus populus adhuc sacrificabat : hinc , quamvis de variis Regibus legatur in Libris Regum , quod rectum fecerint coram Domino , tamen subjungitur , *veruntamen Excelsa non abstulit* . Meminit Propheta in præsentī Capite tribus Juda , & eorum , qui habitabant in Jerusalem : quamvis enim Deus omnem Idololatriæ cultum abominatus semper fuerit in Gentilibus , & magis in decem tribubus , quæ Jeroboami partes secutæ sunt , maxime tamen apprehendit , cultum illum a tribu Juda in civitate sua Jerusalem exerceri , ita ut per Sophoniam hic minetur , omnem a se idololatriam adeo delendam , ut nullæ de aris & focis , de lucis & fanis , de sacrificiis , sacerdotibus & excelsis superfuturæ sint . Ejusmodi reliquias inter conversos Gentiles subinde invenire fuit in primitiva Ecclesia , quæ tamen successu temporis penitus sublatae sunt , vel in meliores ritus commutatae . Septuaginta legunt : *Disperdam nomina Baalim* , quod interpretatur , *in sublimioribus* , ait hic juxta anagogen S. Hieronymus : *Auferet autem Dominus nomina vana gloria , & admirationis falsa , quæ versantur in Ecclesia* . Nec aliæ erunt horum

406 *Explicatio Fabularum*,
nominum reliquæ, quam ignominia &
confusiones perpetuæ.

Nomina adituorum cum Sacerdotibus.
Æditui ministri erant Templi Baal: a verbo ædituor nomen provenit, quasi ædem tueor; hinc æditui, quasi sacrae ædis tutores; quorum officium erat, custodire templum, aperire, claudere, purgare, ornare, advenas docere ceremonias, & cultum Baal, oblationes excipere, choros canentium & choreas saltantium adornare, imo præire more furentium & bacchantium. Hinc S. Hieronymus Hebraicum nomen *Kemarim* vertit *fanaticos*, quasi enthusiasmo actos, & dæmonis spiritu afflatos. Alii dicunt *Kemarim* idem significare, quod *accensores ignis & thuris*; a radice *Kamar*, id est, *accendit*, *ussit*, ita ut videantur Gentiles æditui fuisse quasi Diaconi subservientes sacerdoti victimam mactanti & offerenti. Mariana, & Vatablus censent dictos esse *Kemorim*, quasi *exussos* vel *atros*, a pullo vestitu. Hinc Pagninus vertit, *qui nigras induunt vestes*. Sed non sufficienter videtur probari ex dicto verbo exustionem vel nigredinem vestibus convenire, cum magis constet Gentilium sacerdotes, uti Hebræorum, albis tunicis fuisse indutos; quemadmodum sacerdotes Ægyptii, qui hinc *linigeri* dicti sunt, & in sacris Deæ Eleusinae sacerdotes albis amictos fuisse Tertul-

tullianus testatur l. de pallio. Proin prior versio verisimilior est; scilicet quod per Kemarim intelligantur accensores ignis & thuris, qui simul ignem illum debebant conservare. Sic Custodes Ignis Romæ erant Vestales virgines, in Cappadocia Magi dicti Pyreti, qui ignem servabant & fovebant, ne extingueretur, cum certis precibus & ceremoniis, uti docet Strabo l. 15. Videntur itaque hi æditui simii ædituorum, quos Deus jusserat custodire diu noctuque ignem illum, quo comburendæ erant victimæ, Levit. 6. v. 12. & per dies singulos tam mane quam vesperi Thymia-
ma erat incendendum, Deoque adolen-
dum.

Habebat quoque ædituos suos & Cory-
bantes Cybele Deorum mater: habebat ministrum suum Dionysius in Orgiis, furen-
tium more bacchantes; habebat linigeros suos Ilis Ægyptiorum Dea, tam scæda in
sacris operantes, ut sacerdotum operan-
tium, & ipsorum operum nomina jugi ob-
livione mererentur deleri; cumque infanda
Gentilium flagitia Judæi imitarentur, hic
per Prophetam suum minatur Deus, se
saltem in tribu Juda, & in urbe Jerusa-
lem non solum idololatriam, sed ipsa ido-
lolarum & ædituorum nomina extinctu-
rum.

Conatur etiam Christi Ecclesia Dei e-

xemplo omnem idolorum cultum extingue-
 re, & nomina Baal disperdere: hinc non
 solum festa falforum Deorum & nomina
 abolevit; sed etiam veri Dei, & Sancto-
 rum festa & nomina substituit. Verba
 Theodoreti sunt: *Pro Pandiis, & Diasiis,*
& Dionysii, hoc est, Jovis Liberique Pa-
tris solennitatibus, Petro, Paulo, Thoma,
Sergio, Marcello, Leontio, Antonio, Mau-
ritio, aliisque sanctis Martyribus solennita-
tes populi epulo peraguntur. Gaudet pari-
 ter & desiderat, dies Hebdomadæ non
 Martis, Jovis, & Veneris, sed potius fe-
 riarum nomine appellari: & hic usus sic
 nominandi dies modo Tertulliani tempo-
 re receptus videtur, quo discerent Chri-
 stiani cum abolitione Gentilium nominum
 ab omni pariter flagitioso opere feriari.
 Triduum præcedens Quadragesimam non
 Bacchanalia, sed Antecinerale dies no-
 minat Ecclesia. Bonifacius Pontifex, ubi
 a Phoca Imperatore impetravit Pantheon
 Jovi Vindici consecratum, ut ejusdem no-
 minis cultusque interiret memoria, tem-
 plum illud in honorem Dei Genitricis
 Mariæ, & omnium SS. Martyrum con-
 secravit. Sic Gelasius Papa festivitatem
 mensis Februarii a Februo, id est, Pluto-
 ne sic dictam, & solennitatem Luperca-
 lium in festum Hypapantis sive occursum
 Domini, & Purificationis B. V. Mariæ
 com-

commutavit. Multa certe in Germania loca sunt S. Michaeli sacra, & hæc olim a cultu Martis credibile est nomen suum obtinuisse. In ipsa Ubiorum civitate adhuc platea Martis invenitur, & in eadem sacellum S. Michaelis nomini dedicatum. Sic reliquias Baal, sic ædituorum ac Deorum Gentilium nomina disperdere conati sunt Fideles Christiani, quos laudabili studio æmulatus est Julius Scalerus Augustanus, non ferens stellas animalium abjectorum, Deorumque nominibus insigniri. Quare novam composuit Uranometriam, & obductis Gentilium scditatibus, stellatum cælum mysteriorum Christianæ Religionis, Sanctarumque ac Deo amabilium personarum memoria insigni conatu illustravit, Conditorique suo postliminio quasi restituit. Antiqua signa, qualia sunt Aries, Taurus, Gemini &c. aboleri prorsus voluit, ac ne nominari quidem, & nova Apostolorum signa sive hieroglyphica supposuit, sequenti bimetro expressa:

*Clavis, crux major, baculus, scyphus,
hæsta, fudesque,
Cruæ, culterque, bipennis, serra, &
clava, securis &c.*

In sensu tropologico Dæmonum æditui sunt omnes impii, præsertim luxuriosi, quos adeo averſatus est Apostolus, ut eorum opera, & operum nomina Fidelibus
quasi

410 *Explicatio Fabularum,*
quasi barbara ac peregrina esse cuperet .
Fornicatio & omnis immunditia - nec nomi-
netur in vobis, sicut decet Sanctos.

S O P H O N I Æ

CAP. III. V. 4.

Propheta ejus vesani.

Quo tempore Deus inter Israelitas oracula reddebat, & Vaticinia per Prophetas suos; Satan operum Dei æmulus & imitator responsa quoque hominibus dare conatus est in templis & idolis, quæ jam sibi erigi ubique curaverat, illudebatque miseris mortalibus, mentes eorum falsis fascians miraculis & Prophetiis; ut ad cultum suum magis illos alliceret. Sed jure in præsentī Capite a Deo per Prophetam redarguuntur Gentilium Prophetæ, aut eos imitantes Judæi, quod vesani essent, a spiritu diabolico agitati. Ab Aquila dicuntur enthusiasmo correpti, & furore fanatico perciti. A Septuaginta πνευματοφόροι, id est spiritum ferentes, active, vel potius passive πνευματόφοροι, spiritu acti, non alio certe, quam dæmoniaco, ut S. Ambros. ait in Epist. ad Corinth. cap. 2. *Spiritus mundi hic est, per quem*
cor.

corripiuntur fanatici, qui sine Deo sunt :
 est enim inter mundanos spiritus potior,
 unde solent conjecturis, quæ mundi sunt,
 divinare, quem Pythone[m] appellant. Dio-
 dorus Siculus, ubi de oraculo Pythico
 scribit, originem furoris Prophetici dete-
 git : Cum in eo loco, ubi templum postea
 extructum est, circumpascerent capra, fa-
 ctum est, ut una ex grege frequenter ad
 hiatum illum accederet, & quotiescunque
 introspexisset, toties reversa miris & inusi-
 tatis gestiret saltibus, vocemque sonaret in-
 suetam &c. Quæ pastor miratus, cum ac-
 cederet & ipse, hiatum spectaturus, mox
 eodem impetu hausto conceptoque, simili
 modo exsilire, & vaticinia fundere incipit.
 Fama increbrescit & pervulgatur; fit con-
 cursus ingens ad hiatum, & quotquot de-
 mittunt sese, statim fatidico halitu afflati
 furibundis similes evadunt. Hac Diodo-
 rus.

Jamblichus ad Porphyrium scribens
 duplicem rationem adducit, quæ Sybilla
 Deum suscipere solita est: „ Aut enim per
 „ tenuem spiritum, & ignem, qui alicubi
 „ ex ore quodam antri prorumpibat, aut
 „ ipsa etiam in adyto sedens super aneam
 „ sellam, quæ tripes vel quadrupes foret,
 „ Numinique dicata, & utrobique divino
 „ illo spiritu acta, fundebat vaticinia. I-
 „ taque cum plurimus ignis ex antro evo-
 „ lans

„ lans vati undique circumfunditur , eam-
 „ que suo numine repletam agitat , aut i-
 „ tem sacratæ sedi adhæret , per quam
 „ Deo afflata in vaticinia erumpit. „ De
 simili ita canit Virgilius l. 6. *Æneid.*

----- *Non vultus, non color unus ,
 Non compta mansere coma , sed pectus
 anhelum ,
 Et rabie fera corda rument , majorque
 videri ,
 Nec mortale sonans , afflata est Numine
 quando
 Jam propiore Dei .*

Et paulo infra :

*Bacchatur Vates , magnum si pectore possit
 Excussisse Deum : tanto magis ille fari-
 gat
 Os rabidum , fera corda domans , fingit-
 que premendo .*

Laurum præterea tales Fanatici morde-
 bant , & cervices rotabant . Cornelius Ne-
 pos l. 3. ex Darete , si tamen ejus libri
 Author habendus est :

*Ad tripodas quæstura fugit , ramosque
 loquaces
 Ore premit , poscensque Deum non irrita
 longum
 Fatis plena redit , claretque interprete
 vultu
 Extorti vindicta Dei furiosa potestas .
 Imbelles vexat artus cervice rotata ,
 Crine*

Crine umbrante humeros , oculis spargentibus ignem ,

Et facie prodente fidem ; nunc livida vitrum ,

Nunc flammata facem superat , nunc pallida buxum .

Quis credat , etiam in vera Religione Fideles sacratori spiritu sic incitari , ut aliis videri possent insanire ? Quam exoticus fuisse legitur in libris Regum saltantium & canentium Prophetarum cuneis ? & adjunctus eisdem Saul , de quo Scriptura ait : *Exspoliavit etiam ipse se vestimentis suis , & prophetavit cum ceteris coram Samuele , & cecidit nudus tota die illa ac nocte .* Lib. Reg. 1. cap. 19. Quid da Jeremia quis diceret denudato , & per plateas ambulante ? An non vesanum munda-
no homini videri posset Evangelium , suadens pro maledicentibus Deum orare , paupertatem querere , possessa relinquere , rapienti non resistere , percutienti alteram maxillam præbere &c. Fuit tempore S. Hieronymi , qui sacra ejusmodi sequentes consilia & præcepta carperet , mundi contemptores , & mortificationis studio deditos velut insanos irrideret ; quem idem S. Doctor Epist. 45. ad Asellam ita perstringit : *Tu tales miseros arbitraris , nos te miserabiliorem putamus ; par pari refertur , & invicem nobis videmur insanire ; gratias ago*

Deo

S. Greg. l.
6. mor. c.
16.

Deo meo, quod dignus sim, quem mundus oderit. Jacobonus peramanter a Christo rogatus fertur, cur sic adamaret stultitiam? & pio, ut solebat, lepore reposuisset: quia stultior fuisti me, Domine. Explicat nobis S. Bernardus cap. 11. ad Milites Templi stultitiam Christi, ut mundi confutaret sapientiam, confunderet sapientes, quod videlicet, cum in forma Dei esset, Deo æqualis, semetipsum exinaniverit, formam servi accipiens; quod, dives cum esset, propter nos egenus factus est, de magno parvus, de cello humilis, infirmus de potente &c. Hac ipsius stultitia nonne fuit nobis via prudentia, justitia forma, sanctitatis exemplum?

A B D I Æ

C A P. I. V. 18.

Non erunt reliquia. Septuaginta Interpretes: Non erit πυροπόρος.

CEnsant aliqui, per reliquias hic intelligi nuntios aut veredarios, qui frumentarii olim dicebantur; quod curam haberent annonæ advehendæ, & admetiendæ; ita ut sensus sit: Nec veredarius sive nuntius cladi supererit. Verosimilius legunt
Se-

Septuaginta, πυροφόρος, ignifer. Alludere enim videtur Propheta ad sensum qui præcessit: *Erit domus Jacob ignis*. A Castro sic exponit: Non erit superstes Idumææ, qui posteris vitæ, generisque lampada tradat. Stirpis enim propagatio lucerna in Scripturis vocatur: ut enim lucerna ignem & lumen, sic generatio conservat familiam. *Ut maneat lucerna David*. Lib. Reg. 3. cap. 11. Hæc explicatio alludit ad ritum veterem λαμπαδευχεῖν vocatum; quo solebant in ludis Promethei (quem primo credebant ignem de cælo in terram sustulisse) defatigati cursores lampadem recentibus sibi succedentibus in manus dare. Erat ludus hic symbolum humanæ propagationis, juxta illud Lucretii:

Et quasi cursores vitæ lampada tradunt.
Sic Plato l. 6. de legibus ait: cives debere operam dare generationi, ut ipsi vitam a majoribus haustam vicissim, quasi tædam ardentem, posteris tradant. Hinc a Prometheo forsan Græci hoc sumpsere proverbium, Non est Pyrophorus, id est, superstes. Fertur enim Prometheus evasisse diluvium Deucalionis, ideoque genus humanum cælesti igne restaurasse; & si hic Pyrophorus fuisset extinctus, & genus humanum una interiisset.

In sensu morali per Pyrophoros intelligentur Prædicatores Verbi Dei: tales enim

enim expeditos esse convenit ad currendam
viam mandatorum Domini ; præterea fa-
cem doctrinæ & veritatis aliis communi-
candæ inextinctam conservare , secundum
illud Christi : *Sint lumbi vestri præcincti ,*
& lucerna ardentes in manibus vestris : Ne
unquam generatio novæ creaturæ in Chri-
sto deficiat. Quam non solliciti sunt homi-
nes , ut sui reliquias posteritati reservent ?
Ideo enim Romani Sabinas rapuerunt
mulieres , ut ex historiis constat . Ideo se-
ptem mulieres apud Isaiam cap. 4. legun-
tur apprehendisse virum unum . Ideo i-
psam naturam vicisse censendus est Abra-
ham , quod unicum sacre stirpis pyropho-
rum e medio tollere paratus fuerit . Ideo
mulier Thecuitis Davidi instantissime sup-
plicat : *Querunt extinguere scintillam meam,*
qua relicta est , ut non supersit viro meo no-
men , & reliquia super terram . Ideo velut
magna a Deo pœna Judæis præsentis Ca-
pite intentatur : *Non erit Pyrophorus .*

Lib. Reg.
2. c. 14.

Pari , si non potiori jure sollicita est
Christi Ecclesia de divini verbi præconi-
bus , consecratis Deo Pyrophoris , qui e-
lectam spiritualium filiorum stirpem au-
geant & propagent , non carnali more ,
sed spirituali , pietate scilicet , doctrina ,
& exemplo , de quibus ita canit vetus Poe-
ta Aratus Hypodiaconus :

Ecclesia nunc alma fides sine fine pudicos
Pon-

*Pontifices jubet esse suos , & quarit in
omni*

*Canta tribu , quos rite probet , nec san-
guinis iste ,*

Sed meriti successus erit .

Longe ampliori & nobiliori successu , quam
ulla Regum ac Principum hujus sæculi esse
posset . Quam excellentes Pyrophori fue-
runt Apostoli ? Adversus unicam Petri suc-
cessionem hucusque portæ inferi non potue-
runt prævalere . Quales Pyrophori Mar-
tyres ? qui conservando veræ fidei lumini
olei loco sanguinem effuderunt . Quam in-
signes Pyrophori Confessores , ut S. Basi-
lius , Augustinus , Dominicus , Franciscus ?
D. Benedictus , qui teste Genebrardo ha-
buit aliquando in suo Ordine filios 30000.
S. vero Ignatius socios Anno 1710. unde-
viginti mille nongentos nonaginta octo ,
e quibus sacerdotes fuere , novi scilicet
Pyrophori , novem mille nongenti quin-
quaginta septem .

A M O S

C A P. II. V. 8.

*Super vestimentis pignoratis accubuerunt
juxta omne altare.*

Videntur hic argui Apostatae Judæi ,
quod immolantes victimas vitulis
aureis in Dan & Bethel juxta aras epu-
lantes discubuerint in lectulis, vestibisque ,
quæ ablata erant renuentibus tam impiam
vitæ societatem cum iisdem inire , quasi
pignora pro debitis , vel quod ex iis di-
venditis victimas , epulasque instruxerint .
Notandum hic primo est , persuasissimum
fuisse Ethnicis , tum demum Deos sibi
propitios futuros , si eis vestes offerrent .
Solebant autem , ut observat Melanthius
in lib. de Mysteriis , illam imprimis ve-
stem Diis offerre , ac in templis dicare ,
quam quis gestasset, dum initiaretur . De
pavimento vestimentis instrato meminit A-
sius Poeta apud Athen. l. 12. cap. 9.

*Sic illi pexi Junonis templa petebant
In lucum , ornati perpulchris vestibus ,
atque*

*Tellurem niveis texerunt vestibus omnes .
Athenis feræ omni anno hoc fere ritu ce-
le-*

lebrabantur , toto templo mirifice instructo , & pavimento stragula , ut verisimile est , veste contexto , Plinteria Græcis dicuntur , quibus , ut Plutarchus ait in Alcibiade , *Templi ornamentum omne deponunt , pavimenta tegunt* &c. Dicuntur autem accubuisse Judæi super vestimentis pignorat , ut explicat Martinus de Roa , quod illa fuerint quasi pignus devotionis aut initiationis Diis consecrata ; aut. quod ab initiatis tanquam insigne ejus Numinis , cui se dicabant , gestata fuerint . Notandum secundo , familiare fuisse Gentilibus post peracta sacrificia solennia imprimis ac publica , mensis accumbere , & convivia celebrare eo ipso in loco in honorem Deorum , quibus sacrificatum erat . Ejusmodi conviviorum *sacrificialium* aperte meminit Homerus in omnibus fere sacrificiorum descriptionibus , uti & Apollonius in Argonautici sacrificii descriptione . Duabus Gentiles ex causis has epulas peragebant : tum , ut Deos suos colerent , quos venerant comessationibus hominum , & potationibus delectari ; tum , ut ex rerum , quibus operati fuerant , divinarum meditationibus & actionibus animos suos reficerent , & recrearent .

Apparatus epularum hujusmodi *sacrificialium* in his consistebat . 1. Carnes ex sacrificio reliquas in minores partes secabant ,

bant . 2. Partes sic dissectas affigebant verubus . 3. Affixas solícite assabant . 4. Assatas verubusque detractas in certas portiones singulis convivis distribuendas dividebant . 5. Certa erat convivarum collocatio , confessio , & accubatio . 6. Cibi potusque sumptio . 7. Sermocinatio convivantium & collocutio . 8. Cantus & musica tam vocalis , quam instrumentalis . 9. Tripudia , saltationes & ludi , quorum Homerus aliique frequenter meminerunt . 10. Libationes , quales in ipsis sacrificiis erant usitatæ . 11. Linguarum ex immolatis hostiis excisarum in honorem Mercurii concrematio . 12. Precationes ante & post epulas . Demum lavatio & aquarum aspersio , quæ in fine ac principio tam sacrificiorum , quam epularum sacrificialium fiebant .

Accubitus vero quod attinet , de quo expresse Propheta meminit , notandum est , solitos esse Veteres accumbere mensæ humili , cui apponebantur lecti instrati aulæis , purpura , aut alia veste stragula , pro copia vel inopia convivatoris . In illis loti prius & exuti soleis accumbebant , reclinata supra parte corporis in cubitum sinistrum , infera in longum porrecta ac jacente , capite leviter erecto , dorso modicum a pulvillis suffulto : primus ad caput lecti decumbebat pedibus ad dorsum secundi
por.

porrectis, secundus occiput ad umbilicum primi obvertebat, pedibus ad tergum tertii porrectis, & sic deinceps &c. Hinc incidenter animadvertendum, 1. Jure Christum Dominum Simoni objecisse; *Aquam pedibus meis non dedisti*. 2. Quam facile potuerit S. Joannes supra pectus Domini recumbere. 3. Quam commode Magdalena potuerit pedes Christi post tergum alterius positos lacrymis rigare & inungere.

Septuaginta vertunt non accubitus, sed concubitus, quasi vestimenta ligarint funibus, sive περιπέτισματι; id est velamina fecerint altari adhærentia, ne infanda in idolio committentes scelera viderentur. Simili fere modo Beelphegor a Moabitibus Judæisque cultum esse colligi potest ex Numer. cap. 25. Confirmat idem Minutius Felix in Octavio: *Ubi magis a sacerdotibus quam inter aras & delubra conducuntur stupra, tractantur lenocinia, adulteria meditantur? frequentius in adituum cellulis, quam in ipsis lupanaribus flagrans libido defungitur*. Tertullianus Apolog. cap. 15. ait: *Ceterum si adjiciam, quæ non minus conscientia recognoscunt, in templis adulteria componi, inter aras lenocinia tractari, in ipsis plerumque adituum & sacerdotum tabernaculis, sub iisdem vitis, & apicibus, & purpuris thure fragante libidinem expungi*. Tanta hanc in-

422 *Explicatio Fabularum*,
ter & idololatriam sympathia est : nam
ex luxuria , juxta Lactantium l. 2. c. 1.
ut vitia omnia , sic impietas adversus Deum
nascitur . Vere Sapiens cap. 4. *Initium*
fornicationis est exquisitio idolorum . Par
sympathia fere hæresin inter & luxu-
riam : ut enim S. Hieron. ait in cap. 3.
Jerem. *Nulla hæresis nisi propter gulam*
ventremque construitur , ut seducat mulier-
culas oneratas peccatis .

A M O S

CAP. II. V. 8.

Vinum damnatorum bibebant .

PER damnatos videntur intelligi veri
Dei cultores , qui nec in Bethel ,
nec in Dan , sed in Jerusalem soli vero
Deo sacrificatum ibant , præsertim medio-
cris , aut deterioris conditionis homines ,
quos calumniis affectos , & falsis testibus
circumventos damnabant vel jactura bo-
norum , vel mortis supplicio . Ex bonis ve-
ro sic corrasis sympolia faciebant , & suis
in templis se recreabant , quasi Deos suos
his calumniis , rapinis , ebrietatibus hono-
raturi . Sic Servius docet in *Æneid.* 4.
olim ex damnatorum bonis fuisse Diis sa-
cri-

crificatum, dum in illa Virgiliti verba commentatur: *simul divum templis indicit honorem*; indici dicuntur, quia paupertas majorum ex collatione sacrificabat, aut certe de bonis damnatorum. Unde & supplicia dicuntur. Isidorus Hispal. l. 6. ex Festo ait: *supplicationes, quæ sunt de bonis pauperum supplicia*. Hæc ratio est, cur sacer homo, sacra bona, & sacrum pro execrando sumptum sit: quia sacræ res de bonis execrandorum fiebant; & hinc vinum damnatorum est, quod ex mulcta & supplicio damnatorum comparabatur, ex quo Diis solebant sacrificare, & peracto sacrificio convivari.

LIB. I. MACHABÆOR.

CAP. I. V. 15.

Ædificaverunt Gymnasium in Ierosolymis secundum leges Nationum. Et l. 2. Machab. c. 4. de Jasone: Ausus est sub ipsa arce Gymnasium ponere.

Etyologia Gymnasii oritur a γυμνός nudus, vel a γυμνός nudo, spolio. Locus enim erat, in quo se nudi homines exercebant. Thucydides L. 1. ait de Lacedæmoniis: *Hi primum publice depositis vestibus, nudo corpore, oleoque uncti certa-*

mina ediderunt ; cum olim in Olympiōs quoque certaminibus subligaculis succinū pugiles decertassent. Sed dein adeo place- re cœpit inuerecundia , ut Athletæ non aliter, quam nudi, & oleo uncti, pulvere- que ac arena conspersi certaverint. Licet autem hic modus nudis pugnandi corpori- bus postea fuerit abolitus, retentum tamen est hoc nomen Gymnasii: cum alia etiam in eodem exercitia tractari solerent. Vi- truvius formam Gymnasii describens l. 5. cap. 11. ait: Constituantur in tribus por- tibus exhedra spatiosa, habentes sedes, in quibus Philosophi, Rhetores, reliquique, qui studiis delectantur, sedentes disputare possunt. Erant alia præterea loca, in quibus se cursu, hasta, disco, saltu &c. exerce- bant; alia, in quibus pugiles ad pugnam se preparabant, inuocabant, certabant; alia, in quibus se balneabant. Samuel Pe- titus de Legibus Atticis tit. 7. de Gymna- siis ait, duas in illis Ephebias fuisse; unam, quæ vanæ gloriæ stimulo agebatur in certis quibusdam exercitiis corporis; alteram, quam palæstram vocat puero- rum, in qua festum Mercurii per co- messationes, & infandas impuritates cele- brabant.

Est Interpretum quorundam opinio, hoc Gymnasium ab Apostatis Judæis ex- tractum fuisse etiam officinam nequitia- rum

rum & turpitudinum, quale fuit, quod Jason constituisse legitur L. 2. Machab. cap. 4. qui ne solus fidem abjurare videretur, Judæos ad justitiam Gentium, idolatriam scilicet, conatus est perducere, 100. & 50. talenta promittens Regi Antiocho, ut Gymnasium & Ephebiam posset constituere: nam ut legitur L. Machabæor. 2. C. 4. *Statim ad Gentilem ritum contribules suos transferre cepit*, v. 10. & prava instituta sancire: etenim ausus est sub ipsa arce Gymnasium ponere, & optimos quosque epheborum prostituere, ut lucrum inde non modicum reportaret. Fuisse autem inter Judæos subinde tam nefandos homines, qui innocenti puerorum ætate ad flagitia abuterentur, ex aliis Scripturæ locis satis constat. Additur L. 1. Machabæor. C. 1. *Secundum leges Nationum*. L. 2. Machab. cap. 4. *Ad Gentilem ritum*. Sed quam abominabiles hæ Leges fuerunt, quam ritus execrandi! Cæsar Buleng. l. de Circo Romano & ludis Circensibus ait cap. 55. tantam apud omnes fuisse lasciviam, ut ad omnia pene Gymnasia & spectacula essent popinæ & ganæ, quæ ad fœdas carnis voluptates allicerent homines, & invitarent. Refert Faber Agonist. l. 1. Herculis, Mercurii, & Cupidinis statuis, quæ in Gymnasiis erectæ erant, honorem a Gentibus deferri solitum.

tum. Salvianus de Provid. l. 6. *Colitur & honoratur Minerva in Gymnasiis, Venus in Theatris, Neptunus in Circis, Mars in Arenis, Mercurius in Palastris. Hinc non est, quod quis miretur tantam regnasse impudicitiam in Gymnasiis, quorum Praefides ac Tutores ipsi libidinum vitiis erant celebres.* Ad hæc videre erat in Gymnasiis imagines turpitudinum illices, ut Lactantius testatur l. de fals. relig. c. 20. *Magnum audaxque consilium suscepisse Græciam Cicero dicit, quod cupidinum & amorum simulacra in Gymnasiis consecrasset.* Ait autem Liber Machab. secundus c. 4. *Judæos Apostatas Græcas glorias optimas censuisse, & per omnia his consimiles fieri desiderasse.* Ex his confectaneum est, ipsos habuisse ad ritus Gentilitios, & profanam sapientiam tradendam exhedras; ad discum, luctum, saltum, & reliqua pugilum certamina palæstram; ad viros fœminasque lavandos balnea; ad pueros & adolescentes idololatricæ ceremoniis instituendos ephebias; atque ad explendas hominum pessimas cupiditates popinas & ganeas, & optimos quosque epheborum sub velum ac petasum duxisse, seu, ut Scriptura expresse meminit, in lupanaribus posuisse.

In hanc execrandam innocentum corruptionem & Gentium morem pessimum jure invehitur Lactantius l. 1. de fals. relig. c.

20. *Impudicorum hominum perdita & deplorata nequitia ! qui liberos suos , quos erudire ad honesta deberent , prostituerunt libidini juventutis , a quibus flagitiorum Deos in illa atate coli voluerunt , qua simplex & improvida prius irretiri , & in laqueos potest cadere , quam cavere . Quid mirum , si ab hac Gente universa flagitia manarunt , apud quam vitia ipsa religiosa sunt , eaque non modo non vitantur , verum etiam coluntur ? Ceterum quem ad finem ab Ethnicis instituta sint Gymnasia ; quæ victoribus destinatæ fuerint coronæ ex apio , oleastro , pinu &c. vide apud Lucianum tom. 2. de Gymnasiis in Dialogo Solonem inter & Anacharsim .*

Fuerunt ex Interpretibus , ut S. Thom. Lyranus , Genebrardus , Mariana , Rupertus &c. qui censuerunt nomine Gymnasii , saltem illius , de quo meminit Liber I. Machabæor. cap. I. non venire infame gurgustium aliquod , sed locum aliquem publicum , in quo artes liberales aliæque scientiæ traderentur juxta ritum Gentilem , secundum quem varia in diversis locis erant Gymnasia , ut Romæ , Athenis , Antiochiæ , Alexandriæ , Heliopoli , Beriti &c. Quod autem a Jasone extractum est sub arce Gymnasium , ex Scriptura satis colligitur lupanaribus fuisse infamatum , in quo nulla profecto potuit vera addisci sapien-

plentia : illa enim cum honestatis mater sit, & nutrix, hostis vero carnalium gaudiorum, prius cum bellua hominem conjunxeris, quam cum sapientia & honestate voluptatem. Cicero l. de Senect. bene ait: *Nihil a Deo aut natura homini præstabilius datum est mente; huic autem divino muneri ac dono nihil est tam inimicum quam voluptas.* Consentit Ciceroni Philo: *Non sunt in rebus duo tam contraria, quam voluptas carnalis, & scientia.* Hinc Perfectionem matrem Platonis phantasmate Apollinis correptam ferunt, & sapientia Principem non aliter arbitrantur nisi de partu Virginis editum.

*L. quod
Deus sit
immort.*

*S. Hier. l.
1. contra
Jovinian.
ex Clearcho
in
laud. Plat.*

L. I. MACHABÆOR.

CAP. III. V. 48.

*Expanderunt libros Legis, in quibus
scrutabantur Gentes similitudinem
simulacrorum suorum.*

INferunt Interpretum aliqui ex hoc versu, subtiliores Gentiles voluisse ex ipsis Scripturis probare simulacra Deorum non male fieri; in quibus legere poterant imagines Cherubinorum intra Sancta Sanctorum fuisse positas, & Serpentis iconem in
de-

deserto a Moyse exaltatam &c. Censent alii, Gentiles in ipsis sacris Bibliis depinxisse simulacra Deorum suorum in contumeliam sacrae Scripturae: quemadmodum templa Judaeorum profanare voluerunt erectis statuis & aris; Templum Hierosolymitanum dedicando Jovi Olympio, Garizitanum autem Jovi Hospitali.

Serarius, Oriolanus, Sanctius, Villalpaldus dicunt, ex hoc textu non improbabiler erui, Gentiles idolorum suorum simulacra ex Scripturis desumpsisse; uti jam olim modo ritus & ceremonias non paucas quoad sacrificium ex Judaeorum libris didicerunt & usurparunt, multaque alia fragmenta ex verissimis Scripturarum historiis deduxerunt.

D. Gregorius Nazianz. orat. 1. in Julianum ait: Ægyptiorum, & Phœnicum, & Græcorum eruditionem nostram esse. Exemplum aliquod S. Hieronym. affert in illud Amos 5. *Et Justitiam in terra posuit.* Ego puto, ex hoc loco etiam gentilem Poetam furatum esse, qui de rusticorum simplicitate & beatitudine differens intulit:

- - - - *Extrema per illos*

Justitia excedens terris vestigia fecit.

Duo lumina Ethnicorum fuere, Plato, & Pythagoras. De primo ait S. Augustinus l. 2. de Doctr. Christiana cap. 28. *Nonne memoratus Episcopus (Ambrosius scilicet)*

con-

considerata historia Gentium, cum Platonem reperisset Hieremia Propheta temporibus profectum fuisse in Ægyptum, ubi tum ille Propheta erat, probabilius esse ostendit, quam Plato potius nostris literis per Hieremiam imbutus sit, ut illa posset dicere vel scribere, qua jure laudantur? Eundem Platonem libros Moysis involasse, uno ore arguunt Josephus, Iustinus, Clemens, Theodoretus, & alii, adeo ut Numenius Pythagoræus Platonem nihil aliud esse dixerit, quam Mosen Atticissimum. De Pythagora refert Josephus l. 1. contra Appionem: Pythagoras igitur Samius, cum sit antiquus quidem ætate, sapientia vero & divina pietate Philosophos omnes excellens, non solum qua nostra sunt, agnovisse manifestus est, sed etiam amulatus ea, ex multis apparet. De eodem ait Hermippus l. 1. Dicitur enim vere, quod ille vir multas Judæorum Leges in suam transtulit Philosophiam. In Homeri libris sexcenta deprehendi ex Moysæ deprompta, ait Huetius in demonstrat. Evangelica, proposit. 4. c. 2. Anaxagoram de sacris fluentis Moysis Philosophiam suam temperasse, etiamsi taceret Theodoretus, satis declarant Diogenes Laërtius, & Eusebius. Socratem quoque Mosaicarum sententiarum aura aliqua afflatum esse, sensisse videntur Aristobulus apud Eusebium, & Clemens Alexandrinus. Inde

de factum est (quod Tertullianus notavit in Apolog.) ut veteres Philosophi Instrumentum Vetus inverterint, & in suas sententias adulterarint. *Quis Poetarum, quis Sophistarum, qui non omnino de Prophetarum fonte potaverit: inde Philosophi sitim ingenii sui rigarunt &c. Et si quid in sanctis Scripturis offenderunt digestis, pro instituto curiositatis ad propria opera verterunt.* Addit Justinus: *Quamvis fuerint in Ægypto versati, adjutique scriptis Mosaicis, postea contrarias prioribus, posioresque sententias de Diis introduxerunt.* Juvat ad particularia descendere.

in sermo-
ne exhorta-
torio
ad Gen-
tes.

In Timæo Platonis ipsum quasi Moysem de primo mundi opificio loqui putares. Chaos Hesiodo memoratum ex Moysis verbis confictum esse agnoscunt omnes. Diem nocte satum, proindeque recentiore finxit: Moyses quippe vespertinum tempus matutino anteposuit, & post tenebras creatam lucem dixit. Ex serpente, qui Evam decepit, deducta esse Bacchi Orgia, in quibus circumdati anguibus *Evan* conclamabant, docet Clemens Alexandrinus in adhort. ad Gentes. Sic hortos Alcinoi ex descriptione Paradisi; expulsum Saturnum a Jove, ex historia exacti e Paradiso Adami; Gigantomachiam, ex turri Babel extructa; incendium Phaethontem, ex combusta caelesti igne Pentapoli; fabulam A-

rio.

rionis, delphini beneficio rabiem maris elapsi, ex historia Jonæ; aliaque pene innumera ex Veteris Testamenti libris enata esse adseverant.

Sphingas effinxit Antiquitas virginis vultu, cetera leonis corpore, alis duntaxat tergo adjectis, & has in fabulis Græci, Ægyptii inter sacras notas habuere. Verisimile est, ob analogiam, exemplar earum a Cherubinis alarum projectione Tabernaculum obumbrantibus desumptum esse: uti enim Cherubim apud Judæos, ita Sphinges apud Ethnicos symbolum fuerunt arcanæ ac divinæ sapientiæ. *Quod sane ipsi declarant*, ait Plutarchus, *ante templa Sphinges plerumque collocantes, quo innuunt, suam doctrinam constare perplexa & sub involucris latente sapientia.* Hinc bene Villalpaldus ait: Sphingas Ægyptiorum simias fuisse Cherubinorum. Nisi quis forsitan vellet dicere, quam audacter, tam absurde, Moysem, cum in omni sapientia Ægyptiaca eruditus fuisse legatur Act. c. 7. Cherubinos sacri Tabernaculi ad Sphingum Ægyptiacarum similitudinem efformasse; cum Scriptura nobis dicat: Moysem universa, quæ in Dei Tabernaculo fieri deberent, secundum exemplar, quod ei in monte Sina monstratum est, perfecisse. Accedit, quod Eusebius in Chronico ea nominatim, quæ de Sphinge, & Oedipo nar-

nar-

narrantur, referat ad tempora Gedeonis, annis post Moysen amplius ducentis.

Origenes l. 9. contra Celsum docet, natam esse fabulam Vestæ ex Scriptura, quæ ignis perpetui meminit. Simili errore de nomine Jehovah factum esse Jovem; unum Noe materiam dedisse diluvii Deucalionis, Bacchi, Vinitoris, Jani bicipitis. Audiamus desuper Lucianum, qui in Dea Syria ait: Deucalion „ solus hominum relictus, „ in secundam videlicet generationem, pruden-
 „ tiæ simul & pietatis gratia. Servatus „ autem fuit hoc pacto. Arcam quandam „ magnam, quam ipse habebat, impositis „ in eam & liberis, & uxore sua, con-
 „ scendit. Ceterum cum ipse ingrederetur, „ venerunt eodem & apri, & equi, & leo-
 „ num genera, & serpentes, aliaque, quæ „ cunque tellure pascuntur, bina ex uno „ quoque genere cuncta.

Forſan ex eo, quod legerint Gentiles vel audierint Jacobum tulisse lapidem, erexisse in titulum, & oleum desuper fudisse, orta est lapidum latria. Sic enim Arnobius L. 1. *Si quando conspexeram lubricatum lapidem, & ex olivi unguine odoratum, tanquam inesset vis presens, adulabar, affabar.* Theophrastus refert, ejusdem hominis fuisse unctis lapidibus oleum e lecytho diffundere, dein in genua procumbere, & adorare. Quis dubitet Gentiles ex

E c

iis,

is, quæ de Angelis audierunt, suos finxisse Genios? Sic verisimile est ex historia Angeli de cælo lapsi natam esse fabulam, quod Ate Jovis quidem filia, sed cælo depulsa res humanas turbaverit, & everterit. De Sampson factum & fictum esse Herculem, putat S. Augustinus l. 18. de civit. Dei c. 19. *Sampson, cum mirabiliter fortis esset, putatus est Hercules.* Templum Herculis Gaditanum Silius l. 3. ita describit, ut multa in eo religionis Judaicæ vestigia appareant. Templum illud non saxis, sed trabibus constabat ad modum Tabernaculi Mosaici: ab eodem sues arcebantur, lineæ veste induebantur, qui ad sacra accedebant, uxoribus abstinebant in ordine vicis suæ; ignis illic perpetuus.

Sed nulla effigies, simulacraque nota Deorum,

Majestate locum, & sacro implevere timore.

Sic credibile est manasse a Judæis ad Ammonios Ægyptiorum colonos ritus Lychni in templo semper ardentis. Vestimenta illius Pontificis, qui præfectus erat Ammonis templo, descripsit Athenagoras in Eroticis l. 5., vestimentis summi Judæorum Pontificis adeo similia, ut dubitationi vix locus relinqui possit, ad eorum exemplar fuisse elaborata. Lineas Sacerdotum Hebræorum tunicas imitati Linigeri Sacerdotes

tes Isidis. Serapidi Panificia obtulisse Ægyptios discimus ex Suetonio, ad exemplar scilicet Panum Propositionis. Moyses ait Levit. 2. *In oblatione tua offeres sal.* Plinius L. 3. *Nulla sacra conficiuntur sine mola salsa.* Vinum illos pariter & oleum victimis affudisse prodit Herodotus, uti Judæi in jugi & quotidiano agnorum duorum sacrificio &c. Josephus l. 2. contra Appionem ait: *Nulla omnino urbs est vel Græcorum vel Barbarorum, neque ulla gens, ad quam non penetraverit mos celebrandi septimum diem, quem feriati traducimus.* Sed causam male assignat Tacitus de origine Judaici Sabbathi l. 3., quod e septem sideribus, queis mortales reguntur, altissimo orbe & præcipua potentia stella Saturni feratur, ac pleraque cælestium vim suam & cursum septimos per numeros conficiant. Sic Gentes usæ sunt circumcisione; sed cum verum illius mysterium, principium, & finem ignorarent; ad falsa sua dogmata reduxerunt. Hinc Phœnices legimus circumcisionis institutum ad Saturnum retulisse. Neomenias Græcis sacras fuisse ex Porphyrio constat. Epiphonematis loco sit Lucilius Ruffinus, qui libellum olim scripsisse fertur hoc titulo: *Collatio Legum Judaicarum & Romanarum.* Ex his patet, quam vere Clemens Alexandrinus dixerit, Græcos seu Philosophos seu Poetas a Prophe-

tis præcipua dogmata suffuratos esse; sed nullo fructu. Imo Demetrius apud Josephum l. 12. Antiq. c. 2. circa finem refert, Theopompum, & Theodecten voluisse multa de sacris Scripturis ad usus profanos transferre, & propterea a cœlesti Numine punitos esse.

Facit ad rem nostram, quod S. Rupertus ait l. 6. in Genes. c. 15. in quo eleganti prorsus exemplo alludit ad Scripturam a Gentibus perlustratam. *Sara a Regibus expetita significat pulchritudinem divina Religionis (in Scriptura expressa) quæ etiam captivis Judæis videbatur inter Gentium errores imitabilis, & amulabantur eam, quamvis non caste, Gentes quæ erant in circuitu eorum. Unde scriptum est de libris Legis: Scrutabantur Gentes similitudinem simulacrorum suorum, videlicet, ut more divina Legis exhiberent simulacris suis ritum vel ordinem sacrificiorum.*

Hinc apparet 1. quam execrandum fuerit hoc scrutinium: serviebat enim impiis sacra Scriptura non ad deponendos, sed ad confirmandos errores suos. Quid rationi magis & Scripturæ contrarium, quam plures Deos esse? & tamen hos dari, probare ex Scriptura voluit Simon Magus, ut videre est apud Clement. Alex. l. 1. Recognit. ubi ait: *Quod multi sint Dii, ipsa me Lex docuit: quia nomine Eloim utitur;*
& hanc

& hanc doctrinam suam pluribus ex Scriptura testimoniis pergit stabilire. Quam absurda & ridicula antiqui hæretici, ut E-bion, Valentinus, Marcion &c. tradiderunt dogmata, eaque ex ipsis Bibliis conati sunt probare, more Novatorum, qui (ut Irenæi utar similitudine) Scripturæ verbis utuntur ut lapillis, ex quibus diversimode dispositis figuræ sibi contrariæ prolocantis arbitrio formari possunt. Ita ut impossibile sit, sine infallibili controversiarum Judice in unitatem Fidei convenire.

Notandum secundo est, laudabile ac justum esse Catholicorum scrutinium, quo ostendant hæreticis, ex libro Legis non esse vetitam omnem simulacrorum similitudinem, imo jussum esse a Deo Moysen, ut quædam faceret simulacra, v. g. Cherubim, & Serpentem æneum in deserto, cujus intuitu læsi Israelitæ sanarentur. De quo ita scribit Severianus Gabalorum Episcopus: *Cur hac fecit Moyses? qui populo dixerat: Non facies tibi sculptile &c. Dic obsecro fidelissime Dei minister, quod aliis vetas, ipse id facis? quique conflatum vitulum comminuisi, serpentem ipse ex are conficis? eumque non clam, sed palam & omnibus perspicuum statuis? At illa, inquit, mandavi, quo materiam impietatis excinderem, atque ab omni defectione atque idolorum cultu populum abducerem:*

nunc autem serpentem utiliter conflo, ut veritatem ipsam præsignificem, & quemadmodum tabernaculum compegi, & quæ in eo sunt omnia, & Cherubim, similitudinem eorum, quæ non videntur, adhiberi in sancta, ut figuram atque umbram futurorum ostenderem: sic & serpentem ad populi salutem conflavi, ut ejusmodi experimento exercitatus Crucis imaginem, & Servatorem ac Redemptorem in ipsa pendentem præcognosceret. Ita ille. Et si placere Deo potuit Serpentis exaltatio, eo quod figura esset Christi in cruce exaltandi; quomodo Exaltati imago potest displicere?

Notandum est denique, bene a Christianis fieri, dum non solum Vetus Testamentum Judæorum, sed etiam Gentilium libros scrutantur; negari enim non potest, multa in iis præclara inveniri, & laudabilia quoad vitam bene instituendam, quoad ritus & ceremonias circa cultum Dei, modo fuerint ab omni superstitione purgata. Nec est inconveniens aut absurdum aliquid, Judæum, aut Catholicum ab Ethnicis mutuari aliqua, & in quibusdam assimilari; cum S. August. l. 20. de Civ. Dei c. 21. dicat; *Et si usus quarundam rerum similis esse videtur nobiscum cum Gentibus, longe tamen aliter his utitur, qui ad alium finem earum usum refert, & aliter, qui ex his Deo gratias agit, de quo falsa non credit.* Dic potius, Ethni-

Ethnicos, ut ante probatum est, a veris Dei cultoribus tales ritus ac ceremonias accepisse; proinde eadem ab Ethnicis velut injustis possessoribus per Catholicos in usum pium vindicanda sunt, ut loquitur S. Augustinus l. 2. de Doctr. Christiana c. 4. Fuerunt ritus non pauci, qui velut in alieno solo a veris Dei cultoribus iudicio recuperatorio vindicari possunt; & si quidem corrupti fuerint, ab omni idololatriæ sordē purgati in usum pium ac laudabilem restitui. Communis erat usus aquæ lustralis apud Gentiles, modo etiam apud Catholicos: ritum enim, quem videntur Ethnicī accepisse a Judæis, quibus lex data erat de Levitis Numer. c. 8. v. 7. *Purificabis eos juxta hunc ritum, aspergantur aqua lustrationis*, servandum sibi censuit Ecclesia; sed sine longe meliori nobilitatum. Solent Christiani Anathemata Sanctorum Reliquiis appendere. Dicit hæreticus, ritum esse Gentilium; cum Tibullus eleg. 3. l. 3. canat:

*Nunc Dea, nunc succurre mihi; nam
posse mederi*

Picta docet templis multa tabella tuis.
Et Virgilius in Catalectis:

*Non ego thure modo, aut picta tua tem-
pla tabella*

*Ornabo, & puris fersa feram mani-
bus.*

Præterquam quod natura dictet, non respuenda ejusmodi mnemosyna; poterat Gentilibus constare ex libris Moyſis, reservata a Judæis fuisse, per quæ magna ipsis beneficia obvenerunt, ut Virgam Moyſis, Urnam Manna refertam, Decalogi tabulas. Et si thuribula rebellium in laminas producta ab Aarone altari affixa sint ad terrorem, Numer. 16.; cur non in laudem Dei eorum beneficiorum indicia, quæ ab eodem per Sanctorum patrocinia contigerunt? Solent viri Nobiles & Generosi, dum bello renuntiant, arma sua Deo, alicui Ecclesiæ, aut Sancto, vel B. Virgini consecrare, quemadmodum S.P.N. Ignatium Manresæ constat fecisse. Carpet forsan alius morem illum Gentibus usitatum: nam de gladiatorum armis Herculis ad postem fixis satis meminerunt historiæ. Apud Ovid. Epistola 13.

Dii, precor, a nobis omen removete finistrum,

Et sua det reduci vir meus arma Jovi.

Suetonius in Caligul. cap. 2. *Tres gladios in necem suam preparados Marti ultorri, addito elogio, consecravit.* Sed quis dicat, veri Dei cultores morem illum a Gentibus mutuatos esse, & non potius illos ab iis, v. g. Judæis? cum ex Scripturis palam fiat, gladium, quo Goliath occubuit,
invo-

involutum pallio post Ephod apud Sacerdotem Abimelech fuisse depositum. Idem dixeris de multis aliis ritibus sacris, vel profanis, quorum si plura desideres exempla, consule nostrum Martinum de Roa Hispanum. Sufficiat in præsentī notasse, quod falsum sit, Catholicos mores Gentium & ritus imitari, ut nobis obijciunt Hæretici; sed potius jure, ut dictum est, recuperatorio ritus secundum se indifferentes, malitia tamen Gentium corruptos, a Catholicis omni prius superstitione depuratos ad veri unius Dei cultum, & Sanctorum ejus ordinari.

L. II. MACHABÆOR.

CAP. I. V. 13.

*Cecidit in Templo Nanea consilio
deceptus Sacerdotum.*

Aliqui per Nanzam intelligunt Dianam; ut D. Thom. Lyranus, & Pererius. Illam enim in Perside cultam esse non pauci Scriptores perhibent. Verosimilius per illam Venus intelligitur: nam apud Athenæum Nanno & Nannium sunt meretricum nomina. Apud Armenos quoque & Persas legitur Dea fuisse Anactis vel Nais; Tanaï.

naïtudem vocat Clemens Alexandr., & Venerem interpretatur. De sacris Anaitidi fieri solitis, quæ Sacra vocantur, ita Strabo refert l. 12. *Ubiunque hujus Dea Templum est, legibus statutum est, ut Bacchanalia Sacrorum festa celebrentur, viris omnino Scythice tum interdiu, tum noctu se tractantibus; dum inter se & cum mulieribus una bibentibus poculis certant, & lasciviant.* Solebant etiam illi Deæ dedicari puellæ ut essent ad fani ejus servitium, ac dein nuberent, ut nuptias earum quasi sacras proci ambirent.

Apud Thucydidem l. 3. legitur de urbe quadam Cariæ, quæ Anæa nominatur, eo quod, ut ait Ephorus, ibidem sepulta sit una Amazonum Anæa nomine. Ait vero S. Hier. in c. 35. Jeremiæ: Amazonas mulieres libidinosas fuisse, quæ usque ad decrepitam ætatem bella libidinum experiantur: & hæc quæ modo dicta sunt, Veneri potius, quam Dianæ conveniunt. Ait enim Plutarchus, mulieribus in Dianæ Sacerdotium adlectis perpetuam fuisse indictam pudicitiam.

Verba, quæ præcedentem textum immediate subsequuntur, sunt hæc: *Etenim cum ea habitaturus venit ad locum Antiochus, & amici ejus, & ut acciperet pecunias multas dotis nomine.* Ex his verbis Commentatorum nonnulli inferunt, Antiochum

chum ea mente Nanæ Templum accessisse, ut cum Dea illa iniret matrimonium. Neque illud novum cuiquam aut mirum videatur; ea enim fuit infidelium libido aut superbia, ut humanis non contenti conjugis divina appeterent. Sic legimus celebratum Poetis fuisse connubium Pelei cum Thetide. Item notum est matrimonium Anchisæ cum Venere; Heliogabali, qui Solis Sacerdos in Oriente erat, connubium cum Urania. Constat præterea, quid Antonio volenti se pro Baccho aut Dionysio haberi contigerit. Seneca l. 1. suavoriarum ait: *Desponderunt Athenienses Antonio in matrimonium Minervam, & rogaverunt, ut duceret, & Antonius ait, ducturum; sed dotis nomine imponere se illis mille talenta.* An & unde hæc soluta sint, perinde habet, forte ex redditibus Templi; cum Deorum & Dearum Temppla subinde saltem dotata fuerint. Venus apud Ovidium l. 10. Metam. ait:

Est ager, indigena Damascum nomine dicunt,

Telluris Syria pars optima, quam mihi prisce

Servavere senes, templisque accedere dotem

Hanc iussere meis.

Cum igitur in præsentī capite dicatur Antiochum venisse, ut habitaret cum ea,

in

in græco textu est συνικέν, quod cohabitationem subinde conjugalem significat, & ut acciperet pecunias multas dotis nomine, conjectura quædam est, Antiochum tentasse cum Nanæa Venere inire matrimonium, & pecunias dotis nomine a Sacerdotibus accipere. Quod si ita est, justam nefarii ausus sui mercedem recepit. *Cecidit in Templo Nanæa.*

Longe melius & fortunatius est connubium, quod homo castus inire quærit cum divina Sapientia: *Hanc amavi, & exquisivi a juventute mea, ait Salomon, & quasi sponsam mihi eam assumere.* Et ipsa pariter consortium castorum quærit, & contubernium: nam, teste Ruffino Presbytero in Prologo Librorum S. Greg. Nazianzeni, Sapientia in somno eidem S. Gregorio apparuit dicens, se a Domino missam, ut cum ipso habitaret, eo quod jucundum sibi & satis mundum in corde suo habitaculum haberet præparatum. &c.

L. II. MACHABÆOR.

CAP. IV. & 19.

*Misit Jason facinorosus argenti didrachmas
trecentas in sacrificium Herculis.*

SI gesta hominum præclara & heroica,
rara artium inventa, publica, commu-
niaque beneficia Apotheosin apud Gentiles
sint promerita, illam præ cæteris aliis ju-
re sibi Hercules vindicare potuit. Hinc
de eodem ita canit Ovidius.

*- ubi mortales Tirynthius exiit artus,
Parte sui meliore viget, majorque vi-
deri*

*Capit, & angusta fieri gravitate veren-
dus.*

*Quem Pater omnipotens inter cava nu-
bila raptum*

*Quadrijugo curru radiantibus intulit a-
stris.*

Facinora ipsius amplissima, & gloriosa
certamina a Poëtis passim decantantur.
An omnia illa ab uno tantum gesta sint,
non constat. Varii enim ab antiquis Scri-
ptoribus numerantur Hercules. Diodorus
Siculus ait tres fuisse; Cicero sex; Varro
quadraginta quatuor: ut non mirum sit,
Her-

Herculem olim Tricosum fuisse dictum, ut ex veteri quadam inscriptione colligitur, quæ sic habet:

*Alcmena, Jovis ac Magni fortissima
proles,*

Tricosus subito post mea fata vocor.

Existimat Varro, omnes fortitudinis, & excellentis alicujus virtutis gloria inelytos nominatos fuisse Hercules, qui tamen sua habuerunt subinde cognomina. Prisci Celtæ suum Herculem Ogmiona vocarunt, Cimbri Tuisconem, vel Bisconem, Ægyptii Chonem, Indi Dorfanem, Iberi Gadtanum, Batavi Marcusanum, Ligures Monæcum, Tiburtes Saxanum, Campani Baulium, & Surrentinum. Hi Hercules re aut nomine tantum diversi sua habuerunt templa, aras, statuas, & sacrificia, quæ ob sua in homines merita, ut dictum est, impetrarunt. Hinc a Germanis cultus est Hercules Authore Tacito; & in Augia majore Rheni insula visitur adhuc ipsius Idolum. Lælius Bisciola tom. 2. l. 2. c. 10. Apud Baulos grata posteritas Herculem coluit rotundo templo. Singulari religione Tiburtes Herculem ut tutelarem Deum suum prosecuti sunt, & fanum ei est positum hoc inscriptum titulo: *Herculi Saxano Serv. Sulpitius Trophimus.* Ideo autem Hercules Saxanus videtur dictus, quod fanum illud in saxo ædificatum fuit.

fuerit. Sic olim Mediolani dictum est templum Herculis in petra, quod Maximianus Diocletiani in Imperio collega ibidem extruxit in patria (ut quidam tradunt) sua sumptuosissime, cum Thermis ejusdem nominis Herculeis. Extant adhuc sexdecim striatæ columnæ peraltæ, operis magnificentissimi vestigium, porticus olim seu propylæi Thermarum, aut dicti templi reliquiæ. Sub diversis titulis diversa templa extructa fuerunt Herculi, v. g. Herculi Defensori, Herculi Magno, Herculi Victori, Herculi Musarum.

Ara olim apud Romanos erat Herculis, dicta Maxima, prope forum boarium, nulli inferior; quod ad civium venerationem attinet: nam & jusjurandum apud eam, ac conventa, quæ volebant esse firmiora, peragebant. Inde proverbium: *mehercule*, idem quod certe. Decimas quoque facultatum ex voto illuc non raro offerebant. Mirabile est, quod a Cornelio Tacito de Hercule refertur l. 12. *Gortazes apud montem, cui nomen Sambulos, vota Diis loci suscipiebant, præcipua religione Herculis, qui tempore statuto per quietem monet Sacerdotes, ut juxta templum equos venatui paratos sistant. Equi, ubi pharetras sagittis plenas accepere, per saltus vagi nocte, demum vacuis pharetris multo cum anhelitu redierunt; rursus Deus, quas sylvas pererrave-*

448 *Explicatio Fabularum,*
verint, nocturno visu demonstrat, reperiun-
turque fusa passim fera. Hucusque Tacit-
us. Sic miseris dæmon illudit, ut dum fe-
ras abigit & fugat, ne noceant, semet-
ipsum in Idolo Herculis venerentur.

Creditus etiam fuit Hercules luporum
averruncus, & custos ovium. Hinc agnus
eidem in victimam fuit immolatus; ut te-
statur Antipater his carminibus ex Græ-
co versis:

Mercurius - - - munere lactis

Latatur, mox & dulcia mella capit:
Sed non Alcides, aries vel poscitur a-
gnus

Omnino pinguis victima grata Deo est.
Jure: lupos arcet; sed quid magis utile,
si grex

Custodis cecidit cade, vel ungue lupo?

Erat interdictum fæminis jure sacrificio-
rum; dein, ne per Herculem jurarent, vel
templum ejus ingrederentur, aut sacrificiis
interessent; quia sitienti Herculi, cum bo-
ves Geryonis per Italiam duceret, & po-
tum poscenti respondit mulier, se religio-
nis suæ causa aquam dare non posse. Sed
ad textum redeamus. *In sacrificium Her-*
culis. Aperte simul indicatur, ubi peractum
illud fuerit, Tyri scilicet. Hæc urbs ma-
ritima, cum potenter suum in Oceano im-
perium exercuerit, & extenderit, & ideo
Maris Domina appellata, speciali cultu
ve-

venerata est Herculem, ut inventorem artis nauticæ, & propagatorem celeberrimum. Notitia Sphæræ cælestis omnino nautis est necessaria; hanc Maurus Atlas, & Hercules feruntur primum homines docuisse. Astrolabia, & si quæ alia Matheseos instrumenta navigantibus quam utilia? usum hujus nobis ab Atlante, & Hercule traditum esse in confesso est. Juvabit desuper Diodorum audire; cujus hæc verba sunt. *Atlas Herculem Astrologia quoque scientiam docuit: singularem enim vir ille Astrologorum disciplina curam & operam impendebat, & quia Sphæram siderum artificiose elaboratam habebat, totum humeris suis mundum gestare credebatur.* Eodem modo Hercules quoque, cum doctrinam sphericam ad Græcos transtulisset, præclaram obtinuit existimationem; ut qui mundi onus ab Atlante excepiisset, cum obscure, quid tum accidisset, significaretur. Quod Hercules passim nudus conspiciatur, mos est Nautis haud peregrinus; quin ipsa navis pro vestimento illis est. Quid? quod per Leoninam pellem, qua subinde amictus cernitur, navis possit intelligi. Vide Joannem Fridericum Huart part. 5. cap. 7. Nihil novi Poetis est, pictos Deos, aut bestias pro navibus sumere. In proris navium longarum Herculis Tyrii, atque Gaditani binos comparuisse leones, Ma-

Macrobius testatur Saturnal. l. 20. proris Gaditanæ classis superstantes. Idem paulo ante memoratus Huart docet, per sagittam Herculis revera acum nauticam ad magnetem attritam, intellectam fuisse. Figuræ similitudo non abludit. Notus præterea Herculis Scyphus aut poculum, quo dicitur e Gadibus in Erythiam solvisse. Sed quis ille Scyphus? Macrobius l. 5. Saturn. c. 21. ait: *Poculo Herculem vectum ad Hispania Insulam navigasse, & Panyasis, & Pherecydes auctor est. Ego tamen arbitror non poculo Herculem maria transvectum, sed navigio, cui Scypho nomen fuerit.* Ambigi vix potest, quin opera tam præclara circa navigationem ab Hercule tum facta, tum inventa Tyriis artis nauticæ peritissimis occasionem dederint singulari eundem cultu prosequendi. Accedit, quod putarint Ethnici in Herculis tutela esse terram firmam; hinc colebatur in terrarum finibus prope portus, navalia, fluminumque præcipitia. Confirmat idem Statius Poeta Surrentinum prædium sui Pollii describens, quod ad portum in litore ibidem erat juxta Neptuni & Herculis sacras ades: sic enim canit Sylv. l. 11.

*Ante domus tumida moderator carulus
unda*

Excubat, innocui custos laris, huius amico

Spu-

*Spumant templa salo: felicia rura tue-
tur*

*Alcides, gaudet gemino sub Numine por-
tus:*

*Hic servat terras; hic savis fluctibus ob-
stat.*

Sola hæc causa Herculis colendi sufficiens erat Tyriis; sed quid facinorosum movit Jasonem, ut eum coleret, & tantam pecuniæ vim pro ejus sacrificio mitteret? Diodorus Siculus de decimis Herculi offerri solitis ait: *Dixisse Herculem, eos, qui sibi, postquam ad Deos translatus esset, decimam bonorum dicarent, vitam felicem vikturos, & addit evenisse hoc usque ad sua tempora: multos enim Romanorum non solum mediocri censu, sed & qui ditissimi sunt habiti, decimas Herculi vorisse; posteaque fortunatiores factos bona sua ad quatuor talentorum millia Herculi sacrasse.*

Sed cur nominatim Herculi tanta nummorum summa Tyrum mittitur eo tempore, quo ludi Olympici in honorem Jovis fieri soliti celebrabantur? Serarius ait, Athletas de imitatione Herculis gloriatos, ut Galenus, & Adrianus referunt apud Lipsium, & ideo in Gymnasiis statux & ædiculæ Herculis poni solebant, ut ex Pausania, Dione, & Athenæo licet colligere.

Sub Herculis fabula, uti sub aliis, veritas quædam naturalis latuit: nam Ægy-

ptiorum, Samothracum, aliorumque populorum vetusta religio fuit, ut crederetur Hercules Solis vis, potestas, & varia virtus in inferiora mundi corpora. Est enim ex etymo nominis Hercules idem; quod aeris & terræ gloria, quæ oritur ex illuminatione Solis, qui annuo circuitu per Zodiaci signa duodecim, totidem, ut de Hercule fingitur, obire certamina videtur, atque caloris sui radiis vitalibus generationem & vitam corporibus infundere. Corruptiones ac pestes dispellere putabatur. Hinc sicut alia mundi elementa sub certis Deorum nominibus, ita vim Solis mira in sublevaribus operantem sub nomine Herculis videntur quidam saltem Gentilium adorasse. Verba Porphyrii apud Eusebium sunt: *Duodecim laboriosa certamina effinxerunt, quasi symbolam assignantes duodecim caelestium signorum.* Et l. 3. de præparat. Euang. eo quod mala ab inferioribus hisce Sol procul expellat, *Herculem ipsum dixerunt.*

Forſan hæc de Hercule fabula, uti & multæ aliæ, ex Scripturis, v. g. Sampſonis historia mutilatim & obſcure percepta, & perperam intellecta ſuam traxit originem, ob multiplicem inter utrumque analogiam: ut enim in cunis modo fortis fuit Hercules; ita videtur cum iſtis crinibus Sampſonis robur creviſſe, quod ſatis poſt-

postmodum exercuit, dum portas urbis Gazæ asportavit; sic fores & postes Erebi Hercules diffregit. Victo Geryone, per Latium pergens Hercules sitim passus est; etiam Sampson victis mille Philistæis. Leonem uterque prostravit, a Lena vicissim uterque prostratus. Duas columnas in mari Gaditano Alcides posuit inscribens: *non plus ultra*; duas columnas amplexus Sampson non plus ultra vixit.

In sensu morali Hercules est homo Christianus sub jugum rationis mittens vitiorum monstra, & bestiales appetitus. Alcides pulchre ostendit, quomodo duodecim labores Herculis viro forti & sapienti convenient; quem vide Emblemate 137.

MACHABÆOR. L. II.

C A P. VI. V. 7.

Cum Liberi sacra celebrarentur, cogebantur hedera Libero circumire.

Liberi sacra aliis nominibus vocantur Dionylia, Orgia, Bacchanalia, Liberalia, nocturno tempore a Gentibus peragi solita. Sic major erat turpissimarum libidinum, amorum, stuprorum, cædium, aliorumque facinorum occasio. Unde ipsi

Ethnici ea saepe detestati sunt ac sustulerunt, teste Tertulliano, qui in Apologet. c. 7. ait: *Liberum Patrem cum mysteriis suis Consules Senatus auctoritate non modo Urbe, sed universæ Italia eliminaverunt.* Idem Afer L. de Spectacul. ait: *duo ista demonia Venus, & Liber conjuncta & conspirata inter se sunt ebrietatis, & libidinis. Itaque theatrum Veneris, Liberi quoque domus est.* Sed cur Bacchus Liber est nominatus? Varii varias causas adducunt. Sunt, qui cum Liberum appellatum esse volunt, ob licentiam linguæ; uti Navius: *libera lingua loquemur ludis Liberalibus.* Alii, quod animum curis liberet, pellatque tristitiam. Sic Seneca ait: *Liber non ob licentiam lingua dictus est inventor vini; sed quia liberat servitio curarum animum, asserit, vegetatque, & audaciorem in omnes conatus facit.* Nonnulli Liberum dixerunt, quod in liberis civitatibus coleretur, earumque Symbolum esset; unde & Marfyas ejus minister in civitatibus libertatis fuit indicium. In Bœotia Bacchus omnes civitates liberas esse jussit, & a se conditas Eleutheras appellavit. Plutarchus vel a libertate, quod bibentibus libertatis causa sit, & honesto Baccho licentiores fiant; vel quod Libationem invenerit. Liba, & mella eidem mense Martio offerri solita ex Tibull. 1. licet colligere. Goropius in

In-

Indofcythicis novam prorsus Liberi Patris originem videtur excogitasse. Noe (hunc enim Liberum fuisse asserit) quia omnium populorum pater est, vocatus est a Janigenis suis Liber, id est populos in lucem producens.

Porro quam nefanda & detestanda fuerint hæc Liberi Patris Sacra, horret calamus scribere. Moris erat Autumni tempore Sacra illa solennius observare, ut ex versibus constat nescio cujus Poetæ:

*Tertia succedit Bacchi venerabilis atas,
Sentit adesse novos rustica turba Deos;
Imprimis hilari juvenantem fronte Lyaum,
Est juvenis: juvenes nam facit ille senes.*

Victima Libero Patri offerri solita caper erat, aut hircus. Hinc l. 3. od. 8. ait Horatius: *Voveram dulces epulas, & album Libero caprum.* Cur dulces epulas? supra dixi, mel Baccho offerri solitum. Cur album caprum? quia Superis Diis alba victima immolabatur, ut nigra inferis. Cur caprum? quod vites rodat:

Non aliam ob causam Baccho caper omnibus aris

Caditur - - - Virgil. L. 1. Georg.

Idem confirmat Ovid. l. 1. Fastor.

Rode caper vitem, tamen hinc, cum stabis ad aras,

In tua quod spargi cornua possit, erit.

Vult dicere, tantum adhuc vini supererit,

fit, quod pro more, quando Baccho in
 poenam immolaberis, tua inter cornua pro
 libamine effundi possit. Ritus ac mores in
 sacris Liberi describit ex parte Arnobius
 l. 5. adv. Gentes. *Bacchanalia etiam præ-*
termittamus inania, quibus nomen Omopha-
giis Græcum est, in quibus furore mentito,
& sequestrata posteris savitate circumple-
xis vos anguibus, atque ut vos plenos Dei
numine ac majestate doceatis, caprorum re-
clamantium viscera cruentis oribus dissip-
atis. Moris præterea fuit, ut hedera coro-
 nati Liberum circumirent. Isidorus Hispal.
 l. orig. 19. c. 30. ait: *Nomen corona hac*
ex causa vocatum esse, quod initio circa a-
ras curreretur, atque ad imaginem circui-
tus vel chori est formata vel nominata co-
rona. Et sic videtur mos ille gestandi co-
 ronas a sacrificiis ad convivia delatus esse:
 ut non solum vina & crateres coronarent;
 sed etiam seipsos. Cicero l. 2. de Legibus
 ait: *Sequebantur epula, quas inirent pro-*
pinqui coronati rosis, atque hedera. Quod
 autem in sacris Liberi corona usi fuerint,
 illa videtur fuisse causa, quod inventorem
 coronæ Bacchum fecerint: quia cum præ
 ebrietate vacillaret caput, ipsum mitra seu
 fascia astringere est solitus. Hinc factum est,
 ut quod primo necessitatis causa assumptum
 fuerat, in ornamen postea transferit, & usum
 sacrum, ut Ovidius testatur l. 3. Fastorum:

Ille

Machab. L. 2. c. 6. v. 7. 457

*Ille dies hac est, qua te celebrare Poetae,
Si modo non fallant tempora, Bacche,
solent:*

*Festaque odoratis innectunt tempora sertis,
Et dicunt laudes ad tua vina tuas.*

Serta autem illa in Bacchi honorem gesta
fuisse ex hedera constructa, ex Scripturis
patet, & aliis Authoribus. Aurelius Ne-
mesianus ita Bacchum alloquitur Eclog. 3.

*Te cano, qui gravibus hederata fronte co-
rymbis*

*Vitea sertis plicas, qui comptas palmitibus
tigres*

Ducis odoratis perfusus colla capillis,

Vera Jovis proles.

Ovid. l. 6. Fastor.

*Bacche, racemiferos hedera redimite ca-
pillis.*

Hinc mirum non est, Poetas, qui enthu-
siasmos suos Baccho acceptos referunt, a-
masse hedera, & eadem ornari petiisse.
Sic Tibullus:

*Candide Liber ades, sic sit tibi mystica
vitis,*

*Sic hedera semper tempora vineta fe-
ras.*

Ovidius l. 1. Trist. Eleg. 6.

*Deme meis hederas, Bacchica sertis, co-
mis.*

Idem l. 3. Fastorum causam hederæ Bac-
cho gratæ recenset:

CW

Cur hedera hac cincta est? hedera est gratissima Baccho:

Hoc quoque cur ita sit, dicere nulla mora est.

Nisades Nymphas, puerum quarente No-verca,

Hanc frondem cunis apposuisse ferunt.

Fellus ait: *Hedera in tutela Liberi Patris putatur esse: quia ut ille semper est juvenis, ita hac semper viret.* Aliam causam affert Plinius l. 16. c. 5. *Ferunt primum omnium Liberum Patrem imposuisse capiti suo ex hedera coronam; postea Deorum honori sacrificantes sumpsere, victimis simul coronatis.* Usus autem est Liber corona ex hedera, ut qui potionem invenerat, & illa mala depelleret, quæ ex potionem causantur, & qui inventor fuerat artis; & vini, author idem & remedia prescriberet, ut Plutarchus notavit dec. 3. *sympos. problemat. 1.*

Sed cuius mali remedium esset hedera? Illius scilicet, quod ex nimio calentis vini usu solet provenire: hedera enim æstum temperat, & naturam refrigerat. Effectum hunc hederæ impugnat & refellit Ammonius apud Plutarch. *problem. 2.* docens, naturam hederæ esse calidam; 1. quod absque vino ebrietatem inducat. 2. Quod rami ejus crispentur, & hanc crispationem caloris signum esse ait. 3. Quod nix in
fron-

frondibus hederæ liquefiat & defluat. 4. Quod semper sit viridis; hic autem viror ex caloris & pinguedinis copia nascatur. Ex his infert, Bacchum fuisse usum hedera, non quod existimarit illi vim inesse ad vim vini retundendam; sed quod eam usurparit vitis sibi amicæ loco, quæ toto anno non virescit: hederæ enim nonnullam vitis præfert similitudinem; sicut vinum qui amant, cum eo carent, fictitio utuntur. Sed conjecturas Ammonii erudite dissolvit Eraton. Primo enim videtur manifeste contraria esse experientia. 2. Non causat ebrietatem hederæ, si sola, vel potum mixta sumatur, sed perturbationem, & quasi delirium, ut aliæ quædam herbæ. 3. Crispatio ex imbecillitate oritur; hinc adminicula quærit. 4. Nix liquefcit ob humorem e foliis hederæ provenientem. 5. Viror perpetuus communis est etiam Myrto, & Adianto ex natura frigidis. Potius ex æquabili temperamento, & meatuum symmetria secundum Empedoclem oritur. Adstipulantur Eratoni Dioscorus, & Plinius: hic enim clarissime l. 14. c. 10. dicit. *Hedera mentem turbat, caput purgat largius pota, nervis intus nocet, iisdem nervis adhibita foris prodest; omnia genera ejus refrigerant, capitis dolorem sedant.* Sed perinde forsan erit, frigida sit hederæ, an calida; sive vini acrimoniam frigore suo

re-

retundat, five poros & meatus ad vini vapores exhalandos suo calore aperiat; cum utroque modo ad malum, quod e vino subinde oritur, pellendum juvet, & hoc titulo Libero Patri placeat, ut tam Evergetis, quam Alexicaci nomen habeat.

Sequitur in textu; *Cogebantur hedera coronati circumire Libero*. Usitatus fuit apud Gentiles in sacrificiis circuitus. Hinc Prudentius in hymno de S. Romano ait: *Furere ac rotare ius putatur mysticum*. Symbolum Pythagoræ fuit, Deum adorandum circuitu corporis. Plutarchus tamen hoc symbolum non Pythagoræ; sed Numæ Regi adscribendum esse dicit, qui & multa in Numa cognitione digna de vertigine in sacris refert. Leges Numæ sic habent: *Libes Diis ex vite non putata; ne sacrifices sine farre; circumagas te, dum Deos adoras, sedeas, cum adoraveris*. In Cypro coli solitum legimus Jovem Ilapinastē; ἰλας latine ordo, vel acies &c. quo nomine ordines intelligunt ac vertigines, quos juniores ederent in Choris. Virgil. l. 4. *Æneid*.

Instaurantque choros, mixtique altaria circum

Cretesque, Dryopesque fremunt, piætiq; Agathyrsi.

Confirmat hæc Plinius l. 28. natur. histor. c. 2. *In adorando dextram ad osculum referi-*

ferimus, totumque corpus circumagimus, S. Ambrosius serm. 10. de eo, quod scriptum est: Quis major est in regno cælorum? ait: Quoniam molam asinariam saxum esse constat, videamus, si etiam Paganorum talis est mola. Talis plane est. Saxi enim mola est Paganorum Jupiter, Herculesque lapideus, circa quos cæcis oculis frequenti errore circumveniunt.

Sed quas causas hujusmodi circuitus Gentiles habuere? opinantur aliqui vertiginem hanc a Pythagora ideo institutam, vel quod sacrificantes cælum quodammodo imitarentur; illud enim continua vertigine agitur: vel quod ea cæli circulatione terrena averti viderentur. Putat Revelin, Gentiles hoc symbolo prudentiam circa divinas preces indicare voluisse & circumspeditionem; ne in nos jure retorqueri posset: *Nescitis quid petatis.* Vide Lil. Gyrald. in dicta Pythag. Plutarchus in vita Numæ ait, conversionem adorantium simulacrum mundi esse. Idem Author inquit, per circuitum illum denotari, nihil esse in rebus humanis stabile. Ejusdem inconstantie symbolum erat rota, quæ in Deorum templis verti solebat, ut Clemens Alexand. refert l. 5. Strom.

Observandum hic est, non perinde fuisse Gentilibus, quam partem versus circuitus ille inciperet, ut Possidonius Stoicus

notavit apud Athenæum l. 4. Gymnosoph. de Celtis: Deos adorant ad dextram conversi. De Romanis idem testatur Plutarchus in Camillo scribens: *Simul atque ita factum est, ut in more est Romanis, a precibus & veneratione Deorum sese convertere dextrorsum.* Rhodiginus observavit l. 1. Antiq. Lect. c. 1. *In Græcorum monumentis adnotatum est nobis, morem sacrificandi servatum diu, ut circumcurrerent aras, cursum auspicati a levo dextrorsum, Zodiaci quadam imagine, cujus motio sit mundo diversa ad exortum vergens; mox vero a dextris levorsum procurrerent, quo motu cælum rotari, manifestum.* Hoc est, quod apud Senecam legisse me memini, Sapientem quoad cursum vitæ, motum siderum observare, & contrarium mundo iter intendere.

In sensu morali noverit quivis Fidelis Christianus, utilem & necessarium sibi esse varium in rebus sacris circuitum. 1. Ut fidem suam operibus confirmet: nam in illud Psal. 25. *Circuibam Altare tuum Domine,* ita ait B. Bruno Herbipolens. Episcopus: *Altare significat fidem, quam circumdare est bonis operibus ornare.* 2. Offerat se Deo paratum ad omnia, exemplo L. 3. c. 15. Thomæ Kempensis: *In manu tua sum ego, gyra & reversa me per circuitum, en servus tuus sum ego &c.* 3. Ad bona aliorum ex-

ex-

exempla attendat. *Circuire enim debet vir* Hugo
justus bona aliorum, ut gaudeat; mala a- Carenf.
liorum, ut flet. 4. Ex omni parte sit cir- in Psal.
cumspectus, more animalium ab Ezechiele 26.
visorum, de quibus S. Gregorius: *Corpo-* In Ezech.
ra animalium idcirco plena oculis descri-
buntur, quia Sanctorum actio ab omni par-
te circumspecta est, bona desiderabiliter pro-
videns, mala solerter cavens, que inferre no-
bis conatur diabolus adversarius noster, qui
tanquam Leo rugiens circuit, quarens, quem
devoret.

LIB. MACHABÆOR. II.

CAP. IV. V. 33.

Ipse (Onias) in loco tuto se continens
Antiochia secus Daphnem.

DE loco Daphnes egissem modo Numer.
cap. 34. ubi dicitur, *in Rebla contra*
fontem Daphnim; si certum esset, eundem
esse locum cum loco celeberrimo Daphnes
Antiochenæ. Intelligit quidem S. Hieron.
per Reblam Antiochiam, sed Bonfrerio
nostro non placet S. Hieronymi explicatio:
ait enim, Josephum l. 4. belli Jud. cap. 1.
meminisse alterius Daphnes ad Semechoni-
tem lacum, quem medius præterfluit Jor-
da-

464 *Explicatio Fabularum*,
danis . Lacus ille vocatur in Scripturis a-
qua *Merom* , quem locum amœnum esse ,
ut est locus *Daphnes* Antiochiæ , testatur
Adricomius , qui per *Daphnem* Numer.
34. putat intelligi debere locum a Josepho
assignatum . Sed hac controversia præter-
missa , de *Daphne* Civitatis Antiochenæ
suburbio pauca quædam hic opportune ve-
niunt annotanda .

Daphne est amœnum & ambitiosum An-
tiochiæ suburbium , ut Ammonius loquitur .
Quod in Italia Bajæ , ad Alexandriam Ca-
nopus , id videtur fuisse in Syria deliciosus
Daphnes locus , de quo hæc Strabo habet
l. 16. postquam de Antiochia egisset . *Ulte-
rius est Daphne ad stadia 40. mediocris
rivus , & lucus ingens , & opacus , fonta-
nis aquis irriguus , in cujus medio est fanum
Apollinis & Diana , & asylum .*

Fabula de *Daphne* ab Ovid. l. 1. Me-
tam. descripta hæc est : Fingitur illa fuisse
filia Penei fluvii , quam venusta , tam pud-
ica . Vix illam Phœbus conspexit , illico in
amorem ejus adeo exarsit , ut nulli parfe-
rit labori , quo posset suo satisfacere desi-
derio . Sed *Daphne*

*Nec quid hymen , quid amor , quid sint
connubia , curans ,*

expers thalami vivere & mori statuebat .
Sed cum Phœbus a suo non desisteret pro-
posito , magisque illud urgeret , præsidium
ca-

castitatis in pedibus quæsit Daphne, & cum insequentem procum non posset effugere, oculos in undas Penei parentis conjiciens, in Laurum mutari petiit, & obtinuit.

Hujus Daphniticæ fictionis ansam aliquam Leucippus videtur tribuisse: ille enim Ænomæi Pisæ Regis filius Daphnem virginem deperiit; sed cum finem suum non posset obtinere, ut Pausanias refert l. 8. in Ariad. religata more virginum coma, & muliebriter indutus cum ea conversari cœpit & amari. Daphne a corrivali admonita est, ut ad natandum secum, & cum suis virginibus in Ladone fluvio etiam recusantem Leucippum pertraheret, quod & factum est; sed marem agnitum sociæ Daphnes sagittis & pugiunculis confecere. Finis historiæ non congruit fabulæ; nec mirum sit, cum illa tantum sit rude quoddam & fugiens historiæ vestigium.

Melius forsan dixeris, virtutem, sympathiam, & energiam rerum naturalium sub Daphnes, & Apollinis nomine cultam esse. Daphne enim idem est, quod laurus: hæc filia dicitur fluvii Penei: quia ad illius oras frequenter nascitur, ab eodem alitur & conservatur. Apollo Daphnem amat, & Sol Laurum: cum enim hæc igneæ sit naturæ, uti Sol, sympathiam inter se habent amoris conciliatricem. Per

incallescens Apollinis desiderium, & Daphnes repudium intelligi potest calor & æstus Solis, quo inflammare Laurum cupit, ut vigorem & virorem amittat; Laurus vero non cedit, & nihil horum amittit: quod autem Daphne in undas Penei parentis oculos conjiciat, & juvari postulet, est, quod Laurus ab humore fluvii confortetur, ne languescat & deficiat. Mutatio autem in Laurum potest triumphum Daphnes de calore & æstu Solis significare.

Optime dixeris, Diabolum hunc Daphnes locum seu lauretum jucundissimum, & cum fontibus esset irriguum, lavandis corporibus idoneum, & cum umbrosum valde fuerit, tegendis impudicitis aptissimum selegisse, ut sub Apollinis, & Dianæ simulacris tanquam Deus a gentili populo coleretur. Promovit hunc sui cultum per Phœbadum vaticinia. Hæc qua arte ac dolo primum in orbem introduxerit, refert Diodorus Siculus de Oraculo Pythico. Certum est, Apollinem Daphniticum ab Oraculis fuisse famosissimum; & hinc tantopere increvit loci illius religio, & summa tam apud populum, quam Reges ac Cæsares æstimatio. Templum ibidem Apollinis erat, quo vix ullum magnificentius, aut donariis locupletius. Statuæ in eo plurimæ, ex auro solido & argento, magni ponderis & artificii, a Regibus & Prin-

Principibus erant repositæ, cum aliis donariis pretiosissimis, quæ ab omnis status hominibus religionis causa in Sacrariis erant recondita. Pausanias refert, sceleton athenum artificii admirandi appensum tholo templi fuisse ab Hippocrate. Dirutum quinquies fuisse tradunt historiæ, & dirptum sæpius. Nero Imperator ex templo quingentas athenas statuas abstulisse fertur, mactasse homines Deo, & mortuorum corpora in hiatum projecisse. Tandem sub Juliano Imperatore fulmine tactum, & funditus eversum, in cujus ruinis & incendio periit excellenti opere facta statua Apollinis deaurata. Hæc ab Authore in actis Artemii Martyris ita describitur: *Ex vite* (lapide verisimilius secundum Libanium) *erat corpus compositum, admirabili quadam arte ita comparatum, ut præferret speciem adolescentis, auro autem illius totus, quo induebatur, amictus, nudatus, & non auratis ceteris partibus corporis, ostendebat quandam, quæ dici non potest, pulchritudinem: Stanti vero erat in manibus cithara, & eam videbatur pulsare; coma autem & Lauri corona auro florebant permixto, ut magna effulgeret gratia spectatoribus, duoque magni hyacinthi implebant ei figuram oculorum in memoriam Hyacinthi pueri Amyclai; & gemmarum pulchritudo & magnitudo imagini maximum affe-*

rebat ornatum, adeo ut quamplurimis in eo decipi contingeret, ut qui propter apparentis formæ pulchritudinem inescarentur ad eum adorandum, quod quidem ipsi Juliano evenerat. Majorem certe ei cultum exhibebat, quam aliis omnibus imaginibus, ex singulis generibus ei sacrificans, & ab eo expectans responsa. Hæc Author ille.

Confirmat eadem Zonaras: Julianus frequentabat Daphnem, in qua simulacrum Apollinis mirifica artis dedicatum erat, crebro ibi sacrificabat, ut Antiocheni sacrificulum ad se venisse dicerent, non Imperatorem. Idem Daphnæ Apollini integras hecatombas oraculi impetrandi ergo immolavit.

Laurus sacra fuit Apollini, vel ideo specialiter, quod dandis serviret oraculis. Alii alias assignant causas, v. g. quod non sit obnoxia fulmineis ictibus. Hinc refert Plinius, quod Tiberius Cæsar cælo tonante solitus sit Lauro coronari. Diodorus Siculus hanc allegat rationem, quod Apollo hanc plantam primo invenerit. Phor-nutus, quod Laurus facile incendatur, & ad purgationem sit imprimis idonea; proinde arbor hæc jure Deo mundissimo ac flagrantissimo sit dedicata. Quartæ huic assentitur Eusebius, sed primæ Lactantius Grammaticus, propter vim scilicet divinandi. De Luru Tibullus l. 2. eleg. 6. ita canit:

Tu

*Tu procul eventura vides, tibi candidus
augur*

Scit bene, quid fati provida canter avis.

*Tuque regis sortes, per te presentis Haru-
spex,*

Lubrica signavit cum Deus exta notis.

Hinc & Aphtonius Laurum ait esse divinationis symbolum, & Fulgentius ex relatione eorum, qui de somniorum interpretatione scripserunt, Laurum sub dormientium capita appositam vera somnia causaturam. Utuntur præterea in prædictionibus suis Laurus Augures: nam,

Si tacet extincto Laurus adusta foco,

Ut Propertius ait l. 2. eleg. 29. inauspicatum fore rei exitum ominantur; bonum vero ac felicem, si sonitum edat: quod ex Tibullo confirmatur, qui sic ait lib. 2.

*Ut succensa sacris crepitet bene Laureæ
flammis,*

Omne quo felix, & sacer annus eat.

*At Laurus bona signa dedit, gaudete co-
loni,*

Distendet spicis horrea plena Ceres.

Hinc volunt aliqui, græcum nomen Daphne derivari a particula δα, quæ intentionem vel augmentum notat, & a verbo φωνήν, vel φωνή, id est, vox, quod Laurus in igne vocalis sit a crepitando, ut Lucretius l. 6. ait:

470 *Explicatio Fabularum,*

Nec res ulla magis, quam Phabi Del-
phica Laurus

Terribili sonitu flamma crepitante cre-
mat.

Hi sonitus cessarunt paulatim, & ipsa Apollinis oracula obmutuerunt, postquam in vicinia Daphnes S. Babylæ Martyris, reliquæ, capsulæ cuidam inclusæ fuerunt repositæ. Multis precibus & victimis institit Julianus Apostata, ut resciret causam silentii, accepit tandem hoc responsi a Dæmone: *Daphnes locus cadaveribus sca-*
tet, id quod oraculum arcet. Non ausus est dicere, Martyris vicinia os sibi obstru-
ctum esse, ne cultoribus suis foret ridicu-
lus, ut bene notavit S. Chrysost. l. contra
Gentiles. Hinc auferri iussit Julianus ca-
psulam cum Reliquiis Martyris, & ab
Antiochenis in urbem suam deportari. Sed
cur non attrivit, & exussit illam? quærit
idem Sanctus; horribiles pœnæ, quæ a
Deo inflictæ erant avunculo ejus, & Felici
præfecto ærarii, exterruerunt eum. Vide
Baron. in annum Christi 362.

In sensu morali Daphne est anima fon-
te baptismatis in Christo regenerata, quæ
mundi, & carnis persecutiones patitur; sed
fixum habet, constanter toto vitæ suæ tem-
pore virginem castam exhibere Christo...
durante tamen, & invalescente tentatio-
num æstu, ne viror castitatis, & vigor pa-
tia-

tiatur, ad humorem mittet radices suas, Jerem. 6.
 & non timebit, cum venerit aestus. Imo in 17.
 lavacrum Sanguinis, & fontem regeneratio-
 nis suæ demergi desiderat, aut mutari in
 Christum, ut cum Apostolo possit dicere:
*Vivo ego jam non ego, vivit vero in me
 Christus.*

M A T T H Æ I

CAP. IX. V. 23.

*Cum venisset Jesus in domum Principis,
 & vidisset tibicines.*

MAcrobius l. 11. in Som. Scip. c. 3.
 ait: *Mortuos ad sepulturam cum
 cantu prosequi oportere, plurimarum gen-
 tium vel regionum instituta sanxerunt.* Hunc
 cantum ornabant & distinguebant tubæ &
 tibæ; quanquam tubæ sonantiores in fune-
 re virorum, ac nobilium adhiberi solerent;
 tibæ vero exilioris sonitus in puerorum, &
 plebejorum exequiis. Testatur idem Ale-
 xander ab Alexand. l. 3. c. 7. *Senatori-
 bus patitiis, summis Ducibus tuba; mino-
 ribus, & plebeiis exequiali tibia caneant ti-
 bicines.* Et Servius in l. 5. *Æneid.* Scien-
 dum, majoris ætatis funera ad tubam sole-
 re proferri; minoris vero ad tibias. Quan-

quam non semper id servatum fuerit: nam Suetonius tibiæ meminit in funere C. Julii Cæsaris cap. 83. Tibicinum pariter, & cornicinum Seneca in funere Claudii. Ovid. lib. 5. Trist. eleg. 1. fortunam suam extenuans, non tuba, ait, sed

Tibia funeribus convenit ista meis.

Videtur proinde tuba funeribus duntaxat indictivis fuisse adhibita; tibia vero promiscue omnibus, quibus etiam communes erant Næniæ ad tibiam cantari solitæ. Ovidius l. 6. Fastorum refert, quanti, & a quibus fierent, & quot tibicines fuerint adhibiti.

*Temporibus veterum tibicinis usus avo-
rum*

*Magnus, & in magno semper honore
fuit.*

Cantabat fanis, cantabat tibia ludis,

Cantabat mœstis tibia funeribus.

*Dulcis erat mercede labor; tempusque
secutum est,*

Quo subito grata frangeret artis opes.

*Adde, quod Ædilis pompa qui funeris
exit,*

Artifices solos jusserit esse decem.

De eodem numero tibicinum meminit Cicero l. 2. de legibus. Tibicines vero solitos fuisse adhiberi puerorum funeribus, & a quo mos ille institutus fuerit, refert Statius l. 6. in exequiis Archemori,

Tum

*Tum signum luctus cornu grave mugit
adunco
Tibia, cui teneros suetum traducere Ma-
nes,
Lege Phrygum mæsta, Pelopen monstrasse
ferebant
Exequiale sacrum, carmenque minoribus
umbris
Utile, quo geminis Niobe consumpta pha-
retris
Squalida bis senas Sipylon deduxerat
urnas.*

In hunc Statii locum ita ait Lactantius
Placidius: *Fubet religio, ut majoribus tuba,
minoribus tibia caneretur.* Cantores illi Si-
ticines vocabantur. Sic enim A. Gellius
l. 20. cap. 2. ait: *Nos autem in Capitonis
Atteji conjectaneis invenimus Siticines ap-
pellatos, qui apud sitos canere soliti essent,
hoc est, vita functos, & sepultos.*

Sed quæ causa erat funeribus adhiben-
di cantum, tubas, & tibias? 1. Ut suis
modis luctum excitarent in vicinis & ami-
cis, ait Lucianus in Dialogo de luctu.
Hinc tibias audire non licebat Flamini
Diali, ut Festus author est: *Funebres ti-
bia dicuntur, cum quibus in funere cani-
tur, quas audire Flamini Diali putabant
illicitum.* 2. Boethius in proœmio musices
inquit: *Ut cum cantico dulcior fiat causa
flendi.* 3. Hyginus in historia fabulari re-
fert,

fert, hoc sensu a Tyrrheno Herculis festum institutum, ut cum sepelirentur mortui, populus sono conchæ pertusæ convocaretur, cerneretque, non jam Tyrrheni comites devorare homines, ut ante, sed sepelire. Sic & Romani tibicinum cantu convocabant amicos, testandi gratia, mortuum neque veneno, neque ferro periisse. 4. Fortasse & spectra ferali cantu volebant abigere: nam eum in finem olim, si quis fuisset mortuus, æra & campanas fuisse pulsata, annotavit Scholiastes Theocriti: quod is sonus credebatur spectra, & Dæmonum ludibria avertere. 5. Macrobius loco superius citato ait, Gentiles cantu in sepultura usos ea persuasione, *qua post corpus anima ad originem dulcedinis musica, id est, ad calum redire credantur*. Hæc causa Platonicum dogma redolet. 6. Alexander Aphrodisius in Problemat. Polyd. l. 6. c. 10. de invent. *Cum tubis tibia quoque ac tympana adhibebantur, & ea omnia, ut hominum mortuos lugentium animi languentes tali sono excitati minus dolorem sentirent, qui iis oblectamentis facile distrahi soleant*. Cur tuba mortem præsignificet, subtilem interpretationem dat Artemidorus, quod illa ex ossibus facta notet te in cineres & ossa iturum. Verba ejus sunt: *Composita est enim ex osse, & are*. Porro, ut ab Hier. Magio observatum est, tubæ

ac tibiæ mortuales ceteris latiores & longiores erant, quales in antiquorum sepulchris exsculptæ videntur, ut sonum gravem funeribus proprium possent edere. Galeno enim instrumenti latitudo causa gravitatis est in cantu tibiæ, tubarumque: de quo plura videri possunt apud Magium l. 1. miscell. cap. 13.

Præter tibicines, erant in funeribus mortuorum præficæ, *ut quæ conductæ plorant in funere*, ait Horatius, & carmen aliquod lamentabile & inconditum insonabant, ad deplorandum & collaudandum mortuum accommodatum. Carmen illud latine Lessus vocatur, Græce Nænia, id est, carmen, ut Festus ait, quod in funere laudandi gratia cantatur ad tibiæ. Præficæ secundum Varronem ideo dictæ, quod planctui præficerentur; hæ laudes defuncti & præclara recensabant facinora, tundeant pectora, ejulatus lugubres edebant, in amicis & vicinis dolorem ambiciose provocabant. Hunc morem parentandi defunctis videntur Judæi didicisse à Gentilibus, quibus immixti sæpius vivebant. Eundem insinuat Jeremias C. 9. ubi dicit: *Vocate lamentatrices, & veniant, & deducant super nos lamentum*. Propterea David Ps. 77. *Juvenes eorum comedit ignis, & virgines eorum non sunt lamentatae*. Alii magis proprie explicant, *Et Virgines*

gines eorum non sunt laudatae.

Apud Christianos tibicinum, & præficarum loco olim Psalteria erant substituta, quæ Psalmos canebant. Meminit illorum Justinianus Novell. l. IX. Div. Hieronym. in Epitaphio Paulæ testatur, Christianos in funere & exequiis suorum cecinisse Alleluja, quæ vox est gratulantis potius, quam lugentis. Idem asserit S. Chrysost. Homil. 4. ad Hebr. „Dic mihi, quid „sibi volunt istæ lampades tam splendidæ? „nonne sicut Athletas mortuos comitamur? „quid etiam hymni? nonne ut Deum „glorificemus, eique gratias agamus, „quod jam coronarit discedentem, quod „a laboribus liberarit, quod a laboribus „liberatum jam apud se habeat &c. „Imo idem S. Orator l. c. non dubitat affirmare, Deum ipsum voluisse & approbasse Psalmodiam in Christianorum funeribus, ad evertendam illam perversam consuetudinem plangendi & inconsolabiliter lugendi mortuos. Lugeant, lamententur & deplorent suorum obitus Gentiles,

2. *Thess. sicut & ceteri, qui spem non habent.*

c. 4.

Dei servum non decet fratrum suorum mortem nimium deslere, nec ob instans fatum suum contristari. Non enim dolet, sed exultat nauta, & potius celeusma canit, si portum attingit; miles ovat peracto prælio, & triumphat; gaudet exul & pere-

re-

regrinus aditu patriæ; inclusus carceri patiente porta; cursor, & viator termino; laborum fine operarius. Jam vero iustis mors portus, finis agonum, introitus patriæ, janua, meta, quies.

ACT. APOSTOL.

CAP. VII. V. 43.

Suscepistis Tabernaculum Moloch, & Sidus Dei vestri Rempham.

QUis Deus per Moloch in Scripturis intelligatur, alibi explicatum est. Quale vero idolum per Rempham significetur, obscurum plane ac dubium est. In Hebræo textu nomen Rempha non legitur, sed Chium imaginum vestrarum. Videntur proinde 70. Interpretes addidisse *ρῥμφα*, nomen forsan tunc magis notum, quam Chinan, vel Chyon. S. Hieronym. ait pro Rempham alios Rompha, alios Repham, vel sine diphthongo, vel cum illa, alios Rephon legere. Volunt aliqui primo nomen illud derivari ab Hebraico *Rapha*, quod est *sanare*, eo quod crederetur idolum illud morbos sanare. Alii censent *Rephan* significare *Gigantem*; sic enim Syri Deum suum vocare solebant *Gigantem* *sa*.

ſaculorum. Fundamentum illud aſſerendi ex eo ſumunt, quod putent *Rephan* oriri ab Hebraico *Rapha*, qui fuit pater Gigantum, & hinc Gigantes *Raphaim* nominantur.

Recentiores Hebræi judicant Saturnum fuiſſe. Is enim ab Arabibus, & Perſis *Kivan* appellatur, quod videtur idem eſſe cum *Kevan*, & *Rephan*. Ribera Jovem fuiſſe cenſet, qui habuerit ſtellam in vertice. Oecumenius ſtellam iſtam Luciferum fuiſſe opinatur; ſed in fronte Moloch; nam ſimulacris ſtellas ſubinde affixas fuiſſe ex eo poteſt colligi, quod Romani ſimulacro Julii Cæſaris ſtellam in vertice legantur addidiſſe, ut Suetonius meminit in vita ejus cap. 88.

S. Hieronym., Remigius, Albertus, Beda, Lyranus, Gloſſa interlinearis, alique cenſent fuiſſe ſtellam Veneris ſive Luciferum: hanc enim ſtellam quaſi Reginam cæli Syri olim coluerunt. Illam pariter, teſte Hieronymo in vita S. Hilarionis, venerati ſunt Saraceni. Cultus illius idololatrici occaſionem dedidiſſe videtur eximius ſplendor ſideris, & fidele ſatellitium, quod imperatori ſiderum Soli præſtat, orientem præcurrendo & nuntiando, occidentem ſubſequendo; ſiquidem ſidus illud Rempham fuerit, de quo cum nihil certi poſſit ſtatuī, ad alia progredior.

ACTOR.

A C T O R.

CAP. XIV. V. 11.

Vocabant Barnabam Jovem , Paulum vero Mercurium .

PLUS fundamenti & rationis non tantum ex præfenti Capite , sed alijs etiam Scripturæ locis nobis suppetit , cur Paulus dictus sit Mercurius , quam Barnabas Jupiter . Lyranus existimat , ideo forte Barnabam fuisse a Barbaris Jovem appellatum , quod esset statura & ætate grandior ; Paulus vero parvo & contracto corpore : hinc tricubitalem eum nominat S. Chrysost. & Paulus ipse 2. Corinth. 10. de se refert , Epistolas suas videri quidem alijs graves & fortes ; sed præsentiam corporis sui infirmam . Notat præterea S. Chrysost. fuisse Barnabam vultu joviali , & pulchro , benignum , moribus liberalem , & beneficum . Sic Deorum maximus , & optimus dictus est Jupiter ; quod sit juvens pater ; & ideo Maximus , quia Optimus , id est , beneficentissimus : quia , ut ait Cicero , *Majus est , certeque gratius prodesse omnibus , quam opes magnas possidere .* 1. 2. de nat. Deorum . Beneficentia hominem Deo

Deo reddit similem . *Estote misericordes , sicut & Pater vester celestis misericors est . Esto calamitoso Deus* , ait S. Greg. Naz. de cura pauperum . Et ad Cives Nazianzenos de Beneficentia : *Licet tibi nullo labore Divinitatem assequi* . Ad hæc videtur Barnabas sua specie & gravitate adstitisse quasi silens Paulo , ut Jupiter Mercurio , velut nuntio & præconi suo .

Sed cur Paulus dictus est Mercurius ?

Quoniam ipse erat dux verbi , ait Scriptura . Habitus fuit Mercurius Deus sermonis & facundiæ , Maje & Jovis filius , hoc est τὸ ὄν , ἡγεὶς ὁρμήσεως : eo quod ex mente & prudentia fiat oratio : vel ut Phornutus ait , ex Maja est natus , id est , ex speculatione & inquisitione . Maja enim sic dicta est , quod scrutando & inquirendo partus mentis in lucem producat . Juvenis fingebatur , quod oratio non senesceret ; formosus , non tamen fucatus & comptus ; sed nativa quadam virtutis specie , vultu hilari , acribus oculis , in basi quadrata , ob firmitatem & robur veri sermonis , capite & pedibus alatus , quod alacer per aerem sermo feratur &c. Quis inter omnes Evangelii præcones Paulo fuit in rerum celestium cognitione sublimior ? quis Apostolo in dicendo eloquentior ? Exemplum nobis affert Aratus Diaconus l. 2. in Act. Apostol. *ἡ ἀντιπαράστασις τοῦ εὐαγγελίου*

Ingeniis claras & linguis Paulus Athenas

Ingreditur, tumidamque feris conflictibus urbem

Eloquii torrente premit &c.

Tradit S. Chrysostomus homil. 3. in 1. ad Corinth. disceptatum fuisse inter Ethnicos, an Paulus Platoni, cujus doctrinæ gravitatem & subtilitatem imprimis venerabatur, præferendus esset?

Mercurius Græcis dictus est Hermes ἀπὸ τῆ ἐρμηνεύειν, ab interpretando, quod interpres Deorum fuerit. Quam fideliter Paulus manifestavit nobis & explicavit, quæ didicit per revelationem D. N. J. C. ? Aliqui putant, Mercurium sic nuncupatum, quasi *Medicurrum*; quod oratio inter loquentes duos currat & reciprocetur; vel quod *medius* inter Deos & homines tanquam ipsorum nuntius currat. Hinc & *Caduceator* seu *Caducifer* dicitur, legati pacifici exemplar: quia medius imos summosque conciliat. Apostolum inter Deum & homines, Christum inter & Fideles nuntium & legatum extitisse, & quidem caduciferum seu pacis nuntium, probatione non indiget; cum id certo ex ejus nobis constet Epistolis. Ait enim ad Ephes. cap. 6. *Se pro Evangelio legatione fungi in catena*; & ad Corinth. 2. cap. 5. *Pro Christo legatione fungimur, tanquam Deo*

H h

ex-

482 *Explicatio Fabularum,*
exhortante per nos, obsecramus pro Christo,
reconciliamini Deo.

Fingitur præterea Mercurius in manu Virgam habuisse, qua posset ex Orco Manes evocare, fuisse rei mercatoriae & artis furandi præses &c. Quomodo S. Paulus animas ex inferni faucibus eripuerit, quæ spolia fecerit, instar lupi rapacis, quam pio dolo Fideles ceperit &c. non est operæ pretium pluribus demonstrare; cum ex dictis sat superque appareat, quam merito dictus sit Paulus a Gentibus Mercurius.

ACT. APOSTOL.

CAP. XIV. V. 12.

*Sacerdos quoque Jovis, qui erat ante civitatem, Tanros, & Coronas ante januas
afferens cum populis volebat
sacrificare.*

CAusa divini hujus cultus erat, quod Paulus claudum ab utero matris suæ recte fecerit ambulare; cum enim Lystram veniens eundem intuitus adverteret, quod fidem haberet, ut salvus fieret, dixit voce magna (Arati Diaconi verbis ator)

Surge citus, relictisque tuis imponere plantis.
Exe-

Exequitur præcepta salus , & calle novello

Progreditur persona senex , motuque frequenti

Pulsat ubique solum ;

----- quod ut agmina cernunt ,

Exclamant , Divumque vocant ; ac fersa ministrant ,

Ut mactanda feri procedat victima tauri .

Fuit hæc malefana Gentilium persuasio , ut eos homines , quos mira quædam , & naturæ vires excedentia patrare conspicerent , tanquam Deos adorandos esse censerent . Ita legimus Danielis cap. 2. v. 46. quod Nabuchodonosor Rex Danielem somnii sui interpretem cadens in faciem adoravit , & hostias , & incensum præceperit ut sacrificarent ei . Sic Paulo Thaumaturgo taurorum , & coronas a Jovis sacerdote allatos esse , ex titulo cognovimus . Virgil. 3. Æneid. etiam meminit taurum Jovi immolatum fuisse ,

----- Superoque nitentem

Calicolum Regi mactabam in litore taurum .

Sed hic sacrificulus tanquam ignarus Juris Pontificii reprehenditur ab Evangelo apud Macrobius , eo quod vetitum esset Jovi taurum immolare ; cujus rei Authores citat Attejum Capitonem , & Labeonem summos juris consultos ; ex quibus ille , si

id fieret, piaculum affirmabat. Excusandus Virgilius; narrat enim ut rem insolitam, & ex qua prodigium sit factum, ut notavit Servius.

Coronæ olim publico decreto ab Ethnicis erant Diis dicatæ, testandæ pietatis gratia, aut ostentandæ, nulli vero mortaliū dicabantur nisi universis. Plinius l. 16. *Antiquitus quidem nulla corona, nisi Deo dabatur; ob id Homerus calo tantum eas, & pralio universo tribuit; viritum vero, ne in certaminibus quidem, nulli.* Hinc coronas Deo dicatas Suetonius sacras nominat. Nero propterea easdem Templis detractas circumponendo lectis suis, cultum divinum ad personam suam videri potuit transtulisse. Verisimile est, coronis illis, de quibus hic mentio, victimas Jovi offerendas fuisse coronatas: talibus enim nihil apud Gentiles fuit communius. Cum enim Dii eorum coronati essent, ut alibi ostensum, censebant coronatam pariter, id est absolutam, selectam, perfectam & eximiam offerendam esse victimam. Ita Ovidius 15. *Metam.*

*Victima labe carens, & præstantissima
forma*

*(Nam placuisse nocet) vittis præsignis
& auro*

Sistitur ante aras.

Prudentius Hymno decimo peristephan.

Huc

Huc taurus ingens fronte torva & hispida,

Sertis revinctus aut per armos floreis,

Aut impeditus cornibus deducitur.

Juvenal. Satyr. 13.

Quaque coronata lustrari debeat agna.

Ovid. l. 1. Fast.

*State coronati plenum ad praeſepe Ju-
venci.*

Sic Iphigenia Agamemnonis filia immolanda coronata ducta fuit ad sacrificium, teste Euripide in Aul. Act. 4. Apud eundem Macaria moritura coronari vult: *Ducite, ubi oportet hoc corpus cadere, & coronate, & initiate, si videtur.* Heracl. Act. 2. Plutarchus in Paulo Aemilio: *Post hos, ait, ducebantur auratis cornibus armentales boves centum viginti, mitris ornati & corollis, & hæ coronæ erant ex herbis, vel floribus, sacris illis Diis, quibus immolabantur; ex hedera, si Bæcho, ut in sacrificio Daphnidis videre est apud Longum; ubi optima caprarum hedera coronatur, antequam mactetur. Ex olea, si Minervæ; ex pinu, si Pani; ex malo Punico, si Mercurio; ex quercu & juglande, si Jovi &c. Communiter ex Cupressu. Hæc arbor florida semper, & odorata feralis quidem semper est habita; non tamen in usu sacrificiorum, in quibusungebatur frondibus pariter odoratis, Lauro*

scilicet, & myrto, neque aliter una cum
victima eam Deo offerri par erat. Vide
Carolus Paschalius l. 4. cap. 17. Pru-
dentius in Apotheosi:

*Pontificum festis ferienda securibus, illic
Agmina vaccarum steterant, vitulasque
revincta*

*Fronte coronatas umbrabat torta Cupres-
sus.*

Ex Festo, & Servio licet colligere, eos
olim fuisse appellatos Ovantes, qui coro-
natas tantum oves ante se agebant, & ex-
acta pompa immolabant. Tertul. deni-
que l. de corona militis inquit: *Ipsa fo-
res, ipsa hostia & ara, ipsi ministri & sa-
cerdotes eorum coronantur.* Porro, quid
Apostolus egerit, dixeritque, cum coro-
nas, & victimas pro se cerneret præpara-
ri, supra memoratus Diaconus versu suo
heroico pergit nobis describere:

*Paulus ad hac tunicam rumpit festinus,
aperta*

*Sic prohibens ratione viros: Solennia nobis
Cur precor ista datis? fragili quos cor-
pore constat*

*Terrena sub lege premi? fuit impius o-
lim*

*Religionis honor; cum Numina fusa
metallis*

*Artifices timuere sui; cum Tempia di-
carent*

Ab-

fa
it
co
ck
st
li
re
pr
li
ce
er
ri
H
E
bo
na
tat
In

Abscissis de rupe Diis : hinc forte lice-
bat

Innocuos mactare greges , fibrasque te-
pentes

Consulere , & vocem pecudis morientis in
extis

Quarere ; nunc libeat vanis cessantibus
aris ,

Æterno parere Deo . &c.

His dictis instructa Fides .

Quemadmodum Gentiles in templis & sacrificiis usi sunt coronis frequentissime , ita & Christiani etiam in sacris easdem creperunt usurpare , non tamen primis Ecclesiæ temporibus , ne qua videretur superstitionis communicatio . Hinc & Tertulianus infectatus est integro libro usum coronarum , tanquam profanum , Ethnicis proprium , a Patriarchis & Prophetis alienum , imo ipsi naturæ contrarium ; successu tamen temporis sine ullo scandali & erroris periculo ad Dei , & Sanctorum gloriam coronis usi sunt Christiani . Certe S. Hieronymus laudat Nepotianum , quod Ecclesias Martyrum diversis floribus , arborum ramis , vitiumque pampinis exornaret . Ad idem faciendum Fideles hortatur S. Paulinus :

Spargite flore solum , pratexite limina
fertis .

In actis Severiani apud Surium tom. 5.

legitur coronam ex floribus ejusdem Martiris Reliquiis fuisse impositam . Imo refert S. Augustinus l. 22. de Civit. Dei cap. 8. Flores ad decorandas Stephani Reliquias super altare positas magna miracula edidisse . Jure igitur Ecclesia approbat, suadet, hortatur, fertis floreis, aut aliis ejusmodi ornamentis Christi victimas, id est Martyres coronari . Bacchus fingitur in amoris signum Ariadnæ coronam suam imposuisse, & hanc postmodum cælo donasse *in pretium sceleris*, ut Prudentius ait l. 1. contra Symmachum . Vah pudor ! cum ejus loco, præstaret Virginum, Confessorum, & Martyrum coronas inter sidera collocari : tales enim odorem boni exempli nobis afflant, & ad Sanctorum imitationem non leviter nos exstimulant . Ita legimus, Janitorem & custodem 40. Martyrum (quorum memoria decima Martii ab Ecclesia celebratur) cum Angelos e cælo descendentes vidisset, qui coronas Martyribus distribuerent, & uno, qui a fide defecerat, excepto, quadragesimam deesse advertisset, statim Christianum se professum esse, & ad cruciatus subeundos paratum se obtulisse, ut corona quadragesima donaretur, votisque suis potitum esse .

ACT,

ACT. APOSTOL.

C A P. XVII. V. 23.

Ignoto Deo.

IN actibus Apostolorum prædicto Capite legitur, Apostolum venisse Areopagum, & aram reperisse inscriptam hoc titulo : *Ignoto Deo* . Lucianus in Philopatriide bis meminit ignoti Dei Atheniensium . Oecumenius refert, non totum hunc fuisse titulum . Verba illius sunt : *Est autem integra ara inscriptio in hunc modum : Diis Asia, & Europa, & Lybia, Deo ignoto & peregrino* . S. Hieronym. eandem ponit inscriptionem in Epist. ad Titum cap. 1. sed in plurali : *Diis ignotis & peregrinis* . Verum quia Paulus , ut inquit S. Hieron. non pluribus Diis indigebat ; sed uno tantum ignoto Deo , singulari numero usus est ; ut doceret illum suum Deum esse , quem Athenienses in aræ titulo prænotassent, & recte eum colere deberent, quem ignorantes venerabantur , & nescire non poterant . Hæc ignotorum Deorum Latria non apud Athenienses solum , sed alias etiam Nationes viguit . Magnam illorum copiam fuisse existimatum, ex l. 1. Cicero-
nis

nis de natura Deorum licet colligere. Verba illius hæc sunt: *Chrysippus*, qui Stoicorum somniorum vaferrimus habetur interpretes, magnam turbam congregat ignotorum Deorum, atque ita ignotorum, ut eos ne conjectura quidem informare possimus. Strabo l. 3. Geograph. memorat, Celtiberos, & qui ad Septentrionem eorum sunt vicini, innominatum quendam Deum in plenilunio cum choreis adorasse. Tertull. l. contra Marcionem cap. 9. ait: *Invenio plane ignotis Diis aras prostitutas; sed Attica idololatria est. Item incertis Diis; sed superstitio Romana est.* Nam Aulus Gellius l. 2. cap. 28. ait, Romanos in terræ motu ferias indicto imperasse in honorem Dei alicujus, cujus nomen ignorabant: *Quoniam & qua vi, & per quem Deorum, Dearumve terra tremere, incertum esset.*

Paulanius in Atticis l. 1. ait: *Ara præterea & Deorum, & Heroum, qui ignoti vocabantur.* Hi tales Dii videntur fuisse, de quorum divinitate non satis constabat, quos Semideos vocabant, Nymphas, Rustica Numina, Satyros, Monticolas, Sylvanos &c. de quibus ita Jupiter loquitur apud Ovidium l. 1. Metam.

*Quos quoniam nondum cali dignamur honore,
Quas dedimus certe terras, habitare sinamus.*

Li-

Lilius Gyraldus in *Historia Deorum Syntag.* 17. ait: Arabes sacrificasse camelos pingues & saginatos in ara *Ignoti Dei*. De Indis Peruanis, novæque Hispaniæ incolis referunt Acosta l. 5. hist. natur. & moral. Indorum cap. 3. & Nierenbergius in hist. natur. l. 8. cap. 13. quod *Deum Ignotum* sint venerati, & nomen ejus pronuntiare abstinuerint. Innotuit forsitan Gentilibus aliquid de nomine Dei Hebræorum, quod ineffabile habebatur, quatuor literis Hebraicis expressum; Latine Tetragrammaton, *cujus Majestatem* (verba sunt Hieronymi) etiam Gentilitas non ignorat, & Atheniense testatur Ara; Ignoto Deo. In l. Ezech. c. 16. Lucanus in *Pharsal.* l. 2. ait:

----- *Dedita sacris*

Incerti Judæa Dei.

De eodem Poeta hæc habet S. Augustinus: *Quidam Lucanus magnus eorum in carminibus declamator, credo & ipse diu querens, sive per suas cogitationes, sive per suorum literas, quisnam esset Judæorum Deus; & quia non pie querebat, non inveniens, maluit tamen incertum Deum, quem non inveniebat, quam nullum dicere, cujus tamen magna documenta sentiebat: ait enim: Et dedita sacris incerti Judæa Dei.*
Et Juvenalis:

◦ *Quidam sortiti metuentem Sabbathæ Patrem*

Nil

Nil prater nubes, & cali Numen adorant.

Meminit & Cicero l. 2. de legibus Dei Sabbathii, & quorundam aliorum peregrinorum Deorum, quos una cum cunctis Gentium Diis Judæi habuere contemptui, unum solummodo colentes Deum, sed, ut dictum est, ineffabilem, cujus nullam patiebantur effigiem fieri, & ne nomen ejus vulgo proderent, summopere cavebant; ut vel ideo apud Philonem Judæis objecerit Cajus Cæsar, *quod Deum sine nomine colerent*. Exinde incerti hærebant ceteri populi, quem tandem Deorum ea Natio coleret. Ceterum refert Herodotus, à Pelasgis Deorum nullis affectos cognominibus cultos fuisse.

De Samote quodam in Galliis regnante, qui & Dis appellatus est, lego in tertia parte Argenidis l. 1. cap. 9., quod, cum Hesperius Oceanus ruptis obicibus amœnissimas valles inter Europam & Africam longe lateque excurrentes inundasset, & eo jam processisset, ut Galliæ fines aquæ maris libarent, preces & vota a populo fieri mandarit. Sacerdotes ipsi, qui secundum Regis nomen Semmotei vocabantur, hecatombas multas offerre, & omnibus litationibus placare Superos, quos infensos sibi reputabant. Tunc Samotes ipse, qui Numinis instar inter Gallos omni

nni

nni iustitiæ & sapientiæ laude eminebat, similis vaticinanti ædem, & aram ibi iussit extrui, atque *Ignoto Deo* consecrari; huic & Flaminum collegium, & summum Pontificem, penes quem summa Sacrorum esset, superaddidit, asserens: Donec staret hæc Ara, tam diu Gallos ab aquis illis superstagnantis pelagi, atque ab hoste externo fore incolumes. Forte hæc Ara *Ignoti Dei* fuit eadem illa, cujus meminit Martialis Gallorum Episcopus ad Burdigalenses: sic enim Epist. 1. cap. 13. ad eos scribit: *Nam, dum Altaria demonum in pulverem redigerentur, Aram Ignoti Dei ad consecrationem reservari iussimus.*

Sed qua occasione aut causa Aram *Ignoto Deo* Athenienses statuere? S. Chrysost. tom. 4. Hom. 3. in cap. 1. Epist. ad Titum: *Athenienses quoniam ab initio Deos omnes non acceperunt, verum per tempora, illorum Sacra urbem ingressa sunt, sicuti qua ex Hebrais allata referuntur; sicuti Pan ex Arcadia; sicuti parva qualibet ac magna mysteria, conjicientes ex hoc fieri posse, ut esset & alius Deus, qui ab ipsis nesciretur; ut etiam illi se ipsos devoverent, eam Aram instituerunt, quam inscriberent Ignoto Deo.* Philostratus l. 6. cap. 2. ait: *Praclarus est, & modestia majoris indicium, de Diis omnibus bene loqui, Athenis præsertim, ubi etiam Ignotis Diis*

Diis Ara sunt constituta. Oecumenius in cap. 26. Act. Apost. recenset „ quosdam „ dicere , pestem Athenis grassatam fuisse ; cum autem nihil adjumenti a Diis „ indigenis accepissent , opinantes fortasse „ quendam esse Deum , quem ipsi honore „ prosequi omisissent , quique pestem immiserit , novam extruentes aram inscripserunt *Ignoto Deo* , cumque ipsi sacrificassent , malum cessasse . „ Certe Thucydides meminit pestilentis mali , quo Athenarum civitas afflicta fuit , L. 2. de bello Pelopon. De eadem peste meminit quoque Laertius , & positis ob eam causam aris *Deo anonymo* , L. 1. circa initium vitæ Epimenidis Philosophi.

Aliam adfert causam S. Chrysost. & fusius Oecumenius , cujus hæc sunt verba : „ Aliqui dicunt , quod Athenienses Philippidem miserint ad Lacedæmonios de ferendo auxilio , cum Persæ exercitum ducerent in Græciam ; quorum nuntiis „ juxta Parthenium montem Panis speculum obviam factum Athenienses accusabat , quod se neglecto alios colerent , & auxilium promisit : cum itaque victoria potiti essent , templum illi exserunt , aramque ædificarunt , & tanquam observantes , ne vel idem sane , vel aliud simile ipsis accideret , si quem „ ignotum Deum prætermitterent ; Aram „ illam

„ illam erexerunt , inscribentes Ignoto
„ Deo ; Si quis adhuc alius a nobis igno-
„ retur , in ejus honorem hæc ara a no-
„ bis erecta esto . „ Posset etiam dici , A-
thenienses , cum rerum novarum essent
curiosissimi , & proni admodum in cultum
Deorum aliarum Gentium , ita ut Strabo
dicat l. 10. Geograph. Athenienses multa
sacra etiam peregrina recepisse , eoque no-
mine etiam in comædiis exagitatos esse ;
hinc , inquam , posset dici , eos , cum de
Hebræorum Deo multa inaudiissent , sed
qualis esset , & cujus nominis , ignorarent ,
Aram Ignoto Deo posuisse .

Baronius censet , aram singulari cuidam
ignoto Deo extructam fuisse , & ut putant
aliqui , soli vero Deo , eo quod ex anti-
quorum Philosophorum placitis didicerint ,
præsertim Trismegisti , & Sibyllarum o-
raculis , unum dari Deum invisibilem , im-
perceptibilem , innominatum , ineffabilem ,
secundum doctrinam Hebræorum , ex qua
meliores Philosophi non pauca transcripse-
re : & Augustinus expresse fatetur , Athe-
nienses , licet extra Ecclesiam fuerint ,
unum verum Deum coluisse .

A C T. A P O S T.

C A P. XIX. V. 28.

Magna Diana Ephesiorum.

Ephesus olim a Caribus, & Lelegibus habitata, ab Amazonibus munita, dein Atheniensium, & Jonum Colonia; sed aucta postmodum, & in meliorem formam redacta inter urbes Joniæ post Miletum multis sæculis maxima, ditissima, potentissima, Asiæ denique totius intra Taurum montem Emporium nobilissimum a cultu Dianæ fuit celeberrima. *Quis enim hominum est, aiebat Demetrius Act. 19. v. 35. qui nesciat Ephesiorum civitatem culttricem esse magna Diana; Jovisque prolis?*

Teste Cicerone plures fuerunt Dianæ; sed illa nominatissima, quæ eodem partu cum Apolline ex Jove & Latona est progenita. Et hæc creditur fuisse Diana Ephesina, quæ a S. Hieronymo *Multimammia* vocatur, ut scilicet ex ipsa quoque effigie mentirentur omnium eam bestiarum, & viventium nutricem esse: quam sic appellat Apulejus in precibus, quæ extant in principio l. 11. *Metamorph. Regina cali, sive in Ceres alma, seu in caelestis Venus, seu Pha-*

Phabi soror, qua partu ferarum medelis lenientibus recreato populos tantos educaſti, præclarisq; nunc veneraris delubris Ephesi. Fingitur Dea illa manſiſſe Virgo. Sic Virgil. Æneid. 2.

Virginis os, habitumque ferens, & Virginis arma.

Hinc & Græce ἀρτεμις, ſive integra vocatur. Vim & poteſtatem ſuam in cælo exercere putabatur, in terra, & infra terram, ſecundum verſus illos:

Terret, luſtrat, agit, Proſerpina, Luna, Diana,

Ima, ſuperna, feras; ſceptro, fulgore, ſagitta.

Inter Deos erat Majorum Gentium; ut ex verſu Ennii licet colligere:

Juno, Veſta, Minerva, Ceres, Diana, Venus, Mars.

Hinc legimus exclamaſſe Ephesios: *Magna Diana.* Credebatur præterea eſſe Venatorum Præſes, & parturientium obſtrix, ut Horatius ait l. 3. od. 21. Quod autem primum parientes ſolverent Zonas, quas Dianæ dicabant, *Solvizona* dicta eſt. Templum habuit Ephesi nobiliſſimum inter 7. Orbis miracula relatum; Aſiæ illud totius ſtudio ducentis & ſeptuaginta annis Architecto *Cteſiphonte* fuit ædificatum; erat longitudo ejus pedum quadringentorum quinque ac viginti, latitudo ducentorum &

viginti. Videbantur in eodem centum & viginti septem columnæ a totidem Regibus erectæ, admirabilis longitudinis ac pulchritudinis: nam ad sexaginta pedum mensuram accedebant, quarum triginta sex erant incredibili artificio, & magnifice cælatæ cum aptis tanto artificio columnarum epistyllis. Aderant & picturæ mirificæ, & statuarum pulcherrimarum, quæ magnificentiam templi ornabant & augebant. Templum illud Asylum erat non vulgare, & in idem velut in tutissimum ærarium condebant ditissimi thesauros ac pecunias suas, ut Dion, & Justinus tradunt de Annibale. Totum hoc admirandum ædificium ab Herostrato viro Ephesio incensum fuit eo die, quo natus est Alexander, ut videri potuisset Dianam, cum parituræ Olympias, adeo occupatam fuisse, (quod Hegesias Magnesius notavit) ut templum suum ab igne defendere non potuerit. Sæpius idem restitutum ac restauratum fuisse, meminit Plinius. Tempore S. Pauli adhuc celebre videtur fuisse, & splendidum; sed postmodum pretiosa dona omnia, & simulacræ inde, atque ex Achaicis omnibus templis abstulisse Neronem Tacitus scribit l. 15. Fertur quoque Augustus Cæsar jus Asyli, quod illi templo olim competebat, & locis templo vicinis, abrogasse. Templum illud denique a Gothicis

this sub Galieno invadentibus Asiam per-
nitus spoliatum fuisse atque incensum, tra-
dit Capitolinus in Galieno.

Simulacrum Dianæ Ephesinæ ex ebena
fuisse fertur. Aliud nobis ejusdem Deæ
describit Cicero act. 6. in Verrem: *Fuit
apud Segestanos ex ære simulacrum Diana,
tum summa atque antiquissima religione
præditum, tum singulari opera artificioque
perfectum. Et post pauca. Erat admodum
amplum & excelsum signum cum stola,
veruntamen inerat in illa magnitudine
atas atque habitus Virginalis, sagitta pen-
debant ex humero, sinistra manu retinebat
arcum, dextra ardentem facem præferbat.*
Dubium esse non potest, quin fuerit simu-
lacrum Dianæ Ephesinæ templi magnifi-
centiæ proportionatum. Sed, ut S. Hieron.
asserit, multis mammis præditum. Coro-
nam turritam gerebat in capite: quia ea-
dem credebatur Isis, Ceres, & Cybele, seu
terra, quæ urbibus exculta est. Et quo-
niam (inquit Codinus de origin. Con-
stant.) cujusque urbis sedes terra est, fin-
gitur turrita, quasi urbes gestaret. Audia-
mus Macrobius lib. 1. Saturn. C. 20.
Isidem adinstar Dianæ Ephesinæ describen-
tem: *Isis cuncta religione celebratur, quæ
est vel terra, vel natura rerum, subjacens
Soli. Hinc est, quod continuatis uberibus
corpus Dea omne densetur: quia vel ter-*

ra, vel rerum natura halitu nutritur universitas. Fingebatur simulacrum illud non ab homine factum, sed cælo delapsum; quod vulgo creditum esse, Suidas docet in voce *διονετής*. Sic mendacio aucta superstitio. Ita Palladium Trojanum, & Ancile Romanum cælo lapsa finxerunt. Qui majorem hujus simulacri expositionem desiderat, Claudium Menetreium Cimeliothecæ Barbarinæ præfectum consulat, qui librum scripsit de Symbolica Dianæ Ephesinæ statua, a Petro Bellorio cum notis in lucem restitutum.

Templi Dianæ Sacerdotes ex lege Eunuchi erant. Advenæ sacrum id munus ambientes, & si digni viderentur, eo ornati (quos Megabyzos dicebant) habebantur summo in honore. Sociis ac Symmetis in facienda re sacra utebantur non nisi virginibus. Varias Diana habebat victimas. Herodotus in Melpomene scribit legem in Tauris fuisse, ut omnes Græci, qui naufragi eo appulissent, Virgini Dianæ immolarentur, vel, ut maluerunt alii, e sublimi quodam loco præcipites dejicerentur. Boves etiam huic Deæ cedebant, & cedebantur in victimam. Hinc meminit Plutarchus in Lucullo, eidem apud Persas obvias fuisse boves, quæ per regionem incustoditæ vagarentur, lampadem, Dianæ notam, habentes impressam. Euripides

insinuat, omnium rerum, quæ nascerentur in terra, primitias huic Deæ offerri solitas. Fuit etiam consuetudo, ut cerva candida Dianæ mactaretur. Sic Ovidius canit:

*Candida quæ semel est pro Virgine casa
Diana,*

Nunc quoq; pro nulla Virgine cerva cadit.

Videntur præterea Dianæ præsertim Ephesinæ oblatae fuisse quædam ædiculæ templi, aut ipsius Dianæ imaginem continentes. Nam Act. 19. legitur: Demetrium quendam fecisse ædes argenteas Dianæ. S. Chrysostom. explicat de ædiculis & cooperculis, quæ ciboria nominat. Lyranus censet fuisse tabernacula quædam, in quibus inclusæ imagines Dianæ, aut templi. Aratus Poeta vocat *argentea vota*. Fuerunt forsan Tabellæ, vel ædiculæ ex argento elaboratæ, quasi votiva anathemata: similia enim Diis Gentium oblata fuisse, ex historiis constat. Meminit rerum ejusmodi Polybius, & appellat *vaðia* templa, seu armaria, e quibus imagines Deorum depromi possunt: nec in templo solum talia offerebant sacra Gentiles; sed etiam religionis causa circumferebant. Ammianus l. 23. narrat, solitum Asclepiadem Philosophum Juliano Apostatæ amicum Deæ cœlestis breve figmentum, quocunque iret, secum deferre.

Non in Græcia solum, & Orientali

plaga; sed per Orbem terrarum culta fuit Diana; ut ex relictis posteritati Veterum monumentis licet colligere. In Leodiensi territorio oppidum cis Mosam, Dionantum nomine, aram habuit multis sacrificiis nobilem, & cives ab hac Diana urbem suam Dionantum appellatam esse putant. Fertur quoque Massiliæ Diana templum habuisse; sed per Lazarum dejectum. Idem Myræ factum in Lycia, per S. Nicolaum. Plerumque, ubi Dianæ veneratio fuit exhibita, sua Apollini non defuit. Superius dictum est, in Daphne Antiochena fuisse utriusque templum. *Trevirenses* præter montem a cultu Apollinis famosum, in suburbio prope S. Matthiæ, ad dextrum latus magnam servant statuam lapideam ex alabastro fabricatam ad formam mulieris, quam fuisse Dianam loci incolæ certo affirmant. Idolum hoc cœpit ab adventu S. Eucharîi obmutescere. Prope Epternacum in lapide quadrato ad rupem quandam inter Suram fluvium, & nemus propinquum in excelsiore loco artificis manu leguntur hæc verba: *Dea Diana Quintus Posthumius Protensius*. Quod signum est, cultam ibidem fuisse Dianam, & in pago vicino Apollinem. Pagus enim modo Bollendorff dicitur, olim Apollendorff. Plura ejusmodi inveniet Dianæ cultus indicia, qui Veterum monumenta excusserit.

Fun-

Fundamentum hujus fabulosę superstitionis fuit forsitan Iphigenię historia . Si enim apud alias Nationes meruerunt ii in Deorum numerum referri, qui bonum publicum sua arte, industria, labore, aut sanguine auxerunt & confirmarunt; certe Iphigenia Deorum cętui adscribi potuit . Cum enim pater ejus Agamemnon contra hostes classem e portu educturus, ex ignispicio cognovisset (verba ex Euripide refero) *Ex hujus terra portu naves non deduces, priusquam filiam tuam Iphigeniam Diana acceperit mactatam: quod enim annus pareret ille pulcherrimum, vovisti Lucifera te sacrificaturum Dea, oportet te illam immolare;* non renuit Iphigenia fieri victima pro salute omnium.

Dio refert l. 35. in Cappadocia creditum semper, ibi simulacrum Dianę Tauricę, genusque Agamemnonis fuisse, duasque ibidem urbes extitisse, habentes gladium, quem verum Iphigenię putabant. Quid clarius verbis Herodoti l. 4. *Dæmonem, cui immolant ipsi Tauri, ajunt esse Iphigeniam Agamemnonis filiam.* Superius autem audivimus, nobilissimum Taurorum Emporium fuisse Ephesum.

Multo probabilius sub Dianę nomine ipsam Lunam venerati sunt Ephesini. Cicero l. 2. de nat. Deor. *Dianam & Lunam eandem esse putant.* Fuit autem Dia-

na filia Jovis, & Latonæ, quod nomen a λατοῖα, id est, lateo videtur deductum. Est enim Luna a supremo Jove e lateribus sui nihili creata. Est soror Apollinis, id est, Solis. Præses venationum dicta est: lumen enim ejus nocturnum, quam feris gratum est, ut sua inveniant pabula, tam venatoribus opportunum est, ut easdem capiant. Deinde Luna per circulum suum proprium, sive Zodiacum nostrum, id est, certum cæli spatium, stellis ferarum & animalium quorundam figuram exprimentibus distinctum, nocturno vagans tempore, dum alii somno, & illicitis non raro indulgent voluptatibus, satis fundamenti præbuit Ethnicis, ut illam venatricem dicerent, & virginem. *Hecate* dicta est, quod ἥκαθεν, id est, e longinquo radios suos & sagittas mittat. *Triformis*, ob triplicem Lunæ figuram, falcatam, dum in arcum crescit; inflexam, dum adolescit in semicirculum; rotundam, dum plenum orbem efficit. Hinc Claudianus: *Ternis Hecate variata figuris*. Parturientibus dicta est Diana assistere; quia Luna ob humoris copiam partum faciliat. Cicero lib. 2. de nat. Deorum ait: *Adhibetur ad partus, quod ii maturescerent, aut 7. nonnunquam, aut plerumque 9. Luna cursibus*. Mammosa erat Ephesiorum Diana: quod omnium bestiarum, aut

viventium mater crederetur. Plinius lib. 2. c. 9. de Luna scribit: *Hæc afflatu suo terras saturat, accedensque corpora implet, abscedens inanit, adeoque cum incremento ejus augentur conchylia. Sanguis etiam hominum cum ejus lumine augetur, ac minuitur; frondes quoque, ac pabula vim ejus in omnia penetrantem sentiunt &c.* Plura ejusmodi sideris tam speciosi, terræque familiarissimi beneficia viam cæcis hominibus ad cultum stravere idololatricum.

In sensu morali Diana Virgo, quod venatrix fuerit, & armata, symbolum est conservandæ castitatis. S. Hieron. in Ep. ad Principiam ait, semper virginitatem gladium habere pudicitæ, per quem truncat opera carnis, & superat voluptates. *Gentilis quoque error Deas Virgines finxit armatas.* Inter cæteras ad Dianam armatam Virginem S. Hieronymum respexisse non dubito. Si quod animal Natura castum finxit, *Apis* est: hinc & corpus quasi loricatum habet, & aculeo instructum. Si quis flos illibatæ castitatis est symbolum, est *Lilium inter spinas*. Si quæ Virgo summam pudicitie laudem defendit, & obtinuit, hæc fuit *Deipara*; sed quomodo? *ut castrorum acies ordinata.* Sic nulla castitas, nisi armata, bene poterit conservari.

A C T. A P O S T.

CAP. XV. V. 29.

Ut abstineatis vos ab immolatis simulacrorum, & fornicatione.

QUOD simulacris immolatur, Græcis dicitur Idolothytum ἀπὸ τοῦ εἰδωλον, ἡγὰρ θύειν, quod immolare significat. Hinc etiam eseq, quæ Idolis offeruntur, Corinth. 8. vocantur *immolatiis*. Fuit moris apud Gentiles, ut peracto sacrificio, quæ in altari, & ex mensa Idoli restabant, ad mensam hominum juxta altare, vel in templo positam transferrentur, & ex iis comede-
bant, qui victimas obtulerant, aut immolarant; sacroque hoc Epulo sacrificium claudebatur. Exemplum videre est apud Virgilium, postquam Æneas & Evander sacrificium perfecissent:

Tunc lati juvenes certatim, areque sacerdos

Viscera tosta ferunt taurorum, onerantque canistris

Dona laborata Cereris, Bacchumque ministrant.

Vescitur Æneas, simul & Trojana juvenus

Perpetui tergo bovis, & lustralibus extis.
Erat

Erāt autem hoc Epulum ab Ethnicis institutum religionis causa . Hinc Cicero lib. 1. de finibus ait : *Atqui reperiemus Afotos primum non ita religiosos, ut edant de patella*, id est, ut edant ea, quæ Diis e cœna libata sunt . At vero Horatius inquit : ea se castitate & sanctitate ruri cœnare, ut dapibus, nisi ante Deo libatis, vesci non soleat . Videntur sane ea in persuasione Gentiles fuisse, cibos honori Deorum consecratos, & quasi spiritu eorum afflatos magis fore salutare . Hinc homicidas ab extorum esu prohibebant, ut Aristophanes tradit ; indigni enim sacris censebantur visceribus, qui aliena hominum viscera fudissent . Quod si ex sacrificio epuloque carnes adhuc essent superflue, secum domum asportabant, ut eas domesticis distribuerent, vel ad amicos transmittabant, ut ita absentes etiam sacrificii participes facerent ; ut docet ex Herodoto Gyraldus ; vel etiam, ut Herodotus in Clio asserit, ad macellum mittebantur vendendæ, quarum lucrum ad Sacerdotes pertinebat . Hinc Apostolus 1. Corinth. cap. 10. *Omne, quod in macello vanit, manducate, nihil interrogantes propter conscientiam* . Unde patet, Idolothyta secundum se esse adiaphora, nec vitari in se ea, quæ Idolo oblata sunt . Nam scimus (ait S. Paulus) quia idolum nihil est,

est, & quidquid est in mundo cibi, aut potus a Deo datur: nam *unus est Deus Pater, ex quo omnia, & nos in illum*, & nihil est extra hominem introiens in os, quod possit eum coinquinare: hinc omnia munda mundis.

Potest tamen esus idolothytorum esse malus & vetitus. *Primo*, si fieret ex intentione Idolo præstandi obsequium, aut etiam, licet non cum tali intentione, in Idolio tamen cum Gentilibus: esset enim quædam idololatriæ professio: ut accessus Catholici ad cœnam Calvinisticam Apostasiæ signum est. Tunc *satius est*, ut S. Augustinus ait lib. de bono conjugii cap. 16. mori fame, quam Idolothytis vesci. De S. Luciano scribit D. Chrysostom. „ quod eidem, cum fame diuturna esset „ cruciatus, apposita fuerint Idolothyta, „ quæ tamen Sanctus abominatus est; & „ licet intus magna voce sollicitaret fames, „ & apposita gustare juberet, Dei timor „ manus reprimebat, & ut ipsius naturæ „ oblivisceretur, efficiebat. „ De Valeria refertur in Fastis Sanctorum 28. Aprilis, quod Mediolanum redux in idololatrias incidit Sylvano sacrificantes, qui hortati eam sunt acriter, ut de immolatis comederet; sed illa: Christiana sum, ajebat, non licet mihi de sacrificiis Sylvani manducare; imo nec quidquam tangere; quibus

bus

bus verbis commoti ad iram barbari ictus tam fatales eidem impegerunt, ut tridui spatio expirarit. Tertulliani tempore adeo Christiani averfabantur ea, quæ Idolis oblata erant, ut etiam oculis horrerent respicere. *Si gulam* (ait Tertull.) *& ventrem ab inquinamentis liberamus, quanto l. de spec-*
magis angustiora nostra oculos, & aures ab Etacul. c.
Idolothytis, & Necrothytiis voluptatibus absti-
nemus? ^{13.}

Quanto magis vero Fideles sacras Ethnicorum epulas fugiebant, & execrabantur, eo vehementius, qua vi, qua dolo instabant Gentiles, ut de immolatiis ederent Christiani, & sic eos ad aliquam religionis suæ communionem pertraherent. Hinc *Julianus* Apostata, summus Idolorum cultor, merito *Idolianus* a S. Gregor. Nazianz. appellatus (Orat. 1. in illum) cibos omnes in foro vanales sacrificiis Deorum polluit, ut sic Christiani, nisi mallent fame confici, immolatiis vesci cogerentur. Sed Theodori Martyris admonitu, loco panis, cocto usi sunt frumento; quod cum per hebdomadam factum esset, victus constanti Christianorum abstinentia Tyrannus, rursus puros cibos absque ulla labe in foro apponi jussit. Idem sit Catholico cœnæ Lutheranæ, ac Calvinianæ sumptio, quod Idolothytorum comestio; & eligat potius Hermenegildi

ex-

exemplo vitam cum morte commutare,
quam a sacrilega pseudoministri manu Com-
munionem recipere.

Secundo: Illicitus est Idolothytorum esus
ratione scandali. Hic Apostol. ait 1. Co-
rinth. cap. 8. *Si esca scandalizat fratrem
meum, non manducabo carnes in aeternum.*

Tertio: Ratione conscientię erroneę, quia
quod non est ex fide, peccatum est.

*Quar-
to:* Ratione præcepti vetantis talem elum,
quale Apostoli fecerunt Act. 15. Quod si
nihil horum interveniat, vesci Idolothytis
licebit. Sic narrat Thodoretus lib. 1. hi-
stor. cap. 14. Cives Antiochenos subinde
cibum, & potum in foro vœnalem, quam-
vis a Juliano Diis immolatum, libere &
sine scrupulo manducasse, & bibisse.

Præter abstinentiam ab immolatis, ve-
tatur præterea Gentilibus ad Fidem con-
versis vitium fornicationis: illam enim
(modo citra alterius injuriam fieret)
censebant passim Ethnici licere. Sic S.
Ambrosius lib. de Abrah. cap. 11. testa-
tur, Gentiles putasse meretricios usus tan-
quam legi naturę suppetere. Imo sapien-
tissimi eorum non illos tantum, sed infan-
das etiam pathicasque libidines contra na-
turam ipsam approbarunt. Addit S. Chry-
sostomus, Solonem, aliosque Philosophos
non tantum pædasteriam fecisse, sed &
eam quasi honestam laudasse, legibus san-
xisse,

xisse , & quasi artem liberalem commen-
dasse , ut eadem uti possent non homines qui-
cunque , servi v. g. , sed liberi . Persuadebant
sibi adeo libidinum exercitiis gratum Diis
& Deabus obsequium præstari posse , ut alibi
satis hoc libello ostensum est . Hinc Gen-
tiles stupebant castam Christianorum vi-
tam & continentiam , quasi rem inusitatam ,
inauditam , & eo usque mundo ignotam ,
ut S. Petrus de Ethnicis testatur Epist.
1. cap. 4. v. 4. *Admirantur , non concur-
rentibus vobis in eandem luxuria confusio-
nem* . Pronum inde est judicare , quanto-
pere laborare debuerint Apostoli , ut hanc
Gentibus persuasionem eximerent , proba-
rentque vagum ejusmodi concubitum a ra-
tione alienum , fini naturæ contrarium ,
cum periculo relapsus in idololatriam con-
junctum esse , nec gratiam Spiritus sancti ,
nec vitam æternam cum eo obtineri pos-
se . Sex argumenta adducit S. Paulus ,
quibus vitium illud Corinthiis jam Chri-
stianis conatur dissuadere ; quæ videre po-
teris Epist. 1. ad Corinthios cap. 6.

ELENCHUS

TEXTUUM EXPLICATORUM.

LIBER GENESIS.

- C**ap. 15. vers. 7. Ego Dominus, qui eduxi
te de Ur Chaldaeorum. Pag. 11
Cap. 14. v. 5. Percusseruntque Raphaim in A-
staroth Carnaim. 21
Cap. 31. v. 19. Rachel furata est Idola patris
sui. 23
Cap. 41. v. 45. Dedit illi uxorem Aseneth, filiam
Putiphare, sacerdotis Heliopoleos. 28
Cap. 43. v. 32. Illicitum est Aegyptiis comedere
cum Hebraeis. 32
Cap. 46. v. ult. Detestantur Aegyptii omnes pasto-
res ovium. Ibid.

LIBER EXODI.

- Cap. 23. v. 13. Per nomen externorum Deorum
non jurabis, neque audietur ex ore vestro. 37
Cap. 20. v. 25. Quod si Altare lapideum fece-
ris, non aedificabis illud de sectis lapidibus;
si enim levaveris cultum super eo, polluetur.
41

- Cap. 20. v. 26. Non ascendes per gradus ad Al-
sare mentum, ne reveletur turpitudine tua. 44

LIBER LEVITICI.

- Cap. 2. v. 11. Omnis oblatio, qua offertur Do-
mino, absque fermento fiet, nec quidquam for-
menti ac mellis adolebitur. 46
Cap. 17. v. 7. Nequaquam ultra immolabunt ho-
stias suas Daemoniis, cum quibus fornicati sunt.
47

Cap.

Cap. 18. v. 21. De semine tuo non dabis, ut
consecratur Idolo Moloch, ne polluas nomen Do-
mini. 49

Cap. 19. v. 26. Non augurabimini; neque obser-
vabitis somnia. 54. 62

Cap. 19. v. 27. Neque in rotundum attondebis
comam; nec radeis barbam. 65

Cap. 19. v. 28. Super mortuo non incidetis car-
nem vestram, neque figuras aliquas, aut stig-
mata facietis vobis. 73

LIBER NUMERORUM.

Cap. 21. vers. 29. Va tibi Moab; peristi popule
Chamos. 77

Cap. 25. v. 1. 2. 3. Fornicatus est populus cum
filiabus Moab, quæ vocaverunt eos ad sacrifi-
cia sua; at illi comederunt, & adoraverunt
Deos earum; initiatusque est Israel Beelphegor.
80

LIBER DEUTERONOMII.

Cap. 4. v. 16. 17. 18. Ne forte decepsi faciat
vobis sculptam similitudinem aut imaginem mas-
culi vel femina; similitudinem omnium jumen-
torum, quæ sunt super terram, vel avium sub
celo volantium, atque reptilium, quæ inven-
iuntur in terra, sive piscium, qui morantur sub
terra in aquis. 83

Cap. 13. v. 2. 3. Si surrexeris in medio tui
Prophetæ, qui prædixerit signum atque porten-
tum, & evenerit quod locutus est, non audies
verba Prophetæ illius. 89

Cap. 18. v. 10. 11. Nec invenietur in te, qui
lustrat filium suum, aut filiam, ducens per i-
gnem: aut qui ariolos sciscitetur, & observe
somnia atque anguria: nec sis maleficus; nec
inoantator; nec qui Pythones consulat; nec di-

K k rinos;

- vinos; aut quærat a mortuis veritatem.* 94
Cap. 23. v. 17. 18. Non eris meretrix de filiabus Israel; nec offeres mercedem prostibuli; nec pretium canis in domo Domini Dei tui. 100
Cap. 17. v. 2. 3. & seqq. Cum reperti fuerint, qui serviant Diis alienis, & adorent eos, Solem, & Lunam, & omnem militiæ cali; educes virum, ac mulierem, & lapidibus obruentur. 105

LIBER JOSUE.

- Cap. 8. v. 33. Percusseruntque cum Baal fœdus, ut esset eis in Deum.* 114

LIBER JUDICUM.

- Cap. 17. v. 5. Qui adiculam quoque in ea Deo separavit.* 116

LIBER REGUM I.

- Cap. 5. v. 2. Tulerunt Philistiim Arcam Dei, & intulerunt eam in templum, & statuerunt juxta Dagon.* 118

- Cap. 5. v. 5. Propter hanc causam non calcant Sacerdotes Dagon, & omnes qui ingrediuntur templum ejus, super limen Dagon in Azoto.* 123

- Cap. 28. v. 7. Querite mihi mulierem habentem Pythonem, & vadam ad eam, & sciscitabor per illam.* 128

LIBER REGUM III.

- Cap. 19. v. 18. Quorum genua non sunt incurvata ante Baal, & omne os, quod non adoravit eum, osculans manus.* 131

- Cap. 18. v. 26. Transliebantque Altare, quod fecerant.* 138

LIBER REGUM IV.

- Cap. 1. v. 2. Ille, consulit Beelzebub Deum. Accaron,*

caron, utrum vivere queam ab infirmitate hac mea. 145

Cap. 16. v. 3. De Achaz. Filium suum consecravit transferens per ignem secundum Idola Gentium. 146

Cap. 17. v. 29. 30. 31. Unaquæque Gens fabricata est Deum suum: Viri Babylonis fecerunt Socoth-benot: Viri autem Cusai fecerunt Nergel: & viri de Emath fecerunt Asima. Porro Herali fecerunt Nebeha, & Tharsiac; hi autem qui erant de Separvaim, comburebant filios suos igni Adramelech, & Anamelech Dñs Separvaim. 151

Cap. 28. v. 11. De Josia. Abstulit quoque equos, quos dederant Reges Juda Soli; currus autem Solis combussit igni. 158

LIBER JUDITH.

Cap. 16. v. 8. Nec Filii Titan percusserunt eum, nec excelsi Gigantes opposuerunt se illi. 162

LIBER JOB.

Cap. 9. v. 9. Qui facit Arcturum, & Oriona, & Hyadas, & interiora Austris. 167

Cap. 21. v. 33. Dulcis fuit glarels Cocysi. 173

Cap. 42. v. 14. Nomen tertie Cornustibii. 175

LIBER PSALMORUM.

Psal. 67. v. 14. Si dormiatis inter medios ceteros, pennæ columbæ deargentatæ, & posteriora dorsi ejus in pallore auri. 181

LIBER PROVERBIORUM.

Cap. 26. v. 8. Sicut qui mittit lapidem in acervum Mercurii, ita qui tribuit insipientis honorem. 188

LIBER SAPIENTIÆ.

Cap. 11. v. 16. Quidam errantes colebant multos serpentes, & bestias supervacuas. 196

Cap. 12. v. 4. Quoniam odibilia opera tibi faciebant per medicamenta. 199

Cap. 12. v. 5. Filiorum suorum necatores sine misericordia, & comestores viscerum hominum, & devoratores sanguinis a medio sacramento. 202

Cap. 13. v. 2. Aut ignem, aut spiritum, aut citatum aerem, aut gyrum stellarum, aut nimiam aquam, aut Solem, & Lunam Rectores Orbis terrarum Deos putaverunt. 210

Cap. 14. v. 23. Obscura sacrificia facientes, aut insania plenas vigilias habentes. 220

LIBER ECCLESIASTICI.

Cap. 30. v. 18. Rona apposita in ore clauso, quasi appositiones epularum circumposita sepulchro. 224

Cap. 30. v. 19. Quid proderis libatio Idolo? 231

LIBER ISAÏÆ.

Cap. 2. v. 20. Ut adoraret talpas, & respertiliones. 234

Cap. 14. v. 22. Habitabunt Sirenes in delubris voluptatis. 238

Cap. 19. v. 1. Ecce Deus ascendet super nubem levem, & ingredietur Ægyptum, & commovebuntur simulacra ejus. 239

Cap. 34. v. 14. Occurrent demonia Onocentauris. 242

---- Pilosus clamabit alter ad alterum, ibi cubavit Lamia, & invenit sibi requiem. 250

Cap. 65. v. 11. Qui ponitis Forsuna mensam, & libatis super eam. 253

LIBER JEREMIÆ.

Cap. 7. v. 17. & 18. Nonne vides, quid illi faciunt in civitatibus Juda, & in plateis Jerusalem? Filii colligunt ligna, & patres succendunt. 253

dunt ignem, & mulieres conspergunt adipem,
ut faciant placentas Regina calis. 262

Cap. 46. v. 16. A facie gladii Columba. 267

LIBER BARUCH.

Cap. 6. v. 3. Videbitis in Babylonia Deos au-
reos, & argenteos, & lapideos, & ligneos. 269

Cap. 6. v. 3. Videbitis deos in humeris portari,
ostentantes metum Gentibus. 274

Cap. 6. v. 9. Coronas aureas habent super capita
sua. 276

Cap. 6. v. 10. Dant ex eo prostituitis, & mere-
trices ornant, & iterum cum receperint illud
a meretricibus, ornant Deos suos. 278

Cap. 6. v. 42. Mulieres autem circumdata funibus
in viis sedent, succendentes ossa olivarum. 280

Cap. 6. v. 31. Rugiunt autem clamantes contra
Deos suos, sicut in cœna mortui. 283

Cap. 6. v. 36. Hominem cæcum ad visum non
restituunt, de necessitate hominem non libera-
bunt. 287

Cap. 6. v. 56. Non a furibus, neque latronibus
se liberabunt. 291

LIBER EZECHIELIS.

Cap. 8. v. 3. Ubi erat statutum Idolum Zeli ad
provocandam emulationem. 296

Cap. 8. v. 14. Et ecce! ibi mulieres sedebant
plangentes Adonidem. 298

Cap. 8. v. 16. Adorabant ad ortum Solis. 302

Cap. 8. v. 17. Ecce! applicans ramum ad nares
suas. 309

Cap. 21. v. 2. Commiscens sagittas. 313

Cap. 21. v. 21. Extra consuluit. 316

Cap. 28. v. 14. Imagines Chaldaeorum expressas
coloribus. 322

Cap. 26. v. 11. Stagna tua nobiles in terram cor-
rumpent. 325

LIBER DANIELIS.

Cap. 1. v. 8. Proposuit autem Daniel in corde suo, ne pollueretur de mensa Regis, neque de vino potus ejus. 334

Cap. 2. v. 17. Præcepit Rex, ut convocarentur Arii, Magi, Malefici, & Chaldaei. 337

Cap. 5. v. 4. Ebebant vinum, & laudabant Deos suos. 342

Cap. 14. v. 2. Erat quoque Idolum apud Babylonios nomine Bel, & impendebantur in eo per dies singulos simila Artabæ duodecim, & oves quadraginta, vinique amphoræ sex. 346

Cap. 14. v. 22. Erat Draco magnus in illo loco, & colebatur eum Babylonii. 352

LIBER OSEÆ.

Cap. 4. v. 12. Populus meus in ligno suo interrogavit, & baculus ejus annuntiavit ei. 358

Cap. 4. v. 13. Super capita montium sacrificabant. 363

--- Et super colles accendebant Thymiama. 366

Cap. 10. v. 5. Vaccae Beshaven coluerunt habitatores Samaria. 374

Cap. 11. v. 11. Et volabunt quasi avis ex Ægypto, & quasi columba. 377

LIBER AMOS.

Cap. 6. v. 10. Et tolles eum propinquus suus, & combures eum, ut efferas ossa de domo. 381

Cap. 8. v. 14. Qui irantur in delicto Samaria, & dicunt: Vivis via Bersabea. 386

LIBER MICHEÆ.

Cap. 5. v. 13. Evellam Lucos de medio sui. 389

LIBER HABACUC.

Cap. 1. v. 16. Propterea immolabis sagena sua, & sacrificabis reti suo. 399

Cap.

Cap. 2. v. 18. Ut facerent simulacra muta. 401

LIBER SOPHONIAE.

Cap. 1. v. 4. Disperdant reliquias Baal, nomina
adversariorum cum sacerdotibus. 404

Cap. 3. v. 4. Propheta eius resanabit. 410

LIBER ABDAE.

Cap. 1. v. 18. Non erunt reliquiae. Septuaginta
Interpretes: Non erit πυροφόρος. 414

LIBER AMOS.

Cap. 4. v. 8. Super vestimentis pignoratit accu-
buerunt iuxta omne altare. 418

--- Vinum damnatorum bibebant. 422

LIBER I. MACHABÆORUM.

Cap. 1. v. 15. Ædificaverunt Gymnasium in Je-
rosolymis secundum Leges Nationum. Et Lib.
2. Machab. Cap. 4. de Jasone: Ausus est
sub ipsa arce Gymnasium ponere. 423

Cap. 3. v. 48. Expandemus Libros Legis, in qui-
bus scrutabantur Gentes similitudinem simila-
crorum suorum. 428

LIB. II. MACHAB.

Cap. 1. v. 13. Cecidit in templo Nannæ consilio
deceptus Sacerdotum. 441

Cap. 4. v. 13. Misit Jason facinorosus argenti
didrachmas trecentas in sacrificium Herculis.

445

Cap. 6. v. 7. Cum Liberi sacra celebrarentur,
cogebantur hedera Libero circuire. 453

Cap. 4. v. 33. Ipsæ (Onias) in loco suo se
continens Antiochiæ secus Daphnem. 463

EVANGELIUM MATTHÆI.

Cap. 9. v. 23. Cum venisset Iesus in domum
Principis, & vidisset tibicines. 471

ACTA APOSTOLORUM.

Cap. 7. v. 43. Suscepistis Tabernaculum Moloch,
& si-

& fides Dei vestri Rempham.

477

*Cap. 14. v. 11. Vocabant Barnabam Jovem ,
Paulum vero Mercurium.*

479

*Cap. 14. v. 12. Sacerdos quoque Jovis, qui erat
ante civitatem, sauros, & coronas ante januas
afferens cum populis volebat sacrificare .*

482

Cap. 17. v. 23. Ignoto Deo.

489

Cap. 19. v. 28. Magna Diana Ephesiorum.


496

*Cap. 15. v. 29. Ut abstineatis vos ab immolatis
simulacrorum, & fornicatione.*

506

F I N I S.





17

003654901

